

The Ohio State University



3 2435 00711 0943

DR569A351902

Vak'a-y Sultan Abdulaziz / 001

LIBRARY
OHIO STATE UNIVERSITY

A NOTE TO THE READER:

Because of its value and condition,
this volume has been microfilmed to
preserve its content.

Please check the Libraries' catalog
for location of a copy of that
microform.

Thank you,
The Preservation Office

4/28/1993
D8

وقف سلطان عبدالعزیز

محرری
احمد صائب

فیثاتی پوستہ اجرتیلہ برابر اوچ فرانقدر.
هر حقى محفوظدر.
مصرده طبع اولنمشدر.


۱۳۲۰

DR569


A35

1902

وقعہ سلطان عبد العزیز



فہرست



مقدمہ

وقعہ خیریہ و نتیجہ

سلطان سلیم ثالث — سلطان محمود — اصلاحات تشبثاتندہ کی
مشکلات — سلطان عبدالمجید — وکلای زمان : رشید، عالی و فؤاد
پاشا — اختلالات داخلہ و قریم محاربہ سی — اصلاحات عمومیہ
کورینن احوال غیر مطلوبہ — معارفک نشر و توسعیندہ کی تکامل —
تنظیمات و تشکیلات عسکریہ دہ کی نواقص و بونک اسباب و منشائی —
مالیہ — دولت علیہ دہ برنجی دفعہ اولہ رق استقراضہ مراجعت —
وفات سلطان عبدالمجید —

— سلطان عبدالعزیزک اوائل سلطنتی —

جلوس سلطان عبدالعزیز — پادشاہک برنجی تشبثات حسنہ سی
— باب عالی و سرای — فؤاد پاشانک ایلاک صدارتی — صدارت

کامل پاشا و پادشاهک مصره سیاحتی — فؤاد پاشانک ایکنجی صدا —
رتی — بودورده کی اسرافات — محمد رشیدی پاشانک صدارتی —
اغتشاشات داخلیه —

— سلطان عبدالعزیزک اواسط سلطنتی —

عالی پاشانک صدارتی — سلطان عبدالعزیزک اوروپایه سیاحتی —
صدر اعظمک حسن اداره سی — وفات عالی پاشا — او وقتہ قدر
اجرا ای دیلان بعض اصلاحات — ولایت نظامنامه سی — شورای
دولت تأسیسی — نافعہ ایشلرنده کی بعض تشبثات — جهت عسکریه
— احوال مالیہ —

— اوروپا و دولت علیہ —

فتوحات عثمانیہ حقنہ بعض ملاحظات — ممالک محروسہ ده
عناصر خرسیتیانیہ — یاوز سلطان سلیمک بونلره قارشى تشبثاتی —
قارلوفجه معاهده سند نصرکه دولت علیہ نک انحطاطی — روسیہ نک شرقه
تعرضى — بو دولتک احوال تاریخیہ سی — مشهور دلی پترو و بونک
دولت علیہ ایله ایتدیکی محاربه لر — بو ذاتک وصیت سیاسیہ سی —
دولت علیہ نک اوروپا حکومتلری طرفلرندن صیاتی — قریم محاربه —
سند نصرکه تجدید قوت ایچون روسیہ ده کی غیرت — پان اسلاویزم
(اسلاو اتحادی) فکر و مسلکک مبادی ظهوری — بو جمعیتک
خط حرکتی —

— سلطان عبدالعزیزك اواخر سلطنتنده —

کورینن سوء اداره

خاندان آل عثمان — شهزاده لرك تربیه لری حقنده بعض ملا -
حظات — پادشاهك اواخر سلطنتنده مقام صدارت — محمود ندیم
پاشانك صدارتی — مدحت پاشانك صدارتی — حسین عونى پاشا
و بونك جهت عسکریه یه اولان خدمتی — احوال مالیه —

— سرای و روسیه سفارتی —

دور انحطاطده وکلای عثمانیه — روس سفیری جنرال اغناتیف
— محمود ندیم پاشانك بو ذاتله اولان مناسبتی — سلطان عبدالعزیزك
روسیه سیاستنه میلی — تبدیل وراثت مسئله سی — بو خصوصده
پادشاهك بعض تشبثلری — جنرال اغناتیفك بومسئله یه علاقه سی —
اغناتیفك دیگر انتریقه لری — روم و بلغار کلیسالی —

— ممالك محروسه ده ترقیات فکریه —

وقعه خیریته نك معارف و ادبیات عثمانیه یه تأثیرى — مكاتب متنو -
هنك تأسیسی — ممالك محروسه ده برنجی غزته — مطبعه جیلانك
توسیع و تزییدی — مطبوعات نظامنامه سنك وضعی — بونك نشریاته
اولان تأثیرى — مصطفى فاضل پاشا و پارسده ایلك احرار عثمانیه —
احرارك ممالك محروسه یه عودتلیرى — ضیا پاشا، نامق کمال بك، علی
سعاوی افندی و ذوات سائر —

— سیئات عبدالعزیز —

ممالك محروسه احوال عمومیه سنده کور پن سیئات — اداره
مطلقه تحتنده اداره اولنان مملکت — دور ترقی و دور انحطاطده کی
پادشاهلر — سلطان عبدالحمید و سلطان عبدالعزیز — سلطان عبدالعزیز
العزیزده کی عظمت و تکبر — سرایلیر — پادشاهک اسرافاته اولان
میلی — مصر و بوقطعه یه و یریلن امتیازاتده کی سوء استعمال — خزینہ
خاصه و بوکا دائر ایستاتستیق —

— احوال وکلا و مسلك مدحت پاشا —

پادشاهک اواخر سلطنتنده مرکز حکومت — وکلا ی عثمانیه نک
مسلك سقیملری — مدحت پاشا — پادشاهک خلعی ایچون مشارالیه
حضر تلرینک شیروانی زاده رشدی و حسین عوننی پاشا لر ایله برنجی
اتفاقلری حقنده کی روایات — مدحت پاشانک علما ایله اولان مناسبتلری
— انتظار مستقبل —

— اغتشاشات داخلیه و مشکلات خارجیه —

سیئاتک تشددی — محمود ندیم پاشانک ایکنجی صدارتی —
روسیه نک بوزمانده کی سیاستی — جنرال اغناتیفک انتریقه لری —
بوسنه و هر سگده عصیان — عصیانک داخل و خارجه اولان تأثیر —
قوت آندراسه نک برنجی نوطه سی — استانبولده هیجان افکار —
پرنس غورجا قوفک نوطه سی —

— صوفته لر وقعه سی —

مدحت پاشانك خط حرکتي — حسين عونى پاشانك بعض
احوالى — بو ذاتك اداره دن عدم ممنونيتنه خدمت ايدن اسباب —
پرنس غورجا قوفك نوطى اوزرينه استانبولده غليان افكار — صوفته -
لرك فاتح جامع شريفى جوارنده كى اجتماعى و بونلرك باب عالى يه طوغرى
حركتلىرى — بونلرك حكومتدن طلب ايتديكى مواد — سرايك تردد
و توسوسى — بك اوغلانده دول اجنبيه قونسلسلرينك اجتماعى —
عزل محمود نديم پاشا و حسن فهمى افندى و نصب محمد رشدى پاشا
و خيرالله افندى — وقعه نك اوروپاده عكس تاثيرى —


— اسرار خلع حقنده بعض ملاحظات —

خلع سلطان عبدالعزيز حقنده بعض ملاحظات — خلعى قوه
عسكرىه ايله موقع اجرايه كتورمكه قرار و يرلديكى — سليمان ورديف
پاشالر — تشبثات خلعدن صدر اعظم و شيخ الاسلامك امتناعلىرى
و صكره بالرضا موافقتلىرى — قيصرلى احمد پاشا و ديكرلىرى — وقعه
كيجه سى محمود نديم پاشا، جنرال اغنائيف و سلطان عبدالعزيز —

— سلطان عبدالعزيزك خلعى —

خلع كيجه سى بشكطاش طرفى — سليمان پاشانك مكتب حربيه يه
مواصلتى و بونك طرفندن ضابطانه ايديلن نطق — مكتب حربيه نك

بشکطاش سراینه حرکتی — مواصلت حسین عونى پاشا و تشبثات
خلع — سلیمان پاشانك دائره سلطان مراده دخولى — سلطان مرادك
طیشاری چیقمه دن امتناعی — احوال سلطان عبدالعزیز —



— ❧ مقدمه ❧ —

مقصدم، سلطان عبدالعزیز مرحومك تاريخ سلطنت و حکومتی بتون عنعنہ و تفرعاتیله تفصیلاً و توضیحاً یازمق دکلدر. بوکی تشبثات حد اقتدار عاجزانه مدن خارج اولدیغی کی فکر مجه شمیدیلک بو امر مهمی وجوده کتورمك دخی ممکن دکلدر. چونکه عصر مزده تاریخ یاز- مق بر چوق موادك وجودینه وابسته اولوب از جمله زمین اتخاذ اولنه حق دور حقنده سرمایهنك کثرتلی بر مقدارده بولمنسنه و بالخاصه موضوع بحث اولان وقایعك دقایق و شعباتی آیری آیری ضبط و نقل ایدن آثار و تألیفاتك اولجه موجود بولمنسنه متوقفدرکه شو تسهیلات میدانده اولمق سزین بر تاریخ مکمل یازمق تشبثك مطلوب اولان نتیجه یی ویره- میه جکی ارباب وقوفه معلومدر.

بزده ایسه تاریخ عثمانینك هانکی دورینه عائد اولورسه اولسون، بوکی اثر و مأخذلرک عددی پک آزدر. یقینده استکمال ایدیله جکنه دخی علامتلی یوقدر. اوروپایه کلنجه واقعاً اوراده ممالک محروسه نك احوالنه بالخاصه دور جدیدینه عائد پک چوق تاریخلر نشر ایدلمشسه ده بر مؤرخ ایچون بوتألیفات کافی صاییه مز. چونکه بر چوقلری طرفگیرانه و احوال و معیشت عثمانیه یه وقوف سز لقله یازلمشدر. دیگر طرفدن بر درجه یه قدر امنیت ایدیله جك نشریات اوراده دخی نقصاتدر. مثلاً صوک دورلرده ممالک محروسه ایله کیتدکجه معاملات سیاسی سی جدیت

کسب ایتمکده اولان دول اجنبیه سفارتلرینک کندی حکومتلرینه اعطا ایتدکری راپورلرک جمله سی اورتیه قونلمه مشدر. حالبوکه دور جدید تاریخ عثمانیسندن بر حادثه مهمه یی لایقی وجهله تنویر ایتمک ایچون بو رسمی راپورلردن صرف نظر حتی اخبارات خفیة سیاسیة و مکتومه لرینه دخی کسب وقوف ایتمک لازمدرکه آنجق بوسایه ده موضوع بحث بولنان موادک اطرافلیجه تدقیقات ولایقی وجهله احاطه سی ممکن اوله بیله جکدر. حقیقت حال بودر. مع هذا سالف العرض اسبابدن طولانی تاریخ جدید عثمانیدن بر وقعه حقنده صوک سوز اولق اوزره شمدیلک بر اثر مکملک تألیفیه میدان انتشاره قونلمه سی ممکن اولماقوله برابر بو طریقده بر آدیم آتمق هر حالده فائده دن حالی عد ایدیه من. شو جهتله ایدیلان غیرت پک بیوک فوائدی اعطا ایده جکی دخی شبهه سزدر. چونکه بو کون اورتیه ده موجود معلوماتله شمدی یه قدر مستور قالان بر چوق حقایقی میدانه چیقارمق، و حادثات متسلسله یی بر برینه ربط ایتمک و بو صورتله تاریخ عثمانینک ماضی یه قارشمش بر وقعه مهمه سابقه سی نسیانندن قورتاروب قارئین کرامه شمدیدن دوغری بر فکر ویره پیلمک ممکندر.

سلطان عبدالعزیز مرحومک دور سلطنتنه کلنجه اوروپاده بر قاچ دانه بزده دخی اورتیه قونمش تک بر اثر وارددر. بونلر واسطه سیله مشار الیه حضرتلرینک زمان حکومتی و علی الخصوص اک صکره دوجار اولد. قلمری احوال مؤسفه یی بر درجه یه قدر تنویر ایتمک ممکندر. بالخاصه بزم ایچون بو صوک تکلیف غایت مهمدر. چونکه بو اثر محرر شهر

احمد مدحت افندی حضرتلرینک مخصوص قلمی اولوب مشار الیه
حضرتلری وقعہ بی عیناً کورمش و بوایشه اشتراک ایتماش ایسه بیلہ
فاعلمردن بعضیلرینک قریبتندہ بولمشییدی . بوسبب اثر مذکورک
قیمتی نظر مزده قات اندر قات آرتدیر مقده در .

فی الحقیقه بواثر یعنی « اس انقلاب » شو وادیده یازیلان اثرلرک
اک مهمیدر . بشقه بر محیطده یازماش اولسه ایدی اثرک قیمتی ده ازیاده
اوله جغنه دخی شبهه ایدلمز ایدی . فقط نه فائده سی وارکه تألیف مذ-
کور علی روایة پادشاه زمان اولان ذاتک امری و تعیین ایلدیکی پروغرام
اوزرینه و حدود دائره سنده ده ا طوغریسی مخصوصاً اراثة ایدیلن
طرزده یازلمشدر . بوسببدن کندیسنه تمامیلہ امنیت ایدلمک ممکن دکلدیر .
همان هر سطرندہ مقصد معین تعقیب ایتمکده اولدیغنی لدی المطالعه
کوسترمکده در .

شو حاله تأسف ایتماک ممکن دکلدیر . چونکه وقعہ عزیز کبی تاریخ
عثمانیده غایت مهم بر فصلی تشکیل ایدن بر حادثہ سیاسیه نک بیطرفانه
یازیلوب و حقیقت حال نه ایسه میدانہ قونمسنه شدتله احتیاجمز واردر .
یشادیغمز شو دور مدهشک وقعہ مذ کوره ایلہ مناسبت و رابطه سی پک
زیاده اولدیغنی حالده بو وقعہ نک ظهور و منشائی حقنده یکدیگرینه مبین
و مخالف فکرلر اورته ده دوران ایدوب طور ییور . بعضیلریمز بو زمانده
اوغرا دیغمز مصیبت وفلاکت وچکمکده اولدیغمز بلالری وقعہ مذ کو-
رنک نتیجه طبعیه و قطعیه سی عدا ایلیمکده دیکر لریده بو وقعہ نک یوم ظهور-
رینی ترقیات فکریه عثمانیه ایچون بر تاریخ ابتدا واستقبال عثمانیچون بر نشانه

نجات و خلاص اولق اوزره تلقی ایتمکده در .

هر نه حال ایسه سویلدیکمز شو مواد دخی دور سلطان عبدالعزیز
حقنده یکی بر اثرک وجودینه دائر اولان احتیاجی تشدید ایدیور . بز
شو مقصدی ایفا ایتک دکل یالکمز مؤرخین مستقبله مزه یول آچق ،
بونلرک غیرت و همماتی نه طرفه طوغریله جغنه استقامت اراؤه ایتک اوزره
شو اثر عاجزانه مزی اورته یه قویمغه قرار ویردک . کتابمزده بعض موا-
دی برنجی دفعه اوله رق تنویر ایتدیکمز کی اولجه معلوم اولان وقایعک
تفصیلاتنی ، محاکمات عمومیه سنی دخی بیطرفانه یوروتدک ظن ایدرز .
بونکله برابر ، موضوع بحث اولان بر ماده ده تنویرات و ملاحظاتمز
ارائه و بیان ایتدیکمز صورتده اولدیغنی ادعا ایتیورز . مأخذلرک مفقو-
دیت و عدم کفایتی خصوصاً معلومات رسمیه نک عدم موجودیتی برقاج
خطالرک تولدینه میدان ویره بیلمسی ممکندر . شو قدرکه بزم اصرار
ایتدیکمز بر ماده وارسه بوده ایلرویه سوردیکمز محاکمات و ملاحظات
غرضدن عاری ، صفوت قلب و خلوص نیته مبنی اولمسی قضیه سیدر .
واکر قارئلریمز بوماده یی تصدیق ایدرلرسه کتابک نشرندن انتظار
ایدیلن مقصد ، بزجه حاصل اولمش دیمکدر .

ومن الله التوفیق

احمد صائب

۲۰ کانون ثانی سنه ۱۳۱۹



وقعه خیریه و نتیجه

سلطان سلیم ثالث — سلطان محمود — اصلاحات تشبثاتندہ کی
مشکلات — سلطان عبدالمجید — وکلای زمان : رشید ، عالی و فؤاد
پاشا — اختلالات داخلہ و قریم محاربہ سی — اصلاحات عمومیہ دہ
کورینن احوال غیر مطلوبہ — معارفک نشر و توسعیندہ کی تکاسل —
تنظیمات و تشکیلات عسکر یہ دہ کی نواقص و بونک اسباب و منشاءئی —
مالیہ — دولت علیہ دہ برتجی دفعہ اولہ رق استقراضہ مراجعت —
وفات سلطان عبدالمجید —



بيك سنہ ہجریہ سندن صکرہ عثمانلی پادشاہلری ایچندہ غیرت و
اجراآت ایلہ فوق العادہ بر موقع مخصوص قزانمش اولان پادشاہ سلطان
سلیم ثالث حضر تلری در .
دولت علیہ نک او زمانہ قدر ادارہ سی چوروک ، بتون ممالک محروسہ
باشدن باشہ معرکہ فجایع بر حالہ ایکن سلطان مشارالیہ ، جدی و
صمیمی بر انقلابہ بذل ہمت و غیرت ایتدی . اصلاحات عمومیہ مکملہ -
نک حیز آرای حصول اولسی ایچون ابدالندن کری طورمدی . فقط
بونجہ غیرت فداکارانہ ، پک بیوک موانعہ تصادف ایتدی . چونکہ
اصلاحاتک نتیجہ طبیعیہ سی بالآخرہ کندیلرندن حساب صورمسنی ،
ومنفعتلرینہ سکتہ ویرمسنی پک مأمول کورن ، رجال دولتدن چوقلری
اسکی ادارہ یہ استنادکاه طبیعی بولنان ، فقط بر چوق زماندنبری عسکر

اولمقدن زیاده یاغمجا جیلق وادیسندہ اولان یکیچریلری آل آلتندن قیشقیرتہ رق ، مانع اصلاحات اولمق طریقہ سوق ایتمکدن بر آن حالی قالدیلر . اک صکرہ بویولده فضل و عرفانی ، زهد و تقوایی ایله عثمانلی پادشاهلری آره سندہ ملتک حرمت و ابجانی پک زیاده قزانمش اولان سلطان سلیم ثالث خلعی و شہادت کی فجیعہ لرله صحیفہ تاریخ عثمانی بی قرہ لدیلر .

سلطان محمود خان حضرتلری دخی دور سلطنتلرینک اواسطنہ قدر اومانعہ عظیمہ نک مشکلاتی ایچندن قورتولامدیلر . مقصود معنای وطنپوری بی اجرادن عاجز قالدیلر .

فقط بیک ایکی یوز قرق بر تاریخ هجری ذی القعدہ سنک طقوزنجی کونی خروج علی السلطان نیتیلہ آت میدانہ طوپلانان یکیچریلری بر کونده محو ایدرک وقعہ خیریہ بی وجودہ کتوردی . و بو عزم عالیہمتانہ ایله دولت علیہ عثمانیہ تاریخندہ بر بدر مشعشع رسم ایدرک وطنی انقرا . ضہ سوق ایتمکدن بشقہ بر ایشہ یارامیان اولکی اداره دن صرف نظر اولندیغنی بوندن صکرہ عصر و زمانہ موافق بر اداره تشکیلی ایچون جدی اصلاحات داخلیه تشبث ایدیلہ جکنی عالمہ کوستردی .

بو حقیقہ اولان شاهانہ تشبث کرک داخلده و کرک خارجده پک بیوک تأثیراتی موجب اولدی .

اوروپالیلر اوتہ دنبری شرق اہالیسنک احوالہ لایقی وجهلہ واقف اولہ مدقلرندن ملت عثمانیہ و دولت علیہ حقندہ بر طاقم افکار باطلہ و جاهلانہ ایدنمش اولملری جتیله ترکلرک مدیت حاضرہ اقتضاسندن اولان

اصلاح و تنظيم امور مملكتته عدم استعدادلرني قوياً ذهنلرينه يرلشدير.
مش بولنيورلردى. حالبوكة وقعة مذ كورەنك قولايقله فعله كلمسى و
اصلاح ادارهيه قطعياً ممانعت كوسترن دهشتلى يكيچريلرك آرتق نابود
و محو ايدلمسى و بونى متعاقب اوروپادن دولت امورينه واقف اصحاب
اقتدار جابى حكمانك و ديپلوماتلرك عقللرينه براز طورغونلق ويرمش
وپك چوقلرينك تركلر حقنדה ايدنمش بولندقلرى سوء نظرك تبديلنه
خدمت ايلمككە برابر برطاقملرينك ده جالب خوف وتلاشلى اولمشدر.
بوصوك طاقمده بولنان ذواتك مطالعەلرينه كوره دولت عليهك
ادارهسى اوروپا اصولنده تنظيم ايديلير و تركلر يئىندە مدنيت حاضرەنك
اس اساسى بولنان علوم و فنون متنوعه تعميم اولنورسە ذاتاً دين مابين
اسلامك الهامات قطعيه سندن بولنان قوۋۋ معنويه و اقتدار عسكريهك
عثمانلى دولتى ازهر جهت شەراە ترقيده ايلرى كوتورمى و آزر زمانده
دولتە اسكى شان و شهرتى اعاده ايدرك بو حالك اوروپا موازنە سياسيه سەنە
دخى اجرأى تاثير ايتمى پك محتمل كورونور ايدى.

داخلده ايسە پادشاهك تشبثات جديدە و خيريهسى عموم اھالىنى
تلاشە دوشورەرك ملتى احوال مستقبلة ايچون پك مايوس ايتمش ايدى.
چونكە ايكى اوچ عصر دنبرى اغتشاش ايچىندە يووارلانان اسكى اداره.
نك نتايج سيئاتى تماماً بوزمانده ميدانە چيقدى. ولايتلرده متوالى
عصيانلرى موجب اولدى. بيتىمز توكنىمز غائلەلر جنتىمىكان مرحومى
بحق بيزار ايتدى. مأمورين و رجال دولتك قسم اعظمى بيله يكيچر.
يلرك ظلم و زورندن پك زياده اوركمش و بيقمش اولملرينه رغماً پادشاهك

مقاصد اساسيه سنی یعنی تنظیم امور و اصلاح اداره اوروپا اداره سینه
تقلید اولنه جغنی حس ایدرک ای اولسون فنا اولسون تعصب سوقیله آبا
و اجداددن کوردکلری اصول تعیش و اداره دن انحرافی ایسته مزله
و طریق جدید کیتمکدن اجتناباً پادشاهدن آچیقندن آچیغه شکایتده
بولنورلر ایدی . بر وقت ایش اودرجه یه گلش ایدی که : خنکارده متا-
نت و بر قاچ ارکان حکومتده شدت کورونمسهیدی اهالینک عصیانه
قدر جسارت ایتسی بعید دکل ایدی . فقط آت میداننده وقوعه کلان
قانی قتال اولانجه دهشتیله هر کسک کوزی اوکننده بولندیغندن خروج
علی السلطان کی بر حرکتیه جسارت ایده جک آدم استانبولده قالماش
ایدی .

خلاصه بیک مشکلات ایله اولسون جنتمکان سلطان محمود خان
حضرتلری انقلاب جدی وجوده کتیرمه موفوق اولدی ، و اداره دولته
تمانی جدید و قوی بر صورتده وضع ایتدی . بوندن صکره اوله جق
حرکتک ایدیله جک همتک کافه سی باشلوجه سی آتیلان تملک بنایی ایدی که
اوده ممالک محروسه عثمانیه نك حسن اداره سی ضمنتده وضع و تأسیس
اولنه جق قوانین جدیده نك مواد سیاسی اولان امنیت مال و جان
و محفوظیت عرض و ناموس و تفرعاتی و تعیین و یرکی ترتیب عسکر و سا-
رهنك اجراسی کی تشبثات مهمه عمرانپرورانده دن عبارت ایدی .

سلطان محمود زماننده وجوده کلان اصلاحات عمومیه اساساً ایکی
ماده دن عبارتدر : بری نظام عسکری تأسیسی دیکری قیافت عثمانیه یی
دکیشدیرمک قضیه سی اولوب بوصوک ماده هر نه قدر اهمیتسز کی

کورونور ایسه ده او دورک اها ایسنده موجود اولان جهالت و تعصبک و اوروپا اصول تعیش و اداره سنه قارشى بسله نن نفرتک درجه سى نظر ملاحظه یه آندینی حالدہ بواصلاحاتک اجرا سنده نه قدر ممانعتہ تصادف اولندینی قولایاقلمه آکلا شیلیر.

دولتک اداره سنى انتظامه قویمق و سائر بالجمله اصلاحات مطلوبه یه چالیشمق قضیه مهمه سى اک اول مستعد و مقتدر مأمورین دولت یتشدرمکه و معارفک توسیع و انتشارینه خدمت ایلمکه وابسته بولنمقله بو جهت جنتیمکان مرحومک نظر دقیقانه لرندن اوزاق قالماش و همان بومقصود ایله برقاچ مکتب تأسیسی تحت قراره آلمش ایدی که : یالکز بوماده نام با احترام شاهانه لرنی الی الابد تقدیس ایتدیرمکه کافی موفقیات عظیمه دن معدوددر.

صکره لری فقط ینه او دورده دیگر اصلاحاته ده ممکن اولدینی قدر غیرت ایدیلیر ایکن بلافاصله عصیانلر ظهوری و داخلده موجود بولنان اغتشاشاتک اکسالمیوب آرمه سى و بعضاً خارج ایله ایدیلن محاربه لر احوال داخلیه یی تنظیم ایچون پادشاه مشارالیه حضرترلرینه وقت برقامشدر.

سلطان محمود خان عدلی حضرترلرند نصکره ، سلطان عبدالحمید خان جالس تحت سلطنت اولوب زمانلرنده عموم طرفندن طریق اصلاحاته بر میل مستحسن کورولمش ، او یولده غیورانه حرکت ایتک لازم بولنش ایکن اساساً اولدقچه اوزون سورن بودورده کلاخانه خط هایونی و برقاچ نظامنامه ایله اکتفا ، نقدندن ده یک قیمتدار اولان او زمان عزیز

سوء استعمال ايدلمشدر . بو تڪاسل و يا مسامحه ، پك چوق احوال . لك اجتماعي ضرورتيله وجود بولديغى ده منكر دكلمسه ده ، زمانك ايش باشنده اولان ذواتى مسئول طوتولق حقسىز دكلدر . چونكه : اوزمانك وقايع تاريخيه سنى كوزدن كچيرنلر ، پك قولاي آكلايورلر كه : يكرمى ايكي بحق سنه دوام ايدن مدته ، كرك پادشاه و كرك وكلا اورته ده اولان فنالغى و برطريق صلاح و ترقى يه كيرمك لزومنى تماميله ادراك ايتمشلر فقط بوبابده برفدا كارلق ؛ ولازمى قدر حيت كوسترمه مشلردر . يالكر سوء اداره دن طولاي اوته ده بريده ظهور ايدن اهميتسىز عصيانلر ك تسكىنى و برده محاربه ايله اوغراشمشلردر .

بو پادشاهك دورنده اولدقجه مستعد و كلا يتيشمكه باشلامش ايدى . بيوك رشيد پاشا و صكره لرى عالى ، فؤاد و سائر پاشالر مراتب عاليه نك اك يوكسك طبقاتنى اشغال ايدىيورلردى . بونلر ك اكثرى سلطان محمود خان حضرتلرينك يتيشديرمش اولديغى افكار منوره اصحابى و عصر ك احوال عموميه سنه بحق واقف ذوات ايديلر . فقط نه فائده سى وار كه : دولت عليه امورينك اك يوكسك مقامنده اوته دنبرى موجود بولنان احوال مؤله او زمان دخى اجراى احكام ايتمكه ده بولنديغندن بزجه اك قيمتلى واك نازك اولان او دورده هيچ بر ايش كوروله مديكنى مع . التأسف تذكاره مجبورز .

موجود اولان سوء اداره دن طولاي پاره سزلق ، ملتك ثروت و سعادتنى تشكيل ايدمك وسائطك فقدان درجه سنده ندرتى ، وقت وقت شوراده بوراده ظهور ايدن عصيانلر و تسكين عصيان ايچور ناچار

اختيار ايدىلن بيوك فداكارلار ، دولتك اولانجه قوتنى صرف ايتدير -
مكده ايدى . بو داخلى كشمكشلىر تائيريله ، دولتك وضعيت و حيثيت
خارجيه سى دخى بالطبع دوچار رخنه و تزلزل اولدى .

بو هنكامده ، اوتنه دنبرى ذاتاً قوى بر دشمنمنز اولان و ضعيف بر
گونمىزى بلكه يهرك كندى پوليقيقه سنى تطبيق اچون مترقب فرصت بولنان
روسيه ، شرق مسئله سنى چيقاردى .

ايشته : بويله جه قريم محاربه سى آچيلدى .

اكر بو محاربه ده ، كندى مقاصد و منفعت سياسيه لرندن طولايى
بزه دوست بولنان فرانسه و انگلتره دولتلىرى معاونتده بولنماش اولسه
ايدىلر ، دولت عليه مزك نه قدر تهلكه لره دوچار قاله جغنى بوكون تخميناً
بيله تعيين ايتك ممكن دكلدر .

بودولتلىر ، حقيقه بزه جدى معاونتلىر ده بولنديلر . دولتمزك تماميت
ملكه سنى ، او زمان اچون محافظه يه خدمت ايتدىلر . و بو واسطه ايله
اجراى اصلاحات اچون چوق زمان قزاندىلر . زيرا : بو محاربه ده
قطعى بر مغلوبيته دوچار اولمش بولنان روسيه نك ، آز بر زمانده باش
قالديروب ده يكيدين تعرضه باشلامسى ، امكانسز بر حاله كتيرلمشيدى .

او دورده جناب حق احوال عموميه مزى ، شو صورتله ، مساعد
و سالم بر وضعيتده بولنديردىغندن ، بزم اچون بر دها اويله بر تهلكه يه
دوشمه مك غيرتيله ، طريق تجدد و صلاحه كيرمك ، او سبيل سلامتده
بيوك آديملر آتقى ، شبهه سز بر قاچ سنه صكره بكيدن هجوم ايتمى بك
طبيعى و قطعى اولان شمال استيلاچيسنك اغراضنى تملندن ييقمق ،

بزرگه الزم اولديغنى تقدير ايتلى ايدك . قريم محارب سنده معاونت و
همتلى سبق ايدن او ، ايكي بيوك دولت دخى ، سفيرلى واسطه سيله
بو جهت مهمه و لازمه يى ، و لهمزده كى غيرت و همتلى نيك مجرد ، بو
جهته معطوف و مقصور بولنديغنى تبليغ و افهام ايتشلىردى . بوتبليغات
دوستانه دخى ذره قدر اهميتلى بر روى قبول كورمدى . دولتك اداره سى
محارب دن اول نه يولده و نه حالده ايسه ، ينه او يولده و او حالده
براقيلدى . سراى و وكلا كندى كيفلى نيه طالديلر . معضلات امور
دولت ايچون كيفلى نيه بوزمق زحمتنه كيرمديلر . بر هاى هوى صفادر ،
ميدان آلدى . دور مذ كورده نيچون ايش كوروله مديكى كيفيتك تفصيللا-
تنه كيرشمكه لزوم كورميور ايسه كده ، او زمان ايش باشنده بولنان ذوا-
تك يعنى : پادشاه و وكلا نك هانكى نقطه لرده ياكلش اولدقلى نيه مختصراً
اولسون ايضاح ايتكى فائده دن حالى كورميورز :

معلوم و مجربدركه : بر دولتك واصل اولديغى منزل قدرت ومكن
ملكندده موجود معارفك درجه ترقى و تعاليسيله متناسبدر .

هانكى ملت اولورسه اولسون ترقيات علميه و مدنيه سى بر درجه
عاليهيه واصل اولش بولنورسه ، او دولتك انتظام و قوتى ده او قدر
مكمل اولور .

بو او قدر طوغرى بر حقيقتدركه : نفوسجه زياده ، اراضيجه واسع
و مساعد ، فقط معارفدن محروم قالان جاهل بر ملت معارفله تنور
ايدم مدكجه ايكنجى درجه ده قاله جغنى ، روس ملتك تاريخيله دخى
اثبات ايتك ممكندر .

روسلر، اوروپا هیأت اجتماعیه سنک هر برندن چوق، و اراضیسی
دخی نسبت قبول ایتیه جک درجه ده واسع اولدیغی حالده، بو صوک
ایکی عصره یعنی: خوارق علمیه و فنیه بی بحق مدرک بر دلی پترویه
مالک اولنجیه، و اوسایه ده اوروپا مدینتی مملکتلرنده تطبیق ایدنجیه
قدر بین الدول نفوذ و اعتبار قزانمغه موفق اوله مامشاردر.

معارف حقنده نه قدر سویلنسه آذر:

معارفک، ملتک احوال و استعدادنده کوستردیکی تأثیر یک
بیوکر. انسانلر بو فضیلتیه مالک اوله مدجّه آللرنده بولنان اراضیدن
لایقی وجهله استفاده ایده مزلر. ملت، عدل و حقّه مقرون بر معامله
ایله مسعود قاله ماز.

هیچ بر شئیک حقیقتنه واقف اوله ماز. خلقة موجود ذمائم و
هوای خسیسه یه غلبه ایده مز. انسان ایچون اک مقدس اولان وطنک
قیمت حقیقیه سنی تقدیر مزیتندن محروم بولنور. اونک عندنده حریتله
اسارت یکسان اولور. دیگر ملتله اولان مناسبت و معامله سنده
تعصبدن قورتوله ماز. حمیت حقیقیه نه اولدیغی بیله مز. اک فناسی او
زوالی نصیبسر ملت، دیگر ملتلر نزدنده حرمت و رعایت قزانهمیه رق،
دائما هدف استهزا و حقارت، دائما اسیر و خدمتکار اولور.

حاصلی، معارفسز بر ملتده، منسوب اولدیغی دولتک، او حال
ایله الی الابد محافظه موجودیت ایده بیلمسی غیر ممکندر.

مسرودات واقعه دن یک قولای آکلاشیله بیلیرکه: سلطان محموددن
سکره کلن دورده، اک زیاده اهمیت ویریه جک ماده بر غیرت جدیه و

متمادیه ایله معارف و مدنیتك ملكده نشر و تعمیمنه خدمت ، الزم ایدی .
هیئات !... بو جهته هیچ ده اهمیت ویرلمدی ؛ باقلمدی . ظن
ایدلسین که : ملكده بو کون معارفك نشر و تعمیمی وطنی همان ساحل
سلامته چیقاریر ، فکرنده یز : خیر فکریمز ، و سویله مك ایستدیکمز
بودکدر . معارف ثمراتی درعقب ویرمز . دیدیکمز کی سلطان عبد-
المجید زماننده معارفه همت ایدیلیدی ، بو کون ثمراتی اقتطاف ایدیلهرک
سعادت مملکت امین بولنوردی . اوروپالیلرک معاونت لرندن بیله مستغنی
قالیردق . کندی احتیاجاتمزی کندی فابریقه لریمز ، کندی اعمالاتخا-
نه لریمز تهوین و تسویه ایدردی .

سلطان عبدالمجید دورنده اهمیت و برلمه ین یالکز معارف دکدر :
کلیخانه خط هایونیه رسماً اعلان و تبشیر ایدیلن ، و دولتک خیر
خواهلرینی ممنون و امیدوار براقان اصلاحات دخی ، موقع تطبیقه قونمه-
دی . یالکز کاغد اوزرنده قالدی . اورادن تاریخه کچدی . او قدر .
معارفدن صکره ، شایان اهمیت عظیمه اصلاحات عدلیه ، صکره
و بلکه دهها اول تربیه و تعلم شهزادگان . بونلرک اثبات الزمیتلری
ایچون سوز سویله مک فضله در .

بو جهات مهمه نك تأمین ایچون اوروپادن واقف ذواتک جابی ،
اونلرک عرفان و اقتدارندن استفاضه ، احوال ضروریه دن ایدی . بو
نقطه یه اصلاً بر لحاظه همت آتیلما دی . بر درجه یه قدر اهمیت ویریلن
جهت ، حربیه نظارتی ایدی .

سلطان محمود زماننده ، و دهها صکره لری اوروپادن جلب اولنان

بر قاج ضابط ؛ فطرةٔ عسکر يارادلمش اولان دولت عليه اردولرني بر درجه يه قدر تنظيم ايتديلر . بو زمانه قدر بزجه معلوم اوليان فنون جديدهٔ عسکريه . مکتب حربيّه مزده تحصيل اولمغه باشلادی . نه فائده که : باشده بولنديريلان اصحاب امورک تعصب و غروری (ترقی و تعالی) کله لرینک مفهوم معتناسنی حقیله ادراک ایتلرینه مانع اولدی . فنون و ادبیات حربيّه نک يالکمز مقدماتنه هنوز واقف اوله بیلدکلری حالده ، دورهٔ کمالات عسکريه يه واصل اولدق ؛ توهمیه ، پی درپی مکتبک پروگرامنی توسيع و تنظيم ايدرك ، تجدد و ترقیات فیه دن علی - التوالی نصیبدار اولمق جهتنی قاله المادیلر .

بو تسامح مغرورانه نک ترقیات عسکريه مزه او درجه سوء تأثیری اولدی که : او وقت ، عرض ایتدیکمز کبی ، مکمل تحصيل کورمش ضابطانمز بولمديغندن ، و تحصيلدن پک چابق استغنا کوسترلديکندن فنون عسکريه حاضره نک ضابطان و اردولر اوزرنده تعمیماً تطبیقی ایچون بو کون ، یکیدن اجنبی معلملرینک جالبه احتیاج شدید حس اولمقده . در . بوشونکه ثابتدرکه : دهاکچن سنه ، یعنی مکتب حربيّه نک تأسيسندن آلتش سنه صکره ، تقسیم اراضی فنی ایچون فرانسه دن معلم ضابط جلب اولمشدر .

بوراده شایان ذکر و انتباه بر ماده وارایسه اوده : روسلر بوندن ایکی یوز سنه اول ، سلطان محمود دورنده کی حالمزه مشابه بر درکه ده بولمشلر ایکن ، ایمپراطور بیوک پترو ، دولتنی تسعید و اصصاد غیرتیله اصلزاده لرك اعتراضلرینه اعتبار ایتیه رك ، پک چوق اجنبی معلملر ، و

ایش بیلر آدملر جلب ایدرک ، مملکتی تنسیق و تنظیمه چالیشمش ،
و اوتوز قرق سنه ظرفنده ادارهیه واقف ذوات یتشدیره رک ، آرتق
اجنبیلره احتیاجدن وارسته قالمش اولسیدر .

بز ، بومطالعه و عبرتی درمیانه ، او زمان دولتک ادارهسنی اجنبیلره
تسلیم ایتمک لازم و مصیب اولدیغی فکرند بولمق ایسته میورز . شونی
عرض ایتمک ایستیورز که : مادام که او وقت دولتک ادارهسنی و ترقیسنی
توثیقه قادر ، اصحاب معلومات یوقدی ، ابتدای امرده اوروپادن اهل
و ارباب ذوات جلب اولنه رق ، هیئت وکلانک لزوم کوردیکی موقعلرده
استخدام ایدملی ایدیلر . بو واسطه ایله بزده دخی یواش یواش آدم
یتشدیریه بیلیمش اولوردی . نلی پترونک انحاذ ایتدیکی اصول تطبیق
ایدیلرک ، بر چوق ذکی عثمانلی کنجلی اوروپا مکتبلرینه کوندرملی ،
محصل ایتدیرملی ایدی . بو صورتله پک آز بر زمانده دولتک هر شعبه
اداره سنده حرکات حاضره مدنیه و ترقیات کسترییه واقف ذوات قزانمق
پک طبیعی اوله رق کندی کندینه وجود بولوردی . بو مهمه ناز که او
زمان دوشونولش اولسهیدی ، بو کون اجنبیلردن استعانه و استفاضهیه
احتیاجدن قورتولش اولوردق .

هر نه ایسه ، کچمیشه تأسفله اسراف ایده جک و قتمز اولدیغندن
خلاصه سویلیه لم که : سلطان عبد المجید زمانده جدی برایش کو-
رولدی . نه یاپیلایسه هپ قبا ، وقوفسز تقلیدلردن عبارتدی . بو تقلید-
لرنده پک چوق فناقلری چکیلیدی .


اک برنجی ضربه مضره ، بحران و عدم انتظام مالیده کوروندی .

مالیه ده تأمین مکملیت ایچون برنجی چاره ، ملکه صنت و تجارتی
توسیع و تعمیم ایتک ایکن ، بزم او وقتک متفکر و کلاسی ، اروپا دول
مترقیه سنک ، عمیق حسابات اقونومیقیه نتیجه سنده مراجعت ایتدکری
« استقراض » اصولی « اصلاح مالیه » مقصدیله تقلید ایتدیلر .
اوروپانک پک چوق زنکین مملکتلرنده استقراض طریقله مالیه نک
سلامت و وسعتی جهتیه کیدلدیکی وارسه ده دیدیکمزکی حسابات عمیقہ اقونو-
میقیه نتیجه سی اولدیغی نظر ملاحظه یه آلمق لازمدر . حال بوکه او حسابلردن
برشی آکلامیان بر دواتده . بر درلو آکلاشیله میان مغالطات مبهمه نک
قراکقلری ایچنده ، نه ایچون اولدیغی حقیله بیله میهرک عقد ایدیلن ،
و بالطبع موضوع هلی بولنه میان استقراضلر پک مضر و عاداتی اهلکه لی اولور .
سلطان مجید دوری و کلاسی بونکات دقیقه بی حقیله آکلامدقلرندن
ویا خود آکلادیلر سه بیله ، نصلسه تهله کی کورمه مک ایچون کوز
یومق اعتیادنده بولندقلرندن اوروپا دولترلرینک « استقراض » اصولی
تقلیده برنجی دفعه اوله رق شتاب ایتدیلر . بوصورتله آچیلان دفتر دینک
یکونی کیتدکجه زیاده لشدی . او راده یه کلدی که : پادشاه مشار الیهک
صوک زمانلرنده ، دفترک صوک رقی اون میلیون لیرایه قدر واریوردی .
داخله ده قائمه او قدر بر کومه حاصل ایده جک قدر مبذول ایدی . بو
یکون و کومه ، واقعا ، دولت علیه کی خزینه لره مالک بر دولت ایچون
چوق کورولمه مک لازم کلیرسه ده استقراض واقعک تبذیر ایدلمه سی و
محتاج لهنه صرف اولنمی الزم ایدی . فقط او یله اولمدی . هپ استقراضلر
بی محابا اسراف و اهلاک ایدلدی . یالکز حضرت عبد المجیددن اخلاقنه
(۴)

« اوروپادن استقراض » بر بدعۀ مضره ، و قوجه بر دین دفتری میراث
قالدی که : بونک تکمیل مسئولیتی پادشاهه ، عصرک و کلاسنه عطف
ایدملک حقسز اولمز .


بو دورده تشبث ایدیلن دیگر اصلاحاته کانیجه : جهت عسکریه ده
(۱۲۶۰) تاریخنده نشر اولنان قانون عسکری ایله قرعه اصولی بر
مرتبه دهاتعمیم اولندی . عصرک موظفده بش ، ردیفده دخی یدی سنه
استخدامی قانون تحتته آندی . (۱۲۷۳) ده دخی استانبولده مطبعه
تأسیس ایدلدی . (۱۲۷۴) ده اراضی و جزا قانونلری اعلان اولندی .
که : ایشته سلطان عبدالمجید دورنده یاپیلمش اولان اصلاحاتک همان
جمله سی بو قدردن عبارتدر .

۱۲۷۷ ذی الحججه سنک اون یدیسنده سلطان عبدالمجید حضرتلری
قرق سنه عمر ، و یکرمی ایکی یچق سنه ده سلطنت سوردکن صکره
وفات ایتدی . یرینه برادری سلطان عبدالعزیز خان حضرتلری جالس
تخت سلطنت اولدی .



— سلطان عبدالعزیزك اوائل سلطنتی —

جلوس سلطان عبدالعزیز — پادشاھك برنجی تشبثات حسنہ سی —
باب عالی و سرای — فؤاد پاشانك ایلک صدارتی — صدارت کامل پاشا
و پادشاھك مصرہ سیاحتی — فؤاد پاشانك ایکنجی صدارتی — بودور-
دہ کی اسرافات — محمد رشدی پاشانك صدارتی — اغتشاشات داخلہ



خاقان مشار الیہ تاریخ ہجریٰ نیک (۱۲۴۵) سنہ سندنہ قدمہادۂ عالم
شہود اولدی . سلطان محمودك وفاتیہ بیوک برادری سلطان عبدالمجیدك
جلوسندنہ ہنوز اون یاشندنہ ایدی . تربیۂ عمومیہ سی خاندان عثمانیہ نك
صوک دورلردہ کی تربیہ لرینہ عائد اصول وقواعد موجبہ اجرا اولندی :
عمرینی سرایدہ حرم آغاری و نسوان آرسندنہ کچیردی . یاشی اپلرو-
لدکجہ سرای عادانی و جہلہ اہالینك کوزندن صاقلانمق ، و ہیچ برشیئہ
قاریشامق حالندہ بیودی . شو قدرکہ سلطان عبدالمجید خلقة ای بر
ذات اولدیغندن سلطان عزیزى ممکن اولدیغی و احوالک مساعدہ
ایتدیکی مرتبہ حر و سربست بولندیرردی . فقط سلطان عزیز ، پک
کوچوک یاشندنبری اوقومق و تحصیل عرفان و کمال ایتک جہتنہ قطعاً
التفات ایتہمش بولندیغندن ، او سربستیدن دہ احوال عالمی کورمک ،
آکلامق خصوصنہ ناچیز بر حصہ آیرمایوردی .

قوربغہ لی درہدہ یاپدیردیغی کوشکندنہ اکلنمک ، آوہ کیتمک ، و
کورشمک کی مشاغل خسیسہ ایلہ بتون او قیمتدار کنجلیکی

هوايه ویرمشیدی .

شبهه سز، مشار الیهک اخلاقنده ، صکره لری کورولن او یغونسز -
لقلرده فقدان تربیه و عرفانک بیوک بر تأثیر اولسی طبیعی ایسه ده
فطرتنده کی خود بینلک و خرچینلک ، ای بر تربیه آلمغه و تحصیل علم
و هنر یکانه مانع اولدیغی جای ملاحظه در .

شو حالیه برابر سلطان عزیز شهزاده کی زماننده اهالی بیننده پک
کوزل حسن نظر قزانه رق ، پک چوقلرینه امیدلر ویرمش ایدی .
بیوک برادری لطف و کرم صاحبی اولوب کیمسه نی رنجیده و تعذیب
ایتمک ایسته من ایدیه ده اداره دولته کوستردیکی عجز و مسامحه اهالی نی
بسبتون مایوس ایتمش ، و دولتی پک بریشان بر حاله کتیرمش ایدی .
بونک ایچون سلطان عزیزک طینتنده کی سرتلک و اطوارنده کی وضع قهرما -
نانه ، اهالینک قسم اعظمی امیدوار ایدیوردی . جلوس عقبنده مالک
بر شهره ترقی به کیره جکی ، خالقک مأمولی ایدی که : جلوس ایدر ایتمز
اداره ده آتیلان ایلمک آدیملر بو امید و تخمین تقویه ایده جک بر صو -
رتده چیقدی .

سلطان عزیز ، پادشاه اولور اولمز ، اول امرده سرایده موجود
اسرافات مبذوله نی قالدیرمه غیرت ایدرک ، اوراده پک بوشنه کلیتلی معاشلر
آلان حشراتک پک چوقلرینی دفع ایتدی . سرایده بولندیرلسی و دائماً
مبايعه سی معتاد اولان آلتون و کموش اشیایی و مجوهرات و سائر مزینات
یهوده نی کلیاً قالدردی . بوندن ماعدا نظارتلرده و خاصه سرعسکر قیو -
سندگی مأمورلر ایچون دخی ایجه مهم تنقیحات اجرا ایتدی . منفعت

ذاتیہ سنی منافع عمومیه فدا ایدہ جگنی فعلاً کوسترمک ایچون خزینہ
خاصہ شاهانہ نک وارداتندن اوچده بریسنی بیت الماله تسلیم ایدہ جگنی
اعلان ایتدی . ادوار سابقده پادشاهه تقرب ایدرک پک زیاده نفوذ
قزاقانوب ، علی التمادی دولتی متضرر ایدن و عموم اهلینک نفرتلرینی قزا-
نان بر قاق ذاتی ؛ مثلاً : پادشاه سابقک سوکیلیسی رضا و عثمان پاشالرله
عمر و حاجی مصطفی افندیلری و دها بر طاقلرینی سرایدن دفع ایتدیکی
کی خدمات عمومیه ده بولنان دیگر بعض وظیفه ناشناسلرده ایشدن ال
چکدیردی . شو اجراءات حسنہ ، اساساً جزئیاتدن عبارت ایدیسده
احوال عمومیه پک کوزل تاثیر ایدرک ، سیئات موجوده بی اولدجقه رفع
ایتمش ، و پادشاه حقنده اولان حسن ظن و محبتی تزید ایلیمش ایدی .
جميع زمانده دولتک اداره سنه قطعی صورتده تاثیر ایدن ایکی مقام
اولوب برنجیسی سرای ، ایکنجیسی باب عالی درکه : بونلر اوتہ دنبری بربریلہ
رقابت ایدہ کلمشدر . آنجق هر بریسی کندی حقوق و مسئولیتی دائره -
سندن آیرلمیه رق اجرای وظیفه عصمتی محافظه ایتدجکه رفاه و سعادت
اجتماعیه نک کسب امنیت ایتدیکی وعکسی حالک ایسه پک بیوک فناقلری
و فحرت و سفالتی منتج اولدیغی تجارب عدیده ایلہ کورولمش و بیلنمش
حقایقندر .

سلطان عزیز زمانک یکی سنه لرندہ ایلک آتش ترقی پرورانہ منطقی
اولور اولمز ، وظیفه ناشناسلق . سرای و باب عالی رقابت و ضدیتلری
درعقب میدان آله رق ، صاحب نفوذ و اقتدار بولنان وکلادن بعض
کار آشنالرله سرای بیننده شدتلی مجادله و مصادمه لر وقوعه کله جکی ذاتاً

نخمين اولنمش ایدی .

فقط او وقتلرده بر برینی پک آز فاصله ایله تعقیب ایدرک مقامه کلن صدر اعظم قبریسی محمد و عالی پاشا لر ایله پادشاهک مناسبتی ، سرای ایله باب عالی بی او نخمین اولنان حاله کتیرمه مش ایدی .

مشارالیهامدن برنجیسی خلقة ضعیف ، ومصرانه مقاومه غیر مستعد و ایکنجیسی اقتدار و قابلیت جهتیله سرایه موقعی بیلدیره جک اوصافه مالک و فقط دها پک یکی اولان پادشاهی بردنبره اورسه له مکی مناسب کورمز ، تانی ایله حرکتی اوفق عدایدر ایدی . بناءً علیه : بوزواتک صدارت لرنده سلطان عزیز غالبانه بر موقعده بولنمقده ایدیسده کیدرک بونلرکده حلم و سکونت لرنی ، ملاحظه مدبرانه لرنی احما ایتمکده ، شکا-یتلرنی آرتیرمقده ، باب عالینک حقوقی محافظه ایچون چاردرلر تحریرینه سوق ایتمکده ایدی .

بو سوائقی ضروریه و طبیعیه ایله ماهر ، مستقل و مسئول بر هیئت وکلانک الزمیتی نظرلرده عیان اولدی ؛ بوبداهتی مطلوب مرتبه تأیید ایدن فؤاد پاشا حضرتلریدر .

فؤاد پاشا معلوم اولدیغی اوزره سلطان محمود خان زماننده شهرت و لیاقتیله معروف کچه جی زاده عزت منلانک اوغلودر .

فؤاد پاشا حضرتلری سایه پدرده کوچو کدنبری کوزل بر تربیه آلمش ، او وقتلر پک نادر کوروله بیلن اوروپا تحصیلده پراسته بولنمش ایدی . مشارالیه غایت ذکی و مکتسبانیله ، بش آلتی اوروپا لساننه وقوف ایله تمیز اتمش اصحاب اقتداردن ایدی . مسلك دیپلوماسیده کی

و حاضر جوابلقدہ کی مہارتی آلآن مشہوردرکہ : بونی خاصۃً سیواستپول
محاربہ سی روزکارلرنده بسبتون میدانہ قویمشدہر .

مشارالیه افکارجدیدہ ، و ترقیات مدنیہ طرفداری ایدیسہدہ
دولتک صورت ادارہسندہ بر مسالک مخصوص ، و بر فکر متین صاحبی
بولنہ مامقدن ناشی سلیم و مؤثر بر طریق اتخاذ و انتخابندہ عاجزدی .
ادارۃ دولتک باہر اولان فناغنی صورتاً محو ایتک ، کندی ادارہ .
سنی پارلاق کوسترمک غیرتندہ بولمقلہ برابر حقیقی و جدی ، سلامت
ایچون کافی برمکانت و غیرتہ مالک دکلدی . فطرۃً آزادہ مشرب ایدی .
لاشک ، وطنک سعادت و عمرانی ازجان دل آرزو ایدردیسہدہ کندی
اقبالنی ، و طول مدت مقام صدارتدہ قالہرق اکتساب شان و شہرت
ایتمکی دخی پک سوردی . ایشتہ محافظۃ حقوق و استقلالی ایچون مقامہ
کتیرلمسی ایستہن صدر اعظم ، بویلہ بر ذات ایدی .

فؤاد پاشا مقام صدارتہ کلزدن اول دخی بیوک مقاملردہ بولنمش
ایدیسہدہ ، صدارتدہ سرایدن کلن و آردی آرمہ سی کیلیمہین جوشقونلغہ
اوزون بر مدت طیانیہمدی . بر طرفہ چکیلمکہ مجبور اولدی ، آنجق
بزددہ او صرہلردہ نسبتاً حائر تأثیر و اہمیت اولان مطبوعات ، و ہر
وقت قوتنی کوسترمکدہ بولنان نشریات اجنبیہ بتون سیئات عثمانیہنک
ازالہ سی ایچون فؤاد پاشانک صدارتہ کلنسندن بشقہ چارہ اولمدیغنی
یکزبان اولہرق باغیردیلمر . فقط بتون بو باغیرمقلر اوفق بر موفقیت
کوسترمدی . نہایت بو بابدہ انکلاترہ سفیرینک سرای نزدندہ اعمال
نفوذ ایتسی کارکیر تأثیر اولہ بیلدی . بورادہیہ قدر اوغراشیلمقلہدہ

انكلتره سفیری مداخله و التماس ایتدکجه بر شیئه موفق اولنه مامقلغك
یکانه سببی: پادشاهك، فؤاد پاشانك صدارتندن و ملحوظ اولان
مقاومتندن اورکمه سی و بو ملحوظات ایله مشار الیهی هیچ سومه مکده
اولسی ایدی.

فؤاد پاشانك صدارتی اوزون بر مدت دوام ایده مدی. چونکه:
مشار الیه مقسامه کلیر کلز، سرایك اداره دولته اولان نفوذ و تحکمی
اصلاً تجویز ایدهمیه رك همان منافذ تحکم واستبدادی طیقامغه سعی ایتدی.
بر سعی، زوال ناپذیر بر « باب عالی استقلالی » قزانه بیلمکه قدر
ثمره دار ایتك ایچون وکلا ایله دخی اتفاق ایدرك، ناچیز بر بهانه ایله
هپسینی استعفا ایتدیردی. بوندن مقصد، سرایی شو اتحاد متین ایله
تهدید ایتك، مداخلات کیفیه جوشقونقلرینی کوکندن ییقمق ایدی.
استعفا مسئله سی چوق کوزل دوشونولش، واک زیاده بر رد
ائلاجویانه احتمالی نظر اهمیتته آلمش ایدیسه ده، شو حساب و تخمین
طوغری حیقما دی. خنکار دها صیقی باصه رق، بالعکس استعفالری کمال
هضم و سکونتله قبول ایتدی. بو صورتله باب عالینك نفوذ و اقتدارینی
بستون قیرمق ایچون، اک زیاده امنیت ایتدیکی، و اداره دولته بدل،
مجرد تأمین مقام و اقبال ایچون، تماماً کیفیه مطیع بیلدیکی نورس پاشایی
صدر اعظم نصب ایتدی. شو قدرکه: هر طرفدن باش کوسترن عدم
خشنودی بو نقطه ده دیکیان پای ثباتی قیردی؛ نورس پاشایی عزل
ایتدیره رك یرینه کامل پاشایی کتیرمکه مجبوریت ویردی،
کامل پاشا یکنظرده خنکارك کیفیه خدمت ایدرکی کورونور ایدی

ایسه ده ، اساساً باب عالینک استقلالته طرفدار بولمقله برابر مقام صدارته دخی خریص دکل ایدی . (یالکز اسبق صدر اعظم) نامی طاشیمق ایچون بر کره اورادن کچمک آرزو ایدردی .

ایشته : مختصراً بیان ایتدی کمز شو حالدن پک کوزل آ کلاشیله بیلیرکه : سلطان عزیزک مبادی دورنده بیله ، اساساً ملت و دولت دوشو- نلر ، هر امر مشکل حکومتده ، منافع شخصییه سر دفتر اجرا آتده بولنور ، بو اغورده درلو انتریکلر اختیارندن چکنلمز ایدی .

کامل پاشانک صدارتی یدی آیدن زیاده دوام ایتدی . بویدی آی ظرفنده مهم برایش یاپیادیه ، اوده : صدارتک اوزون بر مدت ایچون فؤاد پاشایه انتقالی کیفیتدر .

مصر ، چوق اولدنبری محمد علی پاشا خاندانک اداره سنده ایدی . اداره داخلیه مصریه بر چوق امتیازلرله تماماً خدیولرک آئنده براقلمش ، و دولت علیه نك مصر اوزرنده کی حقوق حاکمیتی قورو بر سوزدن عبارت بولنش ایدی . بو حال ؛ مرکز اداره نك مسلک و آرزوسنه موافق دکل ایدیسه ده احوال اجباریه سیاسییه ایله شو قدیم خطانک تصحیحی ایچون بر شی یامغه مقتدر اولیان باب عالی ؛ بر سکوت اختیاطکارانه طریق طوته رق آل آتندن ده خدیویتی مرکز خلافته قوی بر صورتده باغلامق چاره لرینی آرایور ایدی . نهایت کامل پاشانک زمان صدارتنده استانبول ایله قاهره آره سنده بر محبت و صمیمیت تأسس ایدرک ؛ پادشاه بر مصر سیاحتی آرزوسنده بولندی . دیگر طرفدن آرزونک سرعتله قرار گیر اوله بیلمسی وهمان موقع فعله کتیرلمسی ؛ فؤاد پاشانک ، تحت نفوذ و اغوا آتنده

قالدينى آدملىرىن آز بر زمان ايچون اوزاق بولنديرمىق ايستمىسندن تحدث ايتىش ايدى . او كروهي پادشاهدن اوزاق براقق ؛ و سرعسكر بولمىق جهتيله پادشاهه سياحت آرقداشى اوله بيلمك ، و اداره دولته عائد عريض و عميق قونشمىغه ، و ممكن اولدىنى قدر قرب سلطان مظهريته ميدان بولمىق ايچون فؤاد پاشا ، پادشاهى شوسياحتته پك ترغيب ايتمىدى . بوسياحت سايه سنده ، فؤاد پاشا ، پادشاهه تقرب ايدرك اوزرنده اولان سوء توجه شاهانه يى ازاليه موفق اولدى . بوندن صكره سرايده ايتىدىكى كى نفوذنى يوروتىرك ، مصردن عودتنده درحال صدر اعظم نصب ايدلى . سرعسكرلك و مابين مشيرلكى دخى مشار اليك عهد- سنده ابقا و توجيه ايدلى .

بودفعه اولدقجه اوزون سورن فؤاد پاشا صدارتنده وقوعه كلن احوالك تفصيلاتنى صكره كى مقالتمزه براقه رق ، بوراده يالكر شونى يازمقله اكتفا ايدرزكه : مشار اليك صدارتندن بلكه نن مهم اجرا آتندن يوزده بريسى دخى ظهور ايتدى . دوت سنه ايچنده ياپيلان اصلاحات ، موجود و لازم الازاله بولنان سيئات ايله مقايسه ايديله جك اولورسه فؤاد پاشا صدارتنك وجود دولته بخش ايتدىكى فوائد و رفاه پك ناچيز قاله جغنده شبهه يوقدر .

دورنده ذكره شايدان اولان مسئله : طونه ولايتنده كى اصلاحات مهمه دركه : بوده . واليسى بولنان مدحت پاشانك كمال غيرت و اقتدا- رندن تولد ايتمىدر . طونه ولايتى اصلاحاتنك ديكر ولايتلرده تعميمي ، و كويا ملكك ترقيسى ايچون ياپيلان بعض كوسترشلر ، مثلاً : (۱۲۷۹) ده

درشعادتده سلطان احمد میداننده سرکی کشادی ، روم ایلینک قضا و قریه لرنده برر سرمایه صندوقی ، و استانبولده برنجی دفعه اوله رق اوتوز سنه امتیازله ، اوچ میلیون انگلیز لیراسنه یقین بر سرمایه ایله عثمانلی بانکه- سی تأسیسی کی شیلر ، او وقتلر محلی و اجنبی مطبوعا ییله دولتک عمران و ترقیسنه براءت استهلال اوله رق تذکیر و تشهیر ایدلایسه ده ، نتیجه ده قورو بر نمایشدن عبارت قالدیغی آثاری دلالتیله ثابت اولمشدر .

فؤاد پاشا دورینک محدث سیئه سنه کلنجه : مشارالیه موقعی دائما منزله کوردک تقویه و ترصین ایچون ، سلطان عزیزک فطری اولان احتراصات مذمومه سنی دائما ترویج طرفنده بولمغه ، و حتی بعض احوالده پادشاهی اسرافات یهودیه تشویق ایتمه که دخی مجبوریت کورش ایدی که : بومسلاک ؛ دولتک مابه الحیاتی اولان مالیه سنی رخنه دار ایتمه که ایدی .

سلطان عزیزک اوائل سلطنتنده مشهود اولان اعتدالپرورلاک ، فؤاد پاشا بر طرفه براقیله رق اولانجه غیرتله قدیمدنبری اوله کلن سرای اسرا- فاته میدان ویرلدی . حرم هایون علی روابه طقوز بوزدن زیاده نسوان ایله طولدرلدی . حرم آغاری ، ودها بر چوق حشرات ، او نسبتده چوغالتلادی ؛ و مجموعی ایکی بیک بشیوز افراده چیقارلادی .

بو قدر خلقک دیوملغی ایچون یالکز مطبخ شاهانه دن کونده بش یوز طابله دن زیاده یمک چیقدیغنی و هر طابله ده اون ایکی قاب یمک بولندیغنی ، یکریمی درت ساعتده یان یمکلرک مجموع عددی آلتی بیکه قدر واردیغنی ذکر ایتمک دیکر شیلر ایچون بلکه کوچوک بر مقیاس اوله بیلیر .

(چراغان و دها صکره لری بکلی بکی سرایلری و بوغاز ایچنده ، دها پک چوق یرلرده کوشکلر انشایی کبی اعمارات) ، خاصه چراغان سرا- بی ایچون ، طوپخانه و ترسانه نك صرفیات میریه بی مستشا اولدیغی حالدہ بریچق میلیون لیرا صرف ایدلمسك انشآت مأمورلری قیوداتیله ثابت بولمسی مطبخ مصارفی مقیاسنه انضمام ایدرک ، فیکرلرده برنخمین اجمالی حصولنه یاردم ایده بیلیر .

ایشته : پادشاهك اسرافاتنه بورادهیه قدر مساعدده اولندقدنصکره فؤاد پاشا کنديسنى دخى اونوتمیوب موفقیات عمرانیرورانه سندن (!) بالاستفاده کنديسنه دخى بر قوناق یایدیرمشدرکه : او قوناق بو کونکی مالیه نظارتی دائره سیدر .

دولتک اداره عمومیه سندن بالذات مسئول اولان ذوات ، بو کبی سوء استعمالته شتاب ایتدکلری حالدہ فناغک شعبات ادارهیه دخى سرا- یت ایتسی پک طبیعیدر . شو سببله بتون دوائر دولته اسرافات ، سوء استعمالات ، ارتکاب ، ارتشا مبدولیتله رواج بولدی . ملکک ثروت و صنعتی و تجارتی اجنبیلرک تسلط و انتفاعنه ترک ایدلدى . بو قدر کشمکش هوا و ذوق ایچنده نصلسه میدانہ کتیرلمش بر مهمه اداره وارسه ، اوده : مقالات مخصوصه سنده عرض اولنه جنی اوزره جهت عسکریه و بالخاصه بحریه اولوب بونلرک درجه مطلوبهیه کتیرلمسی فؤاد پاشا صدارتنک محصولاتندن اولمقدن زیاده صکره کی صدر اعظملره عطف ایدلک دها موافق حقیقت اولور .

بوائساده احوال خارجیه مطلوبه موافق اولمقدن پک اوزاق

ایدی . واقعا فؤاد پاشا حضرتلری غایت عقللی و اوروپا دیپلو-
ماتلری آره‌سنده دها و مهارتله مشهر ایدیسه‌ده ، دولتک احوال
داخلیه‌سنک منتظم بر حالدہ بولنامسی خارجیه ایشلرینه دخی پک فنا
تأثیر ایدرک شهرت و قدرت متواتره‌سندن استفادہ ایدیلہ مامشدر . بناءً
علیه : او وقت صورتا دولت علیہ‌نک تحت نفوذنده بولنان رومانیا ، قره
طاغ ، و خاصه صربیه‌ده حقوق دولت کیتدکجه تزلزلاته اوغرا دی . و
علی الخصوص صربیه‌نک اوتہ دنبری نقاط مهمه‌سنی اشغال ایدن عثمانلی
عسکری بسبتون مملکتدن چیقاریلہرق ضمنی بر استقلالیت بخش
ایدلمش اولدی .

ایشته : فؤاد پاشانک درت سنہ قدر دوام ایدن صدارتی زماننده کی
موفقیات ! حتی دنیله بیلیرکه : بو زمانده یاپیلان فناقلرک ، استقباله
تأثیراتی پک عظیمدر .

فؤاد پاشانک بو حرکات غیر مأموله‌سی کندی دوستلرینی بیله علیهنه
چویرمش ، و بالاتفاق مقام صدارتدن دوشورلمسنی موجب اولمشدر .
مقامدن دوشمک بختنده فؤاد پاشانک دها برمدت صدارتده قالمسنی
تجویر ایتمین احوالدن بریسی ده ، بواشناد انکلتره وکلاسندن بولنان مشهور
پالمستونک وفات ایتسی قضیه‌سیدر . چونکه بزده اوتہ دنبری مقام صدارت
رته کلن ذات ، دائماً دول معظمه‌نک بریسنه استناد ایدرک اداره امور
ایتملری و سرایدن کلن تعرضه قارشی طورملری ایچون ، او دولتک
استانبولده بولنان سفیرینی ایلری یه سورمک ، و اونک سرایه اولان نفو-
ذندن استفادہ ایتک عادت و طبیعت بیلنمش اولدیغندن ، فؤاد پاشا

دخی دائما انکلیز طرفلیسی ، و اوزون مدت صدارتده قالمسی دخی بر درجهیه قدر انکلتردنک ، خاصه پالمستونک استانبولده اولان نفوذی سایه سنده اولمشدر .

فؤاد پاشا صدارتدن دوشدی ؛ محمد رشدی پاشا صدراعظم اولدی .

(۲۴ مایس ۱۲۸۳)

محمد رشدی پاشا وسط الحال وکلادن اولوب ، شو صوک زمانده آله یلدیکنه فناالشمش اولان دولاب دولتی تدویر و تنظیم ایده جک اقتدارده دکلدی . مشارالیهک تحت ریاستنده تشکیل اولنان هیئت وکلا او وقتک — فؤاد پاشادان ماعدا — معروف اولان رجالندن عبارت اولوب ، ایچلرنده صدراسبق عالی پاشا دخی وار ایدی .

بویکی وکلانک کوزه چارپه حق اک برنجی حرکتی ؛ بزده نه وقت اولورسه اولسون اجنبی دولترلرندن بریسنک سیاستنه استناد ، صدارتدرجه عادت صایلدیغندن ، فؤاد پاشانک باغلاندیغی انکلیز پولتیقه سنی ترک ، فرانسه طرفنی التزام ایتک اولدی .


احوال داخایه ایسه کیتدکجه فناالشیور ایدی . سرایک اسرافاتی ، وکلای نخامک سوء اداره سی بلا سیله اوروپادن دفعاتله میلیونلر استقراض ایدلدیکی حالده اورته ده ینه پاره سزاق حکمران ایدی ایدیلن بورجلرک فائضلرینی ویرمک زمانی حلول ایدوبده مالیه جه قدرت بولنماسی ، دولتک کوندن کونه آزالمش اولان اعتبار مالی وخارجیسنی بسبتون برباد ایتدی . و کویا بو درده چاره ساز اولق ایچون دخی فیما بعد آله جقلیلرک بانق عثمانی ایله حساب کوره جکلری تأمین ایدلدی . بو جهتک تأمین

ایچونده برقاچ ولایتک وارداتی، مذکور بانقہیہ ویرلدی. بوحال کیت کیده شمیدیکی دیون عمومیه نیک « حکومت ایچنده حکومت » شکل هائلنده عرض دهشت ایتمنه سبب یکانه اولدی.

زمانک ایکنجی و فقط هر حالده دها دهشتلی شئوناندن بری ده، دولتک ضعفندن استفاده ایله، ذاتاً مخافظه ایتدکلری رابطۀ جزئیہی دائماً قوپارمق سوداسنده بولنان صرپ، قره طاغ و رومانیانک استقلالیت قزائمق و هیچ اولمزسه حقوق و امتیازات موجودہی توسیع ایتمک طاشقینلقلرنده بولنملری ایدکه: پک چوق کورولتولردن صکره مراملرینه نائل اولدقلرینی سویله مک فضلہ در. مثلاً: او وقت صریہ نیک بعض نقاطی و علی الخصوص مرکزی بولنان بلغراد قلعه سی عثمانلی عسکری ایله اشغال اولنمقده ایکن بر چوق مخبراتدن، و قیل و قالدن صکره دولت بلغراد قلعه سی بوشالتمغه مجبور اولدی. یالکز رومانی و قره طاغ حکومتلرینک طلب ایتدکلری امتیازات واسعه نیک بر قسمی طی ایدلمکه اقناع اولنه بیلدیلر.

بتون بواحوالک شدتلی بر حرارتله قاینادیغی شو صرہ ده، هپسینی اونوتدیره جق بر غاغله عقیفه ایله، کرید عصیان ظہور ایتدی. دولت تسکین عصیان ایچون اولانجه قوتیله اوغراشدی؛ موفق اوله مدی. الک صکره، عالی پاشانک صدارتنده. آطه نیک امتیازات یکونی، حدندن زیاده بیولتیلهرک، تسکین عصیان موفقیتی، صانکه الویرمشدی. ایشته: هپ بویارملر، سوء اداره یوزندن آچیلیور، دولتی قعر بی پایان انقراضه طوغری یووارلایور ایدی.

مسرودات مختصره مزدن قولایجه آکلاشیلیرکه : فؤاد پاشادن
صکره مقامه کلن محمد رشدی پاشا دخی امراض موجودیه دواساز
اوله مدی ؛ و نهایت محمد رشدی پاشا استعفا ایتدی . بو آراقینه
فؤاد پاشانک صدارته کتیرلسنه ، هر طرفدن ایجه غیرت ایدلمش
ایدیسه ده خنکارک مشار الیه اولان عدم محبت و امنیتی مانع
اولدیغندن ، عاقبت عالی پاشا صدر اعظم اولدی ؛ فؤاد پاشا خارجیه ،
و محمد رشدی پاشا حربیه نظارتلرینه نصب اولندیلر .



— سلطان عبدالعزیزك واسط سلطنتی —

عالی پاشانك صدارتی — سلطان عبدالعزیزك اوروپایه سیاحتی —
صدر اعظمك حسن اداره سی — وفات عالی پاشا — اووقتہ قدر اجرا
ایدیلن بعض اصلاحات — ولایت نظامنامہ سی — شورای دولت
تأسیسی — نافعہ ایشلرندہ بعض تشبثات — جهت عسکریہ —
احوال مالیه



عالی پاشا؛ زمانی وکلاسنك پك چوقلری کبی، صدر اسبق مشهور
مصطفی رشید پاشا تلامیذندن اولوب، یکریمی سنه دنبری دولتک شعبات
اداره سنده استیخدام اولنه کلش، وعادتا مشارالیهک یابانجی قالدیغی
هیچ بر امر دولت بولنماشدر. صوگ زمانلرده همان دائماً خارجیه نظام
رتنده استیخدام اولنوب، دولته اولدقجه مهم خدمتler کوستردیکی کبی،
خاصه سیواستپول محاربه سنك محصولی اولان پارس معاهده سنده،
دولتک مرخصی بولندیغندن اوراده مهارت سیاسیه سی ابراز ایتش، و
بوصورتله کندیسنی اوروپایه دخی طانمشدر.

اووقتک وکلاسی دائماً کندیلرینی ایلرییه سورمکی، وعلی الخصوص
مقام صدارته جان آتمی، عادتا اعتیاد ایتدکلری حالدہ، عالی پاشا او
طرفه هیچ یاناشماز، ایکنجی طبقه ده بولنه رق، مأمور اولدیغی خارجیه
ایشلریله اشتغالی ترجیح ایدر ایدی. فقط رشدی پاشانك سقوطنده
آرزوسنه مخالف اوله رق صدارته چاغرلش و نوعاً مجبوریت دخی

کورمش اولدیغندن ، مع الکراره قبول ایتشدی .

بو زمانده بالاده ذکر اولندیغی وجهله ، دولتک اداره داخلیه سی
پک قاریشیق ، وهمان کاملاً مداخلات اجنبیه یی موجب اولمقده ایدی که :
بو حال اکثریا دشمن ازلیسی اولان روسیه نیک تعرضاتنه میدان آچمقدن
حالی قالمیور ایدی .

عالی پاشا ، ایجه زماندنبری اوروپا محافل سیاسیّه سنده قزاندیغی نفوذ
و اعتبار سایه سنده ، بر قاچ دولتی ، علی الخصوص عموم اوروپاده مرتبه
بالای شوکت و شرفده بولنان فرانسز ایمپراطوری اوچنجی ناپولیونک
توجه و صمیمیتنی جلبه موفق اولدی . کرید آطه سنده استعمال ایتدیکی
تدابیر مؤثره ایله آز زمانده اختلالی باصدیردی . کرید اختلالی برطرف
اولنجه ، روسلر پان اسلاوئزم قومیتهاری واسطه سیله بلغارستانده بر عظیم
اختلال علواندیرمک غیرتنه دوشدیلر سده موفق اوله مدیلر . بو بلغار
اختلالنک آز بر زمانده باصدیرلدیغی ، بونکه روس دیپلوماسیسنک مکمل
بر مغلوبیته اوغرا دیغی مشهوردر .

ایشته : بو مهم موفقیتلر استحصال اولندیغی صرهدده عالی پاشا ،
دولت علیه نیک ، اوروپا دولتلری آره سنده بر موقع اعتبار و حیثیت قزانده .
سنک مقدمه سنه ، پادشاهی بر اوروپا سیاحتنه چیقارمق تشبیهله باشلادی .
عالی پاشانک بو تدبیری زمان و احواله پک موافق اولدیغی تصدیق
ایتمه مک ممکن دکلدر . چونکه : بویله بر سیاحت شاهانه عثمانلی تاریخنده
او وخته قدر ، هیچ کورولمه مش بر شی اولمقله برابر وقعّه خیریه دنصکره
اوروپا ایله اولان مناسبت قدیمه بررنک دیگر آلمش اولدیغندن ، حکمدارلرک

وجاهاً دخی بر برلریله کوروشه رک تأیید مناسبت دوستانه ایتلمی فائده- سنک، بزجه احراز ایدلمی الزم ایدی. حتی بو تشبدرکه: بالآخره اوروپا حکمدارانى خاندانی ده، شرقه قارشى بسلدکلى فکرلى کیده- ره رک مملکتتمزه سیاحت ایتلمی کبی بر فائده مدنییه یول آچش، و مصره و استانبوله کله رک پادشاهی زیارته ایصندیرمش، بو حکمداران اوروپائییه ایله خاندان شاهانه بیننده مناسبات دوستانه نک کوندن کونه تقویت بولسنه سبب مستقل اولاشدر.

عالی پاشانک، سلطان عزیزى اوروپا سیاحتنه چیقارمقدن ایسته- دیکی منفعت، خاصه: دولت علیه نک شهره ترقی و مدنیته کیردیکنی و اصلاحات جدیدیه تشبث استعدادنده بولندیغنى اوروپایه کوسترمک ایدی. بو صورتله بعض بدخواهلىک، و على الخصوص روسیه نک عثمانلى پادشاهلى حقنده کی اسنادات و مفتریات جاهلانه و غرضکارانه لرینک تأثیرات مضره سنى احما ایتک املنده ایدی.

بر جهتله ده شو سیاحت واسطه سیله، مشارالیه، دولت علیه یه میال و متوجه بولنان اوروپا سرایلرندن بعضیلریله دهه زیاده حقوق و مخالفت پیدا ایتک آرزوسنده ایدی.

مذکور سیاحتدن عالی پاشانک بر مقصود مهمی ده: پادشاهه، اوروپایی و اوروپا حکمدارلرینی، او حکمدارلرک ملتیه و حکومتیه قارشى التزام ایتدکلى معامله معتدله و ترقی جویانه و بتون اوروپا بلاد معمور- ره سنک احوال حاضره مترقبه و مسعوده سنى، هپ بونلرک اداره عادله و منتظمه، محصولات بدیعه سنى اولدیغنى کوستره رک، سلطان عزیزى

او طريقة جليله ميل و هوس ايتديرمك ایدی .

شو صوك مقصودك علویت و مبعجلیتی یکنظرده مشهود اولور .

ایشته : بو مقاصد مهمایه بناء پادشاه سیاحتیه تشویق ایدلدی .

سلطان عزیز ، نزد شاهانه سنده شهرزاده سلطان مراد و سلطان حمید

و بر خیلی اکابر رجال و اتباع بولندیغی حالد ۱۸۶۷ سنه سنده پارسه

طوغری حرکت ایتدی . پادشاهك شو سیاحتیه ایلک اوغراغی پارس

اولسی ، او آراق وقایع مهمه مدنیهدن اوله رق اومطنطن شهرده سرکی

ولمسندن ، و سریرقرالیده ، دنیانك مظهر اعتبار و احترامی اولان

اوجنجی ناپولیون کی بر حکمدارك جالس اولمسندن ایلری کلمشیدی .

مقدما دخی عرض اولندیغی وجهله : عالی پاشانك فرانسز پولتیقه سنی

تعقیب ایتسی دخی بو بابده حائز تاثیر اولدی .

سلطان عزیز پارسده بولندیغی مدتجه حقیقه بیوک بر حکمداره

لایق اوله حق مرتبهده مظهر احترام اولدی . انکلتزده دخی پك خا-

الصانه رعایت و حرمت بولدی .

سلطان عزیز پارسده ملتك دكل حكومتك یعنی : سرايك مسا-

فری بولندیغی حالد لوندرده انکلیزلرك ، ترکاره قارشى دائما موجود اولان

صمیمیتلرندن طولای دكل یالکز سراى ، عموم اهالى طرفندن غایت

خالصانه آقیشلاندى ، مظهر اعزاز اولدی . بالخاصه لوندیره بلدییه سی

سلطان عزیزه مکمل و مطمئن بر ضیافت ویردی .

انکلتزده دن صکره ، دهها بعض طرفلره اوغرانه رق استانبوله

عودت ایدلدی .

عالی پاشانك صدارتی زمانی، اك پارلاق بر زمان اولوب، مشار
الیهك غیرتیه مرکز سلطنتده شورای دولت تأسیس اولندی. شعبات
اداره جه آثار ترقی رونما اولمغه باشلادی. کرید عصیانى تدابیر حسنه ايله
یاواش یاواش کسب سکونت ایتدی. وقتیه سردار عمر پاشا قومانداسنده
پك بیوک بر قوت سوق ایدیلهرک اوغراشلدیغی حالده بيله، تسکینی
ممکن اولمیان و همان همان عصیانچیلره معاونت متمادیه سنندن طولانی یونانه
حرب آچیلماق راده سنه کلن آطه ده آسایشك اعاده سی ممکن اوله بیلدی.
بوندن صکره دخی عالی پاشا، دولتک امور داخلیه سی تنظیم ایتک
جهتته حصر غیرت ایتدیسه ده اساساً اداره و طرق اصلاحاتده ماهرانه
اجرای وظیفه یه مقتدر اصحاب عرفان و مقتدر بولنمه سی، سرایک معتاد
ایدندیکی مداخلات سقیمه نك وقت وقت کندینی کوسترمسی، و هپ
بوکبی احوال مؤسفه، مشار الیهك آرزوسی مرتبه سننده اصلاحات
اجراسنه موانع مستقله اولدی. یالکز شایان قید اولان ماده، شودرکه:
استانبولده امنیت صندوقی تأسیس اولندی؛ اردولرده موظف، ردیف
و مستحفظ عسکرینك صورت تنظیم وتنسیقنده بعض مرتبه اصلاحات
اجرا ایدلدی. وعمومیت اعتباریه کرید وقعه سنندن صکره امور داخلیه
ده اولدجه انتظام و آسایش، ای بر سکونت وجود بولدی.

بو صره ده بغداد والیسی بولنان مدحت پاشا دخی قطیف و احسا
طرفلرینی تحت اطاعته آله رق — طونه ده یاپدیغی کی — توزیع عدالت
و مدنیته حصر همت و غیرت ایتدی. بر عثمانلی واپور شرکته ده تأسیس
بیوردی که: بو شرکت بر طرفدن بومبایه، بر طرفدن ده استانبوله واپور

ایشلدرک مملکتک تجارتی توسیع و تزید ایدہ جک ایدی .

او دورده شایان قید وقایعدن بری ده (۱۲۸۷) تاریخنده یمنده تشکیل اولنان اردوی همایونک عسیر و صنعا جهتلرنده کی عربانی تحت اطاعتہ کتیرمکہ موفق اولسی ، و اورالرده نفوذ و حاکمیت عثمانیہ یی تقریر و تأیید ایتسی ایدی .

بوندن بر سنہ صکرہ صدر اعظم عالی پاشانک صحتی کیتدکجه مختل اولمغه باشلادی . تدریجاً خستہ لغی شدتلندی . بو صرہ ده آلمان — فرانسر محاربہ سنده فرانسه نک (۱۸۷۰) مغلوبیتی و ناپولیونک اسارتی وقعہ لرله اوروپا خیلی صارصلمش ایدی کہ ، خاصہً فرانسه نک مغلو-بتی عالی پاشایی پک متأثر ایتمش ، وخستہ لغنک اشتدادینه باعث اولمشدر دیانلرده واردر . بو سببلرله مشار الیه پک وقتسز اوله رق ارحال داربقا ایتدی . مولا رحمت ایلہ .

عالی پاشا ؛ — هر نه قدر زمان صدارتنده قطعی بر (اصلاحات) اجرا ایدم دیسه ده — او وقته قدر کلن صدر اعظم لک مقتدری ، و مقام صدارتہ اک زیاده لایق بر وزیر آصف تدبیر ایدی . هیچ اولمز ایسه شورای دولتک تشکیلی ، سرای تسلطانہ قارشى حیثیت مقامی و منفعت دولتی محافظہ یه ساعی بولمنسی مشار الیهک نامنی رحمتله یاد ایتدیرمکہ کافی کله بیلیر .

سلطان عزیزک حرمت و رعایتی جلب ایتمکده کی قدرت متنفذانه سی مشهوردر . و بو سایه ده درکه انتظام اداره یی آز چوق ید تخریبکار شاها-نه دن قورتاره بیلدی . و فلاکتلی کونلری برار اولسون تأخیر ایتدی .

(۱۲۸۸) تاریخنده وفات ایدن عالی پاشانک مقامنه صدر اعظم

اولان ذات ، محمودندیم پاشا ایدی .

محمود ندیم پاشانک صدارتی دور سلطان عزیزده بر دور مخصوص فلاکت و انقراض تشکیل ایدر . بوجهتی آتی یه براقه رق ، بوراده یالکیز سلطان عزیزک جلوسندن محمود ندیم پاشا صدارتنک ابتداسنه قدر اداره ده و دولتده آز چوق کوزه چارپان اصلاحاتی خلاصه ایده لم :

اهالی ، اصلاح و عمران مملکت ایچون سلطان عبدالعزیزدن چوق امید بسلامتده ایدی . بونک نه قدر بوش اولدینی چوق کچمدن آکلا شلدی . مع هذا ، انکار ایتمه ملیدرکه : سلطان عزیز دورنده ، سلطان مجید زمانندن زیاده عمران و اصلاح مملکه یارار شیر وجوده کلمشدر .

بو آثار عمران و ترقی ، سرای و وکلانک وطنپرورلکاری ، و خلوص نیتلری اولوب ، بلکه زمانک و امتک استعداد و اجباری ایله حاصل اولمشدر . بویله اولمقله برابر موقع اقتداره کچمش بولمانلرده غیرتسزلاک کورلمش ، بر قاجی مستثنا اولدینی حالدده همان هیج بری بر اهلیت و قابلیت اثبات ایدمه مش اولسی ، بتون اجرا آتک پک جزئی واهمیتجه درجه ثانیه ده قالمسیله مستدلدر .

او دورده ولایتلر ، استانبولدن نصب و اعزام اولنان والیلر ایله اداره اولنورلر ایدی . ولایتده والیدن بشقه مأمورین ، والی طرفندن انتخاب و تعیین ایدیلرک جمله سی والیلرک اتباع و خدامندن معدود ایدیلر . بونلرک هر بری کندی نفوذ و انصافی راده سنده اهالی یه ویرکی طرح ایتمکده و طوتدیره بیلدکاری قدر پک فنا معاملهلر ایدرلردی . مملکتده

وبادن دهشتلی مضرتلر ایقاعندن چکینمز لردی. خالق بی محابا صویمقدمه کی بو جسارت؛ والیدن، استانبول اصحاب نفوذندن، سرایه قدر، اموال منهوبهده اشتراك بولنمىسندن ایلری کلیردی. والی موقعی محافظه ایچون طرف طرف هدیهلر، بهیهلر یاغدی رردی. بو صورتله طوپلانا پارهنك مالیه خزینهسینه پك آز بر جزئی کیرردی.

بو پك کوزه باتان قید اقبال ومنفعتی، تجویز ایتهمك لزومنی عصرک بعض دورینلری ادراك ایتشلردی. اداره حکومتی بشقه بر طرز نافعہ قلب ایتمه که قرار ویردی لر. مقصد مصممك حسن تطبیقی ایچون او وقت والیر آره سنده فعالیت و غیرت ایله بحق اکتساب شهرت ایتمش بولنان طونه والیسی مشهور مدحت پاشا حضرتلری استانبوله دعوت ایدلدی. کیفیت تکرار وکلا بیننده مذاکره اولندقدن صکره اساساً مدحت پاشا حضرتلرینك افکار و مطالعات واقفانه لریله ولایات اداره سنی یکی بر اصله افراغی متکفل بر ولایت نظامنامه سی تنظیم اولندی. نظامنامه مه نك ایلک ساحه تطبیقی طونه ولایتیدر. طونه ده تطبیقندن ایی ثمره لر اقتطاف ایدلدیکی حالدہ پیدرپی دیگر ولایتلرده دخی تطبیقی قرار کیر ایدی. شوراده شایان دقت بر جهتی قید ایتمه که مجبورزکه: مقصد نه قدر کوزل و نظامنامه نه قدر موافق مصالحت اولورسه اولسون، تطبیقنده اربابنك استخدای الزمدر؛ بونده ده او یله اولدی. مذکور نظامنامه نك احکام عملیه سی یالکز طونه ولایتنده ایی ثمره لر ویره بیلدی.

مذکور نظامنامه طونه ولایتنده بالذات مدحت پاشانك همت و غیرتیله تطبیق اولنه رق پك بیوک فائده لر استحصال ایدلدی. مملکتی

عادتاً ، احيا ايتدی . او درجهيه قدرکه : پک آز بر زمانده اوروپا بلاد
متمدنه سنک عمران ورفاهنی اکتساب ايتديکي پک جلی بر صورتده کوزه
چارپمغه باشلادی . بوراسی بویله ایکن دیکر ولایتلرده همان هیج بر ثمره
حسنه آله مدی . نه ایسه ؛ ولایتلر بوصورتله بر درجهيه قدرتنظیم اولندقدن
صکره صره ، پای تخته کلدی ، شورای دولت دواثری ایشته بو زمانک
تأسیسات تجدید پرورانه سندنر . بو جهتده دخی اثبات آثار رؤیتندی
بیوران ، مدحت پاشا حضرتلریدر . بوسبيله شورای دولتك ایلک دفعه
اوله رق ریاستی مشارالیه حضرتلرینه تفویض اولنمشدر .

صکره ، نظر کریم اصلاحا تپروری ، جهت عدلیه انعطاف ایتدی !
بوراده بعض مرتبه تنظیمات اجرا اولندی .

هر شعبه اداره ده موقع تطبیقه قونان شو ذکر ایتدی کمز نظامات
ومقررات دولتك احتیاجات مبرمه سنی پک آز اقناع ایده بیلدی . هر حالده
مهم واساسلی بر حرکت ، بر انقلاب احتیاجی اصل بوندن ، پک جلی بر
صورتده اظهار وجود ایتدی .

او ، مقدمه انقلابده نافع ایشلرینه دخی باقلدی :
انجق بوکی ایشلری ملکمزده کندمز یاپه جق قدر نصاب وقوف
ایله بهره دار ذاتلر بولندیغی جهتله ، منابع ثروت مملکت اولان بوکی
امور مهمه بعض شرائط ایله اجنبیلره احاله ایدیایور ؛ و بوسبيله خیلی
ضرر لر کور یاییوردی . بو خطرک انشا و کشادی اجنبی الیه اوله سندن
تولد ایدن ضرری تقدیر ایتمش کی کورونن حکومت عثمانیه ، بالآخره
آناطولی خطنی اجنبیلره ویرمیه رك حکومت حسابنه یامغه تشبث ایتدی ،

فقط کمال تأثر له قید ایدرزکه : بوندن کوریلن رختهلر اجنبی الیه کلندن
چوق زیاده یه مال اولدی . خطک ، آناتولینک ایچریلرینه دوغرو
تمیدی مصمم ایکن ، اومقصودک حصولی ایچون اوروپادن استقراض
ایدیلن میلیونلرله ، انجق استانبولدن ازمیده قدر کتور یله بیلدی .
وعند الحساب آکلاشادی که : اوتکی خطلر ایچون اجنبیلرک صرفیاتندن
کیلومتر و باشنه الی قات فضلہ یه مال اولمشدر ، اگر بوایشده کیزلی کوپلرک
طولدرلمسی جهتی اقدم بیلمسه ایدی ، اصحاب وقوفک تأمینلرینه کوره ،
خطک ازمیده قدر تمیدیدینه صرف ایدیلن پاره ایله ، بصره یه قدر شمندوفر
یاپیلمق ممکن ایدی .

نافعه جهتی بو قدرلده قالمدی : فرات نهرنده بر واپور قومپانیاسی
احداث ایدلدی . فقط آناتولی شمندوفرنده اولدینگی کی : منافع خاصه ،
مصاححت عامه یی کریده براقدی . امور نافعه ده وکلانک جهنی واحتراس
منفعت جویانه سی او (مرتبه ده) ایدی که : هر کون آلتونلر صاحبان
بوغاز ایچی شرکت خیریه سنک حالی بیله کوزلری اوکنده بر هیکل عظیم
انتباه تشکیل ایدرکن ، اداره عزیزیه دینیلن ، بوکونکی اداره مخصوصه یی
حقیله تنسیق وتنظیم ایتک جهتنه کیده مزلردی .

بو اداره عزیزیه گاه دولت طرفندن و گاه ملتزم واسطه سیله اداره
اولنور ؛ ینه برفائده استحصال ایدیله من ، بوندن دائمی اجنبیلر انتفاع
ایدرلر ایدی .

بر آراق وطنک بغرنده مکنوز اولان بر قسم معدنلر ایچون امتیازلر
ویرلدی . بونده ده ضرر دولتک حصه سنه اصابت ایتدی . یالکراجنیلرک

وايش آدمارينك (!) جيپلري وقاصه لري دولدي .
اوصره لرده مملكتك هر طرفه تمديد ايديلن تلغراف خطلري دخي
شاين ذكر در :

تلغراف سايه سنده ولاياتك مركزايله اولان مربرطيتي تقويه ايدلدي .
نافعه ايشلرنده بر قاجر كله ايله عرض ايتك ايسته ديكمز تشبثات
جمعاً يكون شويازد قلمزدن عبارت قالمش هيچ برندن حقيله استفاده
ايديله مه مشدر .


صرف پادشاهلرك كيف وذوقلريني تطيب ايجون بنا ايديلن سرايلرك ،
حين انشاسنده مأمورلرك ، و بعدالانشا سكانك چيلغين برتهالكله اختيار
ايتدكلري سوء استعمالات و اسرافات ، بتون بوسايد قلمز ضرورلرك
فوقنده ، بر شكل مهيب ايله عرض دهشت ايدر .

امور عسكريه يه كلنجه : بوراده دخي نسبتاً آثار ترقى كورلديكي
محققدر . آنجق سلطان محمود زماننده تأسيس اولنان مكتب حربيه ، نه
صورته ايديسه بودورده دخي عموميت اعتباريله ينه اوصورته قالدي .
حالبوكه اردولر يمزك مقداري آرتمش ، لازم اولديغي قدر معلوماتلي ضابط
يتشديرمك ايجون يالكر مكتب حربيه كافي كله مزدي . اردولر يمزك
احتياجه مبنى پياده ايجون ايكي و بلكه ده اوچ مكتبه ، سواري ايجون دخي
آريجه بر مكتبه و بر مهندس خانه يه اشد احتياج واردى . حال بوكه :
بونلرك هيچ بريسي ياپلاما ديني شويله دورسون ، مكتبك پروغرامى
دخي بك وقوفسز بر غيرت ، فقط فنا بر التزام ترقى شكنانه ايله تعديل
واصلاح اولنه كلديكندن بزم عسكري مكتبلري اورو پافنون عسكريه سنك

ترقیاتندن بحق بهرہ دار اولہ مدی . ونسبتاً بزده پک کریدہ قالدی .
 بو دورلرده برنجی خاصہ وایکنجی اردولرہ مناورہلر اجرا ایتدیریلہ-
 رك ؛ تعلیمات عمومیه اولدقچہ ای بر درجہ یہ کتیرلدی . ایدیلن آتش
 تعلیملرینک صکرہلری فائدہ عظیمہ سی کورلدی .
 سواری ؛ وقتیلہ عثمانلی عسکرینک الگ ممتاز . و دائماً مظفریتی تأمین
 ایدن برصنفی ایکن ، پک چوق زماندنبری صنف مذکورک احوالی تدنی یہ
 یوز طوتہ رق ؛ پیاده و طویجی یہ نسبتاً پک دون بر درجہ یہ قدر بو صنفک
 ایلریلہ تلمسنہ صرف ہمت ایدیلہ رك ؛ آنجق حیوانلرک سریع السیر
 وسلاحلرک صوک سیستم وینجسترتفنی وطبائجہ وقلیج ایلہ تسلیحی کافی
 کورلدی .

مالیہ یہ کلنجہ تصور ایدیلہ میہ چک قدر فنا بر حالہ ایدی :
 سلطان عبد المجید دورندہ باشلایان و مشارالیهک صوک زمانلرده ،
 اون میلیونہ قدر یوکسلن خارجی استقراضلر ، داخلہ دخی آلابیلدیکنہ
 سرایت ایدرک ، ینہ او صوک کونلرده دیونات داخلہ ، او مقدارہ قدر
 وارمشدی .

آجینہ جق احوالدن بریسی دە : بویلہ فداکارلقلرلہ آلمان پارہلرک
 جدی برایشہ صرف اولنمایشی ، و پک آز بر زمان ظرفندہ سراى ایلہ
 وکلا بینندہ اریوب کیدیشی ایدی کہ بو مادہ یہ دائر محل مخصوصندہ
 لزومی قدر تفصیلات ویریلہ جکدر .



— آوروپا ودوات عليه —

فتوحات عثمانیه حقننده بعض ملاحظات — ممالك محروسه ده عناصر
خرستیانیه — یاوز سلطان سلیمک بونلره قارشى تشبثاتی — قارلوفجه
معاهده سند نشکره دولت عليه نك انحطاطی — روسیه نك شرقه تعرضی —
بودولتک احوال تاریخیه سی — مشهور دنی پترو و بونک دولت عليه
ایله ایتدیکی محاربه لر — بوزاتک وصیت سیاسییه سی — دولت عليه نك
اوروپا حکومتلری طرفلرندن صیانتی — قریم محاربه سند نصکره تجدید
قوت ایچون روسیه ده کی غیرت — پان اسلاویزم — (اسلاوا اتحادی)
فکر مسالک نك مبادی ظهوری — بوجمعیته خط حرکتی —



بر دولته اکتساب قوت وشوکت ایتمه سی، پک چوق احوال ووقایع
متسلسله نك مساعد بر زمین اوزرنده، اجتماع وامتزازنه منوط اولدیغی
کبی، ذی شوکت وقدرت اولان بر دولته؛ کمالی بولدقن صکره،
تدنی و انحطاطه یوز طوته رق، عاقبت منقرض اولمسیدخی، کذلک بر
چوق احوال و، وقایعک اجتماعیه وجود بولدیغی تاریخله ثابتدر.
دولت عليه عثمانیه تاریخنده، شو ایکنجی حالک اماراتی میدان آلمسی،
اوج یوزسنه اولندن باشلار.

دولت عليه عثمانیه، شوکت وقوتی ایله فرید دوران بولندیغی عصر-
لرده، آسیادن اوروپایه آتلامش، نسبتاً آز بر زمانده ویانه قاپیلرینه قدر
دایانمشدر، شو قدرکه، ممالك مفتوحه ده بولنوب، تحت تابعیت عثمانیه

کیرن خریستیان اھالینک ، طول مدت اطاعت عثمانیہ دہ قالمہ سی ، سطوت عسکریہ مزک . قارشیسندہ قییر دانمق ، ممکن اولدیغندن ایلری کلش ایدی . عثمانلیلرک ؛ او وقت فتوحات یولندہ کوستردکلری قدرت ومھارتک پک آزینی ، قطعات مفتوحہ نک حاکمیت عثمانیہ یه غیر قابل انفکاک بر صورتدہ ربط ایدلمسی خصوصنہ حصر ایتھملری ، وبومھمہ نازکەدہ ، پک بیوک سیاسی خطا لرایشلہملری ، اک صوکنندہ دولت علیہ . نک اضمحلالنہ سبب اولہ جنی پک طبیعیدی . چونکہ : قوی براساس اوزینہ بنا ایدلمینجہ مجرد فتح بلاد ، استقبال ایچون هیچ برفائده یی منتج اولہ مز .

خرستیانلرک ینہ خریستیان قالہرق ، کندی جنسیت وقومیتلرینی ، عرف وعاداتنی تماماً محافظہ ایتلری ، کندیلرینہ بر کون ترکلرک الندن تخلیص نفس امیدینی ویرمسی شہہ سز ایدی . بناء علیہ : بلاد مفتوحہ . دہ عناصر خریستیانیہ یی ، ممکن اولدیغی قدز ترکلشدیرمک طریقہ کیدلمہ مسی بر خطای عظیم ایدی

بوندن بشقہدہ ، اوروپا قطعہ سنده بولنان اولاد اسلامیه نک تکثرینہ ، اھمیت ویرلمدی . بالعکس ، متوالی اولان محاربہ لرلہ کیتدکجہ آزالتدیکہ : بوجھت تھلکینی کوندن کونہ تشدید ایدیوردی .

مع هذا کرک سیاستدہ ، وکرکسہ اجراآت عمومیه دہ فوق العادہ بر مھارت کوسترن اسکی عثمانلیلرک بومھالکی نظر دقت و اھمیتہ قطعاً امدقلری ظن اولنمیین :

عثمانلی پادشاھلری آراسندہ عقل وکیاست ، نفوذ نظرایلہ بر موقع

مخصوص اجمال قزاقان اولان ياوز سلطان سليم خان حضرتلری بوبابده
دخی کمال عزیم وغیرتله ابدال همت و قدرتدن کری دورمدی. فتوحاتک
حال ایچون دکل، استقبال ایچون اوله جغنی اس حکمت حکومت بیله رک،
هر آدیمنی او مقصدله آتدی. نه فائده سی وارکه: خارق العاده براققدار
عالی همتانه یه مالک اولان او شهریار عالی شعار فکر و سیاستنی کیمسه یه
آکلاته مدی. و عمری دخی وفاسز حقیقه رق دولت ایچون محض حیات
اولان بو طریق، و بو فکر شاهانه کندیسيله برابر کومولدی...
بوسلطان جنت مقردن صکره کلنلر؛ مسئله مبحوثه یه همان هیچ اهمیت
ویرمدیلر. بو آغز خطانک جزاسی، صکره لری اولانجه آجیلانی ودهشتیه
میدانه چیقدی.

قارلوفچه معاهده سیله دولت علیه، آرتق فاتحلیکی ترک ایتدیکنی
امضالمشدی، وصفیر رجعتی چالمش بولندی. داخلده او قدر کشمکش
واغتشاش میدان آلدیکه: اصلاح امورایدلک امید دخی یراره کچدی،
دشمنلر؛ تابعیت عثمانیه یه ناچار قاتلندقلری کوندنبری، ایچلرنده
صاقلدقلری اغراضی، آرتق او مربوطیتک اسکی قوت و متاتی قالمینجه،
شدید بر طمع، و، کوز قرارتیجی بر حرص ایله میدانه اوردیلر. اساساً
دینلری، قومیت و جنسیتلری آیری اولان روم ایلی قطعات عثمانیه سنی
استرداد، و حاکمیت عثمانیه یی رفع ایله مستقل دولتلر تشکیل ایتک، و
کیدرک آور و پاده پک آزلق بولنان اسلام اهالی بی وطن اصلیمی اولان
آسیایه آتمق چاره لرندنبشقه برامل بسلمز اولدیلر.

دولت علیه بو خان ارزولری کور یوردیسه ده اخانی جزالندرمقدن

عاجزدی . بو کون همان اوچيوز ياشنه بصمش اولان عجوز سيئات او وقتلرده ، دخي ينه سرايدن ، شدت استبداد قيافتنده چيقوب اطرافه صالديررق ، بتون اداره دولتي ، عرب صاحبي کي قارمه قاريشيق ايتمکده ایدی . بوسيدلرله وکلاده اسکی عثمانلير کي صاحب تدبير بر وزيرك ظهور ايتسي مستبعد ایدی .

داخلي وخارجي دشمنلر آتيريني اويناتمغه بيوك بر ميدان بولمشلر ، هر صالديرشلرنده بر موفقيت احراز ايدرك قوشيورلردي . ايشته : دولت عليه نك امور داخله سنده كي عدالت سرك وقار غشلق يوزندن كيتد كجه قوتدن دوشمسنك آورو پاليلره بيوك اميدلر ويرمسي وهر برينك روم-ايلي ني پايشمقده زياده جه حصه دار اولمق حرصيله درلو انتريقه لر ايجاد ايتماري بذاته « شرق مسئله سي » در .

دولت عليه حقنده فكر استيلا بسلين قومشو حكومتلردن روسيه سائرلرينه تقدم ايتدي . بو مملكتك موقع جغرافيسي ودلي پترونك موفق اولديغي اصلاحاتك نتيجه فيوضاتي اوله رق اكتساب ايتديكي مدهش قوته استناداً ممالك عثمانيه ني قبضه تسخيرينه آلمغي قوردی مقصده وصول ايچون ممالك محروسه ده متمكن هممذهبي بولنان روملرله ، روم ايليده متوطن كليتلي مقدارده بولنان اسلاولرك لزوم حمايه سني سر رشته اخاذ ايدرك كنديسنه دولت عليه نك وارث مشرعي سوسني ويرiyorدي كه بو امنيه نك حصوليچون دولت عليه يه صيق صيق محار به لر آچيور ، بيوك بيوك فداكارلقلر اختيار ايدiyorدي .

شو ، بتون دنيا جه معلوم اولان وخصم طبيعي بيلين دشمني ،

نظرلرده أیجه تعیین ایچون براز تفصیلاته لزوم و مجبوریّت واردر .
 روسیه‌نک ، اورویا دولتلری آره‌سنده بر درجه‌یه قدر کسب نفوذ
 و اعتبار ایتیمی بوندن ایکی یوز سنه اول ، او مملکتک حکمداری بولنان
 دلی پترو زمانندن باشلار . او وقتّه قدر روس ماتی اورویانک شرقنده پک
 بیوک اراضی‌یه مالک و کندیلری دخی کثرتلی بر مقدارده بولمشلر ایدیسده
 منتظم و قوی بر دولت تشکیله پک چوق زمان موفق اوله‌ماملردر .
 بوملت ، اساساً اسلاو جنسنه منسوب اولوب فقط اسلاوک دیکر
 شعباتندن زیاده قبا ، تعصب دینی‌لری و جهالتلری دخی صوک درجه‌ده
 ایدی . دیکر اورویا ملتلیله مناسبتده بولمیه‌رق بر چوق عصرلر قبالی
 و مردمکریز بر حالده قالمشلردر . ابتدای ظهورنده پتپرست ایدیلر .
 براز صکره روم ایمپراطورلغنک پایتختی بولنان استانبولدن نشر دین ایچون
 سوق اولنان پاپاسلر واسطه‌سیله خرستیان و اورتودقس مذهبنی قبول
 ایتمشلردر .

بو وقعه ، عموم روسیه‌نک پرئسی بولنان « وولودیمیری » زماننده
 واقع اولمشدی . « وولودیمیری » نک وفاتندن صکره عموم مملکت اولاد-
 لرینه تقسیم اولنوب کیت کیده بو تقسیم بیوک بر تفرقه‌یه سبب اولدی .
 و بو حالده خارجدن کلن دشمنه مقاومتدن عاجز قالدیلر .
 اسلاولر ، بو عجز ایچنده ایکن ظهور ایدن تاتارلرک آئنده ایکی یوز
 الی سنه کبی عظیم بر مدت دوچار ربقه اسارت اولمشدر .
 فقط بو پرئسلرک « موسقووه » ده اولان قولی ، یواش یواش طرز
 تقسیم قدیمی ، کوردکاری مضرات متعاقبه‌سنه بناء ترک ایتدیلر . بر

طرفدن ده دشمن غالبلى قارشىسىندە برمسلك « خوف ورجا » طوتدىلر.
بو كيدىشله ايكي عصر ايچىندە روسىيەنى اولدۇقچە بر دولت ياپمىغە موفقيت
حاصل ايتدىلر.

بو زمان ؛ موسقووه پرنسلىرىدن برنجى (ايوان) ك دورى ايدى كه
بزم سلطان فاتحك جولان جهانكيرانه سىنه مصادفدر.

حضرت فاتح استانبولى فتح ايتدىكى زمان، روم ايمپراطورى بولنان
و استانبول فتحىندە مقتول اولان قسطنطينك برادرى ديمترى اوروپايە
فرار ايتمشدى. برنجى ايوان، ديمترينك قىزى صوفىيەنى تزويج ايدرك
پرنسلك نامنى « چار » نامنه تبديل ايتدى. و بو حركت ايله كويا روم
ايمپراطورلغىك وارث مشروعى صفتنى طاقنىش اولدى. مع هذا ايكي
عصر صكره روسلر، ينه اسكى حاللارنده ايدىلر. اوروپا حكوماتنه بىكره-
مكدن زياده بر آسيا حكومتى شكلى محافظه ايدىيورلردى. آنجق داخله
و شرق حدودنده بولنان تاتارلىرى ازرك مملكىتك عمران و ترقيسنىه، و
توسيع حدوده موفق اولدىلر. اوروپا نظرنده و حكومت عثمانىه نزدنده
وارقلىرى مشكوك بر شخصيت محافظه ايتىمكده ايدىلر. آره صره اوروپايە
واستانبوله كوندردكلىرى سفىرلردن بر روسىيە موجودىتى خاطرلره كليردى.
بيك يديوز تاربخلارنده موسقوف چارى بولنان (آلکسى ميخالويچ)
وفات ايتدى. ايكي كوچوك اوغلى، و بر بيوجك قىزى قالدى. عموم
اداره دولت، كريمهسى صوفىيە اسمندهكى پرنسلك عهدەسنىه ترك
ايدلدى. صوفىيە غايت مدبر و حريص حكومت اولديغىدن چوجقلىك
الك عقلانىسى بولنانى محوايتك طرفنى (ديكرى خستىلقلى و سرسم ايدى)

التزام ایتدی . بو عقللی چاریچه یه بر ، دیکن موقعنده طوران چوجنگ
طرفدارلری ، موسقووه عسکرینی پرنسسک علیهنه قالدردیلر . صوفیه یی
مناسیره حبس ایتمکه ، چوجنی اون سکر یاشنده ایکن کندی باشنه مقام
حکمداری یه اصعاده موفق اولدیلر .

ایشته بو چوجق ، ذکر ایتدیکمز بیوک پترودر .
غریب تصادفلردندرکه : پترونک ظهوری ، دولت علیه عثمانیه نک
مبدأ انحطاطی زمانی ایدی .

دلی پترو ، شبهه سز خارق العاده یارادلش بر آدمدی . آز بر زمانده
روسیه نک احوالی کلیاً دکشدردی . اوروپا مدنیتنی مملکته ادخال ایتمکه
چالشدی . بو نقطه ده پک چوق فداکارلقلر کوستردی . اوتوز سنه یه
وارمیان حکومتنده اعمار و عرفان مملکت و ملته موفق اوله رق روسیه یی
روسیه یاپدی .

مشارالیه ، بزمه ایکی دفعه محاربه ایتشدر . برنجی محاربه سی . اووقت
دولت علیه ایله محارب بولنان نمسه ، پولونیا ، ونديک اتفاقنه داخل اوله رق
قره دکر ساحلنه مالک اولمق ایچون ، او طرفده بولنان آذوف قلعه سنه
هجوم ایتسیدر . هجومده فنا حالده بوزولدی ، رجعت ایتدی . مغلوبیتیه
مایوس اوله جق طاقدن اولدیغیچون ایکنجی دفعه تشبثده اوزون بر
محاصره و تضییق ایله قلعه یی آلمغه موفق اولدی که : او قلعه قارلوفجه
معاهده سیله روسلرک النده قالدی .

ایکنجی محاربه سی ایسه شو وجهله در :
اسوچ قرالی دمیرباش شارل ، روسیه ایله پک چوق زمان محارب

بولنوب نهايت مشهور پولتاوا محاربه سنده مغلوب اولدقد نصكره بزه التجا ايتمش ایدی . شارلك و بعض وكلائك تشويقيه روسلره اعلان حرب ایدلدی . بومحاربده عثمانلی اردوسی قوماندانی بولنان صدر 'عظم بالطه' جی محمد پاشا ، دلی پترونی پروت نهری اطرافنده صاردی . خلاصی ممکنسر بر حاله کتیردی . تهلكه عظیمه ایچنده قالان پترو معیتی ضابطا نندن شفیروف نامنده برینی و قاریسی قاترینانی عثمانلی اردوسنه کوندر مشدی . بو باشده ایمپراطور یچه لری بولنان هیئت مبعوثه ، بالطه جی به و معیتندن اقتضا ایدن اصحاب نفوذه پك چوق پاره لر ویره رك ودها زیاده سنی دخی وعد ایدرك صلحه راضی ایتكه موقع اولدی لر .

ایمپراطور یچه قاترینانك صدر اعظم ایله اولان ملاقاتنده مشار الیهك آیاقلرینه قپانه رق و بیك عشوه ایله کوركنك ایتكندن صاریله رق صلحه راضی اولدقچه قویوویرمیه جكنی ، مؤثر و دلا شوب ادالره رجا ایتدیکی و صدر اعظمی انسان و موقع ایچون ممکن اوله بیلن معامله لرله یوموشاندیغی او وقتدن قاله روس و اجنبی محرراتنده مقیددر .

دلی پترونك وطننه اولان خدماتی پك بیو کدر .

ادارده اتخاذا ایتدیکی اصول ، و ایلروده نه یایمق لازمکلدیکنه دائر یراقدیغی وصیتنامه عادتاً روسیه ایچون دستور العمل طوتلمقده در .

پترونك وصیتنامه سنده روسیه ایچون تعیین ایتدیکی سیاست خارجییه نك طریق و استقامتی همان تماماً بزه عائددر . بو وصیتنامه ده روس ملتئك دینی استانبولدن چیقدیغنی و صوك استانبول ایمپراطورینك قیزی روس چا ریه ازدا جنی اخطار ایدرك روسیه روم ایمپراطورلغئك وارث مشروعی اولدیغنی

و بناءً عليه استانبولی وبالجملة دولت علیه ممالکنی الہ کچیرمک جمیع زماندہ روسیہ۔
 نك اس سیاستی بولندیغی، وکندیسندن صکره دخی تکمیل غیرت او طرفه
 حصرایدیلمک لازم کلدیکنی، اورالری تماماً الہ کچمدکجه روسیہ حدود
 طبیعیه سنی بوله میه جغنی وحقيله ایلریله مک ایچون بحر سفید سواحلی
 قبضه تصرفه کچیرمک لزومنی ایضاح واثبات ایتدکدن صکره تدابیر مقتضیه۔
 یی دخی کوستر مشدر :

فرصت کوزدرک دولت علیه یه محاربه لر آچق بویله جه یاواش یاواش
 ایلریلمک محاربه لری قزانمق ایچون انتظام ورسوخ عسکری یی تأمین
 ایتمک، ممالک عثمانیه داخلنده وقوعه کله جک وکتیریله جک اغتشاشادن
 استفاده غیرتنده بولمق، اوراده کی عناصر خرسیتیانیه یی دائماً عصیانہ
 آشدرمق وتشویق ایلیمک، ملت عثمانیه ده موجود اولان حسن اخلاق
 وجسارتک تدنی یه یوزطوتمقده اولسنی و بناء علیه : وکلای دولت فساد
 ونفاق ایله مألوف بولندقلرینی بیانله بوندن استفاده ایچون هپسنی پاره ایله
 یوموشاته رق قزانمق، وکیدرک عثمانلی ممالکنی پیدرپی تسخیر ایتمک
 والخ

شمدی یه قدر آوروپا مطبوعاتیلہ نشر اولنمش بولنان بو، وصیتنامه نك
 وجودینی روسلر انکار ایتمکدن کری دور میورلر سه ده پتروندن صکره
 سیاست خارجی ده اتخاذ ایتدکلری طریق شو انکاری رد، و اشاعه یی
 تأیید ایتمکده در .

نه اولور سه اولسون شوراسی محققدر که : روسلرک دولت علیه یه اولان
 تعرض استیلا جویانه لری پترو دوردن اعتباراً باشلامشدر .

شمدی یه قدر روسلرله سکر محاربه من اولمشدر . همان جمله سنده غائب ایتدک . بو محاربه لرك اك زياده ضرر منى موجب اولانى ايكنجى قاترينانك زماننده كى ، قاينارجه معاهده سنى انتاج ايدن محاربه در . پترونك وصيتنامه سنى اك دهشتلى تطبيق ايدن بوذكى قاترينادر كه : طورونى صوك روم ايمپراطور ينك اسمنى تذكىراً قسطنطين تسميه ايتمشدر . صكره برنجى آلکساندر و برنجى نيقولانك وقتلرنده كى محاربه لر دخى بزه معاهدات مضره بى امضا لتمشدر .

برنجى نيقولانك دور اخيرنده قدسده كى كليسا آنتخارلرى بهانه سيلاه آچيلان حربده انكلتره وفرانسه دولترلر ينك معاوتلر نى كورد يكمزدن روسيه كلياً مغلوب اوله رق احكام وصيتى اجرا و حرصنى اقناع ايدهمدى . بو دورلرده روسلرك كندى مقصدلر ينك قوه دن فعله چيقارلمسنى تسهيل ايدن موادك برنجيسى يوقارده سويلديكمز اوزره روم ايليده بولنان اهالينك قسم اعظمى قوميه ، ديانة روسلرله متحد بولندقلرى قضيه سيدر . فى الحقيقه روسلر مملكتتمز اهالى خريستيانيه سنك حقمز ده كى اغبرارندن بيوك بيوك استفاده لرده بولندى . فقط اسلا و آمال فاسده سنك نقطه استنادينك منحصرأ بو نقطه دن عبارت بولنديغى فكرينه ذاهب اوله جق اولورسه ق ياكليز . دولت عليه اداره داخليله سنده عصرلردنبرى دوام ايدهكلن عدم انتظام حكومت عثمانيه نك قوه زنده كيسنى كوندن كونه خللدار ايتديكندن بو تذبذب و اغتشاشك ايركچ كندى نائل مقصد ايده جكنه روسيه حكومتى اميد وار بولنيور .

روسلر بو انفساخ اداره منى رعنا كوردكلرى كى كوندن كونه

مملکتتمزده حکمفرما اولان فساد و انحلالک اسباب و منشائی دخی کمالیله
تشخیص ایتشلردر. بو دقیقه تاریخیه یی ایضاح ایدیه بیلیمک ایچون ماضییه
ارجاع نظره مجبور ز .

روسیه نك دولت علیه یه قارشى اتخاذ کرده سی اولان سیاست قدیمه نك
تمل طاشنى آتان بیوک پترو نك — بوذاته دلی پترو دینلرده بولنیور ! —
فکرینی اجمالاً قلمه آلدیغی وصیتنامه مشهورنده شو عباریه تصادف
اولنیور :

عثمانلی وکلاسنی الده ایتک ایچون اونلری پاره واسطه سیله صاتون
آلق لازم اولدیغی کبی بالخاصه سرای خلقنی و ممکن ایسه خنکاری بیله
او واسطه ایله مقصد مزه خدمت ایتدیرمک طرفنه چالشمیلیدر . «
دیور . (بو مشهور چارک کندی عصرنده دولت علیه اداره سی حقنده
سویلدیکی سوز بودر .) فقط بودولت ایله ایکی دفعه غالبانه محاربه ایدن
و بزی قاینارجه معاهده سنی امضالتمغه مجبور ایدن او وقت وکلاسندن
پرنس (رپنین) ه یازدیغی بر مکتوبده : « اوچنجی سلطان مصطفی نك
وفاته پک زیاده تأسف ایتدم، بوذات بزه چوق خدمت ایتدی ، چونکه
احق ایدی . عادتاً استراحت روحی ایچون عموم روسیه کلیسالرنده دعا
ایتدیره حکم کلیور » دیمش ایدی .

بو مکتوب برنجی محاربه اثناسنده یازلمش ایدی . ایکنجی محاربه -
دنصکره اوزمان استانبولده بولنان روس سفیرینه یازدیغی مکتوبده مواد
سأره دن بحث ایدرکن بردن بره تبدیل موضوع ایله : آمان سزه سویله -
مکه اونوتدم . یکی سلطان « سلیم ثالث » حقنده کرک اوروپاده و کرک

بوراده پك چوق روايتلر ايشيديليور، بو ذات پك ترقى پرور ايمش .
مملكتهك اصلاحي ايجون بزم پتروكي ممالك اجنييه دن اصحاب هنر و معا-
رف جلب ايدرك امور دواتى تنظيم ، احوال مملكتهك اصلاحي ايلمك
ايشتيورمش ، سزه اخطار ايدر مكه بوشايعه نك اصلى وار ايسه هر نه
واسطه ايله اولور ايسه اولسون تركلرى بوايشدن آليقويكز ، والا منع
اولنه ميوبده ختكارك آمالى حيز حصوله كلير ايسه روسيه ايجون پك مهلك
بر ضربه اولور ، بو مملكته حقندهكى تصوراتمز آلت اوست اولور ، بوكا
داثرسزدن درحال جواب استرم» ديه يازمىشدى .

ايشته شوايكي مکتوب خصم ازليمزك حقمزده بسله ديكي مقاصد
فاسده يي اييدن ابي اثبات ايدر . روسلر دائما ملتتمزك جهلندن ، اداره-
مزك تشوشندن ، بالخاصه شرق و غرب استبداد لر ينك مخلوط عجيبى بولنان
سرايلر مزك رخاوتندن ، مسكننندن ، سفاھتنندن ، شنايعندن ، مساو يسندن
استفاده ايتمشلردر ؛ اك زياده قورقدقلرى بر جهت وارسه اوده ممالك
عثمانيه سكنه سنك انكشاف افكار ايله تكمل ايلملرى احتما ليدر . روس
سياسيونى بونى هيچ بر زمان نظر دقتلرندن دور طوتمامشلىر ، ممالك
عثمانيه يه اصلاحاتك ادخال ايدلمسنيه اولانجه غيرتلىله چاشمشلردر ،
حتى بوندن قرق بش سنه اول روسلر ك قدس كليساسنك آنختارلر نى بهانه
ايدرك بزه اعلان حرب ايتمى وقعه خيريه دنسك ره ممالك عثمانيه احوال
عموميه سنده حس اولنان آثار صلاحك سر كاردنه بولنان عاليه مت و كلانك
دلايتيله ممالك عثمانيه ده اصلاحات مكمله اجرا اولنه جغنه روسلرده بر
قناعت حصوله كتير مسندن نشأت ايتديكي بو كون و نائق ايله مثبتدر .

اشته روسلر دلى پتروودنسكره بو ذاتك كوستردىكى طريق اوزرينه
دولت عليه نك محو و احساسنه كال غيرت و همته چالشديلر. فقط شو
مسئله حقنده قارئلر مزه برفكر تام ويرمك ايچون شونیده علاوه ايتمليزكه
زمان ايلر يلدكجه بونلرده دولت عليه يي اورتادن قالدرتمق آرزوسى دها
طوغرىسى بو ماده نك وجودىنى ارائه ايدر فكر كتدكجه تشدد و تكثر
ايتكده ايدى. چونكه صوك زمانلرده روسيه نك دولت عليه به بر
نظر خصمانه ايله باقمسنى مؤدى اسبابدن برىسى دخى پادشاهان عثما-
نيانك عموم اقوام اسلاميه جه خليفه رب العالمين وامير المؤمنين اوله رق
طانلمسى قضيه سيدر.

روسلر اوروپا ايلردن زياده اسلاملرله معامله ده خصوصيله محاربه ده
بولندقلرندن ملل اسلاميه آره سنده مقام خلافتك نه درجه مهم بر نفوذ
دينى و سياسى يي حائز اولدقلرىنى بيليرلر. بو جهتي دفعاتله تجربه دخى
ايتمشلر، و بوسيله مقام خلافتدن دائما احتراز اوزره بولنورلر كه صوك
زمانلرده بونلرك فكري اللرنده بولنان اسلاملرده اميد تخليصى بسبتون
امحا ايتك ايچون مركز خلافت اولان استانبولى استيلا ايتمى بهمه حال
لازمدر. بوندن ماعدا روسلرك دائما شرقه تعرض ايتملىنه سبب اولان
احوالدن برىسى ده كندى اعتقاد لر نجه مملكتلرينك وضعيت جغرافيه سى،
اقونومى قيه سيدر ديورلر كه ممالك محروسه ايله روسيه آره سنده كى بحرسياه
تماماً بر روس دكرى يعنى هر طرفى روسيه اراضيسيله محاط بر كول حالنه كير-
مدكجه مملكتتمزك احوال تجاريه و اقتصاديه سى هيچ بروقتده تحت امنيتده
بولنه مز. روسلر بوا منيه لر ينه نائل اولدكجه نه قدر ترقى ايديليرسه ايدلسون

روسیه اهالیسی معیشتنك بر بصق آلتنده بولنه جغنه ، جنوبی روسیه نك همیشه تعرض اعدایه معروض قاله جغنه قانعدرلر . بو مانعه لك رفعی منحصرأ استانبول بوغازینك الده ایدلمسیله ممكن اوله بیله جکی ذهنلرینه یرلشمش قالمشدر .

قارئلرمزه بالخاصه روسلرك بو صوك ملاحظه لرینی نظردقتدن دور طوتمامنی توصیه ایدرم ، چونكه بو نقطه مهمه یی کمالیله تصور ایده بیلنلر روسیه نك شرق مسئله سی حقنده حال حاضرده اتخاذ ایتدیکی ، مستقبلا ده تعقیب ایده جکی مسلك سیاستی سهولته ادراك ایده بیلیرلر .

هرنه ایسه ! . . . ایکی عصر دنبری روسیه نك درات علیه یه قارشى آلدیغی وضعیت خصمانه سی بوراده ده ایدی . فقط بو حكومتك خفی جلی آمالی ، مقاصدی بو مرکزده ایکن بونی منافع ذاتیه لر یله طبان طبانه ضد کورن بعض اوروپا دولتلری موجود ایدی . واقعا بو قسمی تشکیل ایدن اوروپا دولتلرندن هیچ بریسی منفرداً روسیه ایله اوغراشمق اقتدارینی حائز اولمادیغی حالده همدست وفاق اولنجه دولت مشارالیه نك تعرضاتنه برسد قوی چكمنك اقتدارینه مع زیاده مالک ایلر . اوروپا دولتلرینك همان عمومی اساساً سیاست اخیره یی التزام ایلدیلر ؛ شوقدرکه بو دولتلرك روسیه خلاف فکر لکنده ابراز ایتکده اولدقلری غیرت زمان ، زمان تغیر ایده رك بر دورده دولت علیه نك حامیسی بریسی ایکن دیگر بر دوزده بر بشقه سی اوله کلمشدر .

شرق مسئله سنده روسیه یه قارشواك اول مقاومت کوسترن وروس استیلاسنه ممانعت ایدن دولت فرانسه در . عصر سابقده روسیه سریراحتشامنده

بر شهرت فوق العاده مظهر اولان قاترینه قوه کليه ايله ممالك عثمانیه یوکلندیکی حالد بر دفعه سنده آوستریا ايله متفقاً دیکرند منفرداً بیوک بیوک ضایعاته کرفتار اولدقدن صکره دولتمزی دهشتلی بر دشمنک الندن قورتاره بیلمشدر. فرانسرلرک بو خصوصده کی خدمتی بالخاصه اون طقوزنجی عصر مبادیسنده بیوک ناپولیونک میدان شهامت وجلادتده غالبانه جولان ایتدیکی دملرده کورلمکده در. بوهنکامده ناپولیون روسیه یی متعدد محاربه لر ايله ایجه زده لد کد نصکره شرقه تعرضه مجال بر اقامش، محاربه نک ختامی متعاقب اون بش سنه امتداد ایدن دائمی بر مشغله ايله ضعیف دوشن روسیه اوزون بر مدت شرقه اولان تعرضاتندن واز کچمکه مجبور اولمشدر.

واز کچدی اما بو فراغت اضطراری ایدی، دائمی دکلدی؛ روسیه ایچون شرق مسئله سی مسائل حیاتیه عد ایدلایکندن، منافعه موافق بر صورتده حل ایتمکی اخص آمالی بیلیردی. براز دکلوب یورغونلغنی آلیر آماز در حال ادرنه معاهده سنی انتاج ایدن محاربه یی آچمشدر. فرانسه و آوستریا دولتلری بوهنکامده ینه دولت علیه نک تمامیت ملکیه سنک ابقا وادامه سنه خدمت ایتمشلردی، فقط تخمیناً بو اثنالرده اوزمانه قدر شرق مسئله سنده پی طرف قالمش بولنان دیکر بر دولت دهها مسئله مذکوریه بزم منفعت مزه اوله رق قارشمنغه باشلامش ایدیکه بو آندن اعتباراً مسئله شرقیه روسیه وانکلتره حکومتلری بیننده بر مسئله خصوصیه رنگنی آلمشدر. قطعاً دنیله بیلیرکه بوا یکی دولتک اختلاف منافی بر چوق ضایعاتدن صکره بیله دولت علیه تمامیت ملکیه سنک قسماً صیانتنه خادم اولمشدر؛

روسلر قريم محاربه سنده ، انكلتره ، فرانسه و تركيه يه مقاومت ايدە-
مديلر . مغلوب اولديلر . كنديلر چون پك فنا اولان صلح معاهده سنى
پارسده امضالمق مجبور يتنده قالديلر .

يو حال او مملكتك اداره سنى ، ايمپراطورك سرايندن بر كويلونك
قوله سنده قدر ، شدتله صارصدى . ملت و حكومت اسباب مغلوبيتى آرامغه
قويولديلر . اداره داخليله ده پك چوق فنالق اولديغنى ، تجديد قوت ايتك
ايچون اصلاحات جديده اجراسى الزم بولنديغنى اكلاديلر . اولانجه قوت
وعزمله بونك تاميننه صرف همت ايتديلر .

يكرمى سنه لك بر غيرت فوق العاده ايله بتون اوفالقلىرى ، تماماً ازاله
ايتديلر . هر شعبه اداره يى تنسيق و تنظيم ايتديلر . او عصر ك ايمپراطورى
بولنان ايكنجى آلكساندر ، فطرة عدالتپور ، و انسانيتلى بر آدم اولد-
يغندن ، قارشيسينه چيقمقدن چكنمين اعتراضات و موانعى اصلا سمع
اعتباره آلدى . تخميناً يكرمى درت ميليونه واران اهالى يى اسارتدن قور-
تاردى . اولنره رفاه ، سعادت و يردى . ملكده عدليه يى ، نافع يى صنا-
عت و تجارتى ، خاصةً بر وطن ايچون هر درلو سعادت و سلامت ك مهـد
و منبعى اولان معارفى تعميم و توسيعه اولانجه قدرت حيتـه كسترانه سيله چالشدى .
طرف طرف ملكى ، عسكرى ، رشدى ، عالى ، ابتدائى مکتبلر تاسيس ايتدى .
اساساً روس اداره حكومتنده او وقته قدر كورولمه مش بر صورتده
« اعتدال » اساسى وضع ايتدى . عسكرلكى يكي بر تمل اوزرينه بنا
ايدرك ضابطانك اكتسابات فنيه عموميه سنى توسيع ايچون پك چوق همـتـلر
ابراز ايتدى . صنوف ممتازهنك امتيازاتى محو ايله مساوات عموميه يى

اعلان ، و روسیه یی یکی باشند بر حیات مسعوده ایله کامران ایلدی .
 فاصله سز یکر می سنه دوام ایدن بوعزم و غیرتک نتیجه سی ، روسیه -
 نك اداره داخلیه سنی مطلوبه موافق برحاله کتیردی . بو ، روسیه خارجی
 پولتیقه سنك اس الاساسی اولان شرقه تعرض مسملکنی دخی تعقیبه وقت
 وقوت ویرمش ایدی .

مسرودات سابقه دن پك قولای آکلاشیلیرکه : روسیه ، دلی پترودن
 صکره تکمیل آمال سیاسییه سنی « شرق مسئله سی » نك یعنی : استانبولی
 کندیلرینه پای تخت باقمق ، و ممالک عثمانیه یی استیلا ایتک قضیه سنك
 حلنه بذل ایتدی .

بوفکر روسیه ده کیتدکجه ملی بر مسئله اولدی . بوعصرده عسکریه
 وخاصةً معارف عمومیه توسع و عموم مملکت ترقی ایتدکجه « شرق مسئله -
 سی » فکری عوام اهلینک بیله دماغلرینه ایجه یرلشدی ، دها صکره -
 لری تخمیناً (۱۸۴۰) تاریخلرنده روس هیئت اجتماعیه سی ایچنده یتشمش
 استیلا پرور عقلا ، عصرک فکرمومیسنی دها زیاده انبساطه کتیره رک ،
 اورته ده بر پان اسلاویزم فرقه سی میدان کتیرمش ایدی . بو فرقه شرق
 مسئله سنی اسکی حدودنده براقمدی . دنیاده نه قدر اسلاو وار ایسه
 هپسنی روسیه نك تحت حکم ونفوذنده بیوک بر قوت واحده تشکیل ایتک
 فکرنده بولندی . بو مقصدک اجرایی ایچون روسیه مدنیت و ادبیاتی
 بر چوق قطعه لرده کی اسلاو اقوامی آره سنده تعمیم ، و خلق طبیعتیه
 جلب و جذب ایتک طریقنه کیردی .

فقط پان اسلاویزم فرقه سی ، وار قوتی ایله چالشمه یی شمیدیلک

هم جنساً و هم ده دیناً کندیلرله بر اولان عثمانلی اسلاولری یعنی : بلغار، صرب، بوسنه و هر سىك، قره طاغ عناصرى الله ايتىك و اونلرى تركلرك النىدن قورتارمى غيرتىنده بولندى .

روسيه حكومتى ايمپراطورنىقولانك زمانىنده پان اسلاولرك فكري نه اولديغنى ايجه آكلايخيه قدر و حتى آكلا دقد نصكره دى بعض مشكلات خارجيه - نى موجب اولور ملاحظه سيله بر مدت آنلرى تشويقدن و تزويد قوت ايتلرينه چالشمقدن چكنيور ايدى سه ده قريم محارب سندن نصكره بواجتناء بك يهوده لكى تقدير ايدرك پان اسلاويزم مسئله سنك ايلرى سورلمسيله روسيه حكومتىك شرقده اولان اصل و مقصدينى بك چوق تسهيل ايدى - جكنى آكلادى . و پان اسلاولره جدى معاونتلردن كرى طورمدى . اشته شوصورتله پان اسلاويزم سوزى ابتداى احوالده قورى بر نمايشدن عبارت كى ايكن كى كى شدت وقوت بولدى . فعليات مقرر و لازمه يه باشلامق ايچون (موسقووه) شهرنده بر پان اسلاو قوميتيه سى تشكىل ايتدى .

كليلى اعانه لر ايله آز زمانده قوت و اقتدار كسب ايتدى . او صره - لردى پان اسلاويزم قوميتيه سنك على و خفى شعبه لرى ممالك محروسه يه و جوار قومشولرك الكالرينه يايلىدى .

اسلاو و تبعه عثمانيه عائله لرندن بك چوق چوقلر روسيه مكاتبىنده تحصيل علم ايتد كد نصكره ، كندى مملكاتلرينه عودت ايدرلر ، اوراده كندى - يلرى مكاتبلر تاسيس و كشاد ايدرك عموم اهالى يه پان اسلاويزم فكري نشر ايلرلر ايدى . و قوميتيه لر روم ايلينك هر طرفنده بولنديرق اسلاو

اهالی یه ، ترك الندن یقینده قورتله جقلری ، و بوبابده روسیه حکومتك و قومیتلهرك دائما چالشمقده اولدقلری ، و قومیتلهرك صورت حرکتلری حقنده معلومات ویررلر ، لزومنده عصیان ایتك ایچون سلاح تدارکی ، و عصیانك موفقیات ایچونده دیگر بالمله تدابیرك وقتيله اخذ اولنمسی خصوصلرنده معاونت و تسهیلات کوستررلر ایدی که : تاریخی یازدیغمز زمانده روم ایلی ولایاتنده بولنان خرستیان عناصری قومیتلهرك تحت نفو-
ذنده بولنیور ایدی .

روسیهده اصل پاناسلاویزم ساعیلری آریجه برفرقه تشکیل ایدوب کندیلرینه مخصوص بیوک و مهم غزتهلره ، رسالهلره ، مکمل اداره -
خانهلره و دهها برخیلی وسائط مهمهیه مالک ایدیلر .

فرقه باشلی باشنه حرکت ایدیور ایدیسهده اقتضای احوالده حکو-
مته اخبار کیفیت ایدر ، وینه اوکی مواضعده حکومتك امر و اراءهسنه
توفیق حرکت ایلر ایدی .

فرقهیه روسیه حکومتك مراتب عالیهسنده بولنان پك چوق ذوات
التحاق ایتدی . قومیتلهرك علنی رئیسلی ایچنده قاتقوف ، آقساقوف
صکرهلری صرپ محاربهسنده عموم قوماندان بولنان جرنایف بولندقلری
کی ، هر نه قدر او صرهلرده رسماً قومیتلهیه منسوب دکلدیسهده خفیاً
قومیتلهرك بر رکن مهمی استانبول سفیری جنرال اغناتیف ایدی .

اشته سلطان عزیزك صوك دورینك نهایتنده روسیه بو حالده ایدی .
دوات علیه بالاده ذکر ایتدیگمز قدرته بولنیوردی که بو قارشی قارشییه
دوران حالر ، دولتمزه قریب محاربهسندن دهها دهشتلی بر میدان مبارزه

حاضر لمقدمه اولديغنى حکم ايتدرمکده و ظاهرأ کوسترمکده ایدی .



— دور سلطان عبدالعزیز اواخرنده سوء اداره —

خاندان آل عثمان — شهزاده لرك تربيه لری حقننده بعض ملا -
حظات — پادشاهك اواخر سلطنتنده مقام صدارت — محمود ندیم
پاشانك صدارتی — مدحت پاشانك صدارتی — حسین عونى پاشا
و بونك جهت عسکریه یه اولان خدمتی — احوال مالیه



بيك ايکيوز سکسان سنه سنده عالی پاشانك وفات ايتديکنى مقدم
سويلمش ايدك . بو تاريخ سلطان عزيز دورنده آيروجه بر دور تشکيل
ايدر . چونکه بو هنکامدن اعتبارأ پادشاه مشاراليه حضرتلرينك احوال -
لنده کوريلن اويغونسزلقلر بر چوق زمانلردنبرى تاريخ عثمانى ده مثلى
کورلمه مش و صورت اجراسى دخى خاطره امتدن چقمش بولنان بر حال -
دنه فاجعه يه ميدان ويرمشدرکه بز بونى ممکن اولديغى قدر محل مخصوص -
صنده مفصلاً ايضاح ايدجك ايسه کده اول امرده بو فاجعه يه سبب
اولان وقايى بالخاصه بونلرك اصل و منشأ نك زده اولديغنى بوراده
کوسترمكى مناسب کوريورز .

بوندن اول ميدان انتشاره قويدیغىغى و بالخاصه خاندان آل عثمان

احواله عائد اولان دیکر بر اثر مزده [*] بیک سنه هجریه سندنصکره بو خاندان نجابتیناه اعضاسنه مخصوص اولان طرز تربیه و معیشت حقنده شو یولده اداره کلام ایتشیدک :

« شهزاده عثمانیان آوان صباوتدن باشلایه رق خو'جه و لالارندن ایلریده پادشاه اوله جقلرینی اوکرنیرلر. پادشاهلق بونلرجه عددی میلیونلره واصل اولان اهالی بی یالکز کندی کیفلرینه تبعاً اداره ایتک اولدیغنی ایستمدکاری آدملری قوغوب ایستدکلرینی احسانلره غرق ایده بیلمکدن عبارت بولندیغنی و اهالی ذات هایونلری ایچون جناب حق طرفندن قول اولق اوزره یرادلدیغنی و دها بوکی نیجه خرافاتی ، و بر ملکی بر ملتی نالان و پریشان و اسیر ایتکه یرار بر چوق بندکلی عقللرینه محکم صورتده یراشدیررلر. یوقسه ملتک پادشاه ایچون دکل پادشاهک ملت ایچون منتخب و منصوب اولدیغنی نه بونلره بر سویلیان واردر، نه ده بونلر کندیلککلرندن آکلارلر. »

« بو عصرده دولت علیه پادشاهلرینه اک زیاده تقرب ایدن و بو ذوات محترمه یه ایستدکلرینی یاپدیران بندکان ، شهزاده لکلرندن بیلد- کلری طانیدقلری اوشاقلری، و بعضاً آنلری جهتمدن اقربا و تعلقات صایدقلری کوله لردرکه بونلر ایچون دولته پک زیاده امک و یرن و حقیله بو ملته خدمات جدیه سی سبقت ایدن ذوات فدا اولنه کلشدر. »

مطالعات سابقه مزه بوراده بر شی علاوه ایتک لازمکلیرسه دیه بیلیرزکه حکمداران عثمانیه نک احوال معروضه سندن اک زیاده متضرر

[*] رهنمای انقلاب . احمد صائب

اولان شعبه اداره دولت مقام عالی صدارت اولمشد .
چونکه كرك اداره كرك سياست سرایه اك یقین و اونكله اك زیاده
مناسبت و ارتباطده بولنان دائره بوراسیدر .

سرایك سیئات مذكوره سی یوقاروده ایضاح ایتدیكمز دور عزیز
اوائلنده هر نه قدر تأثیرات وخیمه سی کوسترمکدن حالی قالمیورسهده دور
اخیرنده تاریخده امثالی کورلمه مش بر رنك آلمشدر .

۱۲۸۸ تاریخنده وفات ایدن عالی پاشانك یرینه مشهور محمود ندیم
پاشا صدارته کلدی . بو ذات اون بر آیده عزل اولندقدن صکره یرینه
مدحت پاشا کچدی . مشار الیه سکسان بر کون صکره عزل ایدیلهرك
مهر صدارت رشدی پاشایه ویرلدی . مشار الیه دخی اون یدی کون
صکره مهر صدارتی اسعد پاشایه تسلیم ایتدی . اسعد پاشاده آلتمش بر
کون صکره عزل اولنه رق مقامی ، شیروانی زاده رشدی پاشایه براقدی .
متعاقباً حسین عونى پاشا و تکرار اسعد پاشا و بوندن بر قاج کون صکره
محمود ندیم پاشا او مقامه تکرار کلمشدر درکه تخمیناً اوچ سنه بر آى و بر
قاج کون ظرفنده وکلادن سکر طقوز ذاتك برر ایکیشر مقام صدارته
اوغرا یوب کچدکلى کورلمشدر . [*]

ایمدی بو حال اسف انکیزك ممالك محروسه دن ماعدا هیچ بر یرده
وقوعی ممکن دکلدر . بزده کورلمسی ایسه دمندنبری سویلدیکمز ماده دن
یعنی دور انحطاط پادشاهلرمزه مخصوص اولان فکر سقیمك ایجابات
ضرور به سندن و بو فکر سقیم دخی کوچوکلکلرندنبری آلدقلى تربیه

[*] اس انقلاب . احمد مدحت

مقتضاسنجه بن پادشاهم . ملك بنم . كيم نه قاريشير كې منطقه شرع شريف اسلامه مغاير اولان اعتقاد باطللك نتيجه طبعيه سندنذر .

اولكى زمانلرده هانيا دولتمزك هلال اجلانك اوج سطوت وعظمتدن بتون دنيايه نورار ، شمشه لر صاحديغي ، او اونوتلمز دملرده مقام صدارت ، خدمات دولته يرارقلر ابرازينه قادر صاحب اقتدار و لياقت اصحاب حميته منحصر ايكن صكره لري پادشاهلرك هوسات و مشتهيات خسروانه لريني اوخشار ، ريا و دسيسه ايله يشار بياغي مخلوقلر صدر اقباله چيقارلدي . بو ذوات مشئومه نك اكثريسي طبعاً مزيات اقتداري چكه مدكلرندن بو اوصافه مالك ذواتي مركزر حكومتدن دفعه اللرندن كلديكي قدر چالشيرلر ، و اكثر احوالده دخی موفق اولورلرايدي .

عالی پاشا امور دولته سلطان محمودك دست تربيتنده پرورشياپ اولش ذواتك اك صوكي ايسه ده مشار اليك وفاتي صره لرنده ينه او اصول تربيه ده يتشمش ، دولتك اصلاحني جداً آرزو ايدن و بو طريقده اقتدار و مهارت كوسترن ذوات وار ايدى . فقط سلطان عزيز اورالرده اوليوب ، مقام صدارتي اهلنه ويرمك دكل بو مقامه كندى كيف و آرزولريني موقع اجرايه كتورمك اوزره مقصد شاهانه يه موافق و كلادن بريسنى آرايور ايدى . زماننده انتخاب ايتديكي ذات دخی محمود ندیم پاشا اولدى . بو پاشا ، خدمات دولته مقام بالايه واصل اولان بر ذاتك اوغلدير . كنديسي ده كوچوكلكه نبري امور دولته بولنش ايسه . ده اخلاق و افكارى مطلوب درجه ده اولمقدن پك اوزاق ايدى . ذره قدر حميت مليه سي اولمديغي شويله دورسون رعايت و حرمت عموميه يه

مظهریتی بیله دوشنمز بالعکس منفعت شخصی سنی ملک و ملتک ضرر-
 رنده، اقبال و سعادتنی یالکز پادشاهک حسن توجهنده بیلیر و عموم
 حرکات و افعالی یالکز بو اساسه بنا ایتدیرر ایدی. بالنفس غایت مر-
 تکب اولدینگی کبی ارتکاب و ارتشایه پادشاهی دخی تشویق و تشریک
 ایتمکدن کرو دورمز ایدی. مشربی بکتابی و درویشانه مخصوص اولان
 برطرزده اولوب عیش و نوشه میال ایدی. دور عبدالعزیزک اواخرنده کی
 سیئات بوذاتک مقام صدارته آیق باصدینگی کوندن اعتباراً باشلامشدر.
 صدارتنده سوزده اصلاحات اولق اوزرینه عمومی بر تنقیحات
 اجرا اولندی. حقلی حقسنز (اکثر احوالده غرض شخصییه بنا))
 اداره دن بر چوق مأمورلر طرد ایدلدی. ایچلرنده اوتوز قرق سنه خد-
 مت دولته مستخدم و بشقه صورتله اسباب معیشتنی تدارکدن عاجز بر
 چوق ذوات وار ایدی. اکر بو تنقیحاتدن خزینۀ دولتهجه بر فائده
 حصوله کلسه ینه بر شی سویلمک ممکن اوله مز. حالبوکه او یله اولمادی.
 تنقیحاتدن مالیه جه ایدیلان تصرف در حال سرایلیرک التماسلیریتته ویر-
 لدی. بر چوقلرک معاشلرینه ضم اولندی. یالکز اورته ده مدهش بر
 حقسنزاق روا کورلدی.

ینه محمود پاشانک صدارتنده ایدیان فناقلردن بریده روم ایلی شمندو-
 فر امتیازاتنک نمسه لی « بارون هیرش » دولته غایت آغیر و امثالی دنیاده
 نامسبوق شرائطله مضر بر صورتده ویرلمسی اولمشدر.

بو امتیاز سایه سمنده سرای حشراتی بالذات صدر اعظم و خلیجه
 توابعی داخل اولدینگی حالده قومپانیه دن کلیتلی رشوت آلدیلر.

سلطان عزيزك محمود نديم پاشايه توجه و محبتى دركار اولوب بوده
پادشاهك هر آرزوسنه موافق و اطاعت كوسترمسندن و برده آتيا ايضاح
ايديله جك ديكر مواددن ايلرو گللكده ايديسه ده بعض احوال مجبره
بالخاصه اهالينك خشنودسزلغى اك صكره محمود نديم پاشانك عزليله
مشهور مدحت پاشانك اقامه سنه ذات شاهانه نى ناچار براقشدر .

مدحت پاشا حضرتلرى بو تاريخلرده تخميناً اللى ياشلرنده ايدى .
خدمت دولته اك كوچوك پايه دن اك بيوك مقامنه قدر يوليله و بلا التماس
ايلريليله رك ترقى ايتمش . سلطان عزيزك اوائل سلطنتنده رتبه وزارته
قدر واصل اولمش ايدى . بوذاتك اقتدارينه يول آچان و اشتهارينه سبب
اولان ماده طونه ولايتنده والى بولنديغى زمان اجرا ايتديكى اصلاحاتدر
روسلر هميشه دولت عليه نك پریشانيتندن استفاده ايتمك طريقى
غائب ايتمكلرينى و اكثرى احوالده بو پریشانيتدن استفاده ايتمكدن
كرى طور مدقلرينى محل مخصوصنده سويلمش ايدك . مدحت پاشا
روم ايلیده وال بولنديغى زمان دخی بو حالدن استفاده ايتمك اوزره او
حوالیده ساکن عناصر خريستيانیه نى بالخاصه بلغارلرى فساد تشويق
ايتمكدن كىرو طور ميوردى .

مدحت پاشا طونه واليلكى كى نازك و مهم بر مأمورى ، اوزرينه
آلدقد نصكره برمدت مقامنده ، روسلرك اوتة دنبرى بيلدكلرى يعنى هيچ
برشيدن خيرى اولميان اسكى ترك واليلرى كى اوطوردى . فقط بو ائشاده
خفياً منبع فسادى و بوكا علاقه سى بولنان ذواتى آراشدير مقله مشغول ايدى .
نهایت ايستديكنى آله ايتدكد نصكره فسادك انكارينه روسلرك مجاللرى

قالیه جق درجدهده ایشی اورتهیه قویدی. روس خفیه وفساد مأمورلرینی یولیه محاکمه ایدرک لازمکلان جزالرینی ویردی. بو فساده قاپیلان بلغار قومیه اعضالرینی دخی کذا یولیه محاکمه ایدرک بر چوقلرینی روس قونسولسلرینک و سائر اجنبی مأمورلرینک مواجهه لرنده آصدیکه، پاشانک بومهارتنه اولوقت اورو پا مطبوعاتی حیران اوله رق کندیسنی آقشلادیلر. بو صورتله طونه ولایتی آز بر زمانده دوزلدی. روسلر فساددن عاجز قالدیلر. و بویله کیدرسه برایش یاپامیه چقلرینی آکلایه رق وار قوتی یازویه و یروب استانبولده وبالخاصه سرایده کی طرفدارلریله پاشایی کوچ بلا اورادن عزل ایتدیردیلر.

مدحت پاشا بوندن بر مدت صکره بغداد ولایتنه تعیین اولندی. اولوقت بو ولایت دخی پک قاریشیق بر حالده ایدی. پاشای مشارالیه حضرتلری اوراده دخی آز بر زمانده انتظام واسایشی یولنه قویدی. مملکتی شقاوت و امنیتسز لکدن تطهیر ایتدی. ولایت دروننده عرب قبیله لرینی سرعتله بالتأدیب دائرة اطاعته سوقدی. فرات نهرنده واپور قومپانیه سی تأسیس ایلدی. غایت منبت بولنان بو ولایتک تجارتته دیکریکی طریقلا آچدی. والحاصل ولایتک منظره عمومیه سنی دکشدیردی. بو ولایتی ازهر جهت ترقی و عمرانیه سوق ایتدی.

مدحت پاشا اول دورده موجود وکلاییننده امثالسز بر غیرت و اقتداره مالک ایدی. مشارالیه دن هر کس دولت ایچون خدمت عظیمه بکلیور ایدی. بو جهتی شهه سز هر کس دن ایو کندیسنی بیلیر ایدی. بونک ایچون اولمایدرکه ولایتلرده بالخاصه بغدادده بولندیغی زمان مرکز حکومتده نه

کې احوالی جریان ایتمکده اولدیغنی دائماً خبر آلیر و بو حاله قارشو انتباه و انتظارده بولنور ایدی . بناء علیه عالی پاشا وفات ایتدیکنی خبر آلیر آلماز استانبوله کندیسنی آتمق طرفنی دوشندی . بو ائناده ایسه محمود ندیم پاشا صدارته کچمش ایدی . مدحت پاشا بو ذاتک اخلاق و اطوارینی ایوجه بیلدیکندن شاید بر مدت صدارتده قالیرسه احوال دولتک پریشان بر حاله کله جکنی دوشونوب همه حال اونی عزل ایتدیرمک جهتنی قوردی . و احوال عمومیه نی کوزلجه وزن ایتدکدنصکره بلا استیدان بغداد دن استانبوله طوغری حرکت ایتدی . اثنای راهده کیرویه دونمک ایچون برقاق دفعه کندیسنه آوامر عالیه تبلیغ ایدلمش ایدیسده بر چوق بهانه لر ارائه سیله توقف و عودتدن بالا جتناب نهایت استانبوله واصل اولدی . در حال حضور شاهانه یه چیقارق نه یاپدی ایسه یاپدی . عالی پاشانک وفاتندن اونبر آی صکره مقام صدارته کچدی .

ایشته مدحت پاشا بو صورتله مقام صدارته کچدی . فقط نه فائده سی وارکه مقام صدارتده چوق او طوره مدی . . . چونکه سرای ، منفعت و اقبال قیدیله سرایک اطرافنده طولاشمقدن کیر و قالمیان وکلای نخام (!) حضراتی مشارالیه حضرتلرینه حسد ایدرلر ، اقتدار و نفوذندن قورقارلر ایدی . بو سببله سکسان بر کون صدارتده قاله بیلهرک عزل ایدلدی . و حتی استانبوله او طور می دخی جائز کورلمیه رک طیشارویه کوندرلدی . مشار الیهک بو منفیلکی چوق زمان سور میوب ینه در سعادتده عودته موفق اولدی . کلدی .

مقام صدارتده کندیسنی استخلاف ایله ین رشدی ، اسعد پاشا لر و سائر

دخی اقتدارسز وکلادن اولیوب کندیلرینی حریت اداره ایله اوزون مدت مأموریتلرنده ابقا ایدلمش اولسه لر دولت و ملت ایچون خدمات حسنه ابراز ایلیه جککری محقق ایدی . فقط مسئله بو صورتله اولیوب هر بری ایشه تثبث ایدر ایتمز یوقاروده سویله دیکمز اوزره سرایدن کلن براراده ایله آز زمانده عزل ، طرد اولنوب یرینه بشقه لری کچور و بو سیئات بویله جه دوام ایدوب طور یوردی .

بو دورده امور دولت ایچون آثار نافع و وجوده کله مه یشی وکلای حاضره آراسنده اصحاب اقتدارک مفقودیت و یاقلتندنناشی اولیوب بو قباحتک یالکمز سرای هایوندن نشأت ایتدیکنه دائر دلائل کافیه و واضحه واردر . از جمله بو زمان وکلا سندن حسین عونى پاشانک مقام سرعسکری بی آراق آراق اشغالی سایه سنده اردوی هایونه ایتدیکی خدمات عظیمه قولمزه الک کوزل بره اندر .

حسین عونى پاشانک مسقط رأسی اسپارته در . اولامملکتده علوم شرعیه و عربیه بی تحصیل ایتمش مؤخرأً مکتب حربیه نك ایلک تأسیس اولندیغی تاریخنده استانبوله کله رک بورایه دخول ، بر قاق سنه صکره تخمیناً اوتوز یاشلرنده ارکان حرب یوزباشیلغی ایله مکتبدن چیقارق خاصه اردو- سنه تعیین اولنش ایدی . کیت کیده معلومات عسکریه و ذکاوت فطریه سی سایه سنده ترقی ایدرک آز بر زمانده مشیرلک رتبه سنه قدر واصل اولمشیدی . مشار الیه حضرتلری ۱۸۶۵ سنه میلادیه سنده وقوعه کلان کرید اختلالنه اولاً ، سردار عمر پاشانک معیتنده و بعده مستقلاً ابراز ایتدیکی لیاقت کندیسنه سرعسکرلکه قدر یول آچمشدی .

فقط عالی پاشانك وفاتند نصكره محمود ندیم پاشا صدارتنده حسین
عونی پاشا بو ذاتك حرکات دنائتکارانه سنه بعض خصوصده مقاومت
ایتدیکندن صدر اعظمك طرفداری بولنان سرای حشراتنك همترلایله
اسپارتهیه نفی ایدلدی . فقط چوق کچمدن محمود ندیم پاشا دخی عزل
اولندقد نصكره اسعد پاشا صدارتنده استانبوله جلب و سرعسكرلك مقام
منه کچمش ، براز صكره صدارته بیله کلشیدی . فقط بوراده اوزون بر
مدت قالمدیغی کبی صدارتدن عزل اولندقدن صكره محل مخصوصنده
تفصیلاً ذکر اولنه جنی اوزره اولوقت عموم اداره دولته يك زیاده نفوذ
اجرا ایدن روس سفیری اغناتیفك غیرتیله سرعسكرلكدن بیله عزل
و والیدکله بروسهیه نفی ایدلمش ، فقط بر مدت کچدکدن صكره ینه وقت
حالك اجباریله عودت و تکرار سرعسكرلكده استخدام اولنمشیدی .
حسین عونی پاشانك احوال آتیه سنی صكرهیه براقه رق بوراده مشارالیه
حضرترلرینك متعدد دفعه سرعسكرلك مقامنده بولندیغی زمان اردولرمزه
ابراز ایتدیکی خدماتی بیان ایده لم :

بو دورده دولت علیه اردولرنده اك اول طوپیجی صنفنه اهمیت
ویرلدی . عمومیتله قروپ فابریقه سنك صوك سیستم طوپلری ایله تجهیز
و حیواناتك قوتلی و بو صنفك خدمتنه متحمل جنسندن آلمسنه دقت
ایدلدی . بواثناده طوپیجی ضابطانك صاحب معلومات و ممارسه
اولملرینه دخی اهمیت ویرلدی . استحکامجیلق دخی بوهنکامده خیلایجه
مظهرترقی اولدی . اردو مرکز لرینه متعدد خسته خانه لر تأسیس ایدلدی .
فقط بوراده دخی کوریلان بعض نواقص مثلاً سیار خسته خانه لرینك مفقودی

صوك روس محاربه سنده پك چوق مشكلاته و ضايعاته سبيت ويردى .
 پياده نك قيافته اهميت ويريلوب اك موافق لباس اولمق اوزره اولكى
 قيصره جاك و كنيش پانطالون ، ستره و طار پانطالونه تبديل ايديلهرك
 بو خصوصده اوروپا عسكرينه تقليد ايدلدى . بوزمانده وقوعه كلان اك
 بيوك اصلاحات اول عصرده اردوى هايونك دنيانك اك مكمل سلاحي
 اولان آمرىقانك مارتين تفنكريله تجهيز ايدلمسيدير .

معلول و اختيار ضابطان و مأمورين عسكريه ايتام و اراملك تامين
 اعاشه سى مقصديله (عسكرى تقاعد صندوقى) تاسيسنه موفق اولندى .
 حسين عونى پاشانك اردولرمزه قارشو ايفا ايتديكى وظيفه و خدمت
 يوقاروده سويلديكمز مواددن عبارت دكلدر . كنديسنه مخصوص اولان
 ذكاي عسكريسيله ضابطان و امراي عثمانيه آره سنده اك زياده مستعد
 و صاحب اقتدار اولانلرى سچوب اونلره كنيش بر صورتده طريق ترقى
 و تفيض آچارق عثمانلى اردولرنده بويله مستعد ذوات يتشدرمشدركه
 روس محاربه سنده دولت عليه نك بر قاچ موفقياته نائليتله ناموس مى
 و عسكرى بي محافظه ايده بيلمسى آنجق بوسايله ده اولمشدر .

مع هذا اداره دولتك بر شعبه سنده نه قدر اصلاحات اجرا ايديليرسه
 ايدلسون بوماده مملكتك احوال عموميه سى مطلوبه موافق صورتده
 جريان ايتمسنه پك آز تاثير ايده بيلير . بونك حصوليچون هر شعبه
 اداره بي اصلاحه كافى آيرى آيرى منتظم پلانلر و صورت مطلوبه ده اجرالى
 ايچون وجودى الزم وسائطك نه اولديغنى ارائه و تعيين ايليهرك مشتركاً
 فعليته باشلانمى امور ضروريه دندر كه عكسى تقديرده نه قدر فداكارلقلر

اختیار اولنسه بوشنه کیدوب نتایج لازمه و مطلوبه یی میدانه کتیره میه-
جکی احوال مجربه دندر .

یوقاروده سویل دیگمز فکرک طوغریلغی شعبه بحریده ده دخی کوزه
چارپار .

دور عزیزینک نهایتده احیاسنه غیرت ایدیلن بر جهت وار ایدیه
بوده دولت علیه نک قوه بحریره سی ایدی . لکن ایشک ظاهریات و مادیاتیه
اکتفا اولندیغندن بونجه امک و غیرتله ، فوق العاده همترلر مطلوب ثمره یی
ویره مدی . فی الحقیقه بو زمانده دوات علیه دونمائی قوت و مکملیتجه
عموم اوروپا دولتلری آره سنده اوچنچی درجه ده ایدی . بیوک ، کوچوک
یکرمی بش قدر زرهلیمز ، بر چوق سفائن نقلیه من وار ایدی . بو مقدار
اول عصرده دیگر حکومتله بالخاصه روسلرک قوه بحریره سنه مقابله
ایتمکه کافی ایدی .

بوراسی طوغریدر . فقط شوراسی ده قابل انکار دکلدرکه بحریره
عثمانیه بومکملیت ماده سی قارشوسنده جهت معنویه جه صفر درجه سنده
براقلمشیدی . فکر منی ایضاح ایده لم :

اوروپادن کلیتی استقراضلرله قوه بحریره عثمانیه ماده بر حاله کتیر-
لیدی حاله بونلری استعمال ایده بیله جک معلوماتلی ماهر و تجربه لی
ضابطان جهتی هیچ دوشونلمدی . اکر او زرهلیلردن بردانه سی ایچون
ویریلن مبالغ بو تحصیل و تعلیم جهتنه صرف اولنسه ایدی قوه بحریره من
اصل اوزمان جدی و حقیقی بر صورتده تکمل ایتش اولوب ، دونمای
عثمانی روس محاربه سنده ایشه یرایه رق قورو بر او یونجاق مشابه سنه

ایتمز ایدی . بونلری ده کچه لم :

بودورده هر دولت ومملکتک روحی بولنان مالیه یه نقل کلام اولتنبجه

تصور ایدیلهمیه جک قدر فنا بر حالدہ بولندیغنی درحال خبر ویرملیز .

دولت علیہ ده استقراضلره سلطان عبدالمجید زماننده باشلانیدیغنی

اولجه سویلمش ایدک . بوهنکامده خارجدن ایدیلن استقراضک

یکونی اون میلیونه قدر واردیغنی کی داخلده کی دیونات دخی او مقداره

اولاشمشیدی .

سلطان عبدالعزیز دورنده ایسه استقراض یکونی هر سنه بیومکده

ایدی . زیرا بودورده استقراضه او درجه آیشیلمشدرکه مقداری آرتان

کلیتی آچینی قیامق ایچون استقراضدن بشقه هیچ بر شی دوشونلمز

ایدی . استقراض امراض دولته « دوی کل » اولمشدی .

آتیاً ارائه اولنان شو استاتستیقه بر عطف نظر ایدیلیرسه سویلد -

یکمزک طوغری اولدیغنی میدانہ حیقار .

سلطان عبدالمجید وفات ایتدیکی هنکامده دولت علیہ نک دیونی

تماماً اوچیوز یتش بش میلیون فرانق اولوب بودیونک فائضی اون بش

میلیوندن عبارت اولوب ، رأس المالنک تأدیہ سی نامنده ویریلن پاره دخی

سکز میلیون فرانقدن آشاغی دکلدر .

سلطان عبدالعزیز مرحوم تختہ جلوس ایتدیکی زمان ایسه پیدرپی

ایدیلن استقراضی ارائه ایدن جدول بر وجه آتیدر :

تاریخ استقراض	فرانق
۱۲۷۹	۲۰۰
۱۲۸۰	۱۵۰
۱۲۸۱	۵۰
۱۲۸۲	۹۰
۱۲۸۳	۱۵۰
۱۲۸۵	۱۵۰
۱۲۸۶	۵۵۵ ۶۰۰
۱۲۸۷	۷۹۳
۱۲۸۸	۱۴۲ ۵۰۰
۱۲۸۹	۲۷۸ ۲۰۰
۱۲۹۰	۶۹۴ ۸۰۰
مجموعی « اون بر سنه ظرفنده »	۴ ۵۷۱ ۸۰۰

بویکون دولت علیه نك اوروپالیلره ویردیکی تعهدنامه لرده مقید بولنان مقداری اراءه ایدوب یوقسه آلتان پاره نك مقداری دکلدر . چونکه مثلاً یکرمی میلیون لیرا استقراض ایدلدیکی حالدده برچوق حسابلر تنزیل ایدیلهرک بعضاً سالف العرض مقدار پاره نك ربعی ، و یا خود نصفی دولت علیه خزینه سنه کیردیکی کورلمشدر .

اشته بالاده مذکور جدول بزه کوستریورکه ، دولت علیه سلطان عزیز تخته جلوس ایتدکن صکره هیچ بر سنه بی استقراض سنر کچیرما- مشدر . اوروپالیلر ایسه استقراضک یکونندن زیاده سیله قورقدقلرنندن کیت کیده تأمینات سنر پاره ویرمامکه باشلا دیلر . نهایت ویریه جک تأمیناتده قالمه مقله اوروپالیلر دخی پاره ویرمنز اولدیلر . حال بو پرسه یه کلوب باب استقراض قپانجه ارباب دانش بشقه درلو چاره لر تحریر سیله اوروپایه دیگر تأمینات کوسترمک فعالیتنه کیردیلرکه بو تأمینات کویا

استقراضاً آنه حق پاره لر ممالك محروسه نك هر طرفنده شمندوفر يابه جغنه هر كسى اقناع ايتمك اولدى .

صالت خوليادن عبارت اولان بوكوسترشلىر ، احوالمنزه تماميله واقف اولميان اوروپايليرى قولايجه آلداته بيلدى . بوسايله ده دخی بر قاج استقراض دها ياپيلدى . فقط بو پاره دن آنجق آصريقايه بر قاج يوز بيك مارتين تفنكلرى اصهارنه بيلوب شمندوفر نامنه حيدر پاشادن اذميده قدر يالكز طقسان كيلومتره بوينده بر خط ياپيله بيلدى . اوست طرفى اولكيلر كى ينه سرايك سفاهتى اوغرينه اريدى كيتدى .

بو او يون اوروپا غزته لرينه عكس ايدرك اوراده بيوك كوراتى قوپدى . آرتق بونام آلتنده دخی دولت عليه يه پاره ويرمامكه قرار ويرلدى . شو صورتله دولتك ناموسى و حيثيتى برباد ايدلدى .

بيك ايكي يوز طقسان بر سنه سنده دولتك ديونات خارجيه سى ايكي يوز اللى مليون ليرا راده سنده ايدى . داخنده دخی قونسليد كليتلى مقدارده موجود ايدى . دولت وارداتنك اوچده ايكي سى يالكز بورجلرك فائضنه كيديوردى .

بيك ايكي يوز طقسان ايكي تاريخنده ، اسعد پاشانك صدارتنده ماليه نك دوچار اولديغى مشكلاتى دفع ايتمك ايچون آيريجه بر قوميسيون تشكيل اولنديسه ده بوده موجود اولان بحرانى بسبتون شدتلنديرمكدن بشقه بر نتيجه ويرمدى . او جمله دن اوله رق دولت عليه فيما بعد استقراضات و اسهام عموميه فائضلرينك آنجق نصفنى ويره بيله جكنى اعلان ايتدى . بالاخره بونك دخی امكانسزلىغى آكلاشلديغندن دولتك اعتبار

مالیه سی صوک درجه یه قدر تزلزله اوغرا دی .
ایشته سلطان عزیزک دورا خیرنده دولت علیه احوالی بو مرکزده
ایدی . فقط بو حاله تمامیه واقف اولمق ایچون دیگر جهته دخی عطف
نظر ایتک لازمدرکه بو خصوصه دائر آتیده ایضاحات لازمه ویریه جکدر .



— سرای و روسیه سفارتی —

دور انحطاطده وکلای عثمانیه — روس سفیری جنرال اغناتیف —
محمود ندیم پاشانک بو ذاتله اولان مناسبتی — سلطان عبدالعزیزک
روسیه سیاستنه میلی — تبدیل وراثت مسئله سی — بو خصوصه
پادشاهک بمض تشبثلری — جنرال اغناتیفک بو مسئله یه علاقه سی —
اغناتیفک دیگر انترقیقه لری — روم و بلغار کلیسالی



حیات داخلیه مزنی صدمات متوالیه سیله زیرو زبر ایدن بو دورده
دولت علیه نک معاملات خارجیه سنده کوزه چارپان فناقلردن بریسی
دخی اداره نک ال یوکسک طبقه اتنده یکدیگرینه کلیاً ضد ایکی فکرک
بولنمسیدر . برنجیسی بزه میال اولان و بو بابده کی توجهات پولتیقیه لرینی
دفعاتله اثبات ایدن فرانسه و انگلتره حکومتلرینه استناداً مملکتک
اداره عمومیه سی طریق اصلاحاته سوق ایتک ، ایکنجیسی ده بوفکرک

کلیاً عايننده اوله رق ممالك محروسه يي طريق تجدددن منع و بوزعم باطله تبعیه روسیه يي دولت عليه نك حامی طبعیسی طانیق قضیه لریدر .
بری احکام عصریه یه توفیقاً دولتی احیا ، دیکری اجرا آت مدنیهدن تغافل و بو بایده بلکهده بالالتزام تکاسل ایدیلهرک ملکی احکا دیمک اولان بوا یکی مسلك معلوم اولدیغی اوزره سلطان عزیز مرحومک دور اخیرنده ابتدار ایلر !...

وقعه خیریه دن صکره بزده منافع ملکیه ، منافع حکمداریدن یواش یواش آیرلمغه ، بر اصله راجع اولان شو ایکی فرع غیر مفارق بربرندن اوزا قلاشمغه باشلادی .

منافع ملکیه ؛ نه صورتله اولورسه اولسون ، دولتی عصرک آهنگ ترقیسیله نغمه ساز اولور بر تکمل و انتظام ایله اصلاح ایتک جهت ضروریه سنی کویسترمکده و بو خصوص حمیتپروران وکلای عثمانیه دن رشید و عالی و فؤاد پاشالر طرفدن مصرانه ایلری سورملکده ایکن ؛ سرای او جهتی قطعاً رد و دور قدیم ایله دور جدید آره سنده بر حد انفصال دیمک اهمیتی حائر اولان وقعه خیریه دن صکره بیله مملکتی ینه او اسکی استبداد ایله اداره ایتک استیوردی .

اک بارلاق مظفریات قهرمانیه ، اک مشهور مزیات حکمرانی یی مبا- هات شهرتپرستانه ، نحوت عظمت فروشانه سائقه سیله احراز و ابراز ایدن پادشاهلر ؛ کرک اجدادینک میراث سیف فتوحاتی اولان ملکک سلا- متنی و کرکسه اهل اسلامک سعادت یی بر لحظه دوشونمیه رک هر عصرک یتشدیره بیلادیکی وکلانک تشبثات خیریه لرینه جدی بر صورتده مقاومت

افكارينك ميدان تطبيقه عدم انتقالی ایچون الدن کلدیکی قدر ممانعت
 کوسـتردیـلر!... بو اوغورده اوغراشدیلر، اک صکره باب عالی ایله
 سرای آره سنده شدتلی مضاربـه لـرک میدان آلمسـنه سبب مستـقل اولدیـلر .
 اسمـلری یوقاروده لسان تجیل ایله ذکر اولنان وکلا بر حیات بولندجـه
 مجرد کندی علوهـمتلری سایه سنده مملکتـمز بر درجه صیانت اولندی ،
 روسلر بو دورده مقاصد فاسده لرینی اجرا ایده مدیلر ، فقط نه فائده سی
 وارکه ملـکه ملک الصیانه کبی کوندریلن بوا عاظم انزواگاه ابدیلرینه
 چکـلدکن صکره وار قوتی بازویه ویرن روسلر ، اولانجه دسائس
 شیطنتکارانه لری ایله صاحبـسز ملکـمزک اوزرینه یوکلندیلر . بر طرفدن
 عصرلردنبری ترکیا رجال و وکلاسنه قارشو کمال موفقیاتله استعمال ایده
 کلدکـری تدابیر مؤثره یی بو دورده تصادف ایتدیکی میدان سربستیده
 کمال مہـسارـتله قوللانـه رق سرايک اک مقبل پرورده سی ، پادشاهک اک
 کزیده بنده سی بولنان مشهور محمود ندیموف و شرکاسنی الده ایتدیکی
 کبی دیگر طرفدن ده پادشاه زمانک سمع شوکت و خیانتنه کمال خضوع
 و تملقله تقرب ایدرک تاج و تخت صاحبـلرینک خوشلرینه کیده جک
 طاتلی طاتلی سوزلرله : « بو ملک ، خاندان عثمانینک قلیجی حقیدر ،
 پادشاهلرک حقوقلری مقدسدر ، بولردن خطا چیقـمق ممکن دکدر ،
 ملتـه ایستـدیکنی یاپـدیره بیلورلر ، پادشاهلق ده بودر ، یوقسه ملک و ملتی
 اصلاح ایتـمک اهلینک کوزینی آچقدـر ، بونک فناغی بر مدت صکره
 کوريله جکدر . نامدار وکلا کزدن بولنان رشید ، فؤاد ، عالی پاشالرک
 صداقتلری مسـلمدر ، فقط سزه قارشو دکل ، ملتـه در . اولر ، وطنلرینه

کوردکاری خدمات سایه‌سندہ کرک داخلده و کرکسه خارجده نفوذ-
لرینک تزايدینه موفق اولدیلر ، بو ایسه شوکت شاهانه کوزه نقیصه در ،
سلطنتک شریک قبول ایتیمه جگنی خاطرلیکنر . اکر آرزوی شاهانه لرینه
ممانعت ایده جک بولنورسه روسیه ، خاندان عثمانینک اک صادق معینی
اولدیغندن سرایه معاونت ایتیمکی وظیفه بیلدیکنی « سویلدیلر!
سویلدیلرده! اک صکره مقاصد خائنه لرینه موفق اولدیلر
بو جهتک تفصیلی ایسه بروجه آتیدر :

دولت علیه‌نک انحطاطه یوز طوتدیغی زماندن ، یعنی : قارلوقجه معال-
هده‌سندن بو کونه قدر اداره‌سندہ کوزه چارپان احوال سیئه‌دن اک
مدهشی ، اوروپا دول معظمه‌سنک ملکمزده ، پک زیاده نفوذ قزانه -
رق ، استانبولده‌کی سفیرلری واسطه‌سیله دولتک دومننی ایستدکاری ، و
منفعتلرینک اقتضا ایتدردیکی طرفه چویرملری ، بویله هر بری بر طرفه
چکشدیروب سوروکله‌ملری ، و دولتی فنا بر اوچورومه کتورمکده اولملری
قضیه‌سیدر .

سرایدن بدأ ایله رجال دولتک ، و وکلانک ، علما‌نک و حتی تکمیل
عوام‌ناسک بیلہ ، بوصوک دورده فساد ، نفاق ، اخلاقسزلق کبی یالکنر
بری ، بر هیئت اجتماعی پریشان و محو ایتیمکه کافی اولان بر چوق فنا
خویلرله تلوث ایتملری اصحاب نظر و حمیتی تترتمکه کافیدر .
بوانقراض و زوال اخلاق ، مأمورین دولته کندی وظیفه ومسئو-
لیتلرینی اونوتدردی . یالکنر معیشت و منفعت شخصیه‌لرینی یولنه قویمق
ایچون هیچ برسوء حرکتدن چکینمز اولدیلر .

بو مدهش و اليم كيديشى اجنييلر ايله اولان مناسبات و معاملاتده
دخى تطبيق ايتمكدن چكنميه جك قدر ذلتلر باش كوستردى . منافع
دولت و امتى اجنييلره پاره ايله صاتمق ايچون بازارلغه كيرشمكلر ، بويله-
جه وطنى ، وطنداشلىرى تعميرى محال ضررلره ، سفالتلره اوغرا تمولر
امور عاديه دن صاييلدى .

هپ بو سويلدكلر من ، واقعا ، شمدى يه قدر مطبوعات عثمانيه يه
كچمش دكلدر . تاريخ عثمانينك هيچ بريسنده بو جهتك تفصيلاتنه تصا-
دف اولنه من . فقط او وقتك رجالي شو جرملرله اتهم ايتمك ايچون يوز
سنه دنبرى دولت عليه ايله مناسبات سياسيهرى پك قوى بولنان اوروپا
دولتلىرىنك يازمش اولدقلىرى ، وقتيله پك كيزلى قالمقده ايكن ، آرتق
كتمنده فائده متصور اولمامقله آشكاره اوردقلىرى اوراق مهمه سياسيّه ،
پك كافيدر .

خاصهً بو جهته اهميت ويرهك ، صاتون آلمقده چوق ايلرى يه
كيتمكده و چوق مستفيد اولان روسيه ديپلوماسيسى اولوب ، دلى پترو-
دن برى مركز سلطنت عثمانيه رجالي آره سنده كيزلى دوستلر وار ايدى .
بو ، روسيه دوستلىرى بولنان عثمانيلر ، شو عثمانلى دشمنندن عادتاً
تخصيصات آلدقلىرى پك قولاي اثبات اولنه بيلير . حقى بعض وئائق
تاريخيه يه نظراً : دولت عليه نك بو صايش « مسلك تخريب » نه سلوك
ايتديرلمسى دخى دلى پترونك ، او مشهور وصيتنامه سنده خاصهً توصيه
اولمشدرد . پترونك پروت نهرنده ، بالطه جى محمد پاشانك محاصره مدهشه-
سى ايچنده نوميده قالد ينى زمان پاره قوتيله كند يسنى و اردوسنى قورتارمى

وصیتنامه سنده بو جهتی تذکاره سبب اولمش اولسه کرکدر . چونکه :
او کوندن صکره روس حکومتی ، صاتون آلمق طریقنی اس قواعد سیاست
بیله رک ، کرک امورسیاسیه ده و کرک اثنای حربده کمال موفقیتله تطبیق
ایتمشدر .

بو سوزک حقیقتنه ده (۱۸۲۸) محاربه سنده ، وارنه قلعه سنک
پاره یه بدل تسلیم اولندیغنی بو کون ، روسلرک انکار ایتمه مکده بولملری
دلیل کتیر یله بیلیر .

وقعه خیره دن صکره اوروپا حکومتلرینک استانبولده کی نفوذلری
دها زیاده شدت و قوت کسب ایتمدی . دولتک اداره داخلیه سی ،
کیتدکجه فنالشدی . شو قدرکه : سلطان عزیزک دوری نهایتنه قدر
استانبولده روس نفوذی قوت بوله مدی . او زمان مقام اقتدارده بولنان
وکلار شید ، عالی و فؤاد پاشالر معلومات و اقتدار ایله متحلی بولملریله
روسیه نك دولت عثمانیه حقنده بسلاکلی مقصد تخریبه تمامیه واقف ،
واجبی پاره لرینه صاتلمق کبی دنائی ارتکاب ایده جک ادانیدن دکل
ایدیلر . یالکز ، خیر و منفعت عثمانیه یی کوزتدکلی حقنده امنیت تامه-
لری بولنان انکلاتره و فرانسه دولتلرینک پولتیقه لرینی محافظه ایتمشلر ،
وبوسایه ده قریم محاربه سی کبی پک تهلاکلی بر بلا ی عظیمی دولتک باشندن
دفع ایتمک موافق اولمشلردر . فقط یینه بوسایه ده درکه قریم محاربه سندن
صکره انکلاتره نك استانبول سفیری لورد رادکلیف ، وکلای عثمانیه یه
عادتا افندیلرک اوشاقلرینه ایتدکلی معامله دن چوق ده فرقلی بر معامله-
ده بولندیغنی ، او کونک اوراق سیاسییه سنی مطالعه ایدنلره معلومدر .

دها صکره لریده فرانسه ایمپراطوری اوچنچی ناپولیونک استانبولده-
کی نفوزی ینه اوسایه ده پک ایلری کیتمش بولنیوردی. فرانسه
نفوزینک مروجی صدر اعظم عالی پاشا ایدی. بو حال ناپولیونک
دوشمنه قدر دوام ایتدی.

عالی پاشانک وفاتندن بر قاج سنه اول روسیه استانبول سفارتنه
جنرال اغناتیف تعین اولنمش ایدی.

جنرال اغناتیف روسیه نک اولدقجه معتبر و اصل بر فامیلیاسنه
منسوب ایدی. باباسی مراتب دولتک اک یوکسکنه واصل اولمش، مجلس
ریاستنده بولنیور ایدی.

اوغلو، ذکا و استعدادی سایه سنده پک چابق ایلریلیه رک نسبتاً
دها کنج یاشده ایکن مهم، سیاسی مأموریتلرده استخدام اولنمشدر.
چین سفیری ایکن عالی پاشانک وفاتندن درت بش سنه اول
استانبول سفارتنه کلش ایدی.

اغناتیف شبهه سز، مهارتلی بر دیپلومات، و خصوصاً شرقده
روسیه مسلکنک اک قوی بر مروج و مدافعی ایدی. مقصده وصول
ایچون اک مدهش، و اک مذموم وسائطه مراجعتدن قاجینماز و چکینمز
ایدی.

اغناتیف، دولت علیه یه قلباً بسلیکی نیات خصمانه سنی عالی پاشا
زماننده اجرا ایده مدی. دولت علیه نک اداره داخلیه سنی و خاصه
سرایده وقوعه کلن احوالی عریض و عمیق تدقیق، آدیم آدیم تعقیب
ایدردی.

بوسایه ده آکلامش و حکم ایتشدی که : دولت عثمانیه پک یقینده دهشتلی بر بحرانه طبیعتیه اوغرایه جقدر . بو حکمنی تأیید ایدن مسئله ایسه : اول امرده پادشاهک بر چیلغیناقدن دیکرینه آتلامق ؛ دینی ، دولتی اصلاً دوشنمه مک کبی حالله پک مستعد بولندیغنی ، و فقط عالی پاشایه اولان انقیاد و حرمتدن ، و خاصه مشارالیهک آره صره تهدید - لرندن پک چکیندیکی ایچون اولانجه جنت و احتراصی ایله اورته یه آتیه - مدیغنی ، راست کلدیکنی ، و قوجه ملک کی کیفنه قربان ایده مدیکنی ، بتون آمال مخر بانه سنه ، بوسبيله بر جولانکاه وسیع بوله مدیغنی حس الیقین بیلیمسی ایدی .

(۱۲۸۸) تاریخنده عالی پاشا وفات ، و محمود ندیم پاشا مقام صدارتی اشغال ایدوبده ، سلطان عزیز پدرینک نظارت شدیدسندن قورتولش بر چوچق کبی اولانجه انهما کیله سوائق ذمیمه سنه منقاد قالدینی زمان آرتق اغنائیف کندیسنک دخی حرکت و فعالیت زمانی کلدیکنی پک طوغری اوله رق کشف ایتش ایدی .

محمود ندیم پاشا ، وکلانک دکل ، اک خسیس الطینه آدملرک ، اک آلچق جانیلرک بيله یاپه میه جنی ذلتلری ، دنائتلری ، منفعتی ایچون ، پاره ایچون یایمقدن اوتانماز و چکینمز ایدی . وجداننده ذره قدر غیرت وطنیه یوقدی . بوندن طولاییدرکه : وطنمزک خصم طبیعی و ازلیسی اولان بردولتک سفیرینه ، منفعت شخصیه سنک بلغ مابلغ تأمین ایدلمسنه بدل ، کندیسنی و عموم مهمام امور حکومتی تسلیم ایتک کبی بر جنایت عظیمه یی ، اصلاً بر تأثر و عتاب وجدانی طویمدن اختیار ایدردی .

او درجه یه قدرکه : عادتاً روس سفارتخانه سی، باب عالی اولمشدی. یاخود باب عالی روس سفارتخانه سنه طاشینممشدی .

اولجه ده عرض اولندیغی وجهله ، داتاً بزم صدراعظم لرك كندیلری بر مسلك صاحبی بولمیبوب دائماً اجنبی دولت لرك پولتیقه سنه تابع اولملری یکی بر شی دکل ایدیسه ده ، محمود ندیم پاشا کی اغناتیفك اسیری، وکویا روس مأموری ایمشجه سنه ، وکندی دولتی دولت عثمانیه اولمیوب (دولت چاریه) اولدیغی ظن و حکم اولنه جق قدر نادان و دنی حر- کتیر او وقته قدر هیچ بر وزیرده کورلمش خائنلکلردن دکلدر .

او زمانك احواله واقف اولانلره معلومدرکه : محمود ندیم پاشانك صدارتی زماننده عزل و نصب مأمورین کی صرف اداره ایشلری بیله اغناتیفك تنسیبینه قالمشدی . و حتی : بعضاً ایشنه کله یین مأمورلری طرد ویرینه بر ایستدیکنی نصب ایده بیلیردی . بویله سی ، استانبولده شمدی یه قدر هیچ بر سفیره نصیب اولمش قوتلردن دکلدر .

غرائب رزائلدن بریسی ده شودرکه : محمود ندیم پاشانك بو خصاتی كرك دیاراجنبیه و کرکسه داخلده آرتق چکلمز درجه یه کله رك ، اها- لیده باش کوسترن و کیتدکجه یوکسلن عدم خشنودی کورلتیلرینك دفعی چاره سنه باقلدیغی صهره ده ، خنکار محمود ندیم پاشایی عزل ایتمه که مجبور اولدیغی حالد بیله ، بو معزولیت چوق دوام ایتزدی . اورته لق براز سکونت بولدیغی آنده درحال ، یکیدن (سفارته) یعنی صدارته کتیریلیر ایدی .

ایشته بو نقطه ، بتون جنایات لئمانه ده سلطان عزیزك پارمنی

اولدیغنی، بشقه بر دلیله حاجت براقمدن اثبات ایدەجك قدر حاز
قوتدر. حقیقتده بوایدی. یوقسه محمود ندیم خان لئیمی نه درجه غدار
و تخریبکار اولورسه اولسون جنایات و تخریباتنه پادشاه اشتراك ایتدکجه
بر شی یپامیه جفی، و شبهه سز اجراسنه یلتندیکی جرائمك دهـا حین
تشبثده بیله جزاسنی کوره جکی طبعیدر.

اغنائیف، عالی پاشادن صکره، اگر استانبولده ایش کورمك
لازمسه پارهیه احتیاج بولندیغنی کندی حکومتته بیلدردی. و مبذولاً
صرف ایتك اوزره غیر محدود بر قره دی آچلمسنی قطعی صورتده طلب
ایتدی. موفق اولدی.

بو پاره نك جهات استهلاکیه سی اوله رق سفارت: بر طاقم خفیه لر
استخدام ایتدیکنی، وکلادن بر قاچنه: محمود ندیم و رضا پاشا لر کی
خبتایه دولغون و منتظم معاشلر و هدیه لر و یردیکنی و بوکا بدل ممالک
عثمانیه یی قبضه تسخیره آلمغه اوغراشدیغنی بیان ایتدی که: تاریخ صحیفه-
سنه کیرن او مردار او جانی اسمارك مرتبه ملعنتلری بر درجه یه قدر
بداهته چیقیدی.

تأثر عظیم ایله قید ایدرزکه: اسمنی بوراده آغزه آلمغه تأدب
ایتدیکنمز بر ذات علیه الشان، ندیموفك واسطه ابلایسانه سیله اولوئیاته
بولاشمش، روس هدیه لرینی، نه یه بدل اولدیغنی بیله رك، بر حظ و
سرور ایله قبول ایتمشدر. اغنائیف سرای داخلنده صوك درجه نافذ-
الحکم بولنان بو ذاتی کرانبها هدیه لرله قزانه بیلدی. بوبابده مادام
اغنائیفك دخی خدمتی بیوک ایدی. بر زمان اولدی که: مادام اغنائیف

ایله بو ذاتك معامله سی پك صمیمی بولندی . [*]
سلطان عبدالعزیز تخت عثمانی بی او قدر عظیم بر حرصله بنمسه مشدیكه
اصول وراثتی دخی تبدیل ایدرك كندندن صكره اوغلنك پادشاه اولمسی
الزام ایدردی . حتی صیق صیق محمود ندیم پاشایی صدارته كتیرمسی
بر جهتله ده بو التزام و مقصدینك اجراسنی ترویج ایده جکی و او بابده
چالیشه جنی ایچون ایدی .

تبدیل وراثت مسئله سی هر حالده پك زیاده شایان اهمیت اولدیغندن
بو بابده براز تفصیلات ویره جکز . بو قورونتی اساساً حرم هایونده بولنان
نسواندن حیقمشدر . موقع فعله كتیرلمسینه عالی پاشا زماننده بیله غیرت
ایدلمش ، و فقط كرك وكلا و كرك عالی پاشا طرفلرندن تصویب

[*] اشته بوراده كتابمرك مقدمه سنده سویلدیكمز ماده : یعنی وقایع
جدیده حقنده تاریخ عثمانیه ده معلومات رسمیه نك عدم وجودی و استانبول
اجنبی سفارتلرینك كندی حكومتلرینه ویره كلكلری معروضات مکتومه
و خفیله لرینك ، بو كونه قدر اورته یه قونلمدیغی قضیه سنی ، حس ایتدر .
مؤرخه پك بیوك مشكلات اعطا ایتكدن كری دورمقده در . شویله كه :
روسیه حكومتنك بو دورده کی سیاستی و جنرال اغناتیفك كرك روم ایلیده
كر كسه استانبولده کی انتریقه لری اك صكره روسیه ایله دولت علیه آره سنده
محاربه بی موجب اولوب بعدالحرب اولا آیاستفانوس ، بعده برلین ده مصالحه
اولندیغنی و بو صوك مصالحه شرائطندن روسلر زیاده سیله مكدر و مایوس
اوله رق محاربه یه سبب اولان ذواته لغتله یاغدر دقلری احوال معلومه دندر .
عموم روسیه نك بو زمانده هدف تعرضلرینه اك زیاده دوچار اولان ذات
ایسه بالطبع جنرال اغناتیف اولمشر . افكار عمومییه بونك اوزرینه زیاده سیله
یوكلندیکی كبی دشمنلری مدت سفارتنده کی صرفیات عظیمه بی ارائه ایله
ویریلن پاره لری سفیرك درجیب ایتدېكنی ایلرویه سوررك تهمت عظیمه ایله ده
اتهام ایدیورلردی . جنرال اغناتیف آرتق بو صوك تعرضه دایانه میهرق

اولمه‌مش ایدی .

پادشاه اعماق روحنده بسلا دیکی امل حریصی محمود ندیم پاشایه
آچدیغی وقت بونک عظیم بر روی قبول و ممنونیت کوردیکنی، و پادشا-
هک فکرینی تقویه و تأیید ایددجک سوزلرله قارشیلانیدیغی علاوه
ایده بیلیرز .

محمود ندیم پاشا، مسئله‌نک سهولتله حل اولنه‌رق موقع اجرایه
کتیرلمسی ممکن بولانیدیغی کویسترمکده ذره قدر تردده دوشمدی . چونکه
سلطان عزیزک بو حرصنی ترویج و تصویب ایدر کورونمکی، مقام و
منفعتنی محافظه و تأمین ایچون الزم عد ایتدی . یوقسه مسئله‌مبحوئه
تکمیل وکلانک و اهالینک خشنودسزلغنی، پک تهاککلی بر صورتده

« اغناتیف عائله‌سی روسیه‌نک اک زنکین عائله‌سیدر . » چار آلکساندردن
کندیسنی تحت محاکمه‌یه آلمسنی رجا ایتش ایدیسه‌ده بعض ملاحظاته مبنی
چار بوکا راضی اولمشدر .

بونک اوزرینه اغناتیف کندیسنی افکارعمومیه‌ده تبریه‌ذمت ایتدرمک
اوزره روسیه‌جه مشهور بر رساله قلمه آلمشدرکه بو رساله مطبوع اولیوب
ال یازیسیله یازلمش کیزلی اوله‌رق لازمکلان یرلره داغتمشدر .

عاجزلی بو رساله‌نی کورمدم . فقط مطالعه ایدن بعض کسه‌دن محتویاتی
ندن عبارت اولدیغی مسموعم اولمشسه‌ده بو موادک حقیقتنی تحقیق ایده-
مدیکمدن تفصیلات ویرمکی مناسب کورمدم . شو قدرکه روسیه‌نک کندی
سفارتنه بو ائنده ویردیکی مبلغ سنه‌ده ایکی میلیون روبله (ایکی یوز بیک
لیرادن) آشاغی اولیوب محمود ندیم پاشا و فامیلیاسنه ویریلن پاره وایدیلن
هدیه‌لر (کورکلر، روس آتلی) سنه‌ده اون بیک لیرایی تجاوز ایدرمش .
محمود ندیم پاشادئماعدا بویله هدیه‌لر قبول ایدن دیگر ذوات وار ایدیسه‌ده
صرفیاتک کلیتلی قسمی بشقه طرفلره کیدرمش . بیچاره سلطان عبدالعزیز
سراینده نهلر جریان ایتکده اولدیغندن قطعاً بی‌خبر اولدیغی محققدر .
مؤرخین مستقبله‌مزه شوماده‌نک تحقیقاتی صورت مخصوصه‌ده توصیه ایدرز .

دعوت ایدە جەڭنى پەك اپى تەقدىر ايدردى . فقط دىدىكىمىز كى مروج
فەكر سىلطانى كورىنەرەك ، پادشاهە ايدىن اپى يە قىرىت پىدا ايتەك ، بو
صورتە مەنەت شەخسىيەسى قەطئىيە كەنىش بر مەقياسدە قىزانمىق غەرتەندە
ايدى . و بو فەكرە ماتى پادشاهە كوسدورەرك آغىر تەلەكەر توليدىنە
باعث اولمىق احمالى دائىما موجود اولدىغى سويلە جەك قدر رىزانى فەكر
و بالخصوص پادشاهە صداقت كوسترە جەك مرتبە ھەيت مەجبولە اصحا .
بەندەن دىلدى .

پادشاه ايلە وزىرى ، ايشى بالاطراف قونشەيلەر ، مەدا كره ايتەيلەر .
بو بابدە كەندەيلەرنە ھەدەمەت ايدە بىلە جەك و ھەقىقەتە فائەدەسى كورىلە جەك
آدمەر ھەر ھالە اجنبى سەفەرلى اچىندە بولنە بىلە جەڭنى دوشەندەيلەر قىرار .
لشەردەيلەر . محمود نەدىم پاشا واسطەسىلە جنرال اغنايفە سويلەندى .
اغنايفە بو مەراجەتە پەك سويلەندى . و قىبول ايدەرك النەدن كەلدىكى قدر
چالەشە جەڭنى وەدىنى وىردى . ھەر ھالە موفەقىت كورىلە جەڭنى دىخى
تأمين ايتەدى . آنەجى دوعرى و ھەقىقت اولان شەودرەك : اغنايفە
پادشاهەك بو ھەرس و مەقسەندەن ، چویر مەكەدە اولدىغى فەرلەداقەر ھەسابنە
واسە بر مەيدان استفادە بولشەدر . چونەكە : بو ماھى سەفەر ، سىلطان
عەزىزەك بو مەقسەدى ، اھالى طەرفەندە پەك آجى رد و تەحقىر كورە جەڭنى ،
و اجراسنە قالەشەلدىغى ھالە داخەلە مەسلمانلەر آره سەندە بر اغتەشاش
عەظىم ظەھور ايدە جەڭنى و بولەن روسىيە اچون نەدر بىوك فائەلەراقتەطافى
مەكەن اولدىغى بىحق تەقدىر ايتەشەدى .

اشە : سىلطان عەبدالعەزىز ، محمود نەدىم پاشا و جنرال اغنايفە

تبدیل وراثت مسئله سنده هپ کندی چیقارلری حسابنه بر اتفاق خفی حاصل ایتدیلر. و چالشیمغه باشلادیلر. فقط بش سینه کمال غیرتله چالشلادیغی حالده موفقیتته بدل، کونلر ایلر یلدکجه مشکلاتک مرتبه سی تظاهر ایدیوردی. و کیتدکجه بو امید قلب آشوب، بر رنگ سیاه محاله بورینه رک اوزاقلشیوردی.

موانعک اک بیوکی و برنجیسی سلطان عزیزک اخلاقنده کی قورققلق. در. مسئله نک صاحب ناموس و حمیت وکلا طرفلرندن آکلاشلمسی و همان اهالی بیتنده شیوع بولسی، و ابتداری قولاقدن قولاغه فیصلدا. نهرق شکایت ایدیلیرکن، کپدرک پرواسزلق و انفعال کوسترن بر سربستلکله آپ آشکاره قونشملری، و چاره جو ایکنجی مانعه یی تشکیل ایدیوردی.

سلطان عزیز بتون بو موانعه رغماً مقصدینی اجرا ایچون شبهه سز اغناتیفک توصیه سیله بر قاچ تدبیره مراجعت ایتدی که، بونلر باشلیجه. سی اهالی یی بو فکره آلدردمق ایچون مصر خدیوی بولنان اسماعیل پاشایه؛ خدیولک او وقتته قدر بوخاندانک اکبرینه انتقال ایده کلکده ایکن دوغرودن دوغرویه اکبر اولاده انتقال ایتدیرلمسی حقنده فرمان ویرهش اولمسی و کندی اوغلو شهزاده یوسف عزالدین افندی یه اها. لی یی و بالخاصه عسکری ایصندرمق ایچون دخی پک چابق ترفیع مراتب ایتدیرک ده ا یکر می یاشنده ایکن استانبولده بولنان خاصه اردوسنه قوماندان نصب ایتسیدر. بر طرفندن ده اکرام و احسان ایله، ممکن اولدینی قدر ضابطان و امرانک محبتلرینی قزانمق تدابیرینی یوسف

عزالدين افندییه توصیه و تلقین ایدیوردی .

بوکی تدابیر ایلہ ، بر قاق سنہ چالشد قد نصکرہ اجرای مافی الضمیرہ
تثبت ایتک نیتندہ اولمقلہ برابر بعضاً استعجال ایلہ همان اعلان ایتک
بر قاق کرہ قرار و یردییکی ، و اکثریسنده جلوس و ولادت کونلرینه
تصادف ایتدرمش اولدینی حالده ینہ بعض مانعہ لر کوررک و خوفہ تابع
اولہرق و از کچمش و تأخیرہ مجبور اولمشدر .

او صرہ لردہ کوردیکی موانعک الک مهملری وارث مشروع سلطنت
سلطان مراد جضرتلرینک طرفدار ی بولنان انکلیر سفیرینک اظهار
ایتدییکی چین جبین ، و شیخ الاسلام افندینک فتوی و یرمسی قضیہ -
لریدر . دیگر طرفدن ده ایش کیتدکجه اهالی بیننده زیاده قیل و قالی
موجب اولیوردی . بو سائقه ایلہ و اهالی بی بر مرتبه دها ایقاظ و تنبیہ
مقصدیله بعض اصحاب قلب و قلم پادشاهک بونیت خفیہ سی حقندہ بر
قاق رساله نشر ایدرک اهالی یه متبصرانه داورانمق لزومنی اخطار
و سلطان مراد طرفدارلغنی شدتله اظهار ایتملردی .

سلطان عزیز نمره دار ظن ایتدییکی غیرت و تدابیر متخذہ نک عقا -
متنی حس ایدنجہ یکی امیدلرله یکی تدبیرلرہ مراجعت ایتدی . ولی عهد
سلطنت حضرت سلطان مرادی پادشاهلقدن فراغتہ راضی ایتک
غیرتنہ دوشدی . شہزادہ مشارالیه پک چوق نصیحتلر و یردی ؛ یالوار -
دی . آلدینی رد قطعی جوابیلہ او امکلردہ بوشه کیتدی . بو جهتدن
دخی نومید قالنجہ آرتق صوک تدبیر اولمق اوزرہ جنرال اغنائیفک
تکلیف ایتدییکی جنایتی قبوله لزوم و مجبوریت کوردی .

يوسف عز الدين افندى ولى عهد سلطنت اعلان ايديله جك ؛ اهالى ياخود وكلا وحقى عسكر طرفندن مقاومت كورلديكى حالده قرق بيك روس عسكرى استانبوله كيرك مقصد شاهانه يي جبراً اجرا ايتديره جك .
اغنائيف قرق بيك ودها زياده عسكر اوده سا ولايتده حاضر بولنديغنى ، استنلديكى زمان قرق بش ساعت ظرفنده استانبوله واصل اوله بيله جكاريني وعد و تأمين ايديوردى .

شبهه سز سلطان عزيز و صدر اعظم محمود نديم پاشا طرفلرندن تصويب و قبول اولنان شو تدبير پادشاه ايله وزيرك ، منفعتلىرى ايچون دولت عليه و ملت اسلاميه قارشى نقدر دهاش خائلكلره مستعد اولدقلىنى اثبات ايده جك بر بينه قطعيه در . فقط صدر اعظم خائى بو تدبيرك دخى اجراسى نقدر كوچ و بلكه محسال اولديغنى بيلديكى حالده نقطه نظرى و اقصى املى منفعت و اقبالى ، اولديغى ايچون اونك اغو- رنده اك صكره پادشاهنى بيله فدا ايتمكى تجويز ايدييور ، بر دقيقه جق سكتة منفعت بليه سنه اوغرامق ايچون وطن و پادشاهى بلالر ، فلاكتلر ايچنه يوواريقدن چكنميور ايدى . بالعكس قرق بيك روس عسكرى تدبيرى ايله مقصد مطلوبك سهل الحصول اولديغنى بيانله خنكارى تشويق ايديوردى .

سلطان عزيز ايسه موجود اولان بو تهلكه لره ذره قدر احتمال و يرميه جك درجه لرده كوزلى قرارمش ، عناد و اصرار ايله عادتاً چيلدرمش ايدى .

پادشاهى و وزيرى استديكى قدر اويناتهرق پايدوس بوروسيله برابر

کندی مملکتی ایچون « پارصه » طوپلامق فرصتی حاضرلقدن بشقه
بر شی دوشونمیهن اغنائیف، او یونی پک اوسته لقلی اداره ایدیوردی.
ذاتاً کندی مقصد اساسیسی اولان حکومت عثمانیه نی پریشان
و محو و ضبط فجیعہ سنی قابل اوله بیلدیکی قدر اجرا ایچون ساده بو
وراثت مسئله سیله مشغول دکدی. بو فاجعه المپیا ایچون هر کون ایجاد
ایده کلکده اولدیغی بیک درلو حیلہ لر و دیسیسه لر ایچنده بریسی ده
استانبولده کی بلغارلری روم پطریقنک ریاست روحانیه سندن آییرمق،
صکره بلغارلری سربستجه قوللانمق جهتی ایدی. بلغارلره آیری کلیسا
انشا و رئیس روحانی نصب ایدلمسینه باب عالیدن مساعده آلمغه موفق
اولدی. آز صکره روم ایلیده وقوعه کلن اغتشاشده دولت عثمانیه ایچون
پک بیوک رخته لر، مضرتلر ایقاع ایتدی. بلغار کلیسالی روسیه ده کی
پان اسلاوئزم قومیتہ لرینه یتاقلق ایتدیکی، صکره دن ثابت اولدی. ذاتاً
بلغارلر اوتہ دنبری روس خدمتکاری و دولت خا ئی اولدقلری معلوم
ایدیسه ده دولته صادق بولنان روم کلیسالرنده دشمنلقلرینی اجرایه بر
زمین مساعد بوله میورار ایدی.

بوصرده اغنائیف بر طرفدن ده دولتک مالیه سنده کی بجرانک
شدنی اوروپایه اشاعه ایتدی. بورجنک فائضی وارداتیلہ اوده ده
مقتدر اولدیغنی ادعا و اثبات ایدرک، حکومت عثمانیه نک رسماً افلاس
ایتمش طانمسی استدی. و قرضاً پاره ویرمش اولان سرمایہ دارانی،
و اوروپا افکار عمومیه سنی ترکلرک علیهنه قالدردی. بو بابده استعمال
ایتدیکی دلائل، شرقک احوالنه حقیله واقف اولیان یبانیچیلری اقناعه

کافی کلیوردی .

اشته : جنرال اغناتیف ، استانبول سفارتنده بولندیغی مدتجه
دولت علیه نك احوال عمومیه و خصوصیه سنی پك مكمل تدقیق ایدرك
و الندن كلدیكى ، كوچنك یتدیكى قدر هر شیئی قارشیدررق (دولت
علیه — روسیه) محاربه مستقبله سنك غلبه سنی روسیه یه تسهیل و تأمین
ایچون شو عرض ایتدیكمز صورتله اوغراشمقده ایدی .



— ممالك محروسه ده ترقیات فکریه —

وقعه خیریه نك معارف و ادبیات عثمانیه ته تأثیری — مكاتب
متنوعه نك تأسیسی — ممالك محروسه ده برنجی غزته — مطبعه جیلغك
توسیع و تزییدی — مطبوعات نظامنامه سنك وضعی — بونك نشریاته
اولان تأثیری — مصطفى فاضل پاشا و پارسده ایلک احرار عثمانیه —
احرارك ممالك محروسه ته عودتلی — ضیا پاشا، نامق کمال بك، علی
سعاوی افندی و ذوات سائر



سلطان عبدالعزیزك اواخر سلطنتنده ممالك محروسه اداره سنك اك
یوكسك طبقاتنده موجود سیئاتدن بریسیده بوایدی. فقط بو دورك
احوالنه تمامیه واقف اولق ایچون اهلینك بالخاصه منورالافكار قسمنك
سیئات مذکوره ته قارشو آلدیغی وضعیتی دخی آكلق لازمدرکه اشته
اولوقت بو دور حقنده بر فکرتام ایدینه بیلیمك ممکندر.

تاریخ عثمانیه ته واقف اولنلره معلومدرکه هر نه طرفدن تدقیق اولنورسه
اولنسون وقعه خیریه نك وجوده کلمسی ملت و دولت عثمانیه نك احوال
عمومیه سنه ماده و معنأ پك بیوك تأثیرات اجرا ایتمكدن کیر و دورمشدرد.
خاصة بو وقعه نك تأثیرات عظیمه سی معیشت عمومیه ده، بر صنف خلقك
منتظماً و تدریجاً توسیع معلومات ایتسنده، و بالخاصه معارف و ادبیات
عثمانیه نك یکی بر اساس اوزرینه بنا ایدلمسنده کورلمشدرد. بو تاریخندن

اعتباراً بزرده ولو آز مقدارده اولسون وكلا و رجال میاننده عصرک احتیاجات وظیفه‌سندن اولان معلوماته مالک ذواته تصادف اولندیغی کبی محررین عثمانیه ایچنده دخی یالکز شرقه مخصوص اولان مکتسبات علمیه ایله دکل اوروپالیلر مرتبه‌سنه و مدنیت حاضره‌نک اس‌الاساسی بولنان فنون متنوعه‌سنه واقف اولنلر دخی موجود بولنمشدر.

مع هذا بزرده بو ترقیات معنویه (بالفرض ژاپونیا لیلره نسبة) پک آغیر صورتده ظهور ایتمشدر. بونک سببی دخی اول امرده ممالک محروسه اداره‌سنده هیچ بر وقت اکیسک اولیان سرائیک خیره دکل شره اولان میلی، طبقات بالاده صاحب اقتدار بولنان ذواتک قیدسز - لغی دها دوغریسی بولنلردن پک چوقلرینک بو امره مهمی لایقیله تقدیر ایده‌مملری و بالخاصه عصرلردنبری دیگر مکتسبات، دیگر تربیه‌یه آشمش اولان ملتک یکی اصول ایله قولایجه کسب‌الفت ایده‌ممسیدر. مع هذا بو مشکلاته رغماً زمان ایلر یلدکجه ترقیات مذکوره‌نک کندیسنی کوستردیکی محققدر.

وقعه مذکوره‌دن اول بزرده یالکز دیانتیه و برازده اصول انشایه عائد علوک تحصیلنه اهمیت ویریلیر ایدی. فقط بوراده‌کی تدریسات اصول قدیم اوزره اولوب بغدادده خلفای عباسیه زماننده وضع اولنان اصولده جریان ایدیوردی. عموم مکتسبات علمیه‌ده غیر معقول و توسیع معلومات لازمه ایچون غیرکافی طرزده تحصیله دوام ایدیلیوردی. برقاج عصر اول یازلش بولنان کتابلرک مطالعه و اکتسابنه حصر نفس ایدیله - رک فنون جدیدیه و تعبیر اصحاه معارف غریبه‌یه اصلاً اهمیت اولنمیوردی.

حروفات مطبعه سی استانبولده برنجی دفعه اوله رق ۱۱۳۸ تاریخنده کشاد اولندیغی حالده علمامزك رغبتسز لکلرندن ودها دوغریسی بونلرک اختراعات جدیدیه اولان نفرتلرندن دولایی آزر زمانده ترك ایدلمش ووقعه خیرییه قدر، وحتی صکره بیله توسیع معارف ایچون غایت اهمیتلی اولان شو صنایعه ذره قدر اهمیت ویرلمش ایدی.

بو هنکامدن اعتباراً ایسه بزده، ولو مطلوب درجهده اولسون معارفه و بونکله مناسبت و ارتباط قویسی بولنان دیگر مواده سعی ایدلدی. هجرتك ۱۲۴۲ تاریخنده مکتب طیبیه وجوده کتیرلدیکی کبی سلطان سلیم ثالث زماننده اساسی وضع اولنان طوپیچی مکتبی دخی اصلاح اولندی. مبادی سلطنت عبدالمجیدده مکتب حربیه تأسیس اولندی. دها صکره بحریه مکتبی میدان کلدی. ینه بودورک آخرنده معادن مکتبی دخی وجوده کتیرلدیکه بونلرک جمله سی مکاتب عالیهدن معدود اولدیغی حالده ینه بو هنکامده بر قاق مواقع مهمهده اعدادیه و بر قاق رشديه مکتبلری تأسیس ایدیلرک معارفه اولان احتیاج بر درجهیه قدر استکمال ایدلدی.

سلطان عزیز دورنده بو طریقده ایدیلن غیرت ایسه مملکته اعطا ایتدیکی فوائد بناء بوندن آزدکلدر. بودورک مبادیسنده قبریسیلی محمد پاشانک غیرتیه مکتب فنون ملکیه وجوده کتیرلدی. اواسطنده ایسه بو کونکی مکتب سلطانیه تأسیس ایدلدی. واقعا بو مکتبک تأسیسنده کی همت حکومتک اولیوب اولوقت استانبولده پک زیاده نافذ الکلام بولنان فرانسه سفارتنک غیرت و تشویقی ایدیسدهده بو

مکتبک انتظامی دیگر مکاتب عثمانیه موقعنده اوله رق صکره لری پک چوق طلبه یتشدرمکه خدمت ایتشدر. بوراده کی تدریسات اولوقت فرانسز لسانی اوزرینه اولق اوزره قبول ایدلدی. فقط بوکا مقابل مکتب طبیه نك مبادی تأسیسنده بو مکتبده قبول اولنان لسان مذکور بوهنکامده ترکیه یه تحویل اوله رق طلبه کندی لسان مادرزادی اوزرینه تحصیله باشلدیلر. و ملکی اولق اوزره عین تاریخده مستقل بر ایکنجی مکتب فنون طبیه دها تأسیس اولندی. سلطان عزیز دورنده معارفه ایدیلن غیرت بونکله قالمشدر. بوراده کورینن غیرت اک بیوک متعدد اعدادیه ورشديه مکاتبک تأسیساتنده کورلمشدرکه فوائد عمومیه، وعوام ایچون کسب عرفان ایتک نقطه نظرندن بونلرک اهمیت بیوک مکاتب عالیهلردن دها افزون ایدی. بونلرک ساحه ظهوره حیقمسنه سبب اولان ذات محترم ایسه سلیمان پاشادر.

مع هذا بودور عزیز دخی دورمجیدی اواخرنده ممالک محروسه ده معارف و تحصیلک ترقیسنه خدمت ایدن ماده یالکز مکاتب متنوعه نك تأسیسی اولیوب اهالیدن بر چوقلرینک مطبوعات ایشنه کوستردکلری رغبتلر اولمشدرکه بوماده نك، عوام ناسک تنویر افکاری خصوصنده ایتدیکی تأثیرات جدیه مکتبلرک فوائدندن کیرو قالمز.

ممالک محروسه ده برنجی دفعه اوله رق میدان انتشاره قونیلن جریده ۱۲۴۱ تاریخنده از میرده Alexandre Blaque «آلکساندر بلاق» نامنده بر فرانسز طرفندن فرانسز لسانی اوزرینه چیقاریلن غزته در. فقط بو تشبث برنجی دفعه دکلدر. سلطان سلیم زماننده بیله فرانسه

حکومتی طرفدن استانبوله کوندریلن برفرانسز، بر مدت کندی دولتی سفارتنده غزته چیقارمشدرکه بو غزته نك محتویاتی اولزمان وقوعه کلن محاربه لرده فرانسزلرك موفقیاتلرینی توضیح و تفصیلدن عبارت قالمشدر. مع هذا بو فرانسزك همت و غیرتی ثمره سز قاهره غزته سی دخی قیصه بر مدت دوام ایتمشدر. صکره لری بشقه طرفدن ایدیلن تشبثات دخی ینه بو حالد بولنه رق یوقارده سویلدکمز و ازمیرده چیقان غزته دنماعدای هیچ طول مدت دوام ایتمشدر.

بو غزته نك اسمی مبادی تأسیسنده Spectateur de l'Orient ایدی. فقط صکره لری Courrier de Smyrne نامنه تحویل اولندی. مندرجاتی پك کوزل و وقت و زمانه موافق ایدی. احوال داخلیه مملکت حقنده اولدجه معلومات ویرر. بالخاصه بو هنکامده کمال شدتله دوام ایتکده اولان یونان عصیانیه زیاده سیله اشتغال ایدر و محاربه مذکوره حقنده سریع و دوغری معلومات اعطا ایلردیکه بوسبیدن اوروپاده بیله اولدجه شهرتی واردی.

۱۲۴۶ تاریخنده سلطان محمود حضرتلری بو غزته نك محررینی استانبوله جلب ایدوب معاونت مقتضیه ییده احسان بیوررق پایتخته Moniteur Ottoman نامنده بر غزته چیقارتدردی. بر سینه صکره ینه بو ذاتک تحت نظارتنده « تقویم وقایع » نامنده ترجمه بر غزته نشر ایتدردیکه بوا یکی غزته حکومتک جریده رسمییه سی مقامنده ایدیسه ده مبادی احواله اولکیسنک مندرجاتی ایکنجیسنندن فرقلی ایدی. « تقویم وقایع » یالکز حکومتک رسمی امرلرینی نشر ایدر و دیگر

مقالاتی قبول ایتمز « مونیتور اوتومان » ایسه احوال داخلیه و خارجیه به عائد مقاله لری نشر ایده کلدیکندن اوروپا لیلرک نزدنده باب عالینک رسمی مروج افکاری عد اولنوردی .

بو صورتله بر قاچ سنه دوام ایتدی . فقط ۱۲۵۹ تاریخنده اولکی غزته لردنماعدا استانبولده ترکیه « جریده حوادث » نامنده دیکر بر غزته موقع انتشاره قونلدیکه بونک مندرجاتنده وقایع متنوعه و اخبار رسمیه دن ماعدا خصوصی حوادثلر بولنوردی . بو سببدن آز بر زمانده پک چوق رغبت بولشدی . بو غزته دخی حکومتک غزته سی ایدی . فقط ده صکره لری حکومتله هیچده مناسبتی اولیان بعض ذوات استانبول و ممالک محروسه نک مهم مرکز لرنده غیر رسمی غزته لر آچمغه سعی ایتدی لرکه بو سببله سلطان عبدالحمید دورینک اواخرنده و دور عزیزینک اوائلنده ممالک محروسه ده وجوده کلن مطبعه لرک مقداری زیاده لشمش و کتدکجه آرتقمده بولنش ایدی . بر درجه ده که بودورک نهایتنده یاپیلن بر ایستادستیقده متنوع قطعانده نشر اولنان غزته لرک مقداری اوتوز نسخه دن زیاده اولوب ایچلرنده آیده ایکی اوچ کره هفته ده بر کره میدان انتشاره وضع اولنان درت بش مجموعه فنیه لر دخی واردی .

شو حال شبهه سنز وقعه خیریه دن صکره عثمانیلرده یواش یواش اولسون مدنیت حاضره لوازمات قطعیه سندن بولنان معارفک اخذیه اکتساب فیض و عرفان ایتک ایچون هوس و رغبتک اویانمش اولدیغنه بر دلیل قطعیدر . حقیقت حالده ده ایش بویله ایدی . بو زمانده یعنی سلطان عزیزک اواخر سلطنتنده کرک رجال و مأمورین ملکیه کرکسه

امرا و ضابطان عسکریه میاننده مکتبلرده آلدیغی تحصیل سایه سنده بر درجه یه قدر ترقیات مدنییه یی طامش ، و وطنداشترینه دخی بولدتی طاتدرمق استین ذوات وارایدی . حتی شو درجه ده که وقعۀ خیرییه زماننده کی مأمورین حکومت یالکز اوروپایه تقلیداً لباسلرینی دکشدر . مش ، ایفای وظیفه و خدمت ایچون لازملکن معلومات اساسیه دن تماماً محروم بولمش ایکن شمدی بونلر میاننده اصلاحات دولت ، و انتظام حکومت ، نه اولدیغنی آکلایان ممالک محروسه ده کی فنالغک اصل و منشائی بیلنلر چوغالمغه باشلامشدی . سوزمیزک دوغرولغنه یعنی بو دورده ملت عثمانیه ده ترقیات فکریه نک اویانمش بولمنسینه سالف العرض مأمورین دولتک احوال معروضه سی دکل آثار و مؤلفات علمییه و ادبییه . نک تکثر و تعددی دخی بر برهاندیر .

سلطان عبدالحمید دورندن اعتباراً بزده نشریات متنوعه تزایدیه باشلامشدر . واقعا بو نشریاتک اکثریسی صرف عالم اسلامیه عائد اثره . لردن عبارت ایدیسه ده آره صره اوروپا مؤلفات مشهوره سندن سائر بعضلریده ترجمه ایدیلهرک طبع ایدلمکده اولدیغنی کورلمشدر . ترجمه دن صرفنظر تخمیناً بو زمانده محررین عثمانیه دن بعضیلرینک مثلاً مشهور « احمدوفیق ، و صکره جودت » و سائر پاشالر کی هم معارف شرقیه هم مکتسبات غربیه یی نفسنده جمع ایتمش و کندیلرینه مخصوص بر طرزتحریر و بلاغت ایجاد و احیا ایلمش ذواتک ، غایت قیمتدار تألیفات نافعهلری دخی میدانده چقمشدی . آثار مذکوره ده و بونلرده بالخاصه جودت پاشا تاریخنده افکار و محاکمات عمومیه یی عصرک مقتضیات

مطلوبه سندن بولنان اصولده يوروتماك جهتيدنخى ترويج ايدلمشدركه بوجهت صاحب قلم بولنان ذواتك اقتدار و مزياتنى بوسبتون ميدانه قويقمده در . دها صكره لرى بو اصول تحريريه محررلر نژدنده دها زياده مقبوله كچهره ك اونلر طرفندن تعميمه چالشمش و بوسايه ده نشر ياتك محاسن و فوا . ندى ياييله رق خلاقك تنوير افكارينه فوق العاده ياردم ايلمشدر . فقط : فقط يازقه بو آرزولر كنديسنى كوسترر كوسترمن آنسزىن قارشيسينه چيقان موانعدن دولايى قوتدن دوشمش ، و بو احوال متأسفه اولدور . دن زمانمزه قدر دوام ايده كلش و الا نده شدنى آرتدير مقده بولنمشدر . دولت عليه ده مطبوعات ايشى دها يكي اولديغندن مبادى احوالده بوماده يه دائر بزده بر قانون معين يوقدى . غزته نشر ايتماك ، و يا خود مطبعه تأسيس ايتماك ايستين ذات بونى اجراده تماماً سربسيته مالكدى . فقط غزته لرك مقدارى چو غالدجه مندرجاتى دخی بشقه رنك كسب ايدرك بوراده احوال داخله يه عائد مقاله لر نشر اولنور ، و بو ميانده حكومتك حركتنى دخی تنقيد ايتمكدن كيرو دورميانلر دخی بولنوردى . بو حال ايسه اولوقت مقام اقتدارده بولنان ذواتك خوشلرينه كتميور اونلرك كتدجه مطبوعاته قارشو خصومت پيدا ايتلرينه خدمت ايدىيور ايدى . نهايت ، كنديلرنجه مضر عدايديلن سربستى مطبوعاتك اوكنى آلق ايچون بر تدابير مؤثره يه مراجعت لزومنى حس ايتمشلردركه بوده اوروپانك بعض يرلرنده اولوقتده دخی حتى بو زمانده بيله ، عين مقصد ايچون قابل تطبيق بولنان « سنسور » اصولنك بزده ده قبول و اجرا اولنميسدر . بناءً عليه بزده برنجى دفعه اوله رق ۱۲۸۲ تاريخنده مطبوعات

ایچون آیریجه بر نظامنامه یاپدی . وکال شدتله بوده موقع اجرایه قوندی . بو نظامنامه نك احکامی ، غزته تأسیس ایچون حکومتدن امتیاز مخصوص آلق جهتی شرط قویدیغی کی مطبوعاتك مندرجاتی دخی غایت محدود بر دائره ایچنه آلهرق سربستجه بیان افکاره میدان براقامش ، و مندرجاتی همیشه حکومتك تفتیش و معاینه دائمه سنه حواله ایتشدرد . بونکچوندخی اول تاریخدن اعتباراً باب عالیده آیریجه بر مطبوعات سنسوری دائره سی تشکیل اولنهرق بو خصوصاتك جمله سی اورایه حواله ایدلمشدرکه حالا موجوددر .

نه طرفدن دوشونیلورسه دوشونلسون حکومتك بو حرکتی کرک اداره ایچون وکرکسه مملکتك منافع عمومیه سی نقطه نظرندن عقله موا - فق دکلدی . چونکه اول امرده سنسور اصولنك وضعیله حکومت بو طرفدن کلن تهلمکه دن خوف اوزرینه اولدیغنی ارائه ایدیوردیکه بوده حکو - مت واداره نك حیثیتنه برنقیصه اعطا ایتدیکی محقق ایدی . ثانیاً حکومت بو واسطه ایله دوغری سوز سویلمکه میدان براقامقله بو جهتك قیوسنی ممالک محروسه ده قیاتهرق اورته ده موجود فنالقده کنديسنك مشترك اولدیغنی کوستردیکه بو خصوصده دخی وکلادن اصلاح ملک بکلمک امیدى تماندن صارصلمش بولندی . ثالثاً ملکه ده صاحب ناموس و همت یوانان ذواتك رجال دولت و وکلایه الی نهایه بر خصومت شدید بسلامک تحت مجبوریته ده بولندردیکه بو حال سالف العرض نظامنامه نك وضعندن برقاج سنه صکره کنديسنی درحال کوسترمشدر . چونکه مجرد بوماده اولوقت یعنی سلطان عبدالعزیزك واسطه سلطنتنده (یکی عثمانیلر)

جمعیتك تشكّل و ظهوریله بر فرقه احرارك میدانه حیقمسنه سبب مستقل اولمشدر .

بوجمعیّت تأسیس ایدن ذات مصرلی مصطفی فاضل پاشا حضرتلر یدر .
 مشارالیه حضرتلری مصرده خدیویت مصریه مؤسسسی مشهور محمد علی پاشا خاندانندن اولوب کوچوكدنبری کوزل و زمان و موقعه کوره تعلیم و تربیه کورمش ، فضله اوله رق صاحب ذکا و اقتداردن بولنمشدر .
 مصطفی فاضل پاشا مرحوم بو خاندانك اکثر اعضایی کبی غایت زنیکن ایدی . فقط مصره اسماعیل پاشا خدیو اولدقد نصکره اونکله کچنه میهرك استانبوله گلش ، و بوراده وکلا صنفه داخل اولمشدی . فقط اولوقت صاحب اقتدار بولنان عالی و فؤاد پاشالره عدم امتزاج سببیه درسعادته دخی اوزون مدت قالدی . نهایت بو ذواتك ادارهده اتخاذ ایتدیکی اصوله معترض حقیقه رق فکر و مقصدینی لایقی وجهله افهام و اعلان ایتدرمك اوزره استانبولی ترك و پارسه کچدی . بوراده عالی پاشا و دیگر وکلادن ، کوسکون ادارهدن متشکی اولان اصحاب قلمی اطرافنه طوبلایه رق ترکیه غزته لر نشریله اولعصرده دولت علیهده مذکور فنالقلر حقنده شدتلی مقاله لر یازدرتدی . موجود اولان سیئاتی برربرر کوسترك بو موادی عالمه تشهیر ایتدردیکه بو سیئاتك باشلوجه سی : فؤاد و عالی پاشالرك شخصی سوء احوالارینی مثلاً درسعادت حریق کبیرنده اولری یانمش خلقه اعانه طریقیله طوبانن آچه نك محل مخصوصنه ویرلمدیکی ، بودورده صربیهده بولنان قلاع عثمانیه نك بو حکومته تسلیم ایدلمکله اورالرده حقوق سلطنتك محافظه اولنمدیغی ، شام مسئله سنك مصارف تسکینه سی خزینه دن پك

فاحش بر صورتده آندینگی، کریدده کی عصیانک تسکینی ایچون پک
کوشک داورانلدیگی، بالخاصه متعدد دفعه عقد اولنان استقراضلرده
سوء استعمالات و سائر امثالی حالاتدر.

اشته ممالک محروسهده برنجی دفعه اوله رق فرقه احرارک ظهوری
بو صورتله ایدی. شبهه سز بونلرک میدان آتلمسی الحاقات طبیعیه دندر.
چونکه وقعه خیریه دن صکره یوقاروده سویلایکمز معیشت ولو جزئی
اولسون معارفده کورینن ترقیات بونی ایجاب ایتدیریوردی. فقط
بالاده مذکور سنسور نظامنامه سی بو حالی تسریع ایتدیررک بلکه
وقتندن اول میدان کلمسینه خدمت ایتدیگی جای ملاحظه در.

هرنه حال ایسه! عالی پاشانک صدارتی هنکامنده اداره داخلیه دن
کوسمش و دولتک کیدیشندن خوشلانیمن ذوات بو وجهله پارسده
طوپلان دیلر. اورادن ممالک محروسه یه دوغری ییلدیرملر اینیور، وافکار
عمومیه یی تهییج ایلوردی. خلقک بو نشریات احرارانه یه اولان رغبتی
پک زیاده ایدی. حتی پارسدن خفیاً ممالک محروسه یه کیرن «حریت»
غزته سی بر نمره سی استانبولده بر عثمانلی لیراسینه قدر ساتلدیگی
واقع اولمشدر.

مع هذا بو ذوات محترمه اوروپاده طول مدت نشریات احرارانه ده
دوام ایدمه دیلر. عالی پاشانک وفاتی صره لرنده بونلرک چوغی عفوشاهانه یه
مظهر اوله رق وطنلرینه دوندیلر. فقط بوراده دخی هر نقدر سربست
حرکته مالک دکل و حکومت کندیلرینه همیشه یان کوزله باقیور ایدی
ایسه ده آیریجه بر فرقه اصلاحات تشکیل ایدرک هر برینک آغزندن

حیقمش سوزلر کمال اهمیتله تلقی اولنیور، کوندن کونه شهرتلری تزايد ایدیوردیکه کرك اوروپادن عودت ایتمش و کرك وطندن خارجه حیقمه- مش یکی عثمانلیلر زمره سنک اک مشهور و ممتازلری شونلردر :

مشاهیر شعرای بنامدن ضیا پاشا مرحوم او وقتک یکی عثمانلیلر آره سنده بر مقام بلند احراز ایدر. نثراً و نظماً فریاد ایدرک وسعتی مرتبه سنده اعلاى وطن ایچون چالشمش، قلب امتده بر یاد احترام براقمش ذوات محترمه دندر.

مع هذا کنج ترکلرک سرفرازی مشهور نامق کمال بک مرحومدرکه ناموسلی، متین؛ ملتئی سور، و ترقیسنی جداً آرزو ایدر؛ ریا و مداهنه دن مجتنب، عالیهمت بر عاشق حریت ایدی. مشارالیه عصر مزک یتشدر مکده بیوک برحست کوستردیکی نوادر خلقت شعرای زمانه دن اولوب یالکز فکر سیاسی صرف نظری ایدی. نامق کمال بک شناسی ایله برابر اسقولاستیک ادبیات قدیمه سنی یقه رق طرز تحریری تجدید، تعمیم و احیا ایلیمشدر. آتشین اشعارى، بلیغ و صاف مقاله لر یله خلقک حسیات ملیه و محبت وطنیه لرینی اویاندرمش اولدیغندن عثمانلیلرک استاذ فکر و قلمی دیه توصیفه بحق سزادر. شهرتی عالی پاشا زمانندن باشلار. صکره لری مصطفی فاضل پاشایه انتساب ایدرک پارسده کی حریت غزته سنک محرری ایدی. بالاخره وطنه عودت ایدرک، داخل وطنده دخی حمیت و صداقتدن کری قالمدیغی جهتله مکرراً نفی ایدلمش ایدیسه ده حکایه سنده بواندیغمز زمان « عبرت » نامنده کی غزته تی اداره ایدیوردی.

کنج ترکلردن ایکنجیسی علی سعاوی مرحوم ایدی. بو ذوات

اساساً عادی بر سوخته ایدیه‌دهه استانبوله مدرسه تحصیلی کورد کدن
صکره بر آراق پارسه قدر کتمش، اوراده بر قاچ سنه چالشهرق
فرانسزجه اوکرندیکی کبی ادبیات اجنبیهیه، اوروپانک احوال عمومیه و
سیاسیه سنه اولدجه کسب وقوفله لوندرده اسلامیت و عثمانلیغه دائر بر قاچ
کتاب و مخبر غزته سنی دخی نشر ایتیشیدی. استانبوله اک کچ عودت
ایدن مشارالیهدر. بوراده اهلینک تنویر افکار یچون جامعلرده و محافل
سائرده چالشیردی. دشمنلری بوذاتده بعض نواقص اولدیغنی ادعا
ایدیورسدهده هر حالده خیرخواه ملت و وطن بر ذات اولدیغنی محقق
اولوب نتهکم حیاتی بو یولده فدا ایدوب کتدیکی معلومدر.....

استانبوله بوکون دخی معروف احمد مدحت افندی ده اول دور
یکی عثمانلیلر ایچنده نظره چارپاردی. مشارالیهک مطبوعات عثمانیهیه
اولان خدمتی یعنی خالقه مطالعه و یازییه آلشدرمق خصوصندهکی
غیرتی قابل انکار دکلدرد. پک چوق تالیفات و ترجمه لری واردرد.
بزده مشارالیه قدر چوق یازان، تالیفات کثیره صاحبی ایکنجی بر محرر
همان کلمش کبیدرد. عصر مزده حمد اولسون عددی چوغالان کنج
محرر لر مزك همان هپسی مشارالیهک آثارینی مطالعه ایتیشلر و ایلک تربیه
و درس تحریری مدحت افندیدن آلمشدردر. فقط بونکله برابر بوذاتده
متانت اخلاق بولنمیوب شدتله اسن روزکاره تابع اولوب کتدیکی کو-
رلمشدرکه بوجهتی مشارالیه حضرتلری کنیدیسی دخی انکار ایتمه مکدهدر.
بو کونکی کونده ذوات معروفه دن معدود اولان ابوالضیا توفیق
بک دخی او کونک یکی عثمانلیلری صره سنده صاییه بیلیردی. بوذاتک

چيقمش سوزلر كمال اهميتله تلىق اولنيور، كوندن كونه شهرتلى تزايد ایدیوردیكه كرك اوروپادن عودت ایتیش و كرك وطندن خارجه چيقمه- مش یكى عثمانلیلر زمره سنك اك مشهور و ممتازلى شونلردر :

مشاهیر شعرای بنامدن ضیاپاشا مرحوم او وقتك یكى عثمانلیلر آره سنده بر مقام بلند احراز ایدر. نثراً و نظماً فریاد ایدرك وسعتی مرتبه سنده اعلاى وطن ایچون چالشمش، قلب امتده بر یاد احترام برافمش ذوات محترمه دندر.

مع هذا کنج ترکلك سرفرازی مشهور نامق کمال بك مرحومدرکه ناموسلی، متین؛ ملتى سور، و ترقیسنی جداً آرزو ایدر؛ ریا و مداهنه دن مجتنب، عالیه مت برعاشق حریت ایدی. مشارالیه عصر مزك یتشدرمکده بیوک برحست کوستردیكى نوادر خلقت شعرای زمانه دن اولوب یالکز فکرسیاسیسی صرف نظری ایدی. نامق کمال بك شناسی ایله برابر اسقولاستیک ادبیات قدیمه سنی ییقه رق طرز تحریری تجدد، تعمیم و احیا ایلیمشدر. آتشین اشعارى، بلیغ و صاف مقاله لر یله خلقت حسیات ملیه و محبت وطنیه لرینی او یاندرمش اولدیغندن عثمانلیلرک استاذ فکر و قلمی دیه توصیفه بحق سزادر. شهرتی عالی پاشا زمانندن باشلار. صکره لری مصطفی فاضل پاشایه انتساب ایدرك پارسده کی حریت غزته سنك محرری ایدی. بالاخره وطنه عودت ایدرك، داخل وطنده دخی حمیت و صداقتدن کری قالمدیغی جهتله مکرراً نفی ایدلمش ایدیسه ده حکایه سنده بولندیغمز زمان « عبرت » نامنده کی غزته پی اداره ایدیوردی.

کنج ترککردن ایکنجیسی علی سعاوی مرحوم ایدی. بو ذوات

اساساً عادى بر سوخته ايدیسه ده استانبوله مدرسه تحصيلى كورد كدن
صكره بر آراق پارسه قدر كتمش ، اوراده بر قاچ سنه چالشه رق
فرانسزجه او كرنديكى كى ادبيات اجنبیهیه ، اوروپانك احوال عمومیه و
سیاسیه سنه اولدجه كسب وقوفله لوندرده اسلامیت و عثمانلیغه دائر بر قاچ
كتاب و مخبر غزته سنى دخى نشر ایتیشیدی . استانبوله اك كچ عودت
ایدن مشارالیه در . بوراده اهالینك تنویر افكار یچون جامعلرده و محافل
سائرده چالشیردی . دشمنلری بو ذاتده بعض نواقص اولدیغنى ادعا
ایدیورسده هر حالده خیر خواه ملت و وطن بر ذات اولدیغنى محقق
اولوب نته كم حیاتی بویولده فدا ایدوب كتدیكى معلومدر

استانبوله بوكون دخى معروف احمد مدحت افندی ده اول دور
یكى عثمانلیلر ایچنده نظره چارپاردی . مشارالیهك مطبوعات عثمانیهیه
اولان خدمتی یعنی خالقه مطالعه و یازییه آلدردمق خصوصندهكى
غیرتی قابل انكار دكلدر . بك چوق تالیفات و ترجمه لری واردر .
بزده مشارالیه قدر چوق یازان ، تالیفات كثیره صاحبی ایكنجی بر محرر
همان كلمش كیدر . عصر مزده حمد اولسون عددی چوغلان كنج
محرر لر مزك همان هپسى مشارالیهك آثارینی مطالعه ایتشلر و ایلک تربیه
و درس تحریری مدحت افندی دن آلدردر . فقط بونكه برابر بو ذاتده
متانت اخلاق بولنمیوب شدتله اسن روزكاره تابع اولوب كتدیكى كو-
رلدردر كه بوجهتی مشارالیه حضرتلری كندیسی دخى انكار ایتمه مكده در .
بو كونی كونده ذوات معروفه دن معدود اولان ابوالضیا توفیق
بك دخى او كونك یكى عثمانلیلری صر مسنده صاییه بیلیردی . بو ذاتك

دخی صکره دن مطبوعات عثمانیه یه اولان خدماتی قابل انکار اولیوب
بو جهتجه اولدقجه شهرت قزانشدر .

اشته بودورده کنج ترك نامنی طاشیان ذوات اساساً بوصاید قلمز-
دن عبارت ایدی . فقط بوهنکامده دیگر بعض ذوات و علی الخصوص
مکتبدن حقیقه ضابطان آره سنده منور ، سالف العرض « احرار
متفق الافکار » و بناءً علیه اونلرک افعال و مقصدلرینه میال ، خیلی
کنج لر بولنور ایدی که بونلرک جمله سی انقلابه و کندی وطنلری ایچون
جداً اصلاحات اساسیه طرفنده بولنه رق کرک ملتک و کرکسه کندی
سعادتلرینی بوراده آرارلردی



— سیئات عبدالعزیز —

ممالك محروسه احوال عمومیه سنده کورینن سیئات — اداره مطلقه
تحتنده اداره اولنان مملکت — دور ترقی و دور انحطاطده پادشاهلر —
سلطان عبدالحمید و سلطان عبدالعزیز — سلطان عبدالعزیزده کی عظمت
و تکبر — سرایلیر — پادشاهک اسرافاته اولان میلی — مصر و بو
قطعه یه ویریلن امتیازاتده کی سوء استعمال — خزینہ خاصه و بوکا
دائر ایستاتستیق



شبهه سز قارئلرمزك آره سنده بو صوك قرق الی سینه ظرفنده
اوروپاده نشئت ایدن و محتویاتی شرقه و بالخاصه دوات علیه احوالنه
عائد بولنان کتابلری مطالعه ایدنلر واردر. اگر وارسه ینه شبهه سزدرکه
تاریخ، جغرافیا و سیاحتنامه دن عبارت بولنان بو کتابلرک مندرحاتی،
ترکلرک باربارقلرینه متعلق فقره لرله دولی اولدقلرینه آنلر البته دقت
ایتمشلردر. چونکه بو نشریاتک هانکی صحیفه سی آچلیرسه آچلسون
ملتتمزك ظلم و جهالت، مدنیته اولان عدم استعدادینه دائر فقره لرله
تصادف ایتمک ممکن دکدر.

خاصه امور اداره و احوال داخلیه عائد ایشلرده : مثلاً بو
محررله سیاحلر ممالك محروسه اراضیسنی غایت منبت، هر جهتجه ترقی
و عمرانه مستعد کورکلری حالده بو کونکی پریشانیقی مملکته صاحب

اولان ملت حاكمه يه يعنى تركلرك قابليتسزلىكنه حمل ايدرلر. اورتالقدە موجود اولان ظلم، حكومت طرفندن اهالى يه قارشو ايدىلن معاملە جبارانه يي دخى ينه او قومك خلقة وحشيانه اولان استعدادينه اسناد ايلر. بوندنماعددا صوك زمانلرده ممالك محروسه نك مختلف طرفنده وقوعه كلن عصيانلرده كى قتالى، ينه بو تركلرك قان دوكمكه اولان تمايل خونريزانه سندن غيرى بر شيئه عطف ايتمك استمزلر.

هيچ بر وجهله انكار اولنه مزكه بونلرك كوستردكلرى فنالق بزده موجوددر. آنلر بو خصوصده اكسيك سويلميورلرسه اورته ده بولنان فنالغى اكثرى احوالده تزويد و مبالغه ايتميشلردر. فقط شوراسيده محققدركه اوروپا رجالنك احوال مملكت حقنده كى فكرلرى عموميتله دوغرى اولديغى حالده سيئاتك منشئ نروده اولديغى كوسترمكده پك بيوك خطالرى واردر. بو خصوص آنلرك، دولت عليه نك چوق زماندنبري دوچار اولديغى حاله تماميله كسب وقوف ايتدكلرينه دليل علنيدر. ملاحظات آتیه دقتله مطالعه ايدلديكى حالده بو مسئله ميدان علنيتيه حيقار.

كره ارضده موجود اولان حكومتلرك احوالنه عطف نظر ايدرسه ك بر قاچ شكل حكومت كورورزكه اشكالك اختلافنه كوره اهالى يه تامين ايلدكلرى سلامت و سعادت دخى مختلف درجه ده در.

حكومتلرك اشكالى مملكتلرك احوال طبيعیه و تاريخيه سنه اهالينك عرف و عاداتنه كوره موضوع بولنديغى و دولت عليه ده آلتى عصردن برى اداره مطلقه جارى اولديغى معلومدر.

ادارهٔ مطلقه جاری اولان مملکتلرده ، اهالینک امنیت عرض و ناموسی ، ملکک سلامت و معموریتی ، و سائر بالجمله خصوصات او مملکتک حکمداری بولان ذاتک آرزو و اقتدارینه منوط و متوقفدر . اکر پادشاه اولان ذات اخلاق حسنه ایله متصف ، خلقة ، تربیه مقام بالایه لایق ایه ، تبعهسی دنیاده یشامغه استحقاق و اقتدار کسب ایده جکی کی عکسی حالدهده بو نعمتدن قطعاً محروم قاهره ، پک چوق ضرورت ، ظلم قهره و اذیته دوچار اوله رق ، اک صکره عموم مملکت صوک درجه بر خرابه زار حاله کله جکی محققدر . بو حال طبیعیدر . امثالی هر ملتک تاریخنده موجود اولدینی کی بالخاصه بزم تاریخ اسلامده و بالخصوص تاریخ عثمانیده ، دیگر تاریخلره نسبة زیادهدر .

ارباب مطالعهیه معلومدرکه دولت علیه نک ابتدای تشکلندن زمانمزه قدر و آلتی عصر دن زیاده دوام ایدن مدتی عثمانلی پادشاهلرینک مقامه لایق اولوب اولدینی نقطه نظرندن ایکی مستقل دوره تقسیم ایتک ممکندر . برنجیسی دور ترقیدرکه مبادی تأسیساتدن بیک سنه هجریه سنه قدر دوام ایدن اوزون زماندر . بواثناده دولت علیه نک حقیقی مؤسسسلرندن بولان پادشاهلر ، آلدقلری تربیه مقتضاسندن اوله رق ، ملته قارشو مکلف بولندقلری وظیفهینی تماماً ایفا ایتشلر ، منافع ذاتیهلرینک منافع ملیهیه وابسته بولندیغنی دوشنمشلر . رهبر اولق اوزره عدالتی التزام ایتشلر ، هر ایشده عاقلانه حرکت ایدرک ، مملکتک حدودینی توسیع ، داخل مملکتک احوالی آسایش و انتظامه قویق ایچون هیچ بر فرصتی فوت ایلممشلر ، محاربه مزاحنه قاتلنمشلر ، نتیجهده ایه امت محمدی نی

کندیلرینه مجبورشکران براقشلردرکه ، برپادشاهک نائل اوله بيله -
جکی سعادتك دخی بوندن زیاده اوله میه جغی شبهه سزدر .

ایکنجی دور بیك سنه هجریه سندن صکره باشلار . بوزمانده
ظهور ایدن پادشاهان عثمانیانک همان جمله سی اجدادلرینک انخاز
ایتدکاری طریقک کلیاً خلافتیه سلوک ایتشلر ، عهدهلرنده بولنان وظیفه
و مسئولیتک بیوکلیکنه باقمقسنرین مقاملرندن یالکز شخصاً مستفید
ومتلذذ اولمغه قویولشلردیکه بو طرز حکومت ، دورترقیده قوریلن افعالك
بیوکلیکنی ، انحطاطک اسباب حقیقیه سنی واضحاً نروده اولدیغنی ارائه ایلر .
واقعا بوصول دور پادشاهلرندن بعضیسنک اخلاق و آمانه کوره امور
اداره حکومتده ایلمکه دونه ده موقتاً تمایلات کوریلپورسه ده اساس
مسئله یوقاروده عرض ایتدکمز کیدر . یعنی پادشاهلرده موجود اولان
عدم لیاقت ، عموم ادارهنک محورلازمنده جریان ایتمسنی موجب
اولش ونهایت وقتیه خارجاباً و داخللاً پک پارلاق بولنان ممالك محرو -
سهنک کوندن کونه تدنییه یوز طوتمسنی انتاج ایلمشدر .

سوزمزنک دوغری اولدیغنی اثبات ایتک ایچون اوزاق کتمکه لزوم
یوقدر . سلطان عزیزک اواخرسلطنتنده بو پادشاهه مخصوص اولان
خط حرکتی ایضاح ایده جک اولورسق بالاده مذکور ماده بوسبتون
ظاهره حقیقه جقدر .

پادشاهک بیوک برادری بولنان سلطان عبدالحمید حضرتلری ، محل
مخصوصنده ذکر اولنان و دولتیجه هیچده مقبول بولمین بعض اخلاق
واوصافه مالک بولندیغنی حالده پدرینک همتیله بر درجهیه قدر عصره

موافق بر تربیه آلمشدی . مکمل دکلمه ده اولدقجه فرانسزجه قونشوز و اولدورده اوروپا مطبوعاتنده نشر اولنان اثرلری مطالعه ایلر ، بوراده جریان ایدن افکاره آزچوق کسب وقوف ایدردی . بالنفس ذوق و صفایه میال ایدی . کرکسه شرقك کرکسه غربك تلذذاتندن کری دورمزدی . بو قیلدن اولق اوزره اولوقته قدر سرایلر مزده کورلمش ایکن مشارالیه حضرتلری سرایده خصوصی بر تیاترو بنا ایتدیرك آره صره اوروپادن کلن تیاترو قومپانیه لرینك بوراده ویردکاری اویونلری سیر و تماشا ایدرلردی .

سلطان عبدالعزیز ایسه بوکی اوصاف و تربیه ده قرنداشنه تماماً ضد بر اخلاقه مالک ایدی . تیاترو کی لذائذ فکریه و معنویه دن خوشلانمز ، احتیاسات مادیه ، مثلاً کولش ، پهلوانلق ، خوروس دوکشدرمک کی اکلنجه لرله وقت کچیرر ، اک زیاده بونلردن متلذذ اولوردی . جلوسك برنجی سنه لرنده قرنداشندن قالان تیاتروی آخوره تحویل ایتدیکی کی خوروسلر ، سید شاهانه یه مخصوص اولان کوپکله ایچونده سرایده یکی بنالری ایدرمشدی . واقعا پادشاهك اخلاقنده کی بو کی احوال شایان مؤاخذه دکلدر . چونکه هر نه صورتله اولورسه اولسون حکمدار اولان ذات دخی اساساً بر انسان و بو مخلوقه مخصوص اولان نفسه مالک اولدیغندن کندی اکلنجه سی ایچون استدیکی ذوقیاتی ترجیحه حق و صلاحیتی واردر . شو قدرکه حکمدار اولان ذات (اوروپاده اولدیغی کی) بوکی احوال خصوصیه سنی کزلی طومغه خلقه چرکین کورینن بوکی اکلنجه لرینی آچیغه چیقارمغه غیرت

لازمه دن اولوب مع التأسف سلطان عبدالعزیز ایسه بو جهتله ده ذره قدر اهمیت ویرمדיکندن ودها دوغریسی عقلنه بیله کتیرمديکندن آز بر زمانده سالف العرض مواده ماهر افراد یعنی پهلوانلر، انواع درلو حیوانات سرایه طوپلانمغه، ختکار بونلرله اکلنمکه باشدی. دیگر طرفدن اوراده نه یاپیلیورسه خارجه عکس ایتدیکه بوراده کی روایتلرک میاننده بعضاً عوامک استهزاسنی موجب اوله جق فقره لر دخی واردی. از جمله سویلدکمز هنگامده پادشاه، غایت ایو دوکوشن بر خوروسک بویینه برنجی رتبه عثمانیه دن بر قطعه سنی رسماً طاقدیغی استانبولک مختلف جمعیتلرنده موثوقاً سویلنمکده ایدی.

پادشاهک اکلنجه سی بو مر کرده اولدیغی حالدده کندیسینده خلقة غرور و تکبر دخی وار ایدی. مبادی سلطنتده پادشاهک بو اوصاف غیر مطلوبه سی حدود داخاندن چیقمیور ایدیسه ده عالی پاشا-نک وقتانده نصره کتدکجه اشتداد ایتمکه باشدی. [*] مثلاً کسه نک عزیز تسمیه اولندیغی استه مزدی. بو هنگامده حضور شاهانه یه حیقانلرک بر قاق دفعه زمین پوس اولملرینی، وجه شاهانه یه ناچیز بر لحظه بیله عطف ایتملرینی آداب و مراسم عییدانه صره سنه قویمش ایدی. عزیز اسمنده بولنان افراد طلب احسان و یاخود بشقه بر ماده دن دولایی حضور شاهانه یه عریضه تقدیم ایتک استدلکری حالدده اسملرینی عزت و یاخود سائر بر نامه تبدیل ایدرلردی. عرضحاللر نقدر ساده بر ماده ده اولورسه اولسون بر چوق دعالرله یازلق عادتاً

[*] اس انقلاب احمد مدحت افندی.

امر و اراده اولانوردی. قصور ایدیلورسه ایشک کورلییه جکی محقق ایدی. غریبدر: عالی پاشا مرحوم پادشاهک بو طبیعتلرینی، بیله رک اوروپاده حکمدارارده کورینن سادەلک سلطان عبدالعزیزک افکار و اخلاقنی تبدیله خدمت ایدر فیکریله مشارالیه حضرتلرینی سیاحتیه تشویق ایتیشیکن بعدالعودة پادشاهک کرکسه کبر و غروری کرکسه استبداده اولان میلی بر قاج قات تزايد ایتدیکی اولوقت سرای مقربلر- ندن منقولدر.

سلطان عزیز بوهنگامده دائماً (بن) لک دعواسنده بولنه رق هیچ بر خصوصده بشقه لرینی تقدم ایتدرمک استه مزدی. نه یپارسه کسه دن اعتراض قبول ایتمز و شاید ایده جکلر بولنورسه جانی صیقیله رق متجاسرله شدتله معامله ایدردی. بر کون سطرنج اوینرکن جزئی بر اعتراضدن دولایی او یون رفیقی بولنان آبراهام پاشانک قفاسنه سطرنج تحته سنی کچیردیکی مشهوردر. بونکله برابر پادشاه مشارالیه حضرتلری کندیسنک توجهنی قزانمش اولان ذواتک النده عادتاً چوجق کبی مطیع برحرکته میال ایدیکه، سلطان عبدالعزیزک شو حالندن سرایلرده و بالخاصه بزم عثمانلی سرایلرنده هیچ بروقت اکسیک اولمین دالقاووقلر پک زیاده استفاده ایدرک استدکلری کبی صراملرینی یوریدرلر ایدی. پادشاه بودورده یالکز سرای دالقاووقلرینک تحت نفوذنده اولیوب حرم هایونده موجود اولان نسوان دخی کندیلرینه استدکلرینی یاپدرر- لردی. بر مدت ذوات محترمه پادشاهی انواع درلو مجوهراته میل ایتدررک چیلغین پارملر صرفیه قیمتدار و کرانها هدیه لر آلددرلر

و کندیلرینه تقدیم ایتدرلردی . کیت کیده سلطان عزیزک اسرافاته اولان میلی یالکز سرایده و یاخود استانبولده معلوم اولقله قالمیوب اوروپانک بعض جهتلرینه دخی عکس ایتش بولندیغندن اوراده کی مشهور هیکل تراشیر ، رساملر ، بوایشلردن هیچ برشی آکلین پادشاهه یوکسک فیئاته کندی اشیارینی صاندرمغه موفق اولورلردی .

مع هذا سلطان عزیزک کندیسنه مخصوص اولان بر آرزوسی وار ایدیسه بوده یوقارده بریرده سویلدکمز اوزره انشاآته اولان میلی ، اقامت ایتدیکی سرایلرک خارجاً و داخلاً ممکن اولدیغی قدر محترم بولمسیدی . مبادی احوالده بو آرزوی خصوصیه سنی وجوده کتورمک ایچون آزچوق تصرفه رعایت ایتمکده ایکن صکره لری چیلغینلق درجه سنه قدر وارمشیدی . مثلاً مشارالیه حضرتلری یکیدن بنا ایتدردیکی سرایی آرزوسی وجهله تفریش و تزین ایتدر . ترتیبات بتدکدنصکره بومفروشاتی بکنمز تبدیانه اراده بیورر . بوصول آرزوسی دخی اجرا اولندیغی زمان اوندن دخی خوشلانمز ، دیگر مفروشاتی بکنیر ، والی نهیاه بویله کیدردی .

شوتهمیدات و تشریحاتدن پادشاه زمانک اخلاق و اطوارینک دولت علیه یه پک زیاده بهالی اوطوردیغی قولایجه آکلاشیلور . حقیقت حالده اویله ایدی . شو حال دورمذکورده مقام اقتدارده بولنان و بر درجه یه قدر صاحب ناموس و حیثیت اولان وکلایی عاجز بر حاله کتیرمش ، و بونلر چکلدکدنصکره وجدانسنر دالقاووقلرک همیشه ایش باشنه کچمسنی موجب اولمشیدی .

سلطان عزیزك محمود ندیم پاشایه اولان محبتی، پادشاهك هر آرزوسنه موافقت کوسترمسندن ایلروكلش، خاصة آرزولرینی اتمامه لازمكلن وسائطی ارائه یعنی پاره‌بی بولق ایچون ایدی. و حتی یوقارده سویلدکمز تنقیحات و روم‌ایلی شمندوفر ایشلرنده کی سوء استعمالات دخی پادشاهك بو مقصدینه مبنی ایدی. فقط سیئات یالکمز بونکله قالمیوب سویلدکمز دوردن اول و صکره دخی بو نوع فنالق ممالک محروسه احوالی کتدکجه دهشتلی بر اوچورومه سوروکلیوب کتورمکده ایدی.

سلطان عزیز مبادی سلطنتنده کورینن فنالقلردن بریده اسرافاته اولان میلانی اشباع ایچون نه طرفدن کلیرسه کلسون پاره کتوره جک وسائطدن امتناع ایتدیکی قضیه سیدر. بو وسائط بعض دفعه وقارشاهانه‌یه منافی، منافع‌ملیکه‌یه کلیاً مغایر اولدیغی حالده بیله اوندن چکنمزدی. اطرا- فنده کی حشرات ایسه پادشاهك بو حالنه تمامیه واقف اولدقلرندن بو خلقت شاهانه‌بی جانلرینه منت بیله رك آرزوی پادشاهی‌بی تشدید و تشویق ایتمکدن کری دورمز لردیکه، پادشاه و سرائك بوکی حاللری مشهور و معهود مصر فرمانلرینك اعطاسنده ظاهراً میدان‌ه حیه مشدر.

مصر قطعه مبارکه‌سی سلطان عبدالحمید زماننده و حتی دور سلطان محمودده بیله اداره داخلیه حقنده آیریجه بر امتیازه مالک ایدی. مع هذا بو امتیاز اقتضاسنجه مرکز حکومتك یعنی استانبولك مصر اداره داخلیه‌سنه مداخله ایتمه حق و صلاحیتی یوق ایدیسه ده خلافتك بو قطعه‌یه حقوقی تمامیه محافظه ایدلمشدی. بویله ایجه بر زمان دوام ایتدی. نهایت ۱۸۶۳ تاریخنده محمد علی پاشا خاندانندن مصر والی‌بی

سعید پاشا وفات ایتدیکی زمان مصره مشهور اسماعیل پاشا تعیین اولندی .
 بو ذات انکاری غیرقابل اولان ذکایه مالک ایدیسه ده طنطنه و سلطنتی
 سور ، اداره مستقله یه غایت حرصلی بولنوردی . مقامنه کچرکچمز
 استانبولی ، اداره سنه مأمور بولندیغی قطعاً نك احوال داخلیه سنه دکل ،
 احوال خارجییه و اوروپا ایله اولان مناسبت و معامله سنه بیله قارشدرمق
 استمزدی . فقط نه فائده سی وارکه مرکز حکومتدن مصر والیرینه
 ویریه کلن فرمانلرله الی آياغی باغلی بولنوردی . خاصه مصرک معامله
 خارجییه سی استانبول معرفتیه اجرا اولنمی کبی مواد بو فرمانلرده
 مؤبداً قید ایدلمشدی .

اسماعیل پاشا بورالرینی هر کسدن ایی بیلیردی . فقط برگره عقلنه
 قویدیغی فیکردن دونه جک آدم اولمديغندن بو حالک دفعی چاره سنه
 باقیغی کندیسنجه اک بیوک وظیفه دن عدا ایتدی . اداره ده بولندیغی
 مدتجه اک زیاده اهمیت ویردیکی ماده بو مسئله اولدی .

دیگر طرفدن اسماعیل پاشا صاحب ادراک بر آدم اولدیغی جهتله
 استانبول احوالنه دخی تمامیه واقف ایدی . بالخاصه دورمذکورده
 موقع اقتدارده بولنان ذواتک جمله اوصاف و اخلاقلرینی پک ایوبیلیر-
 دی . بو ذوات محترمه یه مخصوص اولان منیادتدن کندیسی ایچون
 حصه استفاده چیقارمق ممکن اولدیغی تمامیه آکلمشیدی . بناءً علیه
 مقام خدیویته کلیرکلز مقاصد فاسده و مضره سنی اجرا ایتدرمک اوزره
 کندی بندکانی بولنان ذواتله استانبوله صندوق دولوسی آلتونلر کوندر-
 مکه باشلریکه بو پاره لر اوراده صاحب اقتدار بولنان ذواته صاحیلردی .

مقصد، مصر خدیولرینه مخصوص اولان امتیازلری بیوتکمک، داخلی و خارجی احوالده مستقلاً حرکتیه اقتدار و صلاحیت قزانمق ایدی. مشارالیه حضرتلرینک نائل مرام اولمق ایچون استعمال ایتدیکی بو واسطه کرک سرای ارکانی و کرکسه ایش باشنده کی مأمورین دولت حقنده پک مؤثردی. فقط بیطرفانه سوز سویلیمک لازمکلیرسه خدیو حضرتلری فؤاد و خاصه عالی پاشا زمانلرنده مقصدینه نائل اوله مدی. هیچ اولمزسه تمامیه موفقیت حاصل ایده مدی. کوردیکی مقاومت بالخاصه عالی پاشادن ایدی!... نهایه الامر عالی پاشا صحنه سیاسیه دن چکلدی. اشته او زمان اسماعیل پاشا ایچون آرزوسنه وصول طریقی آچلدی. فرمانلر بر برینی تعقیب ایتدی!...

بز بوراده مصر امتیازات فرمانلرینک تاریخلرینی یازمق فکرنده دکلز. بو خصوصده تفصیلاته کیرشمیز. شو قدر سویلرزکه بو ائناده یعنی محمود ندیم پاشانک ایلك صدارتندن اعتباراً مصر خدیوی وکلا و سرای ایچون پک ایو سود ویرن بر اینک اولمشدی. مرکز حکومت و حقوق دولتک ضررینه اوله رق ویرلمش اولان هر مصر فرماننه قارشو او دورده ایش باشنده بولنان ذواته رشوت طریقله یوز بیکلرجه لیرالر ویریلیوردی.

شبهه سز بو یغما آره سنده بولندیغی مقام سایه سنده اک زیاده استفاده ایدن سرای ایدی. اسماعیل پاشانک بو زمانده مرکز خلافتیه تقدیم ایتدیکی مبلغ، حدندن افزون اولوب سرای و بورایه منسویت پیدا ایدن جمله افراده تشمیل ایدلمشدی. ایش بر درجه یه قدر وارمشدیکه

پادشاه زمان طرفندن اسماعیل پاشایه قوری بر سلام کترین بر ذاته ویریلن مبلغ مقدارى سکسان بیک لیرا اولدیغی مصرلیلرجه معلومدر ، سلطان عزیزک دوغریدن دوغرییه کندی ادارهسی تحتنده بولمادیغی فقط حقوق خلافت و سلطنت جاری اولدیغی بر ولایته ویر- دیکی ضرر بو صورتله ایدی . فقط شو حالدن پادشاهک تحت اداره- سنده بولنان مملکتک نه کی احوال مدهشیهیه دوچار اولسی لازم کله جکی پک قولای آ کلاشیلیر . فی الحقیقه بوراده سرائیک اجرا ایتدیکی تخریبات امثالسر اولوب بو خصوصده دولت علیه نک اک فنا کچیردیکی ادوار متنوعیه مرحمت او قوتدیره حق درجه سنده ایدی .

آتیا ارائه اولنان جدول شو جهتی ظاهره چیقارر :

بو جهتی لایقی وجهله آ کلامق ایچون اول امرده مرکز سیئات بولنان سرائیک معیشت و اسرافاتنه کوز آتمق لازمدر .

سویلدکمز شو دورده خزینة خاصه ادارهسی دفترلرندن استخراج اولنان بر ایستاتستیکده سرایده کی افرادک مقداری بروجه آتی کوستریلیور : سرایده طعام ایدنلرک بش بیک بش یوزدن آز اولیوب ، بیک ایکی یوز نسوان ، اوچ یوز اللی یماق آشجیلر ، درت یوز آخور خد- متکارانی و سالیسر ، درت یوز حامله جی قایقجیلر ، درت یوز خدمه خاصه موزیقه سی ، ایکی یوز قوشباز و جانباز ، ایکی بیک عادی خدمه ، اوچ یوزدن زیاده یاوران ، کتبه ، تشریفاتیجیلر ، مابینجیلر اولوب ؛ قهوه جیلر ، توتونجیلر ، چاشورجیلر ، و سائر دخی بونلر میاننده داخل دکلدی .

سرایده بولنان خادم آغالرینک مقداری دخی اوچیوزدن آشاغی اولیوب
 بونلردن صاحب نفوذ اولانلرینک معیتلرنده کلیتلی مقدارده خدمتجیلر
 موجوددی . تقریباً آلتی بیك کشی سرای مطبخلرندن متعم اولیور -
 لردی . حالبوکه بونلرک همان هپسی متأهل اولوب عائله لری دخی سرایده
 تعیش ایدرلردی . بروجه بالا تعداد ایلدکمز حشراتک عمومی ایچون
 استحضر ایدیلن اطعمه متوعه ، یدی سکمز بیك آدم حسابنه
 کوره ایدی ...!

قارئلرمزه سطحی صورتده ارائه قلنان بو ایستاتستیک عثمانلی
 پادشاهلرینک سرایلری ، ملت ودولته قدره مال اولدیغنی تعینه کافیدر .
 شو قدرکه بو جهته تماماً واقف اولق ایچون سرائک بو زمانده بیت المال
 مسلمینه نقداً نه مقداره اوطوردیغنی بیلمک لازمدر .

دولت علیه نک پارلاق دورلرنده اداره نک هر طرفی ، خصوصاً
 مالیه جهتی منتظم بر صورتده تنظیم اولندیغنی کبی مملکتک حکمدارلره
 اعطا ایتدیکی تخصیصات دخی قانوناً معین اوله رق بونی تزید ایتک
 ممکن دکلدی ، هر حالده وقوعی نادر ایدی . فقط دولت علیه انحطاطه
 دوچار اولدیغنی زمان ایسه بو خصوصده وضع اولنان قانون دخی معطل
 قاهره پادشاهلر عموم خزینه دولتی کندی مالی ، ثروتی عد ایدر
 اولملرلدی . چونکه دولت ، مملکت ، ملت جمله سی پادشاهک ملک
 صریحی عد اولنه رق کندیلرندن ماعدا هیچ بر کیمسه دولت علیه ده
 بر شیئه مالک دکلدی ...!

وقعه خیریه دن صکره دخی حال ایجه مدت بویله دوام ایتدی .

نهایت سلطان عبدالمجیدك اواخر سلطنتنده مقام اقتدارده بولنان بر قاج وکلانك بالخاصه مرحوم رشید پاشانك همتیله مالیه ایچون اولدقجه منتظم بر بودجه یاپلادیعی زمان حکمدارلره مخصوص اولان تخصیصاتك دخی مقداری تعیین ایدلک لازم اولدیغی پادشاهه اخطار اولنهرق رضاسی دخی آندی . بناءً علیه هجرتك ۱۲۷۱ سنهسی ذی القعدةك اون سکرنجی کونی شرفصدور بیوریلن بر اراده موجبنجه اعلان ایدیلن مالیه بودجهسنده پادشاهه تخصیص اولنان مبلغ ، شهری یکرمی بیك کیسه یعنی یوز بیك لیرا رادهسنده ایدی . شهزاده لر و سلطانلره تخصیص اولنان آقجه ایسه سنهده یکرمی بیك بشیوز الی کیسهدن عبارت اولوب بو حسابجه سرای هایون دولته بر بچق میلیون لیرایه مال اولیوردیکه دولت علیهك بو ائندهکی وارداتی یکرمی میلیون لیرایه تجاوز ایتدیکی نظرهلاحظهیه آندیغی حالده بو تخصیصات دهشتلی و هیچ بر مملکتده واقع اولدیغی تصدیق ایتهمک ممکن دکدر .

مع هذا کوستردکمز شو تخصیصات رسمی اولوب حقیقت حالی ارائه ایتمکدن پک اوزاقدرد . چونکه سلطان عبدالمجید زماننده خزینۀ دولتدن بر سنهده سرایه ویریلن مبلغ هیچ بر سنه ایکی میلیون لیرادن آز اولیوب اکثری احوالده تجاوز ایتدیکی او دورده دولتک مالیه نظام رتنه خدمت ایچون جلب اولنان اجنبی مأمورلرینک مرور زمانله اعلان ایتدکبری ایستاتستیکلردن پک قولای آکلاشیلیر .

هر نه ایسه : عبدالمجید زماننده احوال بو مرکزده ایدی . فقط سلطان عبدالعزیزك اواخر سلطنتنده سالف العرض اجنبی مأمورلرندن

بررسی دولت علیه مالیه سی حقنده اوروپاده نشر ایتدیکی بر ایستاد.
تستیقده سرائیک مالیه قارشو ایتدیکی تسلطی شو حساب اوزرینه
کوستریور. [۱]

پادشاه یوقاروده سویلدکمز وجه اوزره مالیه دن بر بچق میلیون لیرا
آلدیغی کی فضله اوله رق یالکمز سرائیلر انشاسی ایچون آلدیغی مبالغ
اون درت سنه ظرفنده یدی میلیون لیرایی تجاوز ایدوب بو مصرف
ایچنده مفروشات، حیوانات، مجوهرات و سائریه بشقه جه ویریلن
پارهلر داخل دکدر. کذا بویکون خارجدن ایدیلن استقراضلردن
دوغریدن دوغرییه سرایه آلمان پارهلر دخی داخل اولیوب غایت
زنکین بولنان خزینة خاصه دن کلن واردات دخی بو حسابه درج
ایدلمه مشدرکه بونلرک هپسی جمع ایدیله جک اولورسه پادشاه زمانک
خدمت حکومتی نقداً ممالک محروسه یه الی میلیون لیرادن آز بر مقداره
اوطورمدیغی اک سطحی بر حسابله میدانه حیقار.

اشته اواخر سلطنتنده سلطان عبدالعزیزک ممالک محروسه یه
ویرمکده اولدیغی تخریبات بو ایدی. بو حالک اسبابی ایسه پادشاه
زمانک مقام حکمدارییه عدم لیاقتندن و بالخاصه حکمدارلره لایق
اولیان اخلاق و اوصاف ایله متصف بولنمندن ناشی ایدیکه حکومتک
متنوع طبقاتنده کی وظیفه و مسئولیت بیلنمیه رک، حقوق انتظامیه -
رق قوانین و نظاماتک آیاقلر آلتنده سورونمسی موجب اولمقده، و بو
کیدیشک یعنی سفیه بر میراث یدیلک طورینک ایجاباتی ایسه دولت علیه یی

[*] L'Economiste Française

یقیناً دهشتلی فلاکتلره کتوره جکی انظار دقت و عبرته علناً چار بمقده و بامقده ایدی .



— احوال وکلا و مسلك مدحت پاشا —

پادشاهك اواخر سلطنتنده مرکز حکومت — وکلاى عثمانیه نك
مسلك سقیملری — مدحت پاشا — پادشاهك خلعی ایچون مشارالیه
حضرتلرینك شیروانی زاده رشدی و حسین عونى پاشالرله برنجی
اتفاقلری حقنده کی روایات — مدحت پاشانك علما ایله اولان منا-
سبتلری — انتظار مستقبل



سلطان عزیز دورا خیرنده ممالک محروسه اداره مرکزیه سنك الك
یوکسك طبقا تندن وقوعه کلن احوالی شوایکی سوزله ایضاح ایتک
ممکندر .

پادشاه ایله محمود پاشا استانبولده نه یایمق ایستلرسه یاپیورلردی ؛
متفقاً حرکت ایدرك نسبتاً پك آز بر زمانده ترکیانی اويله بر حاله
کتیردیلرکه ، نه ایچریده راحت و امنیت نه ده طیشاروده اعتبار و
و حیثیت قالدی !....

پادشاه کندی کبف و ذوقنده دنیایی کورمیور . وزیر اغنائیفك

و دها دوغریسی آلتونلرینک ، کوزکلرینک مطیع و منقادى ، اویونجا-
غى ؛ هم حکومتى ، هم کندیسنى ، آنک ایستدیكى ، اشارت ایتدیكى
طرفه چویریور ؛ اداره دولتی کوندن کونه برباد ایدیوردی .

اما او زمان استانبولده هیچ اهالی یوقیدی ، اوتەکی وزیرلر نرده
ایدیلر ؟ بوقنالقلردن کسه شکایت ایتیورمیدی ؛ کسه مسئول دکلیدی ؟
اگر اهالی دیمک ، روم ایلیده و آناطولیده بولنان مسلمانلر دیمکسه ،
آنلر عصرلر دئبری ایچنده یوزدکلری سیئه جهالتله ، کندیلرینه ظلم
ایدن مقامی تقدیس ایده ککشلردر . انواع ظلم و حقارته طیانیرلر .
حقنى ایستمک ایچون حرکت ایتدی (خروج علی السلطان) عدایدرلر .
ذاتاً اساساً ملت اسلامیه نک ظلم چکمدیکی دور ، کورمه مش کبی بر
شیدر . بونک ایچون اهالی دخی ظلمه آالشقیندر .

بزده ، پک چوق وقتدئبری جاری اولان استبداد ، شرع مبین
احمدییه مغایر اولدیغی حالده ، حکومت کندیسى ایچون ، بو طرفدن
بر تهلاکه اولدیغنی بیایر ، و ظلمی اجرادن بوسبيله چکنمز .

استانبول اهالیسنه کلنجه : اولرده اکثریت اعتباریله دولت
مأموریتده استخدام اولنه کلدکلرندن ، استبداد طولایسیله تأمین و
توسیع معیشت ایدرلر . بناءً علیه اداره استبدادک ظلمندن بالخاصه
مستفید اولدقلرینی تقدیر ایدرک بونلردن چوغی آنک دوامی ممنونیتله
ایستلر . بوسبيله بو طرفدن دخی حکومت اکثر احوالده بر
تهلاکه بوله مز .

اشته : او زمان دخی مبادی احوالده سلطان عزیزک ظلمندن

آچىقدن آچىغه شكائت ايدن كىسه يوقدى . لىكن اداره حاضرده دن
ممنون اولمىانلر واردى .

بو طاقم ذوات ، اركان و رجال دولتدن ايدىلر . خشنود سز لقلرى
ندن نشئت ايدىيوردى ؟ ... اول امرده بو جهتي بيله لم : بونى بيلمك
ايچون ده او زمانك اداره سىنه معارض اولان وكلا و رجالى ايكيه تفريق
ايتك لازمدر .

برنجى طاقم ، افكار عتيقه اصحابى ايدى . دولتك اداره حاضرده سنى
بكىنمزلر ؛ بوكيديشله يقيناً ، ملتك بيوك بر تهلكيه دوجار اوله جفنه
قويأ حكم ايدرلر . ايش باشنده ايكن اويله بر فلاكتى دفع ايده ممكى
دخى ناموسلرينه يدیره مزلر ، و بو سبيله جارى اولان سيئاتك رفعنى
جداً آرزو ايدرلردى . بونكه برابر بو طاقمك ايستديكى انقلاب ، ده
كنديلرنجه بيله لايقى وجهله معين دكلدى . ميدانده ، كوز اوكنده
طوران فناقلرك اوكنى آلىق ايسترلردى ، او قدر ، يوقسه عصر حاضر
احوال عموميه سىنك مقتضيات ضروريه سنى بحق تقدير ايدرک ، متين
بر اصلاحات تشبثاتنده بولمق فكرلرينه كلز ، ده دوغرىسى بو
جهته هيچ ياشمازلردى .

بو ذاتلرك اكثريسى جاهل ، احوال عالمه و مدنیه يه وقوف سز
اولمزلرندن فضله آباء واجداددن كوردكارى اداره و تعيشك حسب الزمان
تبدیلنه و اصلاحنه كيرشمك . بونلر ايچون عادتاً ممكىن سزدى . (بابامز -
دن كوردكز كى) مثل سقىمى بونلرك دماغنده ده ، چوق يراشغال
ايدىيوردى . بوسيدن سلطان محمود زمانده موقع اجرايه كىتيريان

اصلاحاتی پیدرپی ایلر یلتمک و اوروپانک النده دهشتلی بر سلاح اولان معارف عمومیه نك بزده ده تعمیم و ترقیسنه غیرت ایتک ، شدت احتیاج جهتیله فوق العاده مطلوب اولدیغی حالده وکلا ، شو سویلدیکم فکره صابهرق ، بو مهمه یه قطیاً اهمیت ویرمز لردی . اونلر ملتک و دولتک ، سلامتی بو استقامتده بیلمیورلر ، و حتی ایچلرندن بعضیلری عادتاً او استقامتی برنوع خرسیتیانلغه تقلید ظن ایدرک شدتله مخالفیت ایدیورلردی . بوذاتلرک فکر لر نجه : او زمان اورته ده موجود اولان فنا لگ اوکفی آلق مسئله سی ، خیر خواهان ملتدن عد ایدیلن ، وکلادن بر قاق ذاتک رأس کاره کچمسیله اولور بیتر ، درجه سندن یوکسک دکلدی . خلاصه : بو طاقه آیردیغمز وکلانک خیر خواه و محب دولت و ملت اولدقلرینی انکار ایتک ممکن اولمه مقله برابر ، اعتقادلری و فکرلری دولتی سلامته چیقاره حق بر طریق اولمادیغنی دخی ، سویلمکده ذره قدر تردد اولنه مز .

ینه بو صنف وکلا ایچنده ، بعض ذاتلر ده وار دیکه : بونلر ، او دورده رأس کاره کچوب شهرت و قدرتلری پک زیاده آرتان وکلایه ، و علی الخصوص محمود ندیم پاشایه دشمن ایدیلر . اونلردن بهمه حال انتقام آلق ایسترلردی .

ایکنجی صنف وکلایه کلنجه : بونلر یالکز بر ذاتدن عبارت ایدی . بو ذات محترم صفات ده مدحت پاشا حضر تلری ایدی .

بو ذاتک افکاری و درایت فوق العاده سی او درجه بیوک ، سوزی او قدر کسکین . نفوذ و اقتداری او مرتبه ده ایدیکه : بو اسم محترمی

ایشیدنجه ؛ خدماتی ، فلاکتی دوشونهرک قلباً خزن و الم حس
ایتمه مک ممکن دکلدر!...

مدحت پاشانک ، غایت عقلی ، ذکی ، جناب حق طرفدن پک
آز انسانره احسان بیوریلن فوق العاده بر اقتداره مالک اولدیغنی اک
بیوک دشمنلری بیه اعتراف و تصدیق ایدیورار.

نزهده اولورسه اولسون ایچنده یشادیغنی جمعیتک اک برنجی طبقه سنده
بر موقع ممتاز احترام قزانه حق کالات علمییه اصحابندن ایدی .

فطرة غایت جسور ، استحقاقلی شهرتی پک زیاده سور ، بر آدم
ایدی . بر کره تصمیم ایتدیکی فکردن دونمک ، اونک ایچون محال
ایدی . تشبث ایتدیکی ایشک مشکلات عظیمه سندن کوزی قورقمز ،
مقصده وصول ایچون ایجادتدایبرده خارقه لر کوستردی .

قریحه سی زنکین ؛ دیپلوماسی طریقنده حیه و انتریه اختراعندن
چکنمز و عاجز قالمزدی . قوه نطقیه سی پک مؤثر ، اداره امور دولته
فوق العاده ماهر ایدی .

بو ذات نادر الوجودده وسعت عقل ، شدت ذکاء ، بر درجه ده
ایدیکه : دولتک هانکی شعبه اداره سنده بولنورسه بولنسون عدم موفقیت
و یا نقصان ممارسه کبی اکثر کسه لر ایچون معذرت مشروعه اوله بیلن
احوال بوکا کوره وارد دکلدی ،

ایشته سلطان عزیز صوک دورنده جاری اولان احوال سیئه یه معا.
رض و کلادن بریسیده بویله بر ذات ایدی .

مدحت پاشانک بو بایده کی فکری و بر وقتدنبری اعماق روحنده

بسلدیکی آمال ، احوال و آرزولرینی اولجه سویلدیکم و کلانک فکرلرینه کلیاً مغایر ایدی . چونکه مشارالیه حضرتلری بیلیر و تقدیر ایدردیکه : احوال جاریه نك فناغنی ، ذاتندن خدمت بکله ن آدملرك مقام اقتداره و فنالرك عزللری کبی اجراآت تمیزلیه مز . ملت و دولتک سلامتی تأمین آرزو ایدلدیکی حالده ، ادارهده مرعی اولان اصولی جدی بر انقلابه مظهر قیلمق الزم اولدیغنه تماماً مطمئن ایدی .

اولجه دیدیکم کبی مرحوم کنجلیکندنبری دولتک بر چوق مأمو- ریتلرنده استخدام اولندیغندن بالجمله شعبات اداره نك یوليله ، عدالت و شریعت دائره سنده اجرای وظائف ایتمسنه نه کبی اسباب مانع اولدیغنی پك ایو بیلیر ایدی . کندی قناعت ذاتیه سنجه ، بو موانع : بزده اوچ عصر دنبری ، هیچ بر طرفده کورلمه مش ، عقل و شرعه مغایر بر صورتده اجرای احکام ایدن استبداد ایدیکه : فی الحقیقه بوندن دها مکمل بر تشخیص اوله مز . مرضی تماماً آ کلامش ، دواسنی تدارکه قویلمش ایدی . بو قناعت و بو تشخیصک بر حقیقت محضه اولدیغنی صکره دن کلن و بوکون اوزر مزده اولانجه شدت قهارانه سیله اجرای مظالم ایدن احوال ایله دخی ثابتدر .

مدحت پاشا حضرتلری ، بولندیغنی مناصب و مقاماتده ابرازندن بر آن خالی قالمدیغنی خدمات و قابلیت کزیده سی ؛ مشارالیهک شهرتی آفاقه چیقاردی ؛ حکایه سنده بولندیغمز زماندن اوچ سنه مقدم مقام صدارته دخی یول آچدی . صدارتده چوق زمان طورهمدی . چونکه سرای و جرمنفعت و اقبال قیدیه ، سرایک اطرافنده طولاشمقدن

بر ان فارغ قالمین وکلای نخام (!) حضراتی مشارالیه حسد ایدرلر، اطوار و شدتندن خوشلنمزلر، دها طوغریسی شرندن قورقارلردی. بونک ایچون صدارتدن انفصال ایتدیرلمسیله ده راحت و امین قالمدیله. عزانی متعاقب سرای وقرینلرنجه استانبوله اوطورمسی جائز کورلمدی. نفی ایدلدی. بر آراق نصلسه تکرار استانبوله کلکه یول بولمشدی. حکایه سنی ایتدکمز زمان مشارالیه منفاسندن عودت ایتمش، ایجه بر وقتدر استانبوله بولنیوردی..

بو دورده موجود وکلا میاننده مدحت پاشانک اک زیاده ایشه یرار دوراندیش، مسالک مخصوص صاحبی بر ذات عالیقدر اولدیغنه بر قاق دلیل موجوددر. از جمله بو زمانده احوال فجیعهیه دوچار اولمش اولان مملکتک نه صورته قورتلمسی ممکن اولدیغنه دائر فکرنده جریان ایده دورمقده اولان تصورات و تفکراتله اثبات ایتک ممکندر. شویله که: سلطان عزیز دورینک صوکلرنده، اداره مشوشه علیهنده کی وکلا، فناغک اوکنی آلق ایچون بر حرکتیه تشبث ایتکی عقلنه بیله کتیرمینلر چوقاق تشکیل ایدیوردی. بونلرک بویله کثرتده بولنملری اساساً ایشک مشکلات عظیمه سنی، و فضله اوله رق عدم موفقیتده کی تهله کییده، کوزجه بیله کلرندن ایلرو کلیور، بویله توکلی ایشلره کیرشمک جسارتنده بولنه میورلردی.

خلع مسئله سی، پک عوامی بر تعبیر ایله: ولی نعمت اولان پادشاهه قیمق تلقی ایدلمسی، او ذتک پک چوغنی بواشدن آلیقویدیغنی ظن اولنه بیایردی. جمیع زمانده وکلای عثمانیه ایچنده بویله بر طاقمک

وجودینه تعجب ایتماید. زیرا : مشارالیه اساساً جاهل ایدیلر .
و کلا صنفه داخل اولدقد نصکره ، عندالله و عندالناس ، ملته قارشی
مسئول اولدقلرینی تقدیر ایده مزلردی . پک چوغی کمال عزتله سور-
مکده اولدقلری سعادت ، ملت دکل ، پادشاه ویردیکنی اعتقاد ایدرلر .
هر کسجه آشکار اولان ، وادنا بر ملاحظه ایله حل ایدلمسی
طبیعی بولنان بر حقیقتی دوشونمز لردیکه : بوده بالنفس پادشاه بیله ملت
سایه سنده مظهر سلطنت و شوکت اولدیغیدر .

ملت اولدیغی حالد پادشاه دخی عادی بر شخصدن عبارتدر ؛
و کیمسه یه لازم دکادر . مادام که پادشاه و وکلا ، ملتک سایه سنده پادشاه
و وکلادرلر ؛ عقلاً ، شرعاً ، انسانیتاً ملته قارشی بورجلودرلر . اونلر ،
ایشته بو مهمه یی ادراک ایده مزلردی . اونلرک فکرلرنجه : پادشاهلرک
علیهنده حرکت ، عصرک حکمداری اولان پادشاهی ، ولوکه : نقدر
مضر اولورسه اولسون ، خلع ایتک بر نوع اخانت عد اولنوردی . اما ،
بو یوزدن ملت پک بیوک مظالمه کرفتار اولسه ، حتی میلیونلرجه قانلر
دوکه رک ، پک چوق شهدای نجات و شهامتک خون حمیتنه بدل فتح
اولنان مملکتلر دشمن انه کچسه بیله ، بو حرکتی ملته قارشی اخانت
صایمزلر ، « قدر بویله ایمش » دیه کچیویرلر ایدی .

و کلامزک اووقت ، و بو کون بیله او اسکی ادراکده و او قابلیتده ؛
فقط بو کون دها بشقه جیلتلرده دخی اولدقلرینی اثباته حاجت یوقدر .
واقعا او کبی افکار باطله و جاهلانه عوامده بولنورسه ؛ بر درجه یه
قدر عفو ایدیه بیلیرسه ده دولتک اک یوکسک طبقه سنده و مقامات

عالیه ده بولنان، محیطاری اعتباریله غوامض و جریان اداره یه بحق کسب و قوف ایتماری طبیعی اولان وزیرایه نه دیملی؟ بیلیمیز. یالکز بو ذاتلر، اشغال ایتمکاری مقاملره لایق آدملر اولدیغنی قطعی صورتده ادعا ایتمک محتاج اثبات اولیه رق پک طوغری بر سوز اولور.

مع مافیله، مشارالیه می آز چوق معذور کوستره بیلجه جک بر شی وار ایسه اوده: دولت علیه عثمانیه ده، ملتک حقیقه ولی نعمتی عد اولنمغه لایق خدمات مبروره ابراز ایتش اولان بر ایکی وزیر، مجرد وظیفه یی مقدس طانیهرق او یولده مساعی غیورانه ده بولنلرندن طولایی، پادشاهلرک ظلمندن تخلص نفس ایده میوب، اعداماً شهید ایدلرکلینی بیلملری، بو صورتله تهدید متمادی آلتنده بولنملری کیفیتدر.

مدحت پاشا؛ او قیراطده، او درجه عادیله ده دکلدی. ملتک سلامت و سعادتنی تأمین ایچون، پادشاهلری دائماً فدا ایتمک شرعاً و عقلاً حرکات لازمه و ضروریه دن بولندیغنی بالنفس وکلا، پادشاه ملت آره سنده واسطه مناسبات اولملری جهتیله ملتی احوال مضره و سیئه دن محافظه ایتمک، بو صنفک وظیفه اساسیه سی اولدیغنی بیلیر ایدی. کندی کیف و ذوقلرندن بشقه بر شی دوشونمین پادشاهلره اطاعت ایتمک، دنیاده شمعدی یه قدر وضع اولنان عموم قانونلره مغایر اولدیغندن بوکی احوالده ملتک مطیع قالمسی مضرندن بشقه بر شی انتاج ایتیه جکنی حقیله تقدیر ایدردی.

مقام سلطنت و خلافتی احراز ایتدکدنصکره نفس هایون مقدس ایسه ده، اساساً هر کس کی بر شیخص و انسان اولسی جهتیله افکار

مضره و کیفیه سنه ، میلیونلره واران قوجه برملتی منقاد و اسیر ایتمک و بویله قدرت حکمدارانیه صرف کیفی و ذوقی حسابنه استعمال ایله ملتی و وطنی نالان و پریشان ایدن بر شخصه ، پادشاهدر؛ دیه تقدیسده بولنمق؛ ظلمک ، حقارتک مجنونانه و خانئانه بر صورتده تطبیق و جریاننه کوز یومق ، وحشی حیوانلردن فرقی اولمیان عالم بدویتده — اوده بدرجهیه قدر — ممکن اوله بیلسده دیانت اسلامیه ایله مشرف و مسعود اولان برملتک بویله اسارتلره ، حقارتلره قاتلانمسی بک بعید و عادتاً محال اولدیغنی حکم ایتشدی. مادامکه دولتده هپ جاری اولان ظلمدر، ازاله و امحاسی حمیتلی وکلا ایچون فریضه دن ، بو فریضه یی ایفاده تکاسل ، هیج بر وقت عفو ایدیلهمیه جک جنایات عظیمه دن اولدیغنی دائماً دوشونور ایدی. بناءً عایه : اومظالم و اغتشا. شاتدن عصرک وکلاسنی مسئول طوته رق ، و اودائرۀ مسئولیته کندیسنی دخی ادخال ایدرک سیئاتک دفعنه صرف همت ایتمک الزم اولدیغنی قطعاً قرارلشدرمش ایدی .

موثوقاً روایت ایدرلرکه : مشارالیه او صره لرده دکل ، دها ایکی اوج سنه اول ایلک صدارتلری هنکامنده اداره نک کیدیشنی بکنمیه رک ملتی عاقبت دوچار اوله جنی مهلکه دن قورتارمق ایچون پادشاهی خلع ایتمک لزومنی ، امنیت ایده بیلدیکی بعض وکلایه آچمش ، و تشبثده ایتمش ایسه ده بیوک بیوک مانعه لره تصادف ایدرک ، او وقت تأخیر مقصوده مجبور قالمشدر. محرم ایدیندیکی وینلرنده بو بایده مذاکرات جریان ایدن ذوات مرحوم حسین عونى ، و شیروانی زاده رشدی

پاشالر اولدقلرینی دخی سویلیورلر. مسئلهینی اوچی برلکده بالاطراف مذاکره ایتمشلر؛ همان ایشه باشلایه جقلری زمان، شیروانی زاده نك احوال خصوصیه سندن طولانی کندیسینه او قدر امنیت ایدیه ممش. که امنیتسزلکی او ائنده تصادفاً، سلطان عزیزك شیروانی زاده بی نزدینه جاب ایتسی وساعتلرجه مذاکرات خفیه ده بولمسی، دها زیاده آرتیرمش. بو حال عادتاً خوف و تلاشلرینی موجب اولمش. ملحوظ فنالغك اوکفی آلمق ایچون مدحت پاشا ایله حسین عونى پاشا متفقاً حرکتله شیروانی زاده بی استانبولدن تبعیده موفق اولمشلر.

ائناى راهده رشدی پاشانك وفاتی، غضبه اوغرامقدن طولانی یاسدن منبعث اولدیغنی روایت ایدنلر بواندیغنی کبی بو وفاتك شبهه سز مبالغات و اراجیف قیلندن اوله رق بریکیلرک اثر تدبیرلری ایله وقوع بولدیغنی سویلینلرده واردر.

شوراسی محققدرکه: براز صکره مدحت پاشا حضرتلری دخی منفیاً استانبولدن اوزاقلاشمشدر.

هر نه حال ایسه سلطان عزیزى خلع ایتك مسئله سی بودورده میدانہ حیققدیغنی محققدر. چونکه: وقعه مهمه انقلابیه نك حیز آرای حصولدن پك چوق اول استانبولك محافل خصوصیه سنده مذاکره ایدلمشدرکه بو جهتک؛ مدحت و حسین عونى پاشالرك ال آلتندن بعض طرفلره تلقینات و تشویقاتندن تحدث ایتدیکی شبهه سزدر.

هر حالده میدانہ حیققان حقیقت شودر:

معلومدرکه: بر انسانك، مادی و معنوی نقدر قوتلی بولنورسه

بولانسون كمال موفقيتيله ايش كوره بيلمسى، بالخاصه دولتك روح حياتنه متعلق مسئلهلرده پك چوق معاونتلره محتاجدر. برقاج كشي بيننده قرارلشديريلن خلع مسئلهسنگ موقع اجرايه كتيرلمسى ايسه، صوك درجهده مشكل بر مهمه اجتماعيه اولديغندن پك بيوك مهارت و اقتدار فوقالعاده، جسارت و متانت لازم اولديغى و ارسته اثباتدر. خصوصاً قرارك مستعجلاً اجراسنه تشبث ايتك موافق اولميوب، هر حالده افكار عموميه ي دخى قزاقمق اقتضا ايدر. چونكه: بوجهت تأمين ايدلمدكه اغتشاشات عظيمه، قان دوكلك كى تهلكه لر بعيد دكلدر. بونك ايچون شهيد مرحوم مدحت پاشا حضرتلرى، ايشه چوق اول باشلدى.

دولتك اداره سنده اولان فئالق ميدانده، فقط اعتراض وشكايت ايدن مفقود اولديغندن سيئات احوالى، نسبتاً چابوق و ابي كورن، آندن اك زياده متأثر بولنان بر صنفه مراجعت ايتدى: علما صنفنك بهمه حال الده ايدلمسى پك مهم و لازم اولديغى بحق تقدير بيوردى. زيرا: او وقت، و حتى بوكون بيله دولت عليه نك اداره عموميه سنه بر درجهيه قدر حقيله كسب وقوف، و هر دورده يوقاردن كلن فئالقلره اعتراض ايدن، اشتكاده بولنان بزده، علما صنفيدر. بناءً عليه مرحوم، او زمان استانبولده بين العلما ممتاز بولنان برقاج عالمى كندى طرفه جلب ايتك ايچون آنلرله صميمى بر محبته كيرشمك چاره لرني آرامش ايدى. بونك ايچون، طوپقپونك طيش طرفنده، تنها بر بوجقده كوچك بر كوشك ايله برقاج دونمدن عبارت بر باغ پيدا ايتمش ايديكه: بوكوشك،

اليوم مدحت پاشا كوشكى ديمكه مشهور در . بو كوشكه علمادن منتخبي
اولان ذواتى اولابرر برر ، صكره بر قاچنى بردن دعوت ايدر ، آنلرله
اوزون اوزادى يه محبتلر ، صحبتلر ايلردى . مقصد محبت و صحبت اولديغى ،
وفقط بو بر واسطه بولنديغى چون كيدر ، دولتك اداره سنده موجود
اولان سيئاتدن ، و هر كس ايچون درد درون اولان مسائلدن بحث ايدلمكه
باشلدى . بو مصاحبه و مباحثه لردن مشار اليهك يكانه املى خلع مسئلهسى
ايچون حاضرونك رضاىنى آلمق ، و بويله جه عادى بر انقلابى وجوده
كتيرمك دكل ، بلكه اداره مطلقه دن حاصل اولان فناقلرى و ضرر-
لرى تشریح و اثبات ايدر ، بورخنه لردن دولتى قورنارمق لازم اولديغى
حاله اداره ده اصول مشورتى قبول و تطبيق ايتك الزم اولديغى آنلرك
دماغلرينه محكم صورته يرلشدرمك ، قانون اساسى وضع اولمىنجه
دولتك سلامتته چقمسى محال اولديغى آيات واحاديث شريفه ، و بر طاقم
مؤلفات اسلاميه ايله اثبات ايدر ، اصول مشورتك احكام جليله
شرعيه يه موافق بولنديغى كوسترمك ايدى . مرحوم مشار اليه ، توالى
ايدن او مجالس صحبت و محبتده بو جهتى اوييله بر حسن اداره و تحصيل
ايتديكه : يك آز وقتده حميتلى علمادن بر جم غفير ، پاشانك فكرينى
صواب و مقبول كورديلر ، و بو مقصد مقدس ايچون . اقتضا ايدرسه ،
حياتلرينى بيله فدا ايدمكلكلر ينه مشار اليه تامين ايلديلر . بو صورتله علما الله
ايدلمش اولدى . بو سايله ده ، تخميناً قرق بيكه قدر واران وفقط بوكون
يك آزالتيلىن طايبه علوم آراسنده ده ، فكر مشورت ياييله رق ، يك كوزل
رواج و اعتبار بولدى . و كيتدكجه توسع و كسب متانت ايتدى .

اشته بوضوح فکرمقدس مذکور استانبول افکار عمومی سنجیده ، بشقه بر طریقندن کله رك قبول و رغبت کورمه باشدی :
مدحت پاشا حضرتلری اداره مشروطه نك محافظه وادامه سی باینده
اك زیاده کنج ترکله کوه نیرایدی . چونکه ، بونلر اصحاب قلمدن
وبو جهتله اهالینك مظهر توجهی اولمش ذواتدن ایدیلرکه : نشریات
محقانه وحریتپروانه لری ، وقانون اساسی فکرینی اذهان امته یرلشدر-
مك خصوصنده کی مطالعه لری خلق طرفندن حرزجان ایدیلیر امیدنده
بولنیوردی . حقیقه ده اویله اولدی . پارسده بولندقلری زمان نشر
ایتدکلری غزته لرك خفياً ممالك محروسه یه کیردیکنی ونه درجه رغبت
بولدیغنی وحریت غزته سنك برنمره سی استانبولده برعثمانلی لیراسنه قدر
صاتلدیغنی واقع اولدیغنی یوقارده سویلمشده .

شونیده استطراداً قید ایده لکه : شدتله حکومت علیهنده اوله رق
خارجده نشر اولنان « حریت » کی غزته لرك ممالك محروسه یه دخوللری زیاده
بر انضباطله تحت ممنوعیتده ایدیه ده ، استانبول مطبوعاتی بوکون اولدیغنی قدر
تضیق آلتنده ، واسارت بیوندر یغنده دکلدی . بر درجه یه قدر سر بست اداره
افکار ایدرلردی .

نه ایسه کچه لم :

مرحوم مدحت پاشا بر طرفدن علما ایله مصاحبه و مجالسه ده بولنه-
رق او ، صنفی کندی طرفنه جلب ، خلع و قانون اساسی مسئله لری
ایچون رضا و طرفدارقلرینی تحصیل ایتکه اوغراشمقده و موفق دخی
اولقده ایکن ، دیگر طرفندن ده او ، بر درجه یه قدر سر بست اولان

مطبوعات واسطه سیله اداره حاضره بی تنقید ایتدرک ملت و دولتی سلا-
 مته چیقارمق ایچون مهم و جدی بر انقلابک لزومنی افکار عمومییه
 علی التدریج احساس ایتدرمکده ایدی .

انقلاب متصورک موقع اجرایه کتیرلمسی نقدر مشکل اولدیغنی عجله
 و نقصان تدبیرک نه فناقلر تولید ایده جکی محتاج اثبات دکدر . خلع
 مسئله سی ، اساساً بزده چوق کورلمش اولدیغندن برنجی دفعه وقوعه
 کلیه جکی آشکار ایدیسه ده قانون اساسی نه اولدیغنی بیلمین اهالییه
 اونی ، ممنوناً قبول ایتدرمک او قدر قولای حصول بوله حق بر ماده
 اولدیغنی ادنا بر ملاحظه ایله آکشلیر . بوندن بشقه و خاصه دخی
 اهالیدن زیاده ایقاع مشکلاته قادر ایکی طرف واردیکه : آنلرده افکار
 عتیقه و مظلومه صاحبی اولان وزرای دولت ، اصول مشورت وسکتة
 منفعت اعتباریله یوزی اکشییه جکی پک مأمول بولنان سرای طاقنی
 ایدی . بو ، ایکی طاقمک حرکاتیه ، مقصود مقرر پک بیوک موانعه
 تصادف ایده جکی شبهه سزدی .

اشته : بو اوچ جهته موجود اولان مشکلات عظیمه بی کوزه آلد-
 مق دولتک بیوک بر فلاکته اوغرایه جنی صروده ، اهون شرین اختیاری
 طریقیه ، و آز چوق بر امید موفقیتله . بشقه بر طریق نجات وسلامت
 بولندیغنی هنکامده تجویز اولنه بیلیر ، عرض ایتدکمز کی جاهل اهالی ،
 وهر وقت بولانیق صوده بالق طوتمق الفت وارزوسنده بولنان سرای
 ووکلا ، قانون اساسی سدیونک ، مجرد کندی ایشلرینه ومنفعتلرینه حائل
 اولق اوزره قورلادیغنی زعمنه بغلنه رق ظاهرده بر مجبوریت قطعیه یوق

ایکن او طرفه ینا شمیة جقلری پک طبیعی ایدی . حالبوکه بعض احوال اجباریه نك پک یقینده تحدث ، ودواتی بدتر فلا کتله کرفتار ایده جکی حس اولنیوردیکه : وقایع آتیه یی حقیقه تیقن ایتک ایچون او بابده بر نبذه بسط معلومات ایتک لازمدر .



— اغتشاشات داخلیه و مداخلات اجنبیه —

دولت علیه و روس محاربه لری حقنده بعض ملاحظات — پان اسلاویزم فرقه سنک روم ایلیده کی فسادلری — جنرال ایغنا تیه فک انتریقه- لری — هر سکنده عصیان و بونک نتیجه سی — بواشاده مرکز حکو- متده کی تکاسل — قونسلوسلر مسئله سی — مداخلات اجنبیه — قونت آندراسینک نوطه سی



دولت علیه نك روسیه ایله ایتدیکی محاربه لرده شایان دقت احوال د نبریده دلی پتروندن بو گونه قدر ظهور ایدن محاربه لرك تحمیناً یکرمی سنه ده بر کره وقوعه کلسیدر .

بونک تصادفاً اولدیغنی ظن وملاحظه ایدنلر ، البته یا کلش برفکره ذاهب اولمش اولورلر . شو صورتله تدقیق ایدلیدیکی حالدده اسباب حقیقیه پک قولای آکلشایر .

محاربه نصورتله اجرا ایدیلیرسه ایدلسین ایکی خصم دولتک اداره وقوتنی تملمدن صارصار . خصوصاً حرب اوزون برمدت دوام ایده جک

اولورسه ! چونکه محاربه نك مطلوبه موافق اجراسيچون
حکومت يالکز اوطرفه غيرت ايدرك مملكتك عموم اداره سنه لايقي وجهله
اهميت ويره من . بوهنكامده تجارت، وديكر حيات مملكته متعلق ايشلرك
كافه سي معطل قالير . حرب ايچون وقوعه كله جك كليتي صرفيات دخي،
ماليه يي پریشان بر حاله كتير كه بواسباب مهمه دندولايي اولدجه
اوزون سورن بر محاربه دنصكره هانكي مملكت و حكومت اولورسه
اواسون ابي بر زمان استراحت ايمكه ، احوال داخليله سني يكيدين تنظيمه
احتياجي واردر .

روسلر ، بو حاللري دفعاتله تجر به ايتمش اولدقلرندن، بزملة ايتدكلري
هر محاربه دنصكره، يورغلقلريني ازاله، داخلي پریشانلقلريني كيدر مك
ايچون بر قاج مدت سكوته وخارجه عدم تعرضه احتياج حس ايتمكه
بولمشلردر كه شو حال روسلرك دائما بزه يكرمي سنه ده بر كره حرب آچه .
لرينك باشلوجه سبيلرندنبريدر .

بوندن ماعدا حكومت مذكوره يالكر بزملة محاربه ده بولميو ب آره
صره ديكر ملتله مثلاً برنجي ناپوليون زماننده فرانسزلرله ، دها صكره
شماللرنده بولنان اسوه چ نوروچه ، ۱۸۴۸ ده وقوعه كلان مجار عصيانني
بصد رmq ايچون بورالرده دخي عسكر سوقنه مجبور اولمشلردر كه بواحواللك
جمله سي آنلره بر مدت اولسون شرقه اولان تعرضلريني اوتوتد رمشدر .
بو حكومتك داخلنده وقوعه كلن عصيانلر ، و بو عصيانلر ايچون
ناچار ايديلن فداكارلقلر دخي روسلرك باشلرينه بيوك بيوك بلالر آچقدن
كري دورمشدر . قريم محاربه سندن بش سنه صكره روسيه پك بيوك

غیرت کوسترک بر عصر دئیری دوام ایدن قفقاسیه محاربه لرینه نهایت ویره بیلدی. بوقطعه بی کاملاً اداره سنه کچیردی. اوچ سنه صکره پولونیا ده دهشتلی بر عصیان ظهور ایتدی. بو عصیان بصدرمق ایچون پک چوق چالاشدی. وموفق اولدی. « بر قاچ سنه صکره ترکستانده بولنان اسلام حکومتلرندن خنوه خانلغنی، بوقطعه ده بولنان دیکر پک چوق یرلری ضبط ایتدی، اورالده قوی بر صورتده یرلشدی.

مع هذا روسلر بوقطعه لرده استیلای حر یصانه لرله اوغراشدقلری حالده بیله کرک حکومتک و کرک روس ملتک ایکی کوزی شرقه یعنی دولت علیه یه دیکلمش قالمشدی. دلی پترونک وصیتنی موقع اجرایه کتیرمک، بورالری و بالخاصه استانبولی ضبط ایدرک نهایت مرام ومقصد قدیم لرینه نائل اولمق کندیلرنجه احوال ضروریه دن ایدی!... قریم محاربه سندن صکره روس ملتی افرادینک آره سنده آیر یجه « پان اسلاو بزم » فرقه سنک میدان کلمسی، و بونلرک غیرت و همتلری حکومتلرینه پک چوق تسهیلات اعطا ایتمکده اولدیغنی محل مخصوصنده سویلمش ایدک. فی الحقیقه بویله ایدی. بو فرقه میدان کلمز روسیه حکومتی دولت علیه ده متبوع خرسیان عنصرینی حرکات مستقبله یه حاضرلق کی وظیفه بی بونلره حواله ایتمش و کندیسی بو ماده یه عائد دیکر تفرعاتله اوغراشمغه حصر غیرت ایلیمشدی.

فرقه مذکوره، ۱۸۶۷ تاریخنده، موسقوا شهرنده بیوک بر اسلاو قونغرهمی تشکیل ایتدی. قونغرهم مذکوره یه نقدر اسلاو ملتی وارسه هپسینه مراجعت اولنهرق اعضا لر کوندیرلمسی تسکلیف اولندی.

فقط ممالك محروسه اسلاولرندن ماعدا بودعوته اجابت كوسترن بولمىدى. اوستريا اسلاولرى بر چوق بهانه لرله قونغره يه كتمك استمديلر. يالكر بلغارلر، صربيه ليلر، قره طاغليلر موسقوايه عزيمت ايدرك اوراده موضوع بحث اولان ماده كمال حرارتله اشتراك ايتديلر.

بو قونغره پان اسلاويزم قره سنك رسمى اوله رق برنجى اجتماعيدر. اوراده مستقبليه حركت ايچون بر قاچ تدابير اخذ اولنديكه باشلوجه سى دولت عليه اسلاولرىنى وقت وزمانى كلديكى زمان عصيانه قالدرمىق ايچون نه كى وسائط مؤثره يه مراجعت ايتك لزومى عريض وعميق تدقيق اولنديغى قضيه سيدر. اك موافق طريق اولمق اوزره نتيجه ده شوخط حركته قرار ويرلدى.

فرقه ايچون مركز عمومى اولمق اوزره موسقواده بر قوميتيه تشكيل اولندي. ايكنجى قوميتيه بكرشده ديكرلى كزلى اوله رق بلغارستانك، بوسنه نك و سائر مهم قطعه لك بعض محملرنده وجوده كتورلدى. بو قوميتيه لك وظيفه لرى غزته لر، رساله لر واسطه سيلاه اهالى يه تركلرك اللارندن يقيناً قورتيلاه جقلىرينه اميد قوى ويررك بو قطعه لرده ساكن خرسيتيانلرك فكرىنى دائماً تهيج و غليانده بولندرمىق، مركزدن كوند ريلن سلاحرلى شمديلاك مناسب يرلرده كزلى صاقلقمق، مستقبليه كى عصيان ايچون افراد حاضرلمق، متنوع قطعاته آرائته لر سوقيله اراضينك و مملكتك احوالارينه كسب وقوفله عصيانك تسهيلنه خدمت ايدى جك بالجمله وسائطى استحضار ايتك و سائر فسادلردن عبارتدى.

بو صورتله بر قاچ سنه چالشلدى. قوميتيه لر كمال غيرتله بر كره وضع

و قبول اولنان پلان اوزرىنه حرکت ، صکره لری آکلشلدیغی وجهله
پک بیوک موفقیتلر دخی احراز ایدیورلردی .

قومیتلرک اداره جهتی یوقارده سویلدکمز اوزره مسقوا شهرنده
ایدی . فقط بونلر ایچون خط حرکت تعیین هر احواله قارشو نه یاییله .
جغنی ارائه ایتک خصوصی استانبول روس سفارتنک ید اقتدارنده ایدی .
ژنه رال ایغنائیه ف هر احواله قارشو حاکم مطلق بولمقی و ایپک
اوجنی النده طوته رق فساداتی استدیکی طرفه سوق ایتک اقتدارینی
حازدی . بوصورتله ماهر سفیر قومیتلر واسطه سیله مطلوب اولان نتیجه .
یی دسترس ایدرک فسادى عموم ممالک محروسه یی آز برزمانده قاپلمشدی .
فقط بعض ملاحظاته مبنی عناصر خرسئیانیه یی وقتدن اول آياقلندرمغی
استمیور ، حرکت ایچون مساعد بر حال آرایوردیکه بو احوالی بولور
بولمز درحال حرکتله باشلدى .

بکلدیکی احوال ایسه شو ایدی .

ژنه رال ایغنائیه ف علی پاشا وفاتند نصکره مرکز حکومت عثمانیه ده نقدر
صاحب نفوذ اولدیغی اولجه سویلمشدى . ژنه رالک بو نفوذیسه محمود
ندیم پاشا سایه سنده ایدی . فقط محمود ندیم پاشا برنجی دفعه اوله رق
مقام صدارته کلدیکی زمان اوراده چوق اوطوره مدی . افکار عمومیه ده
بوذاتک قزاندىغی نفرت سلطان عزیزى کندیسنى عزل ایتدرمکه مجبور
ایتدی . حالبوکه بوند نصکره مقام صدارته کلن ذواتک هیچ بریسی
کندى وطنلرینک علیه نه ، روس سفیرینک مقاصد خفیه و انتریه لرینه
مماشات و یاردم ایده جک آدملردن دکلدى . واقعا بو زمانده دخی محمود

ندیم پاشا پادشاهك سوکلیسی اك زیاده امنیت ایتدیكى ذات بولنوب
شعبات ادارهك دیکر مهم شعبه سنده مثلاً بحریه نظارتنده استخدام
اولنمقده ایدیهده بو ذاتك موقعی ژنه رالک آتیا ذکر اولنه جق مقاصد
خفیه لرینه خدمت ایده جك درجهده مساعد دکلدی . بناء علیه شو
ملاحظاته مبنی سفیر حضر تلری ، وار قوتی بازویه ویرك سرایده کند .
یلرینه مطیع بولنان حشراته محمود ندیم پاشایی تکراراً ۱۲۹۲ تاریخنده
مقام صدارته کتیردیكه اوتاریخدن اعتباراً مرکز خلافت تماماً اك زورلی
دشمن اولان روسیه حکومتك ید اداره سنه دوشمش بولندی .
بواثناده ژنه رال ایغنا تیه فك تحت تفوذنده یالکز مقام صدارت
دکلدی . یوقارده سویلد کمز اوزره سرایده بولنان حشرات ، خدمات دولته
دیکر مأمورین مثلاً صکره لری مهاجر قومیسونی رئیس بولنان رضا پاشا
و سائر لری ینه سفیرك پرورده لری ایدی . و علی الخصوص مقام مشیخت
مسندی دخی بواثناده روس آلتون و کورکلرینه بویون اکن مشهور حسن
فهمی افندینك النده ایدیکه بو ذات وظیفه و مقامنك حیثیتنی قاله آلمیه .
رق روس سفیرینك کورکورینه آلتی اولمش کتمشدی . بر کون بو ذات
ژنه رال ایغنا تیه فه « بر کوزم سنسك بر کوزم اوغلم حیدر در . »
دیدیکي مشهور اولوب اولوقت استانبول محافل جمعیتلرنده سویلنمکده
ایدی .

هر نه ایسه : ۱۲۹۲ تاریخنده روس سفیری ژنه رال ایغنا تیه ف استانبولده
بك آرسفیرلره نصیب اولان مظهریته نائل اولدی . بو هنکامده ممالک
محروسه نك هر طرفی خصوصاً روم ایلی اولجه سویلد کمز اوزره « پان

اسلاويزم « قوميتەلرى واسطەسىلە تاماماً عصيانە حاضرلنمش ، ژەنەراللىك اشارتنە باقيوردى مركز خلافت دىخى يەنە ژەنەراللىك تىحت نفوذىدە بولنوب بو ذاللىك امرى ھەر شىئە حاكم مطلقىدى . بىناا عليه سفير اىچون ياللىكز برشى قالمشدىكە بۇدە شو مرتبە يەكلىن احوالدىن لايىقى وجهلە استفادە ايدە بىلىمك جەھتىدى .

ايغنا تىيەف ، بويالە فرصتىلى قاقچىرە جىق آدملىرىن دىكلىدى . محمود ندىم پاشا ايكىنجى دفعە اولەرق صدارتە كلىر كلىز ، اولانجە قوتىلە مقصد اصلى اولان مادە يە يوكلىندى . وىردىكى اشارت اوزرە اولجە ترتيب اولنان پلان موجىبنجە دوات عالىەنك روم اىلى قطعە سنك اوتەكى اوجىندە بولنان ھەرسك قطعە سنى عصيانە قالدردى .

بو عصيان ۱۲۹۲ سەنەسى بەھارندە وقوعە كلىدى .

دەھار بۇتارىنچىدىن اول ھەرسك اھالىسىنك بر قىسمى ، « بان اسلاويزم » قوميتە آژانئە لرىنك تشوىقىلە وىركى و تكالىف مىرىيە بى تادىيە وايفى خصوصىندە مشكلات كوسترەكە باشلىمشلردى . ولايت مركزى بوھالى كوررك ايفى تابةيتىدە تكاسل كوسترەن اھالى بى قورقتىمىق اىچون اورايە بر مقدار عسكەر كوندردىسە دە بوھركت فوائىدە مطلوبە بى اعطا ايدە جىك ىردە اوقطاعە دەكى كويلرك آچىقدىن آچىغە عصيانى موجب اولدى . بۇندىن بالاستفادە اورالردە كزلىنمش وعصيان جىقارمىق اىچون سوق ايدىنمش اولان آژانئەلر عصيانچىلەرە التحاق ايتدى . دىكر طرفدىن بو قطعە قرە طاغ ونمىسە حدودىنە يقىن اولدىغىندىن بورادە بولنان بر چوق اسلاو وقرە طاغلىلر اشقىايە التحاق ايدرك بولرك مقدار بى بىولتىدى . شو صورتە

جمله سی طوپانه رق اولجه ترکلرله برقاچ دفعه محاربه ارده بولنان و بوکی عصیانلرده اشتراك ایده کلن « به کو پاولوویچ » نامنده برقره طاغلی بی کندیلرینه سرکرده تعیین و کلن عثمانلی عسکرینه جدی مقاومت کوسترمکه قرار ویردیلر .

حال بویله جدیدیت کسب ایدنجه اورایه سوق اولنان و مقداری جزئیاتدن عبارت بولنان عثمانلی مفرزه سی برایش کوره میهرک رجعت ایتدی . حرکت عصیانچیلرک جسارتنی آرتدیردی .

تاریخ مذکورده بوسنه والیسی بولنان ذات درویش پاشا ایدی . مشارالیه روم ایلیده کی عصیانلرده دفعاتله بولنش بر قورد ایدیسه ده آنسزین ظهور ایدن شو عصیاندن شاشرمشدی . مع هذا برشی یاقمق لازم اولدیغندن الده بولنان قوه عسکریه یی طوپانیه رق در حال عصیانچیلرک اوزرینه یوریدی . فقط ۱۲۹۲ سنه سی تموزک یکر می دردنده مغلوب اولدی . کرییه رجعت ایتدی . مغلوبیت مذکوره ایسه اشقیانک غیرتلینی فوق العاده آرتدردی . نار اختلال هر سک و بوسنه نک هر طرفه سرایت ایتدی . بورادن ، وجوار اسلاو حکومتلرندن یعنی صربییه و قره طاغدن کلیتلی فداییلر محل عصیان شتاب ایدرک آز بر زمانده بونلرک مقداری بر قاجیبیکه بعض معلوماته نظراً الی الشمس بیکه واردی .

عصیانی بو مرتبه یه کتورن ایغناقیه ف ایسه هیچ اویوم یوردی . عصیانی دویار دویمز اوراده کی آژانته لرینه و بالخاصه قونسولس لرینه لازم کلن تعلیماتی کوندررک ایشی علولندر مک ونصورتله ایسه مداخله اتمک لازم اولدیغنی کوستردی . فقط اصل غیرت و مهارتی بو دفعه دخی

مرکز حکومتده ابراز ایتدی .

بوسنه وهرسکده موجود قوه عسکریه پک آزایدی . دارالعصیانده بولنان عسکر قوماندانلری مرکز حکومتده فریادلر یاغدی ررق امداد استیورلردی . ایغنائیه ف ، وکلای عثمانیه یه « اکر بوسنه یه سریعاً وکلیتی مقدارده عسکر سوق ایدرسه کز بو حال آوروپا حکومت و افکارینه پک فنا تاثیر ایدر . اهالی خرسئیانیه یی سزدفعه بوغازلق فکرنده اولدیغکزه ذاهب اولورلر . » دیه امداد کوندرمکدن آلیقویوردی . دیگر طرفدن قاریشقلانی اوزاتمی ایچون ایشی مخابرات سیاسییه دوشرمک نیئیه باب عالی یه روسیه نامنه برنوطه و یردیکه بونوطه ده بوسنه وهرسک اشقیاسنه اورالرده موجود دول معظمه قونسولوسلرندن مرکب بر قومسیون ارسالی و آنلرک تحقیق و توصیه سیله اختلالک بصدرلمسنی اخطار ایتدی . باب عالی بو زمانده کندی امر واداره سنده ایدی . بوسبیدن اوراده فکرینه مخالفت ایده جک کیمسه یوغیدی . ایغنائیه فده استدیکنی اجرا ایتدی . دول معظمه حکومتلرندن بو ایشه مداخله اتمک استمیورلرسه ده ، ایشده الک زیاده علاقه دار بولنان باب عالی بو ایشه رضا کوستر دکدنصکره آنلرده ممانعت موافق اولیه جغنی درپیش مطالعه ایدرک ایغنائیه فک اخطارینی قبول ایتدی لر . کندی قونسولوسلرینه لازمکلن تعلیماتی کوندردی لر . بوسورتله بوسنه وهرسکه بر قومسیون کوندرلدی ، فقط تشکیل و سوق اولنان قومسیوندن ذره قدر فائده بکلمک پک یهوده اولدی . ذاتاً مقصد دخی فائده اولیوب . ژنه رال ایغنائیه فک ارزوسنه خدمت ایدیکه بو ذاتک آمال اصلیه سی اشقیایه یوز ویررک آنلرک جسا .

رتلرینی آرتدرمق و برده وقت قزانه رق عصیانك دیگر محملره سرايت ایتمی ، و بو واسطه ايله یکر می سنه دنبری سس اشیدلمش بولنان شرق مسئله سنی رسماً اورتیه قویمق ایدیکه جنرالک بو مقاصدینك جمله سنه نائل اولدیغنی سویلمك فضله در .

قومسیونك حرکته کلنجه قونسولوسلر اختلالچیلرک افکارینی استفساره و باب عالی یی اصلاحات لازمه اجراسنه دعوته قرار و یردیله . باب عالی بو توصیه یی بالقبول متعدد اصلاحات فرمانی نشر و تطبیقاتی تفتیش ایچون سرور پاشا یی فوق العاده قومیسر تعیین ایتدی . فقط عصات کویا اصلاحات موعودهنك تطبیق و اجراسنده شبهه ایتدکلرندن ترک سلاحه راضی اولیوب عموم مخبرات نتیجه سز قالدی . شو صورتله قومسیون هیچ برایش کورمیدیکندن ماعدا عصیانی مخبره سیاسییه دوشوررک او تاریخن دن اعتباراً شرق مسئله سی اوروپا مطبوعات و حکو- مترلنجه رسماً آچلمش بولندی .

ایشلر بو صورتله دوام ایدوب دور یوردی . فقط زمان ایلرلکجه بوسنه ده کی عصیان دولت علیه ایچون کتدکجه فنا بررنك آلیوردی ، شویله که

اوروپا حکومتلری بوزمانه قدر بیطرف دور یورلردی . فقط دولت علیه یه حقیقه خیر خواه بولنان ، و بو جهتی بالفعل اثبات ایدن حکومتلردن بعضیلری مثلاً انکلترة و فرانسه استانبولده کی سفیرلری واسطه- سیله باب عالی یه نصیحت و یرمکدن کری دور میورلردی . بونلرک فکرلرنجه بر آن اول و نصورتله اولورسه اولسون بوسنه و هر سکده کی عصیانی بصدرمق

الزم ایدی. چونکه دولت علیه نك روم ایلیده کی دیگر ولایتلرینک احوالی دخی معلوم اولوب ، بوکون یارین اختلاک اورالرہ سرایت ایدہ بیللمسی دخی ممکندی .

باب عالی ایسہ بو خیرلی نصیحتلری دکلمکدن پک اوزاقدی ، سفیر- لرسہ ویردکلری نصیحتلرہ باب عالینک قولاق ویرمدیکنی دیگر طرفدن دولت علیه نك کندیسنک الک زورلی دشمنی بولنان ایغنا تیه فک تحت نفوذندہ اولدیغنی کوررک ، فوق العادہ براغبرار کوسترمکہ باشلمشلدیکہ بوحالک ثمرہ سی درحال کندیسنی کوستردی .

معلوم اولدیغنی اوزرہ روم ایلیده وقوعہ کلن ہر کونا قریشقلقدن ترکیاد نصکرہ الک زیادہ متضرر اولان حکومت اوسستریادر . خصوصاً بو حکومت عصیان ایتمش ولایتلرہ ہمجوار اولدیغندن « پان اسلاویزم » قومیتہ لرینک حرکتلرندن کندیسنی دخی تعجیز اولور و بعض احوالده حال اختلاک کندی متبوعی بولنان اسلاو عنصرینہ سرایت ایتمسندن قورقاردی . بالخاصہ سویلدکمز تاریخندہ ایسہ بوسنہ یہ محدود بولنان دالماچیادہ کلیتلی اشقیا طویلنوب اورالرہ کفت وکو چوغلمشدیکہ آوستریا حکومتیچون بو اشقیایی داغتمق واورادہ کی مناسبتسزلیکک برآن اول اوکنی آلمق احوال ضروریہ دن ایدی . مجرد شو ملاحظاتہ مبنی بوزماندہ نمسہ نك بش وکیلی بولنان « قونت آندراسی » بوسنہ دہ کی عصیانک اوکنی آلمق و شرقدہ روسلرک فسادلرینہ میدان ویرمیوب ایشی سریعاً بتیرمک ایچون اوروپا حکومت معظمہ سنک رضالریلہ ۳۰ کانون اول ۱۳۹۳ تاریخندہ باب عالی یہ برنوطہ

کوندردیکه محتویاتی شوندن عبارتدی .

بو نوطه ده ، قونت حضرتلری بوسنه و هرسک و سائر روم ایلی ولایات شاهانه لرینک احوالارینی تفصیلاً و توضیحاً تعداد ایتدکدن صکره بورالرده کی عصیانی بصدرمق ایچون اصلاحات مهمه و اساسیه ته تشبث ایدلمسنی باب عالی یه اخطار ایتمکله برابر بو اصلاحات مذکور ولایتلرده عنصر خرسستیاینک عنصر اسلام درجه سنده حقوقه نائلیتلری و ویرکیلرک مناسب صورتده طرحی ، عموم اصلاحات نهدن عبارت اولورسه اولسون اسلام و خرسستیان بالعموم تبعه عثمانیه دن انتخاب ایدیله جاک اعضالردن . متشکل بر هیئتک واسطه سی و تفتیش و نظارتی ایله وجوده کتیرلمسی کبی مواد مهمه یی حاوی ایدی .

باب عالی بو لایحه یی قبول ایتدی . فقط تطبیق و اجراسنی عقلنه بیله کتیرمدی !

چونکه حکومت عزیزیه او یله اصلاحات ، فلان کبی دولت و مات منافعه یارار ایشلره مستعد اولدیغی کبی نوطه ویرلدکن بر قاقچ کون صکره مرکز حکومتده وقوعه کلن بعض تبدلات اورته لخی قارمه قاریشیق ایتمکده ایدیکه صره سی کلشیکن بز شو تبدلاتک نهدن عبارت اولدیغنی شمدی بیان ایدلم .



— صوفته لر وقعه سی —

احوال استانبول — اهالیده کی ممنونیتسزلك — مدحت پاشانك
 حرکتی — احوال حسین عونی پاشا — قونت آندراسینك نوطی اوزرینه
 استانبولده غلیان افکار — صوفته لرک فاتح جامعشریفی جوارنده کی
 اجتماعی و بونلرک باب عالی یه دوغری حرکتلری — بونلرک حکومتدن
 طلب ایتدکلری مواد — سرایک تردد وتوسوسی — بک اوغلنده دول
 اجنبیه قونسلوسلرینک اجتماعی — عزل محمودندیم پاشا ، حسن فهمی
 افندی ونصب محمد رشدی پاشا وخیر الله افندی — وقعه نك اوروپاده
 عکس تأثیری .



اشته ۱۲۹۲ سنه سی مبادیسنده روم ایلی ولایتلرینک حالی بو مرکز-
 ده ایدی . فقط اوهنکامده ممالک محروسه نك باشنه مسلط اولان سیئات
 یالکز بو دکلدی . بالنفس مرکز حکومتده موجود اولان فنالق کوندن
 کونه تشدد ایدیور ، بو کون یارین دها بیوک فنالقلرک میدان کله جکفی
 آپ آچیق کوستریوردی ! ...

یوقاروده سلطان عبدالعزیزک اواخر سلطنتنده اوچ سنه ظرفنده یدی
 سکر صدر اعظم دکشدر دیکنی سویلمشده . بوتبدل وزرا مسئله سی
 شایان اهمیت اولوب ، اولوقت موجود سیئات حقنده بر فکر تام ایدنک
 ایچون شو مادهیه دائر دیکر معلومات اعطاسی لازمدر .

پادشاهده وکلای صیق صیق تبدیل ایتک ارزوسی ، بعض روایتہ
 نظراً ، مقام صدارتہ ودیگر مواقع مهمہ یه محمود ندیم پاشا وعونہ سنی
 کتیرمک املندن نشأت ایتدیکی ، فقط بو ذاتک اہالیہ قزاندیخی
 نفرتی بیلدیکی جہتلہ بوکا جسات ایدہ میوب ، جانی صقیلہ رق ہیچ اولمزشہ
 وکلا ورجال دولتی بوصورتلہ اولسون ازعاج ایتک فکرندن تولد ایتدیکی
 نقل ایدنلر واردر! ... ہرنہ حال ایسہ : پادشاہ اواخر سلطنتندہ یکدیگری
 متعاقب صدر اعظم لری دکشدر مکملہ قالمیوب بوسیئہ دیگر مقاماتہ دخی
 سرایت ایدرک ہیچ بر نظارتدہ تعیین اولنان ذاتک بر قاج آی مأموریتندہ
 قالدیخی کورلمشدر . خاصہ بوسیئات والیرک حاللرندہ کورلمشدر .
 چونکہ بو دوردہ اناتول ویاخود دیگر بریرہ تعیین اولنان بر والی دہا
 محل مأموریتتہ وارمقسزین کیف شاہانہ ایلہ دیگر بر محلہ تعیین اولنور .
 بو بد بختلکہ دوچار اولان ذات مأموریت جدیدہ سنہ دوغری تکرار
 حرکت ایتمکدہ ایکن دیگر برارادہ ایلہ بشقہ بر ولایتہ نقل اولندیخی دفعاتلہ
 کورلمش ، و بودورک احوال غریبہ سندن بولنمشدر .

بو زماندہ پادشاہ کندی کیف وذوقندن بشقہ برشی دوشنمیوردی .
 اک کوچک برارزوسی وجودہ کتیرمک ایچون پک بیوک فناقلر یامقدن
 چکنمیوردی! ... پادشاہلغک کندیسنہ مخصوص مسئولیت وظیفہ لری
 وارمش! ... بو ذاتہ کورہ دکلدی! ... مملکت باطیورمش! ... قولاق
 بیلہ ویرمیوردی! ... مملکتک احوال عمومیہ سی پک فنا بررنک آلمش
 ہیچدہ آدرمیوردی! ...

بوراسی بویلہ ایدی . فقط ہر کمالک بر زوالی ضرب مثلی مشہور

اولوب بونك دخی احكامی شو زمانده تمامیله میدانہ چقمشیدی . بوده طبعیدی ! ... چونکه : بر حکمدار امور اداره ده نقدر اقتدار سزلق کوسترسه کوسترسین بو اداره دن تولد ایده جك فنا لگ کندیسنی آشکارا یتسی مدت مدیده یه متوقف اولدینی کی ، اهالینکده بو فنا لگه کسب وقوف ایلمسی ، بر خیلی زمان مرو رینه وابسته در ! ...

قارئلر من ، سلطان عزیزك مقام حکمداری یه اولان عدم لیاقتی شبهه سز یوقاردنبری ویردکمز معلوماتدن آکلمشلدرد . فقط شوراسیده محققدرکه مشارالیه حضرتلرینك اوائل واواسط سلطنتنده مقام صدارتده بر برینی تعقیب ایدن مستعد و مقتدر صدراعظملر ، پادشاهك اخلاقندن نشأت ایدن فنا لقلری بر درجه یه قدر ستر اید یورلردی ! ... وقتا که محمود ندیم پاشا او مقامه کلدی . سلطان عبدالعزیزك مزیت ذاتیه و حقیقیه سی میدانہ چقدی ! ... فنا لقلر بر برینی تعقیب ایدر اولدی ! ...

بو زمانده اداره سیئاتك نتیجه طبعیه سی اوله رق عموم ملتده بالخاصه استانبول اهالیسندۀ فوق العاده بر هیجان عظیم واردی . آنلر بالنفس پادشاهی بر قاچ تهمتله اتهام اید یورلردیکه بو اتهاماتك اک مهمملری شونلردر :

همان هر سنه استقراض ایدلدیکی حالدۀ اورته ده و خصوصاً مالیه ده هیچ بر پاره یوغیدی . دوغری اولسون یلان اولسون شو زمانده جریان اتمکده اولان بر روایتۀ کوره استقراضاتك قسم کلیسی سرای بطانخانه لرنده کی صندوقلرده و دیگر روایتلره نظراً بعض اجنبی بانقه لرنده ایدی . خصوصاً والده سلطان علیه الشان حضرتلرنده بر قاچ ملیون لیرالق مجو-

هرات وسائر کرانها اشيا موجود اولديغى سويلنيوردیکه شبهه سز بو روايتلرک بر قسمی مبالغه دن وارسته اولمديغى ظن ايدلمکده در . شو قدرکه آتش سزدومان اولماز ضرب مثلنک احکامی دخی تفکره شایان اولوب بو روايتلرک ولو بر قسمی اولسون دوغری اولسی لازمکه چکی جای ملاحظه در !...

بو دورده اداره دولتدن شکایت ایدن یالکیز افراد اهالی اولیوب بالخاصه مأمورین دولت ایدیکه بونلر هر صنف اهالیدن زیاده احوال عمومیه کسب وقوف ایتدکلری محققدی .

بوصنف : محمودندیم پاشا سرايله برلشهرک ممالک محروسه بی انقراضه سرعتله سوق ایتدکده اولديغى بیلیرلردی . یوقاروده بریرده سويلدکمزاورره بوزمانده والیلک ، متصرفلیق کبی بیوک مأموریتلرک الده ایدلمسی دخی روسیه سفارتته مراجعتیه وابسته قالمشديکيه بعد التعیین مأمورینک محل مأموریتلرنده بقاسی دخی روس قونسولوسلریله او یوشه رق کچنمسنه متوقف ایدی . شو حال شبهه سز بر چوقلرینک حسیات حمیت پروانه لرینه دوقنه . رق حکومت عزیزیه ، نفرت وعداوت شدیدیه بسلملرینه خدمت ایدن احوالدن باشلوجه سیدی . بوندن ماعدا مأمورینک عمومی بر چوق زماندبری معاش المیور واردات مالیه تماماً سرای بطاخخانه لرینه کیدیور . دیکه بوسبیدن دوائر دولتده استخدام اولنانلر آچاقدن اولمک درجه سنه کلشاردی !...

دیگر صنف اهالینک ممنونیتسز لکلرینه کلنجه بونلردن بالخاصه اغنیا طاقی اولجه ذکر اولنان قونسولید مسئله سندن دولایي پک چوقلری

ثروتلرینی بردنبره غائب ایتیش دها برقاچ زمان اول معیشت خصوصیه لری
ازهر جهت تأمین اولنان زنکین عائله لر ، حکومتک افلاسندن صکره اقوات
یومیه یه محتاج قالمشلردی .

بوزمانده فناغی تشددایدن مواد دنبر یسیده مطبوعات عثمانیه نك اولکی
ادواره نسبتاً غایت صیقی بر نظارت تحتیه آلمسیدی .

استانبولده صاحب قلم ، اورته لقمه موجود فناغی هر کسدن ایوا کلر
و آکلدقلری موادی وطنداشلرینه حمیتاً بیلدرمک ارزوسنده ایدیلر ،
حالبوکه بو خصوص مقام اقتدار ده بولنان ذواتک ایشلرینه هیچ ده
کلمدیکندن آنلر طرفندن مطبوعاتک انضباط شدید تحتیه آلمسیچون
لازمکلنله اوامر ویرلمشدی . بوسیدن سنسورلر ، غزته لرده بکنمکلری
مقاله لری دوغریدن دوغری یه آلیقویدقلری کی نشرینه مساعده ایتدکلری
مقاله لرده بیله ، پک چوق فقره لری طی ایتمکده ایدیلرکه شو حال غزته-
لرک نصف ، و یارب ربع مقداری بیاض و بوش ستونلرله نشر اولنمسی مثللو
غریبه لر ایجادینه میدان وعالمک لساننه صوک درجه شدت ویرمکده ایدی .
مع هذا اهالی بی بوزمانده اداره عزیزیه دن نفرت ایتدیرن موادیوقاروده
تعداد ایتدکمز سیئات اولیوب اک زیاده بونلره تأثیر ایدن احوالک باشلوجه-
سی روم ایلی ولایتلرینک حال مؤسفه سی ایدیکه هر سگده وقوعه کلان
عصیان مملکتده صاحب ادراک و حمیت نقدر ذوات وارسه جمله سنی
دهشت ایچنده براقمده ایدی .

چونکه بونلر دولت علیه نك ضایعات ملکیه سی اول امر ده بویله
عصیانلرله باشیه رق بعده روسلرله محاربه بی انتاج ایدرک نتیجه ده ممالک

محروسه نك بر پارچه سی دشمنلر اینه کچه کلدیکنی بیایرلردی . یونان
وصربییه نك استقلاللری میدانده ایدی . بوسنه وهرسك عصیانلرینك
عاقبتلری دخی بو نتیجه یی ویره بیله جکنی روش احوال آپ آچیق
کوستر یوردی . بوکا خدمت ایدن احوال دخی شو ایدی .

واقعا یوقاروده ایضاح ایتدگمز اسبابه بناء استانبوله دکی اشریات یومیه
آچیقدن آچیغه بیان افکار ایتیمورلردیسه ده سطرلر آره سندن تعریضلر-
له ممالک محروسه نك بو هنکامده دوچار اولدیغی حال اسف انکیزی ضمناً
آکلتیورلردیکه شو حال اورتالقدده برخلجان عظیمك تولدینه سببیت ویر یور-
دی . خصوصاً بو هنکامده کدک پاشا ده یاپیلان تیاتروده نامق کمال بکک
« وطن » یاخود « سلیستره » نام اثری بر قاج دفعه موقع تماشایه قونیلوب
اهالی یی هونکور هونکور آغلتمقدده واستانبوله بر بحران عظیمك تولدینه
میدان ویرمکده ایدی .

بوندن ماعدا وکلای عثمانیه دن بعضلرینك شو دورده حکومتیه قارشو
بسلدکلری افکار دخی اورتالقدده فکر اختلالی بر قاج قات تشدد ایتدر
مکدن کری دور میوردی .

مدحت پاشا حضرتلرینك مسلك مخصوصه سنی وبومسلکی موقع
اجرایه کتیرمك ایچون نه کی حرکتده بولندیغنی اولجه سویلمشده .
وقایعنی ایضاح ایتدگمز شو دورده ایسه پاشای مشارالیه حضرتلری هیچ
بر دقیقه بوش اوطور میوردی . اولانجه قوتیله فنا لگ اوکنی آلمق ایچون
اوغراشیوردیکه بونکچون دخی اک اول مراجعت ایتدیکی ذات حسین
عونى پاشا حضرتلریدی .

اودورده فضل وکاليله اشتهار ايتمش نقدر امرای عسکریه وارايسه
هان جمله سی حسین عونى پاشا حضرتلرينك يتشدر دیکى ذوات اولمغله،
بولنديغى سرعسكرلاك مقامنك تأثيرندن ماعدا امرای عسکریه اوزرنده
شخصى نفوذ واعتبارى دخى موجود ایدی. وکلا ایچنده اک زیاده صاحب
اقتدار و نفوذایى دینه بیلوردی. و بو نفوذ و اقتدار سایه سنده سرایه
طوپانان حشراته یوز ویرمزدی وشرلرندن بر درجه یه قدر خلقی مصون
بولندره بیلوردی.

حسین عونى ياشانك اداره دولتدن عدم ممنونیتنه بر قاج سبب اولوب
باشاوجهلری شونلردر:

برنجیسی: وطنپرور وحمیتلی اولان بو ذات مجرد سلطان عزیزك
شخصندن متولد او یغونسزلقلردن واز جمله ژنه رال ایغنائیه فك وکلا
و باب عالی یه قارشى آلدیغى وضعیت آمرانه دن فوق العاده مغیر بولنمیسدر.
ایکنجیسی: منسوب ورثیسی بولنديغى صنف عسکری یی زمان و حالك
ایجاب ایتدر دیکى درجه ده نظام و انتظامه قویه رق وطنه جدی بر خدمتمده
بولنه بيلمك آرزوی حمیتپرورانه و وظیفه شناسانه سیله ترتیبات و تنظیمات
ایچون، هر هانكى بر فعل خیری مراد و اجر اسنى طلب ایتمش ايسه
سر ایدن ایدیلن مداخلات و هر کون دکل بلکه هر ساعت بر برینی فسخ
ونقض ایدن ارادات. مشارالیه حضرتلرینی هیچ بر خدمته موفق
ایده نمشدی.

اوچنجیسی: مساوی اداره، دولت وملتى وادیء انقراضه دوغرو
سوق ایتمکده اولدیغنى و بوکا بر چاره تخلص آرامق وظیفه وطنپروری

مقتضاسندن بولنديغنى قطعياً حس ايلمش اولديغندن ايلرى كمشدر .
 درنجيسى : و بلكه اك مهمى اساساً هيچ بر قباحتى اولمديغنى حالده
 بر قاچ دفعه نفى و تغريب جزا رينه دوچار ايدلمش اولديغندن ، سلطنت
 عثمانيه و خلافت معظمه اسلاميه ي و مقام مقدسى وجوديله بر باد ايدن سلطانك
 شخصندن و بيلهرك وطنه ، ملتة خائنلك ايدن عونہ سندن انتقام المى
 آرزوسى ايدىكه مشاراليہ حضرت تلىرىنك صداقت و استقامتندن ادانى يه
 قارشى كوستردىكى طور مغرورانہ سنى بيلنر ، امور دولته بر انقلاب
 خيرك حصوليچون نه درجه آرزو كس و نقدر فداكارلق كوستره بيله
 جكنى تقدير ايدىه بيليرلردى .

اشته بوسبيلردن دولايى حسين عونى پاشا مرحوم بلكه مدحت
 پاشادن دها زياده دولته بر انقلاب وجوده كتىرمك و امور دولتى قوى
 و متين بر اساس اوزرينه وضع و بنا ايلمك آرزو سنده ايدى . فقط شو-
 نيدىه سويلمك لازمدركه مشاراليہ حضرت تلىرى يالكر خلع مسئله سيلاه كوز
 او كندهكى فناغى قالدرمى و آند نصكره منتظماً حركت ايدىه بيلمكى دوشنه
 بيليردى . حالبوكه مدحت پاشا بعد الانقلاب ياپيله جق شيلرى دوشنمش
 و حتى تعيين ايتمشدى !...

هر نه ايسه حسين عونى پاشا ايله مدحت پاشا آره سنده پك چابوق
 اتفاق حاصل اولدى . فناغك او كنى المى ايچون آنلر طرفندن تدابير جديده
 اتحادينه تشبث ايدلىكه آنلرك افعالنه تسهيلات و يرن ماده دخى شو
 ايدى .

بو دورده ولايات عثمانيه ده وقوعبولان اختلالاتدن بشقه نفس

استانبولده افکار عمومییه حکومتك پك زیاده علیهنده اولدیغنی سویلمشدك.
فقط قونت آندراسینك نوطه سی اوزرینه آرتق ایش بسبتون چیغرندن
چیقدی . اوتوده بریده برچوق اراجیف چوغالدى . هله اهالینك قسم
اعظمی خوف و تلاشه دوشورن ، بوهنكامده « پادشاه ایغناویه فایله کیزلیجه
اتفاق ایتمش ، شهزاده یوسف عزالدین افندی بی ولی عهد سلطنت اعلان
ایده جگمش ، بوکا اعتراض ایدنلری تأدیب ایچون روسیه دن اوتوزبیک
عسکر کتیره جگمش » حوادثی ایدی .

مع مافیه افکار عمومییه ده اك زیاده نفرتی موجب اولان محمود ندیم
پاشا ایدی . علیهنده هر کس اغز لرینه کلن سوزی صرف ایتمکدن چکنمه
مکه باشلمشدی . ایغناویه فدن آلدیغی رشوت مبالغه لی بر صورتده لسان
عوامده دولاشیوردی .

او کونلرده بر حوادث دها یایلدی . کویا یقینده بالعموم اسلام اهالی
غیر مسلم اقوامی کسه جگمش ، استانبول سوقاقلرنده سیل کی قانلر آقه .
جگمش . اشته بواشاعه غیر مسلم اقوامی فوق العاده خوف و تلاشه
دوشوردی . هر کس احتیاطاً سلاحلنمغه مجبور اولدی . استانبولده
سلاحچی دکانلرنده اسلحه یه متعلق برشی قالمشدی .

امور دولتی و افکار ملتی بر نظر دور بین حقیقت ایله تعقیب ایدن ،
تحت ترصد ده بولندران مدحت و حسین عونى پاشا لر ایشه البته بو حاله
واقف ایدیلر . یالکز واقف دکل ، آمال و مقاصد علویه لرینی موقع اجرا یه
قویمق ایچون وقتك حلوانی دخی آکملشردی . بناء علیه دقیقه فوت
ایتمه رك در حال تشبثات لازمه یه قویولدیلر ، اك موافقی اولمق اوزره شو

طریق اختیار ایتدیلر .

اهالینک بو ائناده اداره عزیزیه یه اولان بغض وعداوتی معلوم وافرادی جمعیتدن هر برینک برانقلاب محققه منتظر بولندیغی وارسته اشتباه اولمقله برابر خلع پادشاهی کی بر امر خطرده غایت متبصرانه داورانمق واهالیدن ولو بر قسمی اولسون دلگیر ایتک موافق قاعده احتیاط اوله میه جغندن احوال عمومیه بی لایقی وجهه تنویر و افکار عمومیه بی تدریجاً وقعۀ عظمایه تهیه وتانیس ایتک اوزره برنمایش ملی ترتیبه قرار ویرلدی . مقصدک موفقیتله استحصالی ایچون بو کی احوالده دائماً باشبوغ اوله کلن و بر درجهیه قدر اداره وعند الازوم ضبطی قولای بولنان طلبۀ علومه مراجمعت اولندی .

طایفه لرده ایسه ذاتاً کوردکلری تشویق ثمره سیله وقت وقت غلیان افکار آثاری مشاهده اولنمقده و حکومتک افعالندن ممنون اولمدقلرینی آچیقدن آچیغه سویلینلر بولنمقده ایدی ؛ اوتده بریده حکومتک خط حرکتی مؤاخذهلرندن و طاقندقلری اوضاع و اطواردن خفی بر تشبثلری بولندیغی استشمام اولنیوردی .

هر نه ایسه : ۱۲۹۳ سنه سی ربیع الاولنک واسطنده بر پنجشنبه کونی استانبولک نقاط مختلفه سنده وبالخاصه فاتح جوارنده بولنان مدرسه لرده کی طلبۀ علوم مدرسه لری جوارنده طو پانمغه باشلایلر ، جمعیتلری کتدکجه بیومکده ایدی ؛ افراد مجتمعه ابتدا یواشدن باشلیه رق جمعیتک بیومسیله رفع صوتی و آوازۀ اشتکابی عیوقه چیقاردیلر . بو کوراتی آره سنده نه باغرشدقلرینی آنکق مشکل ایدیسه ده — چونکه هر قفادن

برسس چیقوردی — آره صره «تحصیل زمانی دکدر ، درسره باقلمز ، حکومت تهاده . دولت وملت بطیور بر آیاق اول چاره سینه باقلمیز . «
 آوازه لری یوکسلمکده ایدی . بوهای وهوی ؛ بوهرج وهرج ، بر
 ساعت قدر دوام ایتدی ؛ اطرافدن کلن خلق کندیلرینه التحاق ایدنجه
 صوفته لر ایلری یه حرکت ایتک ، باب سرعسکری یه کتمک ایچون بر برینی
 تشویق ایدیورلردی ؛ نهایت براز صکره اولدقجه کلیتی بر مقداره بالغ
 اولان جمعیت بازید طرفه حرکته باشلدی . بو ائناده ایشک ایچ یوزینه
 واقف اولمیان ویا کندیلرینی او یله کوسترن بعض مدرسلر ایلر ویه حرکت
 ایتملری ایچون نصایحه بولنمشلر سه ده حرکت ایدن جریان صاغدن
 صولدن کندیلرینه قاریشن آقینتیلرله متصل بیومکده . امکان مقاومتی
 ازالتمکده ایدی . شبهه سز بونلرک ایچنده حقیقت حالدن کلیاً بی خبر اولانلر
 ده واردی . فقط صرف تماشا ایچون کلنلر دخی جریان جمعیته تبعاً برابر
 حرکت ایتکده اولدقلرندن کورنلر قیام عمومی یه قائل اولیورلردی .
 بو ائناده کرک جدی و کرک مواضعه قییلندن فاتح قره قول قوماندانی
 دخی طلبه نلک ایلری یه حرکتی جبراً منع ایتک تشبثنده بولندی ؛ سوقاق
 باشلرینه نقطه لر دیکه رک صوفته لره چوق سوزلر سویلدی ؛ بر شیئه موفق
 اوله مدی . زیرا کرک اهالی و کرک دیگر سمتلرده کی طلبه علوم فاتحه
 قیام وقوعی خبر آلیر آلمز بر سیل خروشان کی مرکز آقوردی ، عسکر
 بونلرک اورته سنده قالمشدی .

بوصورتله حرکت ایدن غلبه لک باب سرعسکری میداننه واصل اولدی .
 اوراده چوق دور مدیلر ، باب عالی یه دوغری یورودیلرکه بوماده جمعیت

آره سنده خفياً خلقی سوقه مأمور رهبرلر بولندیغنی اثبات ایدیوردی. بواثناده صدر اعظمه شیخ الاسلام حسن فهمی افندی علیهنسده شدتلی اعتراضلر، تهدید آمیز سوزلر ایشیدلمکده ایدی. باب عالی یه واصل اولور اولمز عمومی متفقاً؛ «صدر اعظمه شیخ الاسلامی استمیز» دیه باغرشمغه باشدیلر.

صوفته لرك فاتحده تجمع ایدرك باب عالی اوزرینه حرکت ایتدکلی خبری، ییلدیرم سرعتیه استانبولک هر طرفه انتشار ایتدی. بالطبع بوحوادثن اک زیاده متأثر اولانلر اوکونلرده استانبولده اسمی «ندیموف» دیه زبازد اولمغه باشلیان صدر اعظم محمود ندیم پاشا ایله شیخ الاسلام افندی ایدی. وقعته نک مبدأ ظهورنده مستغرق بهت وحیرت اولان محمود ندیم پاشا براز صکره عقلانی باشنه آلهرق مقامنی براقوب باب عالی جوارنده بولنان ایران سفارتخانه سنه قاجدی.

شیخ الاسلام دخی صدر اعظمدن زیاده متانت کوستره مدی. صوفته لرك کندی علمهنده کی نمایشلرینی و باب مشیخته برهیئت مبعوثه کوندرمک تشبهنده بولندقلرینی دویاردویماز دایره سندن فرار ایدرك اقر باسندن برینک خانه سنده کزاندی.

طلبة علومک حرکتی سرایی دخی آلت اوست ایتدی. زیرا احوال طبیعیهدن و حقائق مجربه دندرکه قباح و جنایتنی بیلن مستبدلر دائماً اهلیدن خوف و احتراز اوزره بولنورلر، آنلر حقنده ارتکاب ایده. جکلی جنایتلری، زمان سکون و آسوده کیده اجرا ایدرلر، ایلک اعتراض و غایان وقوعنده دهشتلی برخوفه کرفتار اولورلر. شخصاً جسور

بيله اولسه لر مقاومتدن عاجز قاليرلر ؛ کيمسه يه امنيت ايدمه زلر ، عموم دنيایي شخصلرينه دشمن ظن ايدرلر .

بوسبدن سلطان عزيز ، حادثه دن پک زياده تلاشه دوشدى ، نه ياپه جغنى شاشيردى قالدى . مع هذا کنديسيچون قاچه حق ير يوقدى . ايلک هييجان کسب سکون ايدنجه اعتدال دمنى محافظه ايدمه بيان بر قاج ذاتک ترتيبيله تدابير لازمه يه توسل اولندى . در حال استانبولده موجود وزرا ورجال دن بر قاچي سرايه جلب ايدلدى . باش مابينجى ، سرياور وسائر بيوک مأمورين جمعيتيه کوندرلدى . مقصدلرينک نه اولديغى صورلدى . صوفته لردن بر ايکيسي ايلرى يه کله رک دولت عليه نك اهليتسز ، حميتسز وکلا يوزندن گرفتار اولديغى مصائبي بيان ايله علما ، مأمورين ملکيه وعسکريه نك ، اصنافک خلاصه عموم عثمانلي لرك صدر اعظمه شيخ الاسلام دن ممنون اولمداقلىنى و بناء عليه بونلرک عزليله يرلرينه ملتک امنيتنى قزائمش ذواتک نصبنى طلب ايتدکلرينى افاده ايلديلر . بواثناده مقام صدارت ايچون مدحت و يارشدى پاشانک ، مقام مشيخت ايچون دخى خيرالله افندي نك اسملى ايشيدلمکده ايدى .

سرايدن کلن مأمورلر ، جمعيتى داغتمق ايچون طابئه علومه پک چوق نصيحتلر ايتديلر ، مواعيد کثيره ده بولنديلر ، مثمر اولدى ؛ مطالب مشروعه لرى قبول اولمندن بر آديم بيله آئمه جقلرينى مصرانه بيان ايتديلر ؛ اونلرده سرايه کله رک دويدقلىنى ذات شاهانه يه عرض ايتديلر .

او زمان بيله سراي بر شيئه قرار ويره ميوردى ؛ هر کس خلایجان وهييجان ايچنده بولنديغى جهتله بر فکر سالم ايرادنن عاجز قالپوردى .

آراده تشئت واردی . نهایت اك موافق بر تدبیر اولق اوزره انتظاری
بر حرکته بولمق مناسب کورلدی . زیرا وکلانك قسم اعظمی جمعیته
قارشوسرایك مغلوبیتندن جداً ممنون اولمقله برابر سلامت ذاتیهلری ایچون
دخی لازمه احتیاطیه دن آیرلیورلردی . دیگر جهتدن سلطان عزیزك میال
بولندیغی فرقه ایشك علولندیکنی کوررك پادشاهی مقاومتیه سوجه جسارت
ایده میورلردی ، یالکزر روس سفیری ایغناقیه فوقعه یی دویاردو یماز آدم-
لرینی سرایه کوندرك بهمه حال مقاومت لزومنی توصیه ده اصرار ایتدی .
جمعیت بواثناده نتیجه مطالبنی باب عالی وسیرکه جی جوارنده بکلیوردی ،
اقشام اولدی ، برشی ظهور ایتدی . طلبه علومك ایلری کلنلری ایش
بومرکزه کلدکد نصکره داغامه نك تهله کی اوله جغنی آکلدقلری جهتله
صباحه قدر بکلمکه قرار ویردیلر . افراد جمعیتدن هیچ بریسی عودت
ایتمیهرك تابصباح بکلدیلر .

مع هذا بو حادثه آسایش محلی به سوء تأثیر ایتسی احتمالدن پکده
بعیددکلدی جمعیتك اساس قیامنی بیانلر پک محدود اولدیغی جهتله مللی
غیرمسلمه خصوصیه بك اوغلنده مقیم اجانب ، طلبه علومك حرکت واقعه
سندن پک زیاده تلاشه دوشمشلردی .

وقعه دن بر قاق هفته اول بك اوغلی محافلنده صوفته لرك اهالی
خریستیانییه یی قلنجدن کچیره جکلرینی معان جامع و سوقاقلره یافته لر
پايشدردقلرینه دائر برشایعه دوران ایتمشدی . بوکی اراحیف اوروپا-
لیلری صغوتمقده منفعت مخصوصه سی بولنان روسیه سفارتی طرفندن ترتیب
ونشر اولنیوردی . فقط نه فائده می وارکه یوم مذکورده طلبه علومك

آياقلىنمىسى روسىيە سفارتىنىڭ ال التىدن نشر ايتىمىكە بولندىغى شايىعاتىڭ
 صحتىنە اوروپايللىرى اقناىە خادىم اولدى؛ حتى برچوقلىرى وقوع بولە حق
 تعرضدن كىندىلىرىنى وقايە ايچون اسباب تحفظيە يە بىلە توسل ايتدىلار .
 دىكر طرفدن استانبولده بولنان قونسولوسلار وقعه دن پىك زياده اوركه .
 رك روس قونسولوسنىڭ تشويقيىلە آوستريا قونسولوسخانى سنده اجتماع
 ايتدىلار ، تبعه لىرىنىڭ محافظه جان ومالى ايچون اتخاڭى مقتضى تدابىرى ،
 تحت قراره آلىق ايچون مذاكرە يە ، مشاورە يە قويولدىلار . بو مجلسده
 اساس مسئلە حقنە مختلف فىكرلر ايراندن صكرە نهايت آوستريا قونسولو-
 سى « تركلرك بك اوغلنە هجومى تقدير نەدە آوستريا تبعه سى اولەرق استانبولده
 مقيم خرواىلردن بىك بش يوز فرد طويلە بىلە جىكى » بيان ايتدى .
 بونىڭ اوزرىنە من القديم اعمال حيل و دسائس ايلە مشغول بولنان روس
 قونسولوسى موسيو « ختراوو » دىخى اوروپايللىرى مدافعه ايچون برقاج
 يوز قرە طاغلى تدارك ايدە جىكى سويلدى ، رفقاسنىڭ « قرە طاغلىلار
 روس تبعه سى دىكلدر ، بوللىرى سىز نصل و ىرە بىللىر سىكر » يوللو مستهزبانە
 اعتراضلىرىنە روس قونسولوسى « اوراسى بنم بىلە جىكم ايشدر » جوابىلە
 مقابلەدە بولمىشدر .

روس قونسولوسى برطرفدن مجلس مذكوره بوكى تفوهاىتدە بولمىقىدە ،
 دىكر جەتدن التىدن كلىدىكى قدر اورتە لى قارشىدرمىقدە اىكن اىلك
 شاشقىنلىغى كچىرد كد نصكرە سفيرايغناىەف درحال وقعه دن استفادە طرىقنى
 دوشندى . وسائط ممكنە يى استعمال ايدرك تركلىرى خرىستىانلار عايىنە
 آياقلىندىرق اوروپايللىرى كسىدرمىك وبوساىەدە اوروپا افكار عمومىە سنى

عليهمزه چويردك استانبوله اوروپايي عسكر سوقنه مجبور ايتك و بو صورتله مقصدينه نائل اولمق استيوردي . سفير جنابلري بونك ايچون غايت اني تركجه بيليرقره طاغلي و بوكا ممائل خذله يي طلبه علوم قيافته صوقه رق جمعيتيه يوللادي . بونلر واسطه سييله افراد جمعيتي بك اوغلي طرفنه كچيرمه كه سعي ايتدي ؛ فقط حمد اولسون موفق اوله مدي . زيرا جمعيتي سوق و اداره يه مأمور اولانلر بالخاصه بو ماده حقنده تعليمات آلدقلرندن ادب داخلنده افرادي ضبط ايدرك كيمسه يه تعرض ايتدرمديلر .

بو صورتله كيجه كچدي ، صباح اولدي . او كون (جمعه) ايدى . جمعيت اولككندن غلبه لكدي . طلبه علوم دنيا دن خبرلري اولمقسزين مقصدلريني اجرا ايتدرمك ايچون كال ثباتله سر كه جي و باب عالي جوارنده بلكديلر .

على الصباح وكلا و علمادن برچوق ذواتك سرايه دعوت اولندقلاري خبري چيقدى ، براز صكره دخي مسند صدارتك رشدي پاشايه ، مقام مشيختك خير الله افندي يه توجه اولنديغي حوادثي سويلندي . هر كس ممنوناً باغر شمعغه باشلديلر .

بو حوادثك حقيقتنه مقارنتي براز صكره تأيد ايلدى . يكي صدر اعظم تعيين اولنان رشدي پاشا آلاي والايله خلقك او كندن كچهر ك باب عالي- يه كلدى ، رسم تشريفات اجرا اولندي . شيخ الاسلام اولان خير الله افندي مراسم تشريفاتيه ختامندن صكره مقامنه كتدى .

جمعيت افرادي بوني كورنجه مقصدلرينه نائل اولدقلريني آكلديلر ،

پادشاهه دعا ايدرك مطيباً يواش يواش داغلديلر. بواثناده دخی مغل
آداب اوله جق هيچ بر وقعه ظهور ايتدی.

تاریخ عثمانیده صوفتهلر وقعه سی نامنی آلاں حادثه بوندن عبارتدر،
وقعه یی تکمیل ایتدن اول بو حادثه ده بعض نقاط حقنده قارئلرمزك
نظر دقتلرینی جلب ایتکی مناسب کور یورم.

قارئین کرامدن تاریخ مطالعه سیله توغل ایدنلر، بوطلبه علوم جمعیتک،
ادوار سالفده آره صره وقوعه کلمکده و علی الاکثر پادشاهلرک خلغنی
و حتی بعضاً شهادتی انتاج ایلیمکده اولان یکیچری زور بالرینک
عصیانلرینه، مقیس اولدیغنه البته دقت بیورمشلردر. یکیچری قیاملری
غایت کورلتیلی اولوردی. حین وقوعنده استانبول خلغنی خوف
و دهشت ایچنده براقیردی. طلبه علومک آياقلامه سی ایسه مبدأندن
منتهاسنه قدر کمال مهارتله اداره اولمش و کسه نک بورنی بیله قانامقسزین
مقصده دسترس اولندقدنصکره جمعیت داغیدلمشدر. بو حادثه نک
امتدادی اوتوز ساعت بیله سورممشدر.

بویله قولایلقله، بر قوه جبریّه مسلحه یه مراجعت اولنمقسزین
مقصدک استحصالی عبدالعزیزک اخلاق خصوصیه سنه عطف ایتلیدر.
بو ذاتک قان دوکدن طلبه علومک مطالبنه سرفرو ایتسی. علوجناب
و مرحمتنه عطف ایتک خطادر: هر مستبد کی سلطان عبدالعزیز
جسور کورندیکی حالدّه تهلکه باش کوستررکوسترمز لرزان و هراسان
اولمغه باشلامشدر. بو کیفیت حکمدارلرک خاصه ممیزه سیدر.

وقعه نک عقبنده، پادشاه جبانّت مضمهره سنی اظهار ایدنجه خیانت

مستمره اربابندن بولنان صدراعظمندن اختيار ايتديكى حر كتنن بشقه دورلوسنى بىكلمك عبث ايدى . بو ذاتك ردائت و جياتى مشهورانام ايدى . وقعە كوفى نفسندن بشقه سنى دوشونمىهر ك ايران سفارتخانه سنه قاجوب ولى نعمتنى يالكر براقسىله بر كره دها اثبات جيليت ايتدى .

بيطرفانه سوز سويلمك لازمكلىرسه وقعەده روس سفيرينك جسا رت و متانت كوستردىكنى علاويه مجبورز . مومى اليهك بر قاج كون صكره حكومت متبوعه سنه ويردىكى راپورده طلبه علوم جمعيتنه قارشو اتخاذا ايتديكى تدابيرى مفصلاً ايضاح ايتمش و اوكون سرايه دفعاتله آدملىر كوندرك مقاومت لزومنى بيان ايله ، طاش قشله و سراى جوا رنده كى عسكرله جمعيتى جبراً داغتمنى توصيه ايلمش و عندالحاجه اوده سادن عسكر جاي آسان اولديغنى بيلدرمشدر .

سفير راپورنده سرايى پلاننه اشتراك ايتدرمك ايچون فوق العاده بذل همت ايتديكى حالده موفق اوله مديغنى كمال مايوسيتله بياندر نصكره احوال مستقبليه قارشو نه وضعيتده بولمق لازمكه جكنى ملاحظه ايله مشغول اولديغنى يازيور . [*]

وقعه يى ترتيب ايدن ذوات بتمامها مقصدلرينه نائل اولمشلردر . اولاستانبول افكار عموميه سى ، انقلابات مستقبليه احضار ايدلدى ، بو طرفدن برتهاكه كليه جكي ميدانه چيقدى . ثانياً مقصد اصلينك حين اجرا سنده موقعلرده كى قواء فاعله يى ايوجه توزين ايدرك عجله ايتمكسزىن

[*] Moscovski Vedomosti, Correspondance de Constantinople . 1876 .

ایشه باشلمق ایچون وقت قزانلدى .

وقعه نك سياست خارجيه اولان تاثيرى دفعه آكلاشيله مدى .
اوروپاليلر وحى استانبولده بولنان سفرا پك چوق پاره صرف ايتدكلرى
حالده من القديم تركلر حقنده معلومات صحيحه دسترس اوله ميورلر ،
استانبول خلقى بزه اسكيدنبرى آيرى يشارلر ، اجنبيلرله چوقلق
اختلاط ايتملر ، لسانلرينه واقف اولنلر ، اوده دوائر رسميه مداومينه
منحصر اولمق شرطيله ، پك آذر . يالكر مأمورين خارجيه من بك اوغلى
بالو ورسمى ضياقتلرنده اثبات وجود ايتسه لرده هر شئي كيزلك عادت
حكمنه كچمش اولديغندن احوال داخليه مزه دائر شق شفه ايتملر .

مع هذا استانبولده تحدث ايدن بويوك وقعه اوروپا افكار عموميه -
سنده تاثيردن خالى قالمدى . او زمان عالم مدنيتك نظردقتنى جلب
ايتمكده اولان شرق مسئله نك اهميتنى آرتدردى . حقيقت حاله واقف
اولمقله برابر مركز خلافتده برشيلرك جريان ايتمكده اولديغنى ، او
طرفده وقوعه كلن حادثاتك دخی نظردقتدن دور طوتلممسي لازمكه -
جكنى اوروپايه آكلتدى . اوروپا جرايد مهمه سى مسئله نى استكنناه
ايچون استانبوله مخبرلر كوندرديلر .

اشته بواثناده حوادث تداركنه پك خواهشكر بولنان مخبرلر
مطبوعات اجنبيه ستونلرني يالان ياكلش حوادثلرله املا ايتديلر ؛
مصور غزته لرك صحيفه لرى اسملرى سويلنمكده بولنان عثمانلى وكلا ورجا -
لك رسميليله دولدى ؛ شهزاده لرك ، آز چوق اشتهار ايدن ذواتك
مفصلاً ترجمه حاللرى يازلدى ، خلاصه استانبولده تحدث ايدن كوچك

بر وقعہ اوروپا جہ فوق العادہ اہمیتلہ تلقی اولندی .

مع هذا بو قدر حوادث و اخبارات بسبتون بوشہ چیقمدی ،
سرکارده بولمان وکلامزک ماہیت حقیقیہ لری میدانہ چیقمنغہ باشلدی .
وکلا آرہ سندنہ اک زیادہ اشتہار ایدنلر محمود ندیم پاشا ایلہ مدحت پاشا
اولدی . محمود ندیم پاشای روس طرفنی دہا دوغریسی پارہ سنی التزام
ایدن پاشالردن عد ایتدکلری حالہ مدحت پاشای مسلك مخصوص صا .
حبی ترقی پرور ، وکلانک اک متینی ، اک مستعدی اولق اوزرہ طانیديلر .
شہید مشارالیہ حضر تلرینک اوصاف برکزیده سنی بالخاصہ انکلین
و فرانسز مطبوعاتی بر آوردہ لسان تقدیر ، روس مطبوعاتی ایسہ مشار
الیہ حضر تلرینی تقبیح و تلغین ایدیوردی .

بو ہنکامدہ روس غزتہ لری ہر کون مدحت پاشا علیہنہ ستونلر
دولوسی یازی یازمنی بر وظیفہ مقدسہ عد ایدرلردی . بونلرک قولنجہ
شہید مقدس کی مفسد ، بداندیش بر آدم نہ دنیاہ کلش ، نہ دہ کلمی
ممکن بولنمشدر . مدحت اسمی اک اوفق کویہ وارنجیہ قدر ابلیس
درجہ سندنہ منفور اولدی ، او درجہ دہ کہ روسلردن بری مدحت اسمی
ایشیدنجہ استعاذہ ایدر و مشارالیہ اطالہ لسان ایلردی . اخیراً کوریلہ
جکی اوزرہ روس سیاست خارجیہ سنک مغلوبیتنہ بو ذاتک فکر شیطننت
و دسیسہ کاریسی سبب اولدیغنی سویلمک طریقہ اولسون مشارالیہک
مزیت و اقتدارینی دشمنلرمنز بیلہ تسلیم ایتدیلر .

— سيئاتك تشددى —

ولايتلرده تشدد عصيان — روسيه حكومتى — عثمانايلىر حقنדה
اوروپانك افكار عموميهسى — عصيانك بلغارستانه سرايتى وديكر
وقوعات — روسيهنك صربيه و قره طاغله اولان مناسبتى — پرنس
غورجاقوفك نوطهسى — بواثناده استانبولك احوالى — ينه سلطان
عبدالعزيز



استانبولده بو وقوعات جريان ايتمكده ايكن روم ايلیده کی عصيان
ايسه كتدكجه تشدد ايدوردی . بواثناده دارالعصيان بولنان هر سكه
بر مقدار امداد كوندرلمشديسهده اشقيانك آرقهسى بر درلو آلنه مديغى
شويله دورسون مقدار كفایهده بولنميان ، واورايه بورايه آتيلان عثمانلى
مفرزه لرى بر قاچ مغلوبيته دخى دوچار اولمشلردى . بوسبیدن نار
اختلال كتدكجه توسع ايدوردى . بوسنهك كليتلى قسمى سلاحه صا-
رلمشدى و كالماتانله محاربه يه كير يورلردى . عصيان اوزاد قجه يالكر صربيه
و قره طاغدن دكل روسيه دن بيله پك چوق افراد كلهرك اشقيايه
قارشى مقده بولنمشدى .

ايشك اك فنا طرفى صوك ماده ايدى .

يوقاروده ، روس ملتى « پان اسلاويزم » فيكرينه نقد طرفدار ،
و بومسئله سايه سنده اصل آرزو و مقصد فاسدلرى بولنان ماده ، ممالك
محروسه يى محوايتك نيتى اولديغنى سويلمشدك .

ایمدی روس ملتی هر سگده وقوعه کلن عصیانی دویار دویماز
 کوزلرینی آچدیله، درت الله بو ایشه صارلیدیله که اوتارینخدن اعتباراً
 روسیه ده نقدر غزته و ژورناللر وارسه جمله سی شرق ایشلریله مشغول
 اولدیله. یوما فیوما دارالعصیاندن، استانبولدن کلن تلغرافلر و اخبارات
 بتون افکاری اشغال ایتمکده و بو حال عوام ناسک بیله مباحثه سی
 اولمقده ایدی. بو حوادثلرک اکثریسی ایسه مخصوصاً تنظیم اولنان
 ترهاتدن عبارت اولوب ترکر طرفندن کندیلریله همجنسی اولان
 اسلاو قرنداشلرینه ایدیلهن مظالم حوادثلریله دولو ایدی. اوکونلرده
 نشر اولنان غزته لرک هر صحیفه سنده بو کی حوادثه تصادف ایتمک
 ممکن دکلیدی. مثلاً ترک باشی بوزوق عسکرلری فلان کویده یکریمی اوتوز
 حامله قاریلری کسه رک بونلرک چوجقلرندن کفته یاپوب یدکلری کی
 حوادثلر، اخبارات عادیهدن عد اولنوردی. هر غزته نک شرقه کوندر.
 دیکی مخبرلرک ویردکلری معلومات دخی باباسی کسیلن چوجقلر، چو.
 جقلری کسیلن آنالر، عرضنه تسلط ایدیلهن قیزلر حقنده ویریلهن
 اخباراتدن عبارت اولوب عموم وقوعات بشقه بررنمکده کوستریلیوردی.
 شبهه سز بواشناده روس ملتک بوسنه ده کی عصیانه درت الله صا.
 ریله رق کمال حرارتله بوایشلره مشغول اولمسنده بر حکمت واردی.
 بوده روسیه حکومتی بو زمانده شرقه دوغری بر تعرض ایتک استیور،
 داخلده وقوعه کلن بعض احوال دندولایی بو حرکتی کندی سیاستنه
 موافق کوریوردی.

روسیه حکومتی آرزوی حربه سوق ایتدیرن بر قاچ سبیلر اولوب

باشلوجہ سی ممالک محروسہ بی بوزماندہ پک ضعیف و پریشان گورمسنده،
ثانیاً قریم محاربہ سنده دولت علیہ یہ فعلاً معاونتدہ بولنان انکلاترہ
و فرانسه دولترینک احوال عمومیه لری بو هنکامده بر دخی بو کی
حرکاتہ مساعد اولمدیغی ملاحظہ سی ایدی . مع هذا اصل مسئلہ دخی
بو اولیوب روسیہ نك داخلندہ کی بعض احوال ، حکومتلری شو
حرکتہ تشویق ایدیوردی . شویله کہ :

سویلدیکمز تاریخدن بر قاج سنہ اول روسیہ ده نیغیلیست فرقہ سی
ظہور ایدرک بونلر اورتہ لغی قارمہ قاریشیق ایتکده ایدی . اہالی
و بالخاصہ طبقات سفلیہ دن معدود اولان عملہ ، چفتجیلردن پک
چوغی سالف العرض فرقہ افرادینک تشویقیلہ متعدد ولایتلردہ عصیان
ایدرک حکومتی تعجیز ایدیورلردی . مکاتب عالیہ ده بولنان طابہ دخی
تحصیللرینہ باقمیوب متعدد یرلردہ عصیاندن کری دورمیورلردی . کیت کیدہ
افکار عمومیه دخی بونکله اشتغال ایدرک بر چوق موادده حکومتدن
خوشنودسزلق کوستریوردی . بو اسبابدن دولای پترسبورغده بولنان
وکلا ، چار ، افکار عمومیه بی بشقہ طرفہ سوق ایتک استیورلردیکہ بو
اثناده بوسنہ ده ظہور ایدن عصیان ، تماماً بو مقصدہ خدمت ایدہ جک
مواددن ایدی . زیرا اہالینک بو عصیان واسطہ سیلہ حسیات حمیہ لری
قشقرتمق و بو صورتلہ نتیجہ سی ہر حالده کندیسچیون تہلکہ لی اولان
تشویش و معارضات داخلہ بی خارجه چویررک مملکتی داخلی اختلالدن
تخلیص ایتک ممکن ایدی . بناء علیہ مجرد شو ملاحظاتہ مبنی روسیہ
حکومتی خارجدہ کی سیاستی قارشیدرمقدہ اولدیغی کی کندی اہالیسنی

دخی طریق فاسد ایله ترکلرک اوزرینه یوکلتمکدن کری دورمیوب یواش یواش مملکت افکارینی تصور ایتدیکی محاربهیه حاضرلیوردی .

اوروپایه کلنجه : بوراده کی حکومتلر ، و اهالینک افکار عمومیه سی دخی ترکلره موافق دکلدی . واقعاً اوروپالیلر ، روسلرک شرقه قارشو بسلاکلری نیت فاسده لرینی ، و بوراده ظهور ایدن هر قاریش قالمده بونلرک پارمقلری اولدیغنی بیلیرلردی . فقط دیگر طرفدن ترکلرک و بالخاصه دولتعلیه اداره سنک نه کی حرکات ظالمانهیه مستعد اولدیغنه دخی واقف ایدیلر . بوندنماعدا بوزمانده اوروپاده نشر اولنان بر قاق مهم غزتهلر روسلر طرفندن صاتین آلمش اولدیغنی جهتله بونلرک ، ویردکلری اخبارات و بونلردن اقتباساً دیگر بیطرف غزتهلرک مندرجاتلری دخی روسیه غزتهلری درجه سنده دکل ایدیسه ده اوروپاده کی افکار عمومی ترکلرک علیهنده بولندرمغه کافی معلوماتی حازدی .

مع هذا بوهنکامده اوروپایی و بالخاصه دولتعلیهیه محب بولنان بر قاق خیرخوهانی مأیوس ایدن ، ترک دشمنلرینی کتدکجه سويندن بر ماده وار ایدیسه بوده ممالک محروسه ده کی اختلال داخلی کوندن کونه تشدد ایدرک تصور دن خارج بر رنک آلمقده اولدیغنی قضیه سی ایدی . قونت آندراسینک نوطی باب عالییه ویرلیدیکی زمان عصیان بوسنه وهرسکده ایدی . فقط کیت کیده بوراده کی عصیان ایکنجی درجه ده قالب روم ایلینک شرقنده وقوعه کلن اختلال اولکیسنی بصدرمق رنکینی ویریوردی .

بوزمانده طونه ولایتی داخلنده یرلشمش اولان کوچک و کیزلی

قومیت‌ه‌لر، بک‌رشده‌کی بیوک قومیت‌ه‌نک اراءه ایتدیگی طریقده بوراده
دخی شدتلی بر عصیان چیقارمغه اولانجه قوتلریله اوغراشیورلردی .
نهایت تاتار بازارحق، اوتلق کوی و فلبه جوارنده‌کی کویلر آیاغه
قالقوب قومشولری بولنان اسلام کویلرینه هجومه باشدیلر . بریکیلر بو
حالی کوررک جمله‌سی سلاحدیلر، بلغارلرک اوزرینه هجوم ایتدیلر .
نتیجه‌ده غلبه اسلاملرده قالمشیدیس‌ده بونلرک عصیان بصدرمقده
کوستردیگی شدت و معامله وحشیانه، قومیت‌لرک عصیاندن انتظار
ایتدیگی مقصده خدمت ایتش بولندیکه بونلرک فکرلری اهالی اسلامیه‌ی
آیاقلندررق بلغارلرک اوزرلرینه یوکتدروب بالطبع وقوعه کلسی مأمول
بولنان انواع‌درلو مناسب‌تسزلیکلردن اوروپایی خبردار ایتک و اورانک
افکار عمومیه‌سی ترکلرک علینده قالد‌رمق ایدیکه شو بلغار قتالند نصکره
مقصدلرینه تمامیه موفق اولدقلرینی سویامک فضل‌در .

بلغارستان بو مرکزده ایکن تخمیناً بو زمانده سلانیکده دخی دولت
ایچون هیچده مطلوب اولیان بر غائله ظهور ایتدی . اوراده عورتحصار-
دن سلانیکه کلن بر بلغارقیزی دین اسلامی قبول ایتک استمشدی .
فقط بوندولایی خرس‌تیانلرله مسلمانلر آره‌سنده منازعه چقدی . ایکی
طرفک هیچانی تسکین ایتک استیان فرانسز و آلمان قونس‌لوسلری
اصل‌سه غوغا آره‌سنده مسلمانلر طرفندن قتل ایدلدیکه بو وقعه اولجه
روسیه‌نک تشویقیله اوروپاده ترکلره قارشو وقوعه کلن غلیانی برقاق قات
تشدید ایدرک ذاتاً پک قلیل بر مقدارده بولنان صوک عثمانلی محب‌لرینک
دخی بزدن یوز چویرملرینه خدمت ایتدی .

شو وقوعات مؤسسه نك جمله سی روسلری سويندرمك ، آنلك
حركتلرینی تسهيل ايتمكدن كرى دورميوردی .
فی الحقیقه اورانك حكومتی ، زمینی فوق العاده مساعد بولمقلرندن ،
اویومیوردی . شمديلك كندیلرینی ایلری یه آتمق ، و روم ایلیده کی
خرستیان عنصرینك حمایه و محافظه سنی آچیقدن آچیغه اوزرلرینه آلمی
بعض ملاحظاته مبنی موافق کورمدکلرندن بو مقصد ایچون قره طاغ
و صربییه حكومتلرینی ایلری یه سورمكده ایدی . بو ایکی حكومت
بوسنه ده عصیان باشلار باشلامز سلا حاكمشیر ، هر احواله قارشو تدارك
حربییه یه تشبث ایتیشلردی . روس حكومتنك تشویقی اوزوینه صربییه
پرنسی میلان ، كندیسنه عموم خرستیانلرك حامیسی سوسنی ویرك بر
طرفدن حربه حاضرانیور ، دیگر طرفدنده باب عالی یه نوطه لر کوندرك
حكومتی تهدید ایدیوردی . بو خدمته مقابل روسیه دن کلیتلی اعانه لر
آلیوردی . مبادی احواله روسلر بورالر اعانه نقدیه بی کیزی کوند-
ریورلردی . فقط قونت آندراسینك نوطه سی ثمره سز قالدیغنی بهرانه
ایدرك آچیقدن آچیغه کوندرمكه باشلایلر . اردولرنده مستخدم ضا-
بطاندن بر خیلایسنی صربییه یه اعزامدن ، مملكتلری داخلنده نقدر
بیسز صاپسز طاقی وارسه كذا فدائی صفتیله اورایه کوندرمكدن كرى
دورميوردی . بو بریکیلرك جمله سی « پان اسلاويزم » قومیتهلرینك
حسابنه کلیتلی معاونت نقدیه آلدقدن سكره صربییه یه دوغری آقوب
کلیورلردی . بونلرك میانده بر قاچ سنه اول تركستان محاربهلرنده
كسب اشتهار ایتیش ، فقط سرکشلریندن دولانی آچیغه چیقارلمش

مشهور ژه‌نه‌رال چرنايف دخی وار ایدی .
مسئله شو صورتله دولته‌لیه ایچون کتدکجه فنا بررنک آلیوردی .
فقط بو زمانده بيله اوروپا-سیاسیونی ایشی صلحله بتیرمک امیدنده
ایدیلر . غریبی شودرکه روسلر بيله رسمی مخبرات ومذاکراتده صلحه
میال اولدقلرینی باغریورلردی . فقط ایشک دوغریسی شودرکه بریکیلر
ایشی مخبراته دوشیرک وقت قزانمق استیورلردیکه مجرد شو صوک ملا -
حظاته مبنی ، روسیه‌نک صلحپرور اولدیغنی کوسترمک اوزره اولوقت
روسیه خارجیه ناظری بولنان « پرنس قورچاقوف » باب‌عالی ایله
برکره ده‌ا مخبره‌یه کریشمک اوزره اوروپایی تشویق و بو خصوصی
اوزرینه آلمغه تعهد ایتدی . بناءً علیه بوهنکامده کرک اوروپا وکرکسه
کندی حکومتی نامنه باب‌عالیه بر نوطه کوندردی . « پرنس قور -
چاقوف » ک کوندردیکی نوطه‌نک محتویاتی اولجه قونت آندراسینک
تقدیم ایتدیکی نوطه‌دن چوق بر فرقی یوغیدی . یالکز تحریراتک نه‌ا -
یتنده « اکر باب‌عالی ایکی آیه قدر حال عصیانده بولنان ولایتلرک
تسکینیه اداره‌لرینی تنظیم و اصلاح ایتمزسه بویوزدن تولد ایده‌جک
فناغه میدان ویرلمک اوزره اتفاق مثلت تشکیل ایدن اوچ حکومت
یعنی (روسیه ، آلمانیه ، آوستریه) لازمکلن تدابیره مراجعت ایده -
جکلری » کی بر فقره وار ایدی .

ایمدی بو نوطه روسیه سیاسیوننک شیطنتلقلرینی و بالخاصه « پرنس
قورچاقوف » ک امورسیاسیه‌ده اولان مهارتنی آپ‌آچیق کوسترمکده‌در .
زیرا مذکور نوطه ایله بر طرفدن باب‌عالی‌نی تهدید ایدیور ، دیگر

طرفدن ولايتلارك تسکينيچون يالکيز ايکي ماه مدت ويريورديکه بونک ايله اوروپايه روسيه نك صاحپورلکني کوسترمک استديکندنماعدا بوآنه قدر اکمال لوازمات حربيه يه موفق اوله میان صربيه و قره طاغ حکو- متلرينه وقت قزانديروردی . يوقسه بو مدت ظرفنده تسکين اختلال اولور فکرنده دکلدی . ذاتاً اک زياده قورقديغی و استمديکي بوماده ایدی . چونکه يوقاروده دفعاتله سويلديکمز اوزره ممالک محروسه نك هر طرفنده کي پريشانيتدن بالاستفاده بو دفعه شرق مسئله سنی روسيه نك مقاصد خفيه سنه موافق بر صورتده حل اتمکک قرار ويرمشدی . کمال مهارت و متانتله بو مقصده چالشيوردی .

هر نه حال ايسه : روسلارك فکر و نيتلري بومرکزده ایدی . فقط نه فائده سی وارکه ! دولتعلیه اداره مرکزیه سنده کوندن کونه وقو- عه کلککده اولان احوال مؤسسه دخی آنلارك مقصد و آمالارينک اجرا سنه مساعدلی ، بوراده کي ايشلار لایقي وجهله جريان اتمککدن پک اوزاق ایدی .

يوقاروده ، صوفته لرك همت و غيرتاريه ، فناغه سبب مستقل اولان و روسلارك کورکورينه آلاتی بولنان وکلا طرد اولنه رق يرلرينه صاحب حميت برقاج ذوات مقام اقتداره کلديکني سويلمشدک . فقط سيئاتک اصل منشي بولنان ذات ، مقامنده اوطورمقده اولديغندن ، بويکي وکلانک حرکت و افعاللری دخی اداره يه و امور دولته حسن تأثير اجرا ايتديکي کورليوردی . فی الحقیقه بونلر مقامه کليرکلز برقاج تدابير معقوله ده بولنديار . مثلاً شو هنکامده عصيانده بولنان ولايتلره لزومی

مقدار عسکر کوندرلدیکی کی صربییه وقره طاغه قارشو دخی برطاقم تدابیر احتیاطکارانه ده بولونیدی، بوراسی دوغریدر. فقط بوکی تدابیرک تأثیری جزئیاتدن عبارت اولوب دونتعلیهنک بو دورده دوچار اولدیغی خستهلغه دوای قطعی اولمقدن اوزاقدی. چونکه دولتی سلامته چیقار- مق و بوائنده ممالک محروسه نك باشنه مسلط اولان بلالرك دفعیچون، متین بر اصلاحات مقتضیه ده بولمق لازم ایدیکه، آنجق بوسایه ده بلكه دولتی ضایعات عظیمیه اوغرامق سزین قورتاره بیلمک ممکندی. حالبوکه بوائنده مقام اقتدارده بولنان ذواتک احوال و موقعلری بوکی تشبثات جدیه ده بولمغه مساعد دکلدی. بونلر، یوقاروده بیان اولنان وقوعاتدن آکشلدیغی اوزره بولندقلری مقاملره طریق غیر مشروعه و احوال فوق العاده نك الجا آتیله کملر، و بوسبیدن سرایدن امین اوله میوب او طرفدن هر آن و زمان کلسی مأمول بولنان تهاکه دن خوف اوزره بولنیورلردیکه شو حال وکلای زمانک عموم حرکاترینه صورت قطعیه ده تأثیر ایتمکده ایدی. بونلرده موجود اقتدار و مزیات دولت و ملتیرینه قارشو بسلدکلری نیت خالصانه و مقصد خیر خواهانه لرینی اورته یه قویمغه چکینیورلردی. همان هر تشبثلرنده تردد و توسوس نمایان ایدی.

بوندنمعا صوفته لر وقعه سند نصکره استانبولده جریان ایدن احوال دخی بر طرفدن پادشاه دیگر طرفدنده وکلا ایله اهالینک بینلرینی تألیف ایده جک درجه ده دکلدی.

اهالیده سرایه قارشو تشدد ایتمکده اولان افکار کتدکجه فنا

بر دئك آليوردى !...

يوقاروده مطبوعات عثمانيه نك سلطان عز نك صوك دورلرنده نكدر
تضييق آلتنده اولديغنى سويلمشدك . بو حال معلوم اولان وقوعاته قدر
دوام ايتدى . فقط بو وقعه دنصكره مطبوعات عثمانيه بر درجه يه قدر
سربست نفس آله بيلدى . واقعا بوزمانده دخی سندسور نظامنامه سنك
احكامى كنديسى حس ايتدرمكدن كرى دورميورسده اسكى شدت
ودهشتى غائب ايتمشدى . وقعه دنصكره استانبولك تنفس ايتديكى هوا
بشقه ايدى . مطبوعات ايشلريله اوغراشان افراد مقام اقتدارده بولنان
بعض ذواتك كنديلرينك حاميسى اولديغنى بيلرلر و بوندولايى حكو-
مك شرندن قورقزلردى . بناءً عليه بوزمانده مطبوعات عثمانيه امور
دولت حقنده اولدجه سربست بيان افكار ايدر و احوال سابقه و حال-
ضردى تنقيد ايلمكدن كرى دورمزديكه وقوعاتى بيان ايتدكمز دورده
استانبول مطبوعاتنده بصيرت ، عبرت و سائر اساميسى معلوم اولان
جدى غزته لردنمعا عدا چايلاق ، ديوزهن كى اكلنجه غزته لريدخى
ميدان انتشاره قونلمشديكه مندرجاتلى خوش ، مستهزيانه فقط
معنيدار طرز لطيفده بيان افكار ايدر و بوسبیدن اهاليمزك پك چوق
خوشلرينه كيدردي . بر درجه ده كه بو نشریات اليوم خاطره ناسدن
چقمديغى معلومدر .

هر نه ايسه : مطبوعات بوزمانده كنديسنه مخصوص بر موقع
اخذ ايتديكى كى افكار عموميه يه تاثير ايتك نقطه نظرندن دخی غايت
اهميت كسب ايتمشدى . بو هنكامده مملكتده نكدر صاحب اقتدار

و حمیت و ارسه جمله سی بر چوق زمانلردنبری درونلرنده بسلدکری
 دردلری اورتیه قویورلر، وطنلرینک دوچار اولدیغی احوال مؤسفه دن
 زیاده سیله متأثر اوله رق فنا لگ اوکنی آلمق ایچون نه کبی فدا کارلق
 لازم ایسه اجراسندن چکنمیه جکارینی آپ آچیق کوستریوردی .
 بونلرک شدت لسان و عداوتلری بالخاصه وکلای سابقه یه ایدی . هرکون
 محمود ندیم و عونیه سنه لعنتلر یاغیوردی . بو شرککتک دولته لیه یه ویر -
 دیکی ضرر، بالخاصه مقام صدارتک روس سفارتیه اولان مناسبتلری
 استانبول خلقنه بتمزتوکنز سرمایه مباحثه اولمشدی !...

حال بویه دوام ایدوب دوریوردی . فقط استانبول اهالیسنده
 موجود غلیان افکار آره سنده پادشاه زمانک حیثیت و موقعی دخی
 کتدکجه تزلزلاته اوغرامقده ایدی . واقعاً مطبوعات ، پادشاهک
 شخصنه تعرض ایتمیوردیسه ده ، محمود ندیم اداره سنه ایدیلن تعریضلر،
 اک صکره بوذاته راجع اولدیغنی بیلمیان کسه یوقدی . اهالی وزیرک
 اداره سنه مخصوص اولان سیئاتک کلیتلی قسمنی پادشاهک امریه ،
 هیچ اولمزسه رضاسیه یاپلادیغنی بیلمز دکلدیلر . خصوصاً والده
 سلطان علیه الشان حضرتلربنک بر چوق چرکین ایشلره قارشیدیغنه
 واقف ایدیلر . بوسبیدن سرایده بولنانلرک جمله سی اهالینک لسانه
 کلشدیلر . عایهلرنده سویلنمین سوز یوقدی !... اشته صوفته لر وقعه -
 سندنصکره استانبولک حالی بو مرکزده ایدی . فقط بو زمانده
 اولسون ، ذات شاهانه متیقظ و متنبه اوله رق ، عموم حرکتده معقول
 بر طریق آرامش اولسه ایدی ، ملت عثمانیه افرادینک کندی

پادشاهلرینه قارشو همیشه بسلاکری صداقت معلوم اولدیغی جهتله
بلکه فبالغک اوکنی آلق ممکندی ، فقط اويله اولمدی .

عبدالعزیز صوفته لر وقعہ سندنسکره بيله احوال عمومیه یی تقدیر
ایدرك شخصنك معروض اولدیغی تهلاکیه یی برطرف ایتک ایچون بر
طریق سلامت بخشا اختیار ایده جک قدر اقتدار کوستره مشدر .

برطاقم خیال و تصوراتله عمر کچیرر و جریان ایدن هیچ بر وقو-
عادن متنبه اولیه رق خاطرینه کلن بی اساس مقصدلری تعقیب ایدر دورر
ایدی . حتی بویله بر شورش زماننده بيله اسکی حالنی تبدیل ایتیه رك
کندوسنه دشمن عد ایتدیکی شیخ الاسلام و صدراعظمه دائماً بارد
معامله لرده بولندیغی حالده اسکی دوستلری اولان محمود ندیم و ایغنائیه ف
ایله مخابره یی زیاده لشدرمشدی . بو حالک اوزون مدت دوام ایده
بیلیمسی ممکن دکلدی . بر چوق فداکارلقله وجوده کتیریلن موفقیانک
پادشاهک بر اراده سیله زیروزبر اولسی ممکن ایدی . باخصوص
پادشاهک وقعہ دنسکره کی اطوار و حرکتی بر چوق وکلانک پک بیوک
تهلاکیه معروض بولندیغی کوستردیکندن هرایکی طرف ایچون پک
آغیر اولان شو حاله نه صورتله اولورسه اولسون بر نتیجه ویرمک ضرور-
ری ایدی . صوک و قطعی بر حرکتیه احتیاج حس اولنیوردی !...




— سلطان عبدالعزيزك خلعي —

و

بوکا دائر بعض ملاحظات

خلع سلطان عبدالعزيز حقهده بعض ملاحظات — خلعي قوه
عسکريه ايله موقع اجرايه کتورمکه قرار ویرلديکی — سليمان وردیف
پاشالر — تشبثات خلعدن صدراعظم و شيخ الاسلامک امتناعلری
و صکره بالرضا موافقتلری — قیصرلی احمد پاشا و دیکرلری — وقعه
کیجه سی محمود ندیم پاشا، ژنه رال ایغنا تیه ف و سلطان عبدالعزيز —
خلع کیجه سی بشکطاش طرفی — سليمان پاشانک مکتب حربیه یه موا-
صاتی و بونک طرفندن ضابطانه ایدیلن نطق — مکتب حربیه نک
بشکطاش سراینه حرکتی — مواصت حسین عونى پاشا و تشبثات
خلع — سليمان پاشانک دائره سلطان مراده دخولی — سلطان
مرادک طیشاری چیقمه دن امتناعی — احوال سلطان عبدالعزيز .



عصر اخیرک وقایع مهمه سندن بریسیده سلطان عبدالعزيز خلعي
مسئله سیدر . حالبوکه تاریخ عثمانیده بر موقع مهم اشغال ایدن شو
مسئله ده فاعل مطلق بولنان ذوات ، مسئله مذکور نک میدان کلمسنه
سبب اولان بعض وقایعی کیزلمک مجبوریتنه بولندقلرندن اشتراك ایدن
سائر ذواته لزوم کوردکلری موادی بیلدیرمکه قالمشدر . بونک ایچوندرکه
وقوعات بزدن پک اسکی بر زمانده اولمديغی و حتی کوزيله کورن

و بالذات اشتراك ايدنلر حالاً بر حیات بولندقلری حالده بعض مواد مهمه یی لایقی وجهله میدانہ چیقارمق ممکن اوله میور و بوسیدن عمومیتله معلوم اولان بوفاجعه تاریخیه نك بعض تفرعاتی الیوم مجهول قالمقدن، و بناء علیه بر مؤرخه بك بیوك مشكلات ویرمكدن کری طورمه یور.

مثلاً: بر روایتہ کوره [*] صوفته لرك قیامی کونی اھالینك اداره عزیزیه علیه نه بسلدکری عداوتی کورن مدحت و حسین عونى پاشالر حضراتی، حمیت عثمانیه لری معلوم اولان بر قاچ افراد خرسیتانییه یی ده ایشه اشتراك ایتدیره لرك اسلام، روم و ارمنیلردن مرکب بر جمعیت واسطه نیله خلع مسئله سنی میدانہ کیتورمکی دوشونمشلر. و حتی بعضیلری ده بونی تا کیداً، قیام ایچون مایسك طقوزنجی جمعه کونی مناسب کورلدیکنی و مرکز اجتماع دائماً غلبه لك اولان نورعثمانیه جامع شریفی انتخاب اولنهرق، یوم مذکورده جمعه نمازینی بعدالادا طوغریجه باب عالی یه یورینه لرك اصلاحات جدیه یی متضمن پادشاهدن اراده سنییه طلب ایدلمسی و رد اولندیغی تقدیرده یکچری دورلرنده اولدیغی کبی پادشاه زمانك خلعتی و وارث مشروع بولنان شهزاده مراد افندیك جلوسنی اعلان ایتمه که قرار ویرلدیکنی روایت ایدرلر. بزبوروایتی رك ایتمه مکله برابر پلانك موقع اجرایه وضعی ایچون مذاکره اولنمق احتمالی اولدیغنی ده حقیقته یقین اوله رق قبول ایدرز. فقط، خلع پادشاهی کبی غایت مهم بر ایشده اھالینك مطلوبه موافق سوق و اداره سی مشکل اوله جنی، بلکه ممنون اوله میه جنی تجارب

[*] بو روایت اعتماد اولنه بیله جك ذواتدن منقولدر.

متعددده و تاريخيه ايله ثابتدر . ثانياً بوكي وقايعده غايت مهم و موفقياتي
انتاج ايدە جك چارە يكانه محافظه اسرار اولوب بوايسه ممكن اوله -
ميه جغندن بهمه حال موقتاً اغفالى الزم اولان ذوات ايشه آگاه اوله -
جقلرى شبهه سزدى . بويله زمانلرده جزئى بر خطانك وقوعى مقصد
اساسى ي و پك چوق ذواتك حياتى تهلكيه القا ايدە بيليردى .
ثالثاً خريستيان تبعهك ايشه قارشى يكنظرده فنا دكسهده وقوعاتك
توليد ايلديكى فكر پریشانيدن طولاي اهايمز بيننده پك چوق قيل
وقال ميدان آله جنى كى خلعدن صكرده معترض فرقه لك انه صلاح
شورش ويرلمش اوله جقدى .

احتمالكه نورعثمانيه جوارنده اجتماعى قرار كير اولان جمعيتك
اجراى فعلياتى خصوصنه سالف العرض مواددن طولاي تشبث اولنيه رق
انقلاب ، هيئت وكلا و عسكر واسطه سيله اجرا اولمشدر . چونكه
بو صورتله حركتده فاعللر ، وقوعى ملاحظه هر دورلو تهلكه دن
مصون بولندقلرى كى ايجابنده بو صنفك حمايه سنده بولنه رق جريان
احواله كوره سرعتله حركت ايتك و وقوعات اثناسنده فنالق ظهور
ايتديكى تقديرده قولايلاقله اوكنى آلمق ممكن ايدى . باخصوص اسراره
يالكلز امرای عسكر يه دن بر ايكي كشى كسب وقوف ايدرك هيچ
بر شيدن خبرى اولمقسزین امره امثالاً مقصدك اجراى ايچون
چالیشان قوت ايسه بعدالانقلاب نه ياپدقلرىنى آكلایه بيله جكلردى .
هر نه ايسه : نهايت خلع و انقلابك عسكر واسطه سيله وجوده
كتورلمسنة قرار ويرلدى ؛ فقط اول بول وقت قزانمق ايچون سرايى

اويونۇق جەتتى دوش-ونىلدى . بومقصدك حصولى ايچون صوفتەرلر
طرفندن سرايه دفعا تله تشكرنامهلر يازلدى ؛ صداقتدن انحراف اولمىيه .
جغنه دائر يمينلر ايدلدى ؛ اهالى يى انتظارده بولنديرمق ايچون
دورلودورلو حوادثلر اشاعه ايدلدى ؛ بوبجران آره سنده مقصداسا .
سينك حصولى تعقيب اولندى !...

هر نه قدر انقلاب و خلع مسئلهسى مدحت پاشانك فكرندن تولد
ايتىش و افكار عموميه مشاراليهك تدابير دورانديشانه سيله سوق و اداره
اولنمقده ايدىسه ده ايشه بر كره حسين عونى پاشا اشتراك ايدنجه حسب .
الموقع مقصدك حصولى ايچون مشاراليه عونى پاشانك هر كسدىن زياده
فاعل وقعه اولمى امور طبيعیه دن ايدى . زيرا سرعسكر بولمىسى منا .
سببيله عموم عسكر تحت امرنده بولنديغى كى كار كذار ، مقتدر ،
حميتلى بر چوق امرای عسكريه دخى كندىسنى پرستش ايدرجه سنده
سورلر ، اوامرينه از دل و جان منقاد بولنورلردى . ذاتاً بواثناده
استانبولده مواقع مهمه يى اشغال ايدن امرای عسكريه پاشانك
تربيه كرده لرندن بولندقلرى جهتله ولى النعمتلىرينك آغزندن چيچه جق
امرك انفازىنى جانه منت بيليرلردى . فضله اوله رق اولجه عرض
ايتديكمز اوزره مشاراليه هر دورلو معناسيله بر عسكر اولديغندن
اردولرده اطاعت و انتظام عسكرى يى يولنه قويىش ، اعتبار و نفوذ
شخصيسنى امرای موجوده يه احساس و القا ايدرك عثمانلى اردولرنده
او دورلرده وزمانمзде كوروليان بر موقع مستثنا احرار ايلمىش ايدى !..
مع هذا شوراسى محققدر كه : حسين عونى پاشا ، نه قدر بيوك بر

موقعه بولنورسه بولنسون ، خلع پادشاهی کبی بر امر عظیمی یالکز
باشنه وجوده کتوره مزدی . امرادن بر قاجنك معاونت مادیه و
معنویه لرینه محتاج ایدی ؛ بونك ایچون استانبولده عسکرلک عالمنده
حائز اهمیت بعض ذواتك معاونت لرینی تأمین ایچون کندی لرینی جلب
و تشریک لازمه دن ایدی . بولردن برنجیسی مکتب حربیه ناظری
مشهور سلیمان پاشا ایدی .

کیم نه دیرسه دیسون ، سلیمان پاشا علم و فضلیله اودورده اثبات
وجود ایدن امرانك عمومیه فائق ، دولت و ملتی ایچون خدمات
عظیمه ایفاسنه مقتدر بر ذات فضائلسمات ایدی . حسین عونى پاشا
مرحومك مکتب تربیتندن یتشمش ، حمایه محقنه مظهر اوله رق ترقی
ایلمش ایدی . مشارالیه فرط ذکا و فعالیتله مفطور اولدیغی جهته
زمانجه تحصیل ممکن اوله بیان فنون متنوعه ده و بالخاصه تاریخده
احراز قصب السبق ایتش ایدی که سلیمان پاشانك آثار متروکه جدیه سی
الآن اهمیتی غائب ایتمه مشدر .

مشارالیه حضرتلری امور دولته دخی حائز کمال بولندقلرندن
دولت علیه نك عصر لردنبری سیئه سنی چکمه کده اولدیغی سوء اداره نك
اسباب حقیقیه سنی کاهی حقها بیلیر و او نسبتده اصلاحات عاجله نك
حیز فعله کلمسی ایچون چالیشیردی . روس محاربه سند نصره کرفتار
اولدیغی فلاکت مؤلمه حقائق مسروده نی کمالیله اظهار و اثبات ایتمشدر .
بو ذاتك اوزمانلر بر چوق دشمنلری بولندیغی کبی الآن دخی بعض
خصمسی موجوددر . بولر مشارالیه دن انتقام آلتی ایچون

يالان سويلمكدن ، كنديسنه افترا ايتمكدن چكنديلر ؛ پاشايه اسناد اولنان — حركات عسكريه ده — بعض قبايحي تصديق ايتمكه برابر فلاكت معلومه سنك بونقائصدن ايلرو كلديكنه قانع دكلز ؛ منورالافكار ذوات اعدادندن بولمسي ، خلع مسئله سنده مهم بر رول اوينامسي ، سرايك آمال فاسده سنه قربان اولوب كتمسني انتاج ايلمشدر .
شمدي بونیده کچه لم !

حسين عونى پاشانك ، هر حال و طورينه كووهنديكى ذات سليمان پاشا ايدى . خلع مسئله سنده مشاراليه تشويقه احتياج يوق ايدى ؛ چونكه كوز او كنده بولنان سيئات اداره يى كوريور ، فرط حميتي حسييله جداً متأثر بولنيور ، مظالم و استبدادك بر آياق اول اوكى آلتمسي لزومنى هر كسدن زياده تقدير ايدىوردى .

سرعسكر پاشايه بو خصوصده معاونت ايدن ، اعتمادينه مظهر اولان ذواتك ايكنجيسى ايسه شوراي عسكرى رئيسى رديف پاشا ايدى . بو ذات على روايه اقتدارينى بولنديغى متعدد خدمات مهمه عسكريه ده اثبات ايتمش و بوسايله ده تفيض ايلمش ايسه ده سليمان پاشا قدر حميت مليه سى بولنديغى وقوعات متعاقبه مرتبه بداهته ايصال ايدر . رديف پاشا غايت منفعته پرست ، اقبال و راحتنى هر شيدن اول دوشونور ، مرتكب ، اوصاف ذميه يى جامع بر ذات ايدى . وقعه يه اشتراكى ، خلع مسئله سنده درعه ده ايتديكى وظيفه نك اهميتى انكار اولنه مامقله برابر بونى رديف پاشانك حميت مليه سنه عطف ايتمكدن زياده حسين عونى پاشانك حائز بولنديغى نفوذ شخصيه يه

اسناد ايلمك حقيقتە دەا موافقەدر .

بوايىكى ذات وقعه كوني حسين عوني پاشانك اك بيوك معاونلىرى
اولمىشدر . كندىلرينه وقت وزمانىلە تەلىمات لازمە ويرلىش ، خدىمتلىرى
تەيىن اولمىشدر . بعض امارات و علائمە باقىلىرسە قوياً ظن اولنە بىلىركە
وقعه ايىدن اىيە تقرب ايدىنجىە قدر يعنى براىكى كون اوليسنە دكىن
امراء سائرەدن هيىچ بريسنە بوايشە دائر برشى آچىلماشمىشدر ؛
ذاتاً بوكا احتياج دىخى يوق ايدى . سركارده بولنان امرای عسكرىە
كندىلرينە مربوط اقسام عسكرىە يى ، حركتلرندن مقصدنە اولدىغى
كىمەسەيە سزدير مكسزىن اىستىدكلىرى نقطەيە سوق و نقاط مطلوبە يى
الده ايدە بىلىرلردى .

سلطان عزيزك خلغنەدە اك بيوك اهميتى حائز اولان جەت عسكرىە
بو صورتلە تامين ايدىلد كدىنصكرە وقعه يى سەولتە ميدانە كتورمك اىچون
خصوصات سائرەيە تشبث اولندى كە باشلىجەسى بالادە بيان اولنان
طلبة علومك قيامى سايە سنده مقام صدارت و مشيخته كچىرىلن محمد
رشدى پاشا ايلە خيرالله افنديك ايشە تشريك ايدىللىرى قضىە سيدر .
مترجم رشدى پاشا ، كوشك طبعىتلى بر ذات اولدىغىدن دائماً
سائر وزرانك اطوار و حركتنە تبعيت ايدردى . اساساً اداره قديمە
مروجى اولمقلە برابر متانت فكريە اصحابىندن اولدىغى جەتەلە عقلاً
كندىسندن قوتلى اولانلرك تاثيرينە مغلوب اولوردى . كندىسنك
حميتى غير منكر ايدى . فقط دولت عليەك او زمان اىچندە يوزدىكى
سيئات ادارهك او كنى المى اىچون وجودى مقتضى مزيت و اقتداردن

محروم ایدی . آرقه‌سنده نه ایستدیکنی بیلن برکیمسه بولندیغی
حاله اونک دلالت مرشدانه‌سنی قبول ایده‌جک قدر منصف بر وزیر
بولندیغی جهته مقامنک حیثیتی محافظه‌یه مقتدر اولوردی .

مشارالیهک مسئله‌خلعه اشتراکه نه صورتله ارضا ایدلایکنه دائر
معلومات قطعیه مفقوددر . مسئلهنک ایلك مذاکره‌سنده اظهارتردد
ایتدیکی صکره مدحت و علی‌الخصوص حسین عونى پاشانک تهدیدی
اوزرینه روی‌رضا کوستردیکی جمله‌روایاتدندر .

صدراعظمک مسئله‌مذکوره‌یه اشتراکی نه درجه الزم ایسه بوکی
انقلابلرده موقع‌رسمیسی هپسینه تقدم ایتمکده اولان شیخ‌الاسلامک ،
خلعی تصویب و یاردم ایتسی ده‌ها مه‌مدر ؛ چونکه انقلابک مشروع
اولدیغنی عالمه کوسترمک ایچون مقام‌مشيختک فتوی و یرمسی عصر-
لردنبری عادت جاریه حکمنه کیرمشد .

خیرالله افندینک خلع مسئله‌سنه اشتراکی ، احباسندن بریسنه
نقل ایتدیکی اوزره شو صورتله واقع اولمشد :

مقام‌مشيخته کچدکن صکره برکون مجلس وکلا مذاکراتنک
ختمانده مدحت پاشا کن‌دیسنی ، بر طرفه چکه‌رک مسئله‌نی
آکلاتیر و بو خصوصده رأینی صورار . ذات‌مشيختپناهی اسرارک
کن‌دیسنه افشاسندن گرفتارخوف و خشیت اولمش ایسه‌ده پاشانک
تصورنده بولنان حادثه‌نک لزوم و احتیاجنی مدلاً ایراد و عبدالعزیزک
سیئاتی یوزندن دولت‌علیه‌نک دوشدیکی خطر‌عظیمی اثبات ایتسی اوزرینه
اوده اوپله بر پادشاهک خلافتدن سقوطنک مشروعیتنی انکار ایده‌منه ؛

یالکز خلع مسئله سنک موفقیتله موقع اجرایه وضعنده کی مشکلاتی ،
 عکسی صورتده ظهوری ملحوظ تهلکه یی ایلرو سورهرک بو فکر دن واز
 کچلمسنی توصیه ایدر . سوزلرینک مدحت پاشایه تأثیر ایتدیکنی
 کورونجه هیچ اولمزسه مسئله نك تأخیر ایدلمسی ، اطرافلیجه تدقیقه
 وقت براقلمسی خصوصنده اصرار ایدر ؛ بونک اوزرینه آریلیرلر !..
 بر قاچ کون صکره ینه باب عالیده حسین عونى پاشا ایله محمد
 رشدی پاشا مسئله یی کندیسینه آچهرق مذاکره یه کیریشیرلر ،
 کندیسندن قطعی بر جواب ایستدکلرینی آکلاتیرلر . خیرالله افندی
 بودفعه ده قطعی بر جواب ویره مز ، غایت مشکل بر موقعده قالیر .
 نهایت وقعده دن ایکی کون اول بر آقشام یاتسودنصکره مکتب
 حربیه ناظری سلیمان پاشا قوناغنه کلیر ، آیروجه براوطه یه چکلدکن
 صکره کندیسینه هیئت وکلانک سلامنی تبلیغ ایدر ، مسئله معلومه یه
 دائر قطعی بر جواب ایستر ؛ ایضاحات ضمننده کافه ترتیباتک حاضر
 اولدیغنی ، وقت کچورمکسزین تصور خلعک فعله کتورلمسینه قرار ویرلدیکنی ، یالکز
 باب مشیختک فتواسنه لزوم قالدیغنی سویلر . مشارالیه ینه اعتراض ایدرک
 ایشی تأخیر ایتک ایسترسده سلیمان پاشانک : « افندی حضرتلری ،
 آرتق ایش ایشدن کچدی ، شو دقیقه ده بر چوق محترم باشلر بر
 دائمی تهلکه ایچنده بولنیور ، بونلرک حیات وسلامتی افندمزک
 النده در . » دیمسی اوزرینه حقیقت حالی آکلایه رق سلیمان پاشانک
 تقدیم ایتدیکی مضبوطه یی تمهیره مجبور اولور ؛ ایکی کون صکره مقام
 فتوادن منظور انام اولان فتوا صادر اولور .

هانكى دورده اولورسه اولسون ممالك عثمانیهده وقوعه كلن بيوك انقلابلرده تاثيركلىسى اولان مقام مشيخت دخى بوسورتله خلع مسئله سنه تشريك ايدلدى ؛ او طرفدن هيچ برتهلكه قالمدى .

مع هذا بورايه قدر اسملى ذكر اولنان ذواتك اشغال ايتدكلرى مواقع نه درجه مهم اولورسه اولسون ايشه ممانعت ويا ايقتاع مشكلات ايدى بيلملى ملحوظ بعض ذواتك اهميتلى دخى دركار بولمغله كندىلرينه مراجعت ضرورى حكمنده بولمش ايدى .

بونلك برنجيسى بحريه ناظرى قيصرلى احمد پاشا ايدى . بو ذوات اطوار مردانه مالک امراء بحريه آره سنده حميتيله تميز ايتمش ، ضا - بطان بحريه القاء نفوذ و حرمت ايلمش بر فرد كامل و محترم ايدى . او دورك سيئاتى عليهنده بولنانلردن اولديغى ايچون روس سفيرى ايغنايهف و عونهنسك بغض و عداوته هدف اولمش ايدى . حميتندن بشقه هيچ بر قصورى اولديغى حالده دشمنلرينك ان تريقه ليله ايكي دفعه استانبولدن تبعيد ايدلمش و او كونلرده محمود نديم پاشا ايله بيلرنده كي منافرتدن طولايى اوچنچى دفعه اوله رق تبعيد ايدلك اوزره بولمش ايدى . مشاراليه حضرتلى وقعه يه ايلك اشتراك ايدنلردندر . بواثناده جريان ايتمكده اولان احواله كسب وقوف ايدن ديكر ذواتك موجوديتى دخى شبهه سز ايدى سهده بونلك كيم اولديغى لايقيه تحقيق ممكن اوله ميور . اجبار زمان ايله بر چوقلى كندىلرينى كيزلمكه مجبور اولدىلر . يالكر سلطان مراد خامس حضرتلرينك باشكاتبلى اولوب بر قاق سنه اول ويانه سفارتنده ايكن اتحار ايدن سعدالله پاشا ايشك

مبدأندن منتهاسنه قدر بولمیشدر.

ایشته سلطان عزیز دورسلطنتک صوک کونلرنده احوال وکلا بومرکزده ایدی. طبقه بالاده پادشاهک خلعنه قرار ویریلهرک تدابیر لازمهیه ماهرانه تشبث، افکار ناس دخی تمامیه دکلسهده زمانمزه نسبت قبول ائیمیه جک درجهده سربست اولان مطبوعات واسطه سیله انقلابه احضار اولنیوردی.

بو حالک نتیجه سی اوله رق او هنکامده استانبول هواسنده بر بحران عظیم حس اولمغه باشلادی؛ هرکس اندیشه انجام ایله مشوش. الافکار، متهیج الوجدان ایدی. او زمانه قدر استانبولجه مجهول عد اولنه بیلن مباحثه لر جریان ائیمکه، مدحت پاشانک، ژون ترکلرک همت و غیرتلیله قانون اساسی مباحثی جمعیتلرده دوران ایلمکه باشلامش ایدی که آفاق اداره مزده ظهوره کلن بو تبدل ناکهانی، افکارناسی بسبتون شاشیرتیوردی، یالکز بر نقطهده عموم ناس متحد الافکار ایدی که اوده بو حالک چوق زمان دوام ائیمیه جکی قضیه سی ایدی!.. بو ائناده سلطان عزیز نه حالده، نه فکرده ایدی؟...

قطعی اوله رق دیه بیلیرکه هیچ برفکرده دکلدی، اورتهده جریان ایدن احوال دن بی خبر، کندی عالمنده وقت کچیریوردی. افق اقبالنده طوپلانا قره بلوطلردن بوشانه جق اولان سیلابه انتقامک کندیسنی زیروزبر ایده جکنی بیلمیوردی. مسلکندن، مشربندن، شخصندن متنفر ذوات کتدکجه دائرة محاصره لرینی کوچولتمکده، اطرافنی آهنین سد لرله قوشاتمقده ایدیلر!... بی تاب و توان قالان بیچاره پادشاه نه

یا به بیلیدی؟...

خنگارک لطف مخصوصنه مظهر اولان، عثمانلیلری کندی ملتک
سعادتنه فدا ایدن محمود ندیم پاشا و سفیر ایغنا تیهف جنابلری نروده
ایدیلر؟...

محمود ندیم پاشا: وقعه کیجه سی بر معتاد اطرافنه انتخاب کرده سی کنجلی
طوپلایه رق بر بزم نوشا نوشده، اذواق طرب و شادی به مستغرق ایدی.
سفیر جنابلری ایسه بر چوق خفیه لری بولندیغی حالدده هیچ بر شیدن
خبردار اولمیه رق مسافرلری نمسه سفیری قونت زیچنی، یونان سفیری
رتوفیس ایله بر ماصه ده کاغد اوینامقده و ایرتسی کونی علی السحر
وقوعه کله جک انقلاب خیری خاطرینه بیله کتیر مامکده ایدی.

شو حال سلطان عزیز و عونہ سنک او کونلرده نه درجه کران
بر خواب غفلته مستغرق اولدقلرینی پک کوزل ارائه ایتدیکی کبی
انقلابی اداره و اجرا ایدنلرک دخی مرتبه تبصر و مهارت لرینی علناً
اثبات ایدر. اغیاره هیچ بر شی سز دیر مکسزین هر شی حاضر لائش
و استبداده بر ضربه مهلکه اورمق ایچون یالکز آن حرکتیه انتظار
اولنیوردی.

مایسک یکرمی طقوزنجی کونی هیچ بر شیدن خبردار اولمیان
پادشاه بر ایش ایچون حسین عوننی پاشایی سرایه دعوت ایتدی. پاشا
خسته لغنی بهانه ایدرک کتمدی. فقط بود دعوت کندیسنی اور کوتدی.
اتفاق خفی بی کشف اولندی ظن ایدرک اورایه بورایه خبر یوللادی.
هان او کیجه تصور خلک قوه دن فعلا چیقمنه متحداً قرار

ویرلدى . بونىكله فاجعه نىك ايلك پرده سى آچیلدى !

۱۲۹۳ سنه سى جمادى الاولنىك یدنجى بازار ایرتسى کیجه سى
 قراکلق برکیجه ایدی ؛ براز یاغمور یاغیوردی ؛ بوغازدن شدتله
 اسمکده اولان روزکار دکزی جوش و خروشه کتیرمکده ، امواجک
 ساحله هجومندن متولد اصوات شهرک های و هوینی بلع ایلیمکده
 ایدی .

کرك اوکون ، کرك اقشامی طولمه باغچه سراینده اوکیجه بیوک
 بر وقعه تاریخیه تحت ایده جکنه دائر بر اماره یوق ایدی . بشکطاش
 جوارى عمیق بر سکوته مستغرق ، سرای بر معتاد مشغول
 هوسات ، جوار قره قوللری لاقید ایدی ؛ ظاهرده هیچ بر یرده
 خلاف معتاد بر حال کورونمیوردی . فقط اورته لغی دقتلیجه معاینه ایدنلر
 اقشامدن براز اول سوریه دن قره طاعه سوق اولنه جق عسکری
 حامل اولان اوچ قطعه کمینک طورمقده اولدیغنى کوریپورلر ایدی .
 بوسفینه لر اقشامدن براز صکره کیده جکلرمش کبی آهسته آهسته
 بوغاز ایچنه طوغری ایلرولمکه باشلا دیلر ؛ سرائک حذاسنه کلنجه طور دیلر ؛
 روش احوال دن بر شیئه منتظر اولدقلری آکلاشیلیوردی .

سرایه حاکم تپه لرده کی قشله لرده دخی جالب دقت بر حرکت
 کورولیوردی ؛ مکتب حربیه شاهانه ده طلبه بر معتاد اقشام طعا-
 منی ایتدکدن صکره یوقلمه یه چیق دیلر ، اوچ کره « پادشاهم چوق

پاشا « باغریشدیلر ، بعده طاغدیلر ؛ کیجه آلاترقة ساعت اوچده یات بوروسی ووردی ، هر کس یتاغنه چکلدی ، قغوش نوتجیلری کفایالسابق کزینمکده ایدیلر .[*]

ساعت بش راده لرنده بك اوغلی جهتمدن کلن بر آرابه مکتبک قپوسنده طوردی ، ایچندن اوزونجه بویلی بریسی چیقهرق ایچرویه کیردی ، وضعیت عسکریه لریله سلامه طوران قپو نوتجیلرینه رسم سلامی ایفا ایله ناظر اوطه سنه طوغرلدی ، کندوسنی استقباله چیقان ایکی ضابطی یاننه آلوب اوطه یه کیردی ؛ قاپوونی چیقارنجه کیم اولدیغی آکلاشدی . بویله کچ وقت ، خلاف معتاد کلن ذات مکتب حربیه ناظری سلیمان پاشا ایدی .

پاشا مقامنه اوطورنجه یاننده کی ضابطلره برشی سویلدی ، بونلر درحال چیقدیلر ، مشارالیه حضرتلری دخی درین بر تفکره طالیدی . آرهدن اون دقیقه کچمدی ، اولجه پاشا ایله بولنانلردن بری اوطه یه کیرک « حاضر درافندم » دیدی ؛ بو ذات مکتب حربیه امراسندن میرآلای احمد بك ایدی . پاشانک اشارتی اوزرینه قپونک ایکی قنادی آچیلدی ؛ تخمیناً ایچری یه کیرن اون بش قدر ضابط پاشانک ویردیکی امره تبعاً علی مراتبهم اوطوردیلر ؛ اک صکره کیرن احمد بك قپوی قپادی .

[*] مکتب حربیه وقعه سی ، سلیمان پاشانک معیت خاصه سندن اولوب او کیجه جریان ایدن احوالی رأی العین مشاهده ایتش اولان و الآن برحیات بولنان بر ذات عالیقدرک آغزندن ایشیدلمشدر .

سليمان پاشا بونلری برر برر نظر امعان ايله کوزدن کچوردی ،
هپسی تعلیمه حاضر لاش کبی کینمش ، عمومی سلا حلاش ایدی .
ناظر پاشا ، ضابطانک بر قاچنه بعض شیرلوردی . دیگرلریله
قونوشدی ؛ نهایت او طلاق محیره بیانی اعماق وجدانندن قویوب
کلن آواز اشتکای روحیله مزج ایدرک متأثرانه بر لسان ايله اکثریسی
شو طرزده اولق اوزره مستمعلرینه خطاباً شو یولده سوزه باشلادی :
« آرقداشلر !... دولت و ملت بو کیجه سزدن بیوک ، مقدس
بر خدمت ایستیور ؛ بازوی همکزدن بکله دیکی بو وظیفه دن استنکاف
ایده جک اولورسه کز ، دولتمز منقرض ، ملتیز مضمحل اوله جق ؛
کور ییوسکزه خارجی دشمنلر من هر طرفدن باش کوستردی ؛ عنایت
ربانی ايله سایه حمیده آنلره مقاومت ممکن ، فقط خصمهای داخلیه بی
نه یاپه جغز !.. پادشاهمز زمام اموری اک بیوک دشمنمز اولان روسلرک
النه تسلیم ایتدی ، ایغنائیه ف استانبولده فعال لما یزید کس یلدی .
اول ، باب عالی مز واردی ، بوکون باب عالی ، روسیه سفارتخانه سی اولدی .
ایش بو قدرله ده قالمدی ، بزه دخی قاریشمغه باشلادی . هر آن بیوک
امرامز ، کارکنار رجالمز ، مقرر سلطنتدن تبعید اولنیور . بو حالک
دوامی معاذ الله تعالی مرکز خلافت اسلامیته نک روس النه دوشمنی
انتاج ایده جکدر ، ذاتاً دشمنلر مرکز مقصدی ده بودر . بز تکمیل
بو فناءلقره سبب اولان پادشاهه ایشدن ال چکدیر ملی یز ، بشقه بر چاره
نجات متصور دکدر . پامال حقارت ایدیان وطن ، وادی اسارته
سوق اولنمقده اولان ملت ، سزک همت و حمیتکزه حصر امید ایش

سزدن استمداد ایدیور . »

دیدیکی زمان ضابطانك، آغلامق درجه سنه گلش بولنان پاشانك كال سوز وكداز، یأس و تظلم ایله ایراد ایتدیکی حقایقه دقته مجاللری قالمایمش اولدیغندن، هپسی فرط هیجانلرندن نظر بر زمین اوله رق كوز یاشلرینی ضبط ایتك ایچون جبر نفس ایدیورلردی . پاشا دوام ایله :

« ایشته بوکی اسباب مجبره نك الجاسیله وكلا، علما، رجال دولت سلطان عزیزك خلعه قرار ویردی . بن شمدی اونلرك مجلسندن کلیورم . خدمتك اك بیوکی بزه حواله ایتدیله . بحریه لیلر دکردن، طاش قشله وجوارنده کی عسکر ردیف پاشانك قومانداسنده اوله رق قره دن، بزده بورادن طوغری سراهه کیدرك ایجاب ایدن حرکته بولنه جغز . » دیه نطقنه نهایت ویرنجه ضابطان، هپ بر آغزدن : « حاضرز، کیدرز، حتی ایجاب ایدرسه بو اوغورده جانمزی بیله فدا ایدرز ! » دیه باغریشدیلر، هپسی آیاهه قالدیلر، پاشا ایله اشارت ایتدی . احمد بکی یانه چاغردی، ایکسی ده ساعتلرینی چیقاره رق بر بریله قونوشدیلر . پاشا ضابطلره خطاباً : « هایدی ارقداشلر بوروی بکله بیکز » دیدی .

ضابطلر ناظر اوطه سندن چیققدن براز صکره احمد بك نوتجی بورازانی یانه آله رق مکتبک حولیسنه طوغری ایلرولدی، نفره « قالق بوروسنی چال » امرینی ویردی . بورو سسی ایشیدیلر ایشیدیلمز ذاتاً حاضر بولنان ضابطلر درحال دیشاری فیرلادیلر، قغوشلرده قالق آوازهلری ایشیدیلدی، یکی اویقویه وارمش اولان افندیله علی المعجله کیندیله، تفنکترینی آله رق چیققدیلر، بواثناده

حولینک اورتہ سنده احمد بك ، افندیلری نظامہ کتورمک ایچون
یوکسک سسلہ امرلر ویریوردی ؛ اون بش دقیقه صکرہ کورولتی
کسیلدی ؛ عموم طلبہ صف حربہ کیرمش ، ضابطان یرلی یرنده
بولنیوردی . « حذایہ کل » ، « صای » قومانداسی ایشیدیلوردی ،
بواثناده سلیمان پاشا او طہ سندن چیقدی ، احمد بك مشارالیه
یناشہرق امر آلدی . براز صکرہ مکتب حربیہ طلبہ سی احمد بك
قومانداسی آلتندہ ، طابور قول نظامندہ مکتبک آرقہ سندن ، کموش
صوبی قشلہ سی او کندن سس سس صداسز ایلرولمکده ایدیلر . نہایت بوصو-
رتلہ طولہ باغچہ سرایی میدانہ چیقلمزدن اول طابور طور دیرلدی . یالکز سلیمان
پاشا ، احمد بك ، دیگر بر قاق ذات میدانہ طوغری ایلرولدیلر .
بونلرہ قارشو دخی اورادن ایکی اوچ ذات کلدی . بونلر ردیف پاشا
ایلہ معیتی ضابطانندن بر قاقی ایدی . پاشالر بر بریلہ یواش یواش
قونوشدقن صکرہ ایکسی برلکده ساحلہ کیدہرک اورادن دکر
اوزرنده اوزاقدن نہ اولدقلری ایوجہ فرق اولنہ میان نقطہلرہ باقدیلر .
کوردکلری شیدن اودرجه ممنون اولمایدرلرکہ او طرفی براقوب طوپخانہ یہ
کیدن جادہنک باشنہ کلہرک اورادہ دیکلدیلر . قالدیلر . آزدن چوق
وقت کچامش ایدی کہ او طرفدن کلن بر قاق سواری ایلہ محاط بر
بر آرابہ یہ قوشدیلر . بو ذات سرعسکر حسین عونى پاشا ایدی .

سایمان و ردیف پاشا بر مدت سرعسکر ایله قونوشد قدن صکره
 بشقه بشقه طرفلره کیتدیلر؛ چوق کچمدی. مکتب حربیه طابوری
 بولندیغی سوقاقدن میدان کله رک صف حربیه دیزیلدی. شورادن

بورادن یواش یواش قوماندالر ایشیدلمکه ، قسم قسم حرکت اولمغه باشلادی . سلیمان پاشا ایله احمد بک افندیلرک بر قسمی سراپک ریختمنه دیزدیله . میدانلق ایله قپو جهتی دخی کوزلجه تحت محافظه آندی . بشکطاش جامعنه کیدن سوقاغه عسکر اقامه اولندیغی کبی قپولره دخی قوتلی مفرزه لر قونیلدی . یارم ساعت ظرفنده سراپک هر طرفی عساکر مسلحه ایله قوشادلدی . سوقاقلرده عسکر دن ماعدا فرد آفریده یه تصادف اولمئیوردی . آره صره ضابطان دن بعضیلری آرابه یه یناشه رق حسین عونى پاشایه معروضاتده بولنیورلر ، او امر لازمه بی تلقی ایتدکدن صکره درحال قوشه قوشه عودت ایدیورلردی .

بر ساعت صکره سلیمان پاشا یننه بش آلتی ضابط آله رق طولمه باغچه سراپک اوتیه طرفنده بولنان قپولردن بر یسنه یناشدی ، قپوی چالدى . آچیلیر آچیلمز ایچرو کیردی . قپوجیلر طیشاریده کی آوازه لردن ، و بر قاق ضابطانک ایچرو کیرر کیرمز بلا توقف حرم دائره سنه طوغری کیتملرندن ، اورکمشلر ایسه ده وهله وقوعه کلن شو خالدن شاشیرمش قالمش اولدقلرندن سسلرینی چیقارمه مامشلر ایدی .

پاشا حرم دائره سنه کلنجه اوراده کی قپوی دخی آچدیروب ایچرییه کیردی . حولیده کورولتیدن اویانان بر قاق حرم آغاسی بولنیور ، کوزلرینی سیله رک آلیق آلیق اطرافه باقییورلردی . پاشا بونلره وقت برافه قسزین : « شهزاده حضرتلرینه سویله ییکز ، کندیلرینه مهم معروضاتم وار ، بنی درحال حضورلرینه قبول بیورسونلر » دیدی . حرم آغالری ایچرویه قاچدیله . براز صکره یوقاروده قاری باغریشملى ،

آغلاشملي ايشيدلدى . كلن كيدن يوق ايدى .
 ضابطاندىن بر قاجى يوقارى چيقلمسى فېكرىدە بولنديلرسەدە
 سليمان پاشا برازدها بىكلەنيلمىنى تەسب ايتدى . فقط آرەدن خىلى
 مدت كچدىكى حالده كىمسە كىدىكى كورونجه يوقارى چىقمىغە مجبور
 اولدى . بواثناده حرم آغلارندن بر قاجى كلەرك شەزادەنك چىقمق
 اىستىدىكى سويلدىلر . سليمان پاشا « ايش مەمدر ، تأخير قبول ايتمز ،
 مردم وارد ، قورقاسينلر ، بورادە كىلر صادق بندەلرنددر ، كندىلرى
 چىقمىلرسە بندەلرنى ايجرويه قبول بىورسونلر ، بەمە حال كندىلرنى
 كورملىم . » دىە اصرار ايدىنجه ديوانخانەنك يان طرفندەكى اوطەيە
 كىتورلدى . شەزادە قىودن كىردى . سليمان پاشا براى بيعت ياننە
 تقرب ايدرك عموجهسى سلطان عبدالعزىزك ملت و وكلا طرفندن
 خلع اولنديغنى و كندىسنك تخته جلوس ايتدىكى كمال اخلاص
 و صداقتلە تبشير ايتدى .

سلطان مراد حضرتلرى بر مدت طورغون بر حالده قالب هيچ
 جواب وىرمىدى . بواثناده دىكر اوطەلردە قادينلر باغرىشورلردى .
 قىونك اوتەسندە و يقيندە بولنان برىسى هم « بونلرخاندر . اينانمە ، سنى
 طيشارى چىقاروب اخانت ايدە جكلر » دىيور ، همدە آغلایور ايدى .
 سليمان پاشا بونك والده سلطان اولديغنى تفرس ايله قىويه تقرب
 ايدوب امنيتنى جلب ايدە جك بعض سوزلر سويلدى ؛ يواش يواش
 سس كسىلدى . مع مافىە پادشاه حضرتلرى سرايدن چىقمق خصوص
 صندە بر قاج دفعە اظهار تردد ايتش ايسەدە سليمان پاشانك طلاق

معلومه سیله اداره لسان ایتمی کندیلرینه امنیت بخش اولوب کوچ
خال ایله طیشاری چیقماغه موافقت بیوردیلر. بواثناده دخی والده
سلطانك غلیان شفقت مادرانه ایله « یاوروم مرادم!... » دیه حضرت
پادشاهی قوجاقلامسی اوراده بولنانلری آغلایمش ایدی. سلیمان پاشا:
« قورقمايك، برشی یوقدر، بو کوندن اعتباراً پادشاهمزدرد. » دیه
خنكارك قولتوغنه کیروب مردیوندن آشاغی ایندیردی!....

قیودن چیققدنصکره میدانلغه متوجهاً کیدرکن سلطان مراد
ایله سلیمان پاشایان یانه کیدیورار، دیگر ضابطانده کیروندن تعقیب ایدیورلردی.
بیچاره پادشاه نره یه کوتوردکلرینی بیلمکسزین تلاشله یوریور،
واغزینی بیچاقلر آچیوردی. بواثناده یکی شفق سوکمهکده اولدیغندن
اورتهلق خیلیدن خیلی به قراکلق ایدی. سرائك اوکندهکی میدانلقده
آرابه ایچنده بکلهین سرعسکر پاشایه، پادشاه حضرتلرینك کلکده اولد-
قلری خبری ویریلنجه، مشارالیه درحال آرابه دن اینوب خاقان نوجاهی
بالاستقبال کندیلرینه بیعت ایتدی. کمال ادب و احترامله وقوع حالی
محملاً بعض معروضاتده بولندی. او اثناده برای بیعت باب سرعسکریده
تشریف هایونه منتظراً اجتماع ایدن وکلانك، رجالك، علمايك اسعاف
مسئولانی رجا ایتدی. بونك اوزرینه سلطان مراد حضرتلری براز
مستریخ اولوب استانبول جهتنه تشریف بیوره جقلرینی فرمان بیور-
دیلر. حسین عونى پاشا امرایه اوامر لازمه یی بالاعطا، دعوت سذیه یه
بالامثال مواجئه هایونده اخذ موقع ایلدی. یاورلر، سواریلرله محاط
اولان آرابه سرعتله طوپخانه یه طوغری حرکت ایتدی.

بزرگه لم بچاره سلطان عبدالعزیزه :

مکتب حربیه طلبه سی سرای میداننه کلد کد نصکره بر طاقم مفرزه-
لره تقسیم اولنه رق نقاط مناسبه نك محافظه سنه مأمور ایدلشدی . اك
زیاده اهمیت ویریلن نقطه لر سرایك محافظه سنه مأمور قره قوللر ایدی ؛
اوراده کی عسکر دن ، علی الخصوص ضابطلردن چوق اندیشه اولنیوردی ؛
چونکه بونلرك اکثریسی بالذات عبدالعزیزك لطف دیده لری و هر کون
کوزی اوکنده بولندقلری جهته سلطان عزیزه صداقت کوسترملری
مظنون ایدی . حالبوکه وهله صورت ماهرانده کنیدی لرینه ایدی لن
تعرض ، امکان مدافعه بی سلب ایدی . قره قوللرك ضبطنه مأمور بولنان
ضابطلر اوراده بولندقلری عسکره « سلاح یره ! » قومانداسنی ویرنجه
عسکرلر نه اولدیغنی آکلایه میهرق در حال سلاحلرینی یره براقیدیلر .
اوراده کی ضابطلردن بر قاقی ایضاحات طلبنده بولنق ایستدی لر سه ده
امرک اجرا سنده تعلل کوسترنلرك کوکسلرینه روولورلر طیآنجه حرکتدن
عاجز قاله رق تسلیم اولدی لر . مع هذا بونلردن بعضیلرینك صالیویرلمسی
مناسب کورولیه رك تحت الحفظ دیکر بر محله نقل اولندی لر .

سرایده بواثناده دخی ظاهراً هیچ بر حرکت مشاهده اولنمیور-
دی ؛ مع مافیه سلطان مراد حضرتلرینك دائره سی خلقنك اوتهیه
برییه قوشوشمه لری سلطان عزیز دائره سنه دخی اورته ده برشی جریان
ایتدیکنی حس ایتدیرمشدی . خدمه کاملاً اویقودن اویاندی ؛
طیشاریده کی کورولتیلرك نه اولدیغنی آکلامق ایچون پنجره دن باقه رق
سرایك دائرأماندار عسکرله قوشادلمش اولدیغنی کورونجه ایشك ماهیتنی

آکلا دیلر؛ حقیقت حالی آغزدن آغزه حرم هایونه قدر عکس ایتدیر.
دیلر، یالکز عبدالعزیز خبردار ایتکه جسارت ایده مدیلر.

سلیمان پاشا سرائیک اوتہ طرفندہ سلطان مراد حضرتلرینی چیقار.
مقلہ مشغول ایکن سلطان عزیز دائرہ سنک محافظہ سنہ و او طرفدن
وقوعی ملحوظ حرکتک اوکفی آلمغہ ردیف پاشا مأمور ایدلمشدی.
ردیف پاشا، سلیمان پاشا وظیفہ سنی اتمام ایدنجیہ قدر سرائیک هر
طرفنی قوشاتہ رق نہ ایچرودن خارجه برکیمسہ براقدی، نہ دہ طیشا.
ریدن سرائیہ آدم صوقدی. بالذات سرائیک سلاملق دائرہ سنی مرکز
اتخاذ ایدرک بر طرفدن ضابطانہ اوامر لازمہ یی اعطا ایدرکن دیگر
جهتدن بر طاقم وسائلطہ ایچرودہ نہ یاییلمقدہ اولدیغنی خبر آلور ایدی.
اوکیجه سرائی نوبتیسی بولنان یاوران و مابین طاقنی ترصدہ آلدی،
بونلرہ کیفیتی آکلاتدی. کندیلرندن بکله ن صدقت ولی نعمتلی
اولان پادشاهی محافظہ ایتمکدن عبارت اولدیغنی سویلدی، امرینک
خلافتدہ جزئی بر حرکتدہ بولنان اولورسہ درحال اشد مجازات ایله
تأدیب ایدہ جکنی بیلدیردی. بونلر ذاتاً بویله تہلکہ لی زمانلردہ صدا.
قتلرندہ ثبات ایدر طاقدن اولمدقلمری جهتله دیزلرینک باغی چوزولدی،
هیچ برندہ شق شفہیہ قدرت قالمدی.

بواننادہ سلطان عبدالعزیزک نہ حالده اولدیغنه دائر معلومات قطعیه
مفقوددر. یالکز شورامی محققدرکہ تکمیل سرائی خلقی حقیقت حالہ
مطلع اولدیغنی حالده عبدالعزیز هر شیدن بیخبر ایدی، خلع اولندیغنی
ایلیک اوکجه والدہ سلطان ایشیتمشدر. سلطان مراد ایله حسین عون

باشانك حرکتنى متعاقب آتیلان طوپلرک کندیسنی حقیقت حالدن
خبردار ایتدیکنی ده ادعا ایدنلر واردر. اغلب احتمالله کوره بو صوک
روایت صحته ده قریبدر: چونکه عبدالعزیزک مقربیندن منقولدرکه
پادشاه ده ایتاقده ایکن طوپ سسلرینی ایشیده رک عددانداختک
حریقه مخصوص اولان مقداری تجاوز ایتدیکنی کورونجه کال تلاشله:
« بو طوپلر جلوس طوپی اوله جقدر. » دیدیکی مرویدر. [*]

صوک


[*] سلطان عزیز مرحومک عاقبت حاليله صورت وفاتی بیلمک ایستهین
ذوات کرام، دردست طبع اولان « تاریخ سلطان مراد خامس » نام اثر
عاجزییه مراجعت بیورملری توصیه اولنور.

خطا و صواب جدولی

مصرده ترجمه بر کتاب طبع ایتدرمک ایچون لازم کلن کافهٔ وسائط موجود ایسه ده مرتبلك همان اکثریسی لسانمزه واقف اولمقلرنندن حین طبعده دقت ونظارت شدیدۀ متمادیه ایجاب ایدیور . بزایسه دیگر مشغولیتلرمزدن طولانی شوجهته حمصروقت ایتدیکمزدن کتابمزدۀ خلیجه سهویات ، ضروری اوله رق قالمشدر . اک مهملری شونلردر :

صحیفه	سطر	خطا	صواب
۱۰	۲۱	تکلیف	تألیف
۱۱	۱	مخصوص	محصول
۱۴	۲۱	جتیه	جهتیه
۵۶	۱۸	مشروعی	مشروعی
۶۳	۱۳	ایدن او وقت	ایدن قاترینه او وقت
۱۰۶	۲۱	اولمئوردی	ویرلمیوردی
۱۱۹	۱۸	کورکلری	کوردکلری
۱۴۲	۱۳ و ۱۴	ملت	ایله ملت
۱۵۳	۱۴	علی پاشا	عالی پاشانک
۱۷۵	۲۱	اوپالیلری	اوروپالیلری
۱۹۴	۲۱	ممنون	ممکن

شو خطالردن ماعدا ديگر بعض ياكلشلقاردها وار ايسهده بونار
عبارهي تغير ايتديكندن قارئين كراممزه ارائيه لزوم كورمديك .



To renew
call 292-3900

[illegible]

HIGHSMITH 45-220

10 89 126 0503 1 141 PS

7303

MAIN STACKS

